


Esuquidistu Chuiquin  
Tantiamete



New Testament in Matsés (PE:mf:Matsés)

# Esuquidistu Chuiquin Tantiamete

## New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 25 Nov 2022 from source files dated 29 Jan 2022  
446da786-5bd1-5ffa-85e2-9eff4052cf8b

## Contents

Mateyon Dada uaid . . . . .	1
Madcosën Dada uaid . . . . .	81
Ducasën Dada uaid . . . . .	128
Uanën Dada uaid . . . . .	205
Esus Chuibenequidon Naid . . . . .	263
Doma yacnocquidon Iste . . . . .	332
Codinto yacnocquidon Iste 1 . . . . .	369
Codinto yacnocquidon Iste 2 . . . . .	400
Cadasia yacnocquidon Iste . . . . .	419
Epeso yacnocquidon Iste . . . . .	433
Pidipos yacnocquidon Iste . . . . .	444
Codosas yacnocquidon Iste . . . . .	452
Tesadonica yacnocquidon Iste 1 . . . . .	460
Tesadonica yacnocquidon Iste 2 . . . . .	467
Timoteyon Iste 1 . . . . .	471
Timoteyon Iste 2 . . . . .	481
Titon Iste . . . . .	488
Pidemonën Iste . . . . .	493
Ebedeyon Isadaidbon Iste . . . . .	495
Santiacon Dada uaid . . . . .	518
Petedon Dada uaid 1 . . . . .	527
Petedon Dada uaid 2 . . . . .	537
Uanën Dada uaidëmpi 1 . . . . .	543
Uanën Dada uaidëmpi 2 . . . . .	551
Uanën Dada uaidëmpi 3 . . . . .	552
Udasën Dada uaid . . . . .	554
Esusën Uan Ismiaid . . . . .	557

## MATEYON DADA UAID

*Esuquidistun tsusedpabotedi chiaid  
(Duc 3.23-38)*

<sup>1</sup> Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

<sup>2</sup> Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. <sup>3</sup> Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. <sup>4</sup> Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. <sup>5</sup> Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. <sup>6</sup> Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

<sup>7</sup> Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. <sup>8</sup> Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. <sup>9</sup> Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. <sup>10</sup> Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. <sup>11</sup> Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

<sup>12</sup> Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic. <sup>13</sup> Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. <sup>14</sup> Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. <sup>15</sup> Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. <sup>16</sup> Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

<sup>17</sup> Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi.

Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

*Esuquidistu tishaid*

*(Duc 2.1-7)*

<sup>18</sup> Nëbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. <sup>19</sup> Usundoacsho isun abi inuequidën Osen dada utsin chudaïd danec: —“Nëbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

<sup>20</sup> Adnubien Nuquin Papan abi yacnoshon uaidën mayan bëdan Ose ushqin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquio icquin Nuquin Papan Mayanën Madia bacuë usundomiaye. Dacuëdenda. Dacuëdenquio icquin Madia min shubuno buanta. <sup>21</sup> Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquio iquendac,” quequin Esus cuënta —quequin mayan bëdan Ose ushqin ismepac caondash.

<sup>22</sup> Aden mayan bëdan Esus tishte chiacpadomboen Nuquin Papan ambi chiaïd naden dada uamepampic.

<sup>23</sup> “Dadan inacmaidëmbi bacuë usundoshon dada bacuë tishendac. Aidi Imanued cuëmendac.

‘Nuquin Papapadquidquibidi matsesbëd tabadnuec choash nec,’ quequin Imanued cuëmendac.”

quequin Esus tishte Nuquin Papan dada uamepampic.

<sup>24</sup> Aden mayan bëdan chiac isucunshumbien aidën chiacpadomboen Osen aton shubuno Madia buampac caondash. <sup>25</sup> Buanshun Osen chudenquio icnubi dada bacuë tishpac caondash. Tishacsho Esus cuëmpac caondash.

## 2

*Uispa isquido Esus isec choaid*

<sup>1</sup> Nidaïd Udeya caïd yacno tabadquin shubu daëdpactsëcquid Beden caïd yacnoshon Esus tishpac caondash. Adnubien shubu dadpen icquid Edusaden caïd yacno isadaïdbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin <sup>2</sup> anocquido chuituidpac caondash. —Min matses isadaïdbo chuiquid dapa ictequidquio nëbi tishtsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bëdamboshë ictequid nec,” quiash aid isnuec chopobi —quetuidpac caondash.

<sup>3</sup> Adsho tantiasch dacuëdcuededpac caondash abitedimbo. —Padtec. ¿Midapadquid bacuë nependabac? —quecuededpac caondash Edodes isadaïdbo ancaquid ambi ancaïdobëdi. <sup>4</sup> Adshumbien Edodesën abi yacno tsusiobo cho-chomepac caondash. —¿Mitsicquid caique? Tantanu —queshun abi yacno Moisesën dada yampid chuibanquido abi chuiquid dapabobëdta cho-chomepac caondash. Cho-chomeshumbic:

—¿Mitsishunquo Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: <sup>5</sup>—Ai, tantiemi. “Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac,” quiampicpademi tantiemi. Nuquin Papan ambi chiaid nuquin tsusedpa dada uamepampic naden. <sup>6</sup> Shubu daëdpactsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmen-dac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

<sup>7</sup> Adoquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantianu —cac chuisho <sup>8</sup> tantianshun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

<sup>9</sup> Adoquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec. <sup>10</sup> Adsho isashien cuishonquepac caondash uispa isquido. <sup>11</sup> Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidedi menepac caondash. Adoash ushtopac caondash. <sup>12</sup> Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquo yec podqued utsin nidpac caondash aton shubuno nidec.

### *Equipito yacno Osen buanaid*

<sup>13</sup> Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

<sup>14</sup> Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash. <sup>15</sup> Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid

chuiبانquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindami,’ quïosh Nuquin Papa,” quequin Nuquin Papan chiaid dada uapampic.

*Bacuëbo dadpen cuesun siatanaid*

<sup>16</sup> Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadtsëccquid comapenec onquecuenabi ictsëccquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash. <sup>17</sup> Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

<sup>18</sup> “Abi yacnuësh aton bacuëbo nibëdansho isash isadaidbon chidobo sedenqueuededendac.

Unësaid tantiec baded ënëdenquio yec sedenquebudnendac,” quequin chiampicpadomboen aton bacuëbo nibëdamepac caondash.

<sup>19</sup> Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. <sup>20</sup> —“Bacuëbo cuesun siatan,” quiondaid unëssacchoshe. Min chido min bacuëbëdta buanec min nidaid Isadaid caidën nidoata —caquien <sup>21</sup> isucunanec aidën chuibocno buanec nidpac caondash.

<sup>22</sup> Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquiobidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushë. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. <sup>23</sup> Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

### 3

*Uan acten mentoanquidën chuibeniaid*

(*Mad 1.1-8; Duc 3.1-9, 15-17; Uan 1.19-28*)

<sup>1</sup> Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. <sup>2</sup> Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. <sup>3</sup> Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden. “Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiacbimboen: ‘Nuquin Icbombo choeque.

Icsaid ënash bédamboec tabadta, ' quequin chuibenendac, " quequin Isayasën Uanën chuite chuiampic.

<sup>4</sup> Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tspiantebic nidaidën capuquid yua bitsi nacnenaïd tsiupondash. Aton pete bacumbëd shiashbimboecquid icpondash. <sup>5</sup> Aidën Nuquin Papan chiaïd chuibenesho tantianuec nëïdtedi matses cho-chopac caondash. Nëïdic shubu dadpen icquid Edusaden caïd yacnocquido. Nëïdic nidaid Udeya caïd yacnocquido. Nëïdic acte Odan caïd cuëman tabadquido. Aidtedi cho-chopac caondash. <sup>6</sup> Cho-choshon Uanën chuïsho tantiash: —Nuquin Papan chiaïd niacniaquec icsapobi. Icsaboedi aid tantiec bédamboec tabadtiadquïo iquebi —qesho: —“Nëïd Nuquin Papa tantianu,” quequid nec —quequin acte Odan caïdën mentopac caondash Uanën.

<sup>7</sup> Adnubien padiseyobobëd saduseyobo Uan isec cho-chopac caondash. Padiseyobo isadaïdbo tsusedpabon chiaïd namequido nec. Saduseyobobic: —Matses unësaid uincuenquïo iquendac —quequido nec. Aïdo cho-choso isun Uanën: —Nisibimboecquido mibi nec. Adquïdën icsa uachimboen matses icsa uaquïdo mibi nec. Bédambo icquid damianquïec mibi iquec. “Nuquin Papan mibi cuidnushe. Tantiatan,” quequin ¿tsuntsin chiac cho? <sup>8</sup> Mentomete bunec Nuquin Papan chiaïd niac-niacboedi ënash bédamboec tabadta. <sup>9</sup> “Ëbipadquid Abadauanën tsyuecquïdoidtsëqui Nuquin Papan bédamboen isec,” quequin tantienda. ¿Adquïdta Nuquin Papan bédamboen ispec? Abadauampadquid abi tantiaquïdien Nuquin Papan bédamboen isec. Mimbi bédamboen tantiatipimbo icsa isun nëïd cuënotëbi matses uashun Nuquin Papan Abadauampadquid abi tantiaquïdombo icmetsïash icnushe. Nuquin Papambo tantiata. <sup>10</sup> “Icsambo icquid nec,” qeshun ambi nitsinaïd cuëta bacuëesa dëdshun nëdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chïec.

<sup>11</sup> Adshumbic padpiden chuïquin Esusën nate chuïpac caondash. —Nuquin Papa tantianuequïd acten mentobanquin chuïbanquïd nebi. Padnuen con tsyuecquïd choshon aidëntsen chuïbanendac. Ëbi bëdiactsëc tantiaquïd ictsëcnuc aidquïen comapenen tantiaquïdquïo yec bédamboshë iquendac. “Aïdquïo bédamboshë icquid icnuc ¿atotsïeshun icsaquïdquïobi: ‘Aïd choec,’ quequin chuïquïdquïo Nuquin Papan ëbi icmeposh?” quec tsadebi. Ëmbi chuïboed choshon: “Ëbi tantiaquïd nec,” qeshun aton Mayan menequin bédamboec tabadte mibi tantiamendac. Abi tantiesaboen cuidendac. <sup>12</sup> Piacbo choeshashun putu bushcaquin secacimboen abi tantiesabo chïan anëdënquïacno nësecaindac. Adshumbic abi tantiaquïdo abëdi tabadmendac —quepac caondash Uan acten mentoanquïd.

*Uanën Esus mentoaid*

(*Mad 1.9-11; Duc 3.21-22; Uan 1.32-34*)

<sup>13</sup> Acte Odan caïdën matses mentoec adpac caondash Uan. Adnubien Uan yacno Esusquïo chopac caondash. Aton nidaid Cadidia caïd yacnuësh tauamboen matses ismenuc choec: —Ëbitsen mento —quetuidpac caondash. <sup>14</sup> Adshobien Uanën: —Padenquïo iquëmbi. Nuquin Papan chomiaïd icquin mimbibi ëbi naquïen bédambo ictsïash. ¿Atotsïeshun ëbi aden chïe? Padi —qeshobien: <sup>15</sup> —En na. Bédambo



iquec. Ĕbi mentoquin mimbi Nuquin Papan chiacpadomboen natsiaque. Ĕbi acten mento —quesho tantiashun Esus acten mentopac caondash Uanĕn.

<sup>16</sup> Adoac Esus pudundonobien canchedacimboec abu shĕcuĕ yampac caondash. Adsho isaquien aid shĕcuĕ yacnuĕshquio dĕbimbimboec budec Nuquin Papan Mayan Esusquio matsadtopac caondash abĕd icnuec.

<sup>17</sup> Adnubien abucuĕshquio Nuquin Papa onquiampac caondash. —Nĕid ĕmbi tantiaidquio con Mado nec. Ĕmbi chiacpadomboen nasho isash bĕdambo iquebĭ —quepac caondash Esus caic.

## 4

### *Satanasĕn Esus icsamenuequin tanuidaĭd* (*Mad 1.12-13; Duc 4.1-13*)

<sup>1</sup> Uanĕn acten mentobocshobien Nuquin Papan Mayanĕn masiuid-pambo yacno matses nibĕdacno Esus nidmepac caondash. —Ma Nuquin Papa chieshĕnquid Satanasĕn Esus icsamenuequin ma tanu —quequin ambo nidmepac caondash.

<sup>2</sup> Adoaquien buna mĕmunquin penquio yec Esus tsadpac caondash. Inchĕshĕn ushĕ abentsĕc nidmiash utsi tashquecuntsĕcnuc 40tedec ushquin penquio yec comapenec bumpac caondash. <sup>3</sup> Bunec tsadshobien Satanasĕn istuidpac caondash. Istuidtanquimbien: —ĔNuquin Papan Madombobida mibi neque? Aidĕn Madombo icquin nĕid cuĕnote cain: “Pete icta,” cata —caquien <sup>4</sup> Esus: —Padi. Nuquin Papan chiaĭd dada uapampid nad iquec. “ĔPeteuidi tantiecta matses bĕdamboec tabadpec? Nuquin Papan chiacpadomboenuidi naiquien matses bĕdamboec tabadtsiash,” quequin dada uapampid iquec —quepac caondash Esus.

<sup>5</sup> Adsho tantiashumbien shubu dadpen icquid Edusaden caĭd yacno buanshun Nuquin Papa tabadte shubu uashunaid macano Satanasĕn Esus manidtomepac caondash abucquio. <sup>6</sup> Adotanguimbien padpiden chuioaquin: —ĔNuquin Papa caidĕn Madombobida mibi neque? Aidĕn Mado yec nĕuĕshquio pudunta. Nuquin Papan mibi paĕdmenquio ictis Ashe. Nadentsen Nuquin Papan chiaĭd dada uapampic.

“‘Uĭdĕn uata,’ quequin ambi abi yacnoshon uaido mayan bĕdabo Nuquin Papan chiac mibi uĭdĕn uaindac paĕdenquio icnuc.

‘Cuĕnoten tadquĕdnushe,’ qeshun adoendac,”

quequin Nuquin Papan chiaĭd dada uapampique. Pudunta —caquien <sup>7</sup> Esus: —Padi. Nuquin Papan chiaĭd dada uapampid nad iquec. “‘ĔIcsamboen tantiaquin ĕmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

<sup>8</sup> Adoaquien Satanasĕn padpiden buanquin macuĕsh dapa abucquiocquid manidtomeshun nidaĭd abichobi Esus ismepac caondash. Chuiquid dapabotedi ismequinc aidobĕd icquido ismequinc aidon dayun uaidtedi ismequinc capac caondash. <sup>9</sup> Adoshombic: —Nĕidtedi mibi menetsiambique. Ĕbi con icbo cata. Ĕbi aden chuiquin ismenuen danĕshĕn sebudta. Adsho isun ĕmbi ismiactedi mibi menembi. Aidĕn icbo mibi icmembĭ —caquien <sup>10</sup> Esusĕn: —Padi. Baded cuenta. Nuquin Papan chiaĭdquio chuiquin naden dada uapampique. “Nuquin Papa abentsĕcquĭobi mimbi tantiaiduidtsĕqui min Icbombo neque. Aidĕn

namiaidquo icta,” quequin dada uapampique. Cuenta —capac caondash Esusën. <sup>11</sup> Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abédi tabadquin Esus bédambo icmepac caondash.

*Cadidia yacnoshon Esusën chuibeniaid*

(*Mad 1.14-15; Duc 4.14-15*)

<sup>12</sup> Adashic aton nidaid Cadidia caidën Esus nidpac caondash. — Mibi acten mentonaid Uan bedshun quënën nauedac caosh —quesho tantiash nidpac caondash. <sup>13</sup> Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. <sup>14</sup> Esus ambo tabadte chuiquin Nuquin Papan con tsusedpa Isayas cuëmédquid dada uamiampicpadece ambo tabadpac caondash Esus. Naden dada uapampic.

<sup>15</sup> “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

<sup>16</sup> Aidtedishun Nuquin Papan chomiaid tantiendac.

Pabiate cuënëdabimboec icsamboec tabadquin Nuquin Papa tantienquo icboedombi tantiabenendac.

Nuquin Papa tantiamenuen chuibancho tantiashun matsesën paposhquiabimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenendac ushash isucunacimboen,”

quequin Isayas Esus choash tabadte dada uamepampic Nuquin Papan.

<sup>17</sup> Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadece bédamboec tabadta. Nëbi Nuquin Papan abéd tabadtequido icmequin matses bédamboen tabadmendac —quepac caondash Esus ambibi naid chiequi.

*Nuëcquid bedquido Esusën: Cho, caid*

(*Mad 1.16-20; Duc 5.1-11*)

<sup>18</sup> Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapambo acte nënepac. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquien aton nëshaid acte nënesho istuidpac caondash Esusën. <sup>19</sup> Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu <sup>20</sup> —caquien aton nëshaid nianec nidquimbi Esus tsibanampac caondash.

<sup>21</sup> Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien <sup>22</sup> aton papabëdta cano nianec Esusbëd icnuec nidpac caondash.

*Matses dadpen Esusën chuibeniaid**(Duc 6.17-19)*

<sup>23</sup> Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bēdamboen iste matses chuibeniac caondash. Adshumbic daicsaidotedi bēdamebampac caondash. <sup>24</sup> Adosho istanquin: —Bēdamequidquio nec —quequin isboedon Esusën naid chuibenepac caondash. Ēnapen nidec nidaid utsi Sidia caidēn nidshun chuibeniac caondash. Aden chiac daicsaidotedi bē-bēpac caondash. Dada paēmboeshē icquido yec podobitsi icsa dapuduedaido yec unēsanequido yec dada shēquēquenquio icquido yec quenuc bē-bēacsho aitedi bēdamepac caondash Esusën. <sup>25</sup> Aden: —Bēdamiosh —quequin chiac isec cho-choash dadpenquio tsucus-tsucustsēcquio yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidēn tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidēn tabadquidon. Nēidic acte Odan caid uquē cuēma utsiuc tabadquidon. Aitedtedshun Esus tsibanampac caondash.

**5***Nadquido bēdambo iquendac, quequin Esusën chiaid**(Duc 6.20-23)*

<sup>1</sup> Matses dadpenshun tsibananac macuēsh dapa cuēte nibēdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abēd icquido Esusën dayunquio tabadpondash. <sup>2</sup> Adshobien Nuquin Papan matses bēdamboen isquin bēdambo icmete Esusën matses abitedi chuibampondash.

<sup>3</sup> —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbembī bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

<sup>4</sup> “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

<sup>5</sup> Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidēn tabadmendac.

<sup>6</sup> Pete bunacimboec ambi chiacpadec bēdamboec tabadte bunquid Nuquin Papan bēdamboen tabadmendac.

<sup>7</sup> Abi chieshēnquidi chieshēnenquio icquin bēdamboen isquid Nuquin Papan bēdamboen isendac.

<sup>8</sup> Ambi chiacpadomboenuidi nate bunquid Nuquin Papan bēdambo icmequin abibi bēismendac.

<sup>9</sup> Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

<sup>10</sup> Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. <sup>11</sup> “Esus tantiaquid nec,” qeshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac. <sup>12</sup> Aden utsibon: “Esus tantiaquid nec,” qeshun chieshēnaqui cuishonqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipondash Esusēn.

*Abi tantiaquido bēdamboec tabadte chiaid*  
(*Mad 9.50; Duc 14.34-35*)

<sup>13</sup> Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yacbimboec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquio yec icsasho ĵmitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi mat-ses bēdamboec tabadenquio yec icsambo icsho Nuquin Papan chian anēdēnquiacno nēsecatquid nendac —quepondash Esus.

<sup>14</sup> Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ĵNuntanshunda ēapadic? Padenquio. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. <sup>15</sup> ĵUtsibo chuinuecta abentsēqui uano icpadic? Padenquio. “Ma nēidēn tantianu,” quec aidbēdi bēdamboec tabadquin chuibanquid. <sup>16</sup> Adembidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “ ‘Nuquin Papa bēdambo iquec,’ ma utsibotsen quenu,” qeshun adota —quequin Esusēn chuipondash.

*Nuquin Papan Moises chuimiaid chiaid*

<sup>17</sup> Nadentsen Esusēn chuipondash. —Ēmbi chuibansho tantianshun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquio icquin utsi uapēc,” mimbi ēbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. <sup>18</sup> Abimbo chuinu. Tanta. Abubēdta nidaid nibēdamiabi icnuc Nuquin Papan chiaid bēnudtiapimbo iquendac. Ambi chiactedimbo naquin Nuquin Papan nainendac.

<sup>19</sup> Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdambohē icquid nec,” caindac. <sup>20</sup> Moisesēn dada uampid chuibanquido padiseyobobēd Nuquin Papa

yacno puduedtequidoen mimbi dampec. Aido bēdambo icquid dami-anashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

*Chieshēmēnquido nēish bēdante chiaid*  
(Duc 12.57-59)

<sup>21</sup> Adshumbic Esusēn padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuipampid mimbi tantiec. <sup>22</sup> “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquio icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac. <sup>23</sup> “Chieshēmēnquid Nuquin Papan cuidtequid nendac,” quequin ěmbi chuisho tantiashun bēdamboen nata. Nuquin Papa tabadte shubu uashunaidēn puduedash: “Ambi chiacpadomboen musc menenu,” mibi quepec. Aden musc menenumbi mimbi naid tantiata. “¿Ada ěbi chieshēnquid icpec? ¿Ěmbi chieshēmeboedta icpec?” quequin tantiata. <sup>24</sup> Adshun: “Ai, ěmbi chieshēmeboed iquec,” queshun Nuquin Papa tantiaquin mimbi bēboed meniabi mibēd chieshēnamboed yacno nidash aidbēd bēdamboec onqueta. Adec bēdamboec onquiash padpidec choashun Nuquin Papa tantiaquin meneta. Adec mibēd chieshēnamboedbēdi bēdamboec onqueta.

<sup>25</sup> Mibēd chieshēnamboed utsimbic: “Nēid cuidmenuen cuidte chuiquid yacno buanchitembimbi iquec,” queshun: “Baded nid,” cac podquedēn nidec aidbēd bēdamboec onquenidta: “Ma nēish bēdanu,” quiash. “Matses cuidte chuiquidēn cuidchitoshe,” quiash badedquio mibēd chieshēnamboedbēd bēdamboec isnanta. Abi yacno buanacsho cuidte chuiquidēn: “Icsambo iqueque. Quēnēn nauedta. Ěmbi chiacted piucquid ěmbi bedabi icnuc ma tsadpanu,” mibi catsiash. Quēnēn nauedshun <sup>26</sup> ambi chiacted piucquid nibēdnuc mibi cuemenquio ictsiashe. Mibēd chieshēnamboedbēdi bēdamboec onqueta. “Nuquin Papan adembidi cuidnushe,” quiash adta —quequin Esusēn chuipondash.

*Icsaquin chudaid chiaid*

<sup>27</sup> Adshumbic naden Esusēn chuipondash. —Chiaid utsitsen mimbi tantiec. “Min chidopenquio chudenda. Min bēnēpenquio chudmenda. Aben uequid chudenda. Aben uequidēn dada chudmenda,” quequin Nuquin Papan chiaid nuquin tsusedpan dada uapampic. <sup>28</sup> Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapec. <sup>29</sup> Ěshēn isec mibi min chidopenquio bunec icsaic. Ěshē chicshuniacimboec icsainquio yec ěnēdash mibi bēdambo ictsiaic. Icsaid ěnenquio icquid Nuquin Papan chian anēdēnquiacno nēsecaquin cuidendac. <sup>30</sup> Min chidopenquio chudte bunquin mēismec mibi icsaic. Mēteshuniac bedtiapimbo yacimboen mibi icsaid ěnta.

Ënenquo icquid Nuquin Papan cuidendac —quequin Esusën chuipondash.

*Aton chidobëd cuëshëdte chiaid*  
(*Mat 19.3-9; Mad 10.11-12; Duc 16.18*)

<sup>31</sup>Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquo icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. <sup>32</sup>Utsitsen chuinu. Aton chidon bënëpenquo chudmesho istuidshun Moisesën chiacpadomboen nac bëdambo ictsiash. Aton chido dada utsi chudmesa icshobi dadan ambembi dada uaid menequin nidmiac ic-sambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

*Abimbo chiacimboen chienda, quequin Esusën chiaid*

<sup>33</sup>Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “ ‘Nuquin Papa utsi uatiapimbo yachimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. <sup>34-36</sup>Aidën chiacpadec muainquo ictiadquidi mimbi abimbo chiacimboen utsi uain icsamboen chiec. “Abi cuëmëdquid cuënec muasho ëbi cuidtsiash. Nuquin Papa cuëmëdquid cuënenquo yec muasho Nuquin Papan ëbi cuidenquo ictsiash,” queshun mimbi utsi chiec. “Abu utsi uatiapimbo yachimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yachimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacimboen chienda. “Nuquin Papa cuëmëdquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacimboen icsamboen chienda. <sup>37</sup>Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” queshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

*Chieshë nec cuidnanenda, quiaid*  
(*Duc 6.29-30*)

<sup>38</sup>Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshë nquin ëshë ansiac adecbidi cuidnanec ëshë ansenanquid. Chieshë nquin sëcsiac adecbidi cuidnanec sëcsenanquid,” quequin chiaid icnuc <sup>39</sup>utsitsen chuinu. Tantia. Mibi cuesquid cuidenda. Chieshënaqui cuidnanenquo icquin adembi bëdamboen ista. <sup>40</sup>Min matses: “Ëbi cuidquin mimbi ëbi meniambo iqueque. Min dashcute beccho,” quesho mimbi menenquo icsho isun: “Cuidte chuiquid yacno buanshun dashcute dachicmechit-omane,” quesho aid dashcute meneshumbic min dashcute utsitsen

chicshun meneta. Adec bēdamboec tabadta. <sup>41</sup> Utsibic: “Nēbi nidtuidquin con na buanec nid,” quequin ancabudac nēbi nidtuidenquo icquin udimbo buanshunta. <sup>42</sup> Aton na nibēdquid: “Mitsana beccho,” qesho meneta. Utsibic: “Mitsana buanshun bēuaindami,” qesho: “Padi,” cainda. Meneta. Aden bēdamboen nata —quepondash Esus.

*Chieshēnquidobi bēdamboen iste chiaid*  
(Duc 6.27-28, 32-36)

<sup>43</sup> Adshumbic abi macuēsh dapa poctse tsadquin bēdamboec tabadte Esusēn chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshēnquido chieshēnta,” quequin chuipampic. <sup>44</sup> Utsi mibi chuinu. Tantia. Mibi chieshēnquidobi bēdamboen isquin tantiata. Chieshēnaqui: “Ēbi chieshēnquid bēdamboen ista, Papa,” quequin Nuquin Papa chianeta. <sup>45</sup> Aden chianec Nuquin Papabimboec mibi ictsiac. Mibi ut-sibo bēdamboen nashunquid ictsiac. ¿Bēdambo icquido yacnouidida Nuquin Papan ushē chēncamepadic? Padenquo. Icsaido yacnotsen ushē chēncamec. ¿Bēdambo icquido yacnouidida ue chomepadic? Padenquo. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. <sup>46</sup> ¿Mibēd tantiananquido min shubun icquidoidi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquo. Mimbi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidoidi nashuntsiashe. Aden nainda. Utsibotsen bēdamboen nashunta. <sup>47</sup> ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. <sup>48</sup> Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiapadomboen utsibotsen bēdamboen tantiata —quepondash Esus.

## 6

*Utsibo bēdamboen nashunte chiaid*

<sup>1</sup> Adshumbic abi macuēsh dapa poctse tsadquin Esusēn chuipondash. —Nadquid icsambo iquec. Nuquin Papa tantienquo icquimbi aton mases ismenuenuidi naic icsambo iquec. Adquid Nuquin Papan bēdamboen istiapimbo iqueque. “Utsibo nashunu,” quequin utsibo ismenquo icquin nata. <sup>2</sup> “Aton na nibēdquido menenu,” qeshun utsibo ismequin menenda. Ismenquo icquin meniac bēdambo ictsiash. “Nuquin Papa tantiaquid nebi,” quec muaquidēn nacpaden nainda. Nuquin Papa tantiaquid damenuembien muaquidēn mases dadpen yacnoshonuidi menedenepec. Adosho isun aton masesēnuidi bēdamboen isnubi Nuquin Papan bēdamboen istiapimbo iquec. <sup>3</sup> Aton na nibēdquido menequin utsibo ismenda. Meneshun: “Menebanombi,” quequin utsibo chienda. <sup>4</sup> Adsho isun mimbi utsibo ismenquo icquin naid tantiaquid icquin Nuquin Papan bēdamboen isquin abēdi mibi tabadmendac —quequin Esusēn chuipondash.

*Nuquin Papa chianete Esusēn chiaid*  
(Duc 11.2-4)

<sup>5</sup> Adshumbic Nuquin Papa chianetetsen Esusēn chuipondash naden. —Bēdambo icquid damianquidēn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi

nidtoson comapenec onquequin Nuquin Papa chianepec. Adash umanac puduenshun matses dadpen ismenuenuidi padpiden adembidi chianec. Adquid aton matsesën: “Bëdambo iquec,” canubi Nuquin Papan padenquo iquec. Bëdamboen istiapimbo iquendac. <sup>6</sup> Mibi adenda. Utsibo ismenuenuidi nainquo icquin matsesën isacmaidquo Nuquin Papambo tantiaquoquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bëdamboen isquin abëdi tabadmendac.

<sup>7</sup> Nuquin Papa chuiquin bëdamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquo chuibudac nuqui tantiaboedën nuqui nashuntsiash. Padenquo icac nuqui nashunenquo ictsias,” qeshun Nuquin Papa tantiesabon yuen chuibudacimboen nainda. <sup>8</sup> Adoenquo icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsias,” quequin mimbi otacquo tantiaid Nuquin Papan tantieque. <sup>9</sup> Naden Nuquin Papa chuita.

“Bëdamboshë icquid icsho matses abitedishunquo mibi tantiapashun, Papa.

<sup>10</sup> Matses abitedishunquo mibi con Icho capashun. Mibi yacnoshon mimbi uaido mayan bëdabon mimbi chiacpadomboenuidi naic. Adomboembidi mimbi chiacpadomboen matses abitedishunquo napashun.

<sup>11</sup> Bumianenda, Papa. Badiadquidën badiadquidënquien con pete icmeta.

<sup>12</sup> Utsibon chieshënaqui ëbi cuidnanenquo icsho isun ëbi icsashobi cuidenquo icquin ëbi bëdamboen ista, Papa.

<sup>13</sup> Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ëmbi mibi chuisho tantiata, Papa.

Ënenquo icquin abitedishunquo: ‘Bëdambo iquec,’ mibi capashun. Padi,”

quequin Nuquin Papa chianeta —quequin Esusën chuipondash.

<sup>14</sup> Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquo icsho isun Nuquin Papan mibi cuidenquo icquin bëdamboen istsias. <sup>15</sup> Cuidnanec chieshënansho isun Nuquin Papan mibi bëdamboen istiapimbo ictsias —uequin Esusën chuipondash.

### *Buna mëmunte chiaid*

<sup>16</sup> Adshumbic utsibo ismenquo icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nacimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquo iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. <sup>17</sup> “Nuquin Papauidi tantiaquin nëidtedec ushquin buna mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. <sup>18</sup> Aden bëdamboen manëdaid shueshcaid isun: “Buna mëmunec



nec,” cainquo ictsias ut sibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsias. Adshun mimbi utsibo ismenquo icquin naidtedi tantiaquid icquin abëdi mibi tabadmendac —quequin chuipondash Esusën.

*Nuquin Papa yacno tabadte bunta, quiaid*  
(Duc 12.34)

<sup>19</sup> Adshumbic padpiden Esusën chuipondash. —Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. <sup>20</sup> Icsabudesambo tantiata. Nuquin Papambo tantiec aibdëd tabadte bunquin ambi chiapadomboen nata. Chodquetiapimbo icquid yec shënbudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. <sup>21</sup> Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

*Pabiate shëcuë cuembo icquid chiaid*  
(Duc 11.34-36)

<sup>22</sup> Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bëdamboec tabadtsiac. <sup>23</sup> Pabiate cuënëdacimboec yec Nuquin Papa tantienquo yec mitsanauidi tantiec ÷bëdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusën.

*Bedteuidi tantienda, quiaid*  
(Duc 16.13)

<sup>24</sup> Adshumbic naden Esusën chuipondash. —Mitsanauidi tantiec mibi icsamboec tabadtsiac. “¿Naic cho,” quequin daëdshun chiacta aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiapadomboen mimbi natiapimbo ictsiaque. Mitsana bedteuidi tantienda. Nuquin Papauidsëqui tantiata —quequin Esusën chuipondash.

*Nuquin Papan abi tantiaquido dayun uaid*  
(Duc 12.22-31)

<sup>25</sup> Adshumbic Esusën padpiden chuipondash. —Ëmbi aden chuisho tantiash dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsias,” quias dacuëdec tabadenda. <sup>26</sup> ¿Uicchunënda ambibi cuëte ëshë siac bacuëacsho chepadic? Padenquo. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquoda icpadic? Nuquin Papan mibi nashunquin min pete icmeque. Dacuëndenda. <sup>27</sup> ¿“Unëstiapimbo iquebi. Dacuëdebi,” quequidta unësenquo icpadic? Adequi dacuëdquid unëstiashe. Unësteuidi dacuëdënenda.

28 “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëc bédamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bédamboshë isadpadic? Padenquoio. Nuquin Papan uacpadquiobi iquec. 29 ¿Cuëte bacuëc bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquoio. Adpenquien icpampic. 30 Cuëte bacuëc bédamboshë isadboed abadiadtsëcshumbi isac ënden chodquiac. Aid badedquoio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquoio. Mibi dasiuidte icmeque. Dacuëdenda. Mitsana nibëdquoio icte dacuëdënquimbi mimbi Nuquin Papa bëdiactsëc tantiatseque. 31 Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëdenda. 32 Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. 33 Adenquoio yec: “Con Icbo mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe. 34 Èbi adsho tantiashe badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquoio yec —quequin chuipondash Esusën.

## 7

### *Utsibo icsaid chienda, quiaid* (Duc 6.37-38, 41-42)

1 Naden Esusën Nuquin Papan chiacpadec tabadte chuipondash. — Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. 2 “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. 3-4 ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquoio. 5 Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bédamboequien tabadtiad,” quequin utsibo bédamboen chuita. Bédambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. 6 Mimbi bédamboen chiaqui tantienquoio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshëntsiashe. Chanchon icbon dashcute nebudshun bëchish uaquin tin-tincacimboen Nuquin Papan chiaid niac-niactsiashe. Adquid chuidonenda —quepondash Esus.

### *Ènenquoio icquin Nuquin Papa chianete chiaid* (Duc 11.9-13)

7-8 Nadembidi Esusën chuipondash. —Nuquin Papa ènenquoio icquin chuidoneta. Bacuëbon: “En na,” cadoniacbimboen chuidoniac Nuquin Papan mibi tantiatiashe. Adembidi: “Èbi bédamboen name, Papa,” mimbi cacpadomboen bédamboen mibi nametsiashe. Adembidi: “Èbi

nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

<sup>9</sup> ¿Icsambo icquidta Nuquin Papa icpadic? Padenquo. Bëdambo icquidquo nec. Bacuëmpi: “Bundobique. Penu. Beccho, papa,” ¿qeshoda amën cudasënquin cuënotebi menepadic? Padenquo. <sup>10</sup> ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquo. <sup>11</sup> Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” qesho tantiashun bëdamboen nashuntsiashe. Nuquin Papan chianeta.

(Duc 6.31)

<sup>12</sup> Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquo tantiacpadomboebidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaqin chimpicpadomboen mimbi natsiaque. Aden utsibo nashunta —quequin chuipondash Esusën.

*Daëdpactsëcshun Esus tantiabente chiaid*

(Duc 13.24)

<sup>13-14</sup> Adshumbic Esusën naden chuipondash. —Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedacimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidacimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

*Icsambo icquid nec, quequin tantiate chiaid*

(Duc 6.43-44)

<sup>15</sup> Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiachimboec mibi icsamete bunquieque. Adquidën chuisho tantienda. <sup>16</sup> “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catisiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic. <sup>17</sup> Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. <sup>18</sup> ¿Cuëte bëdan bacuë chetemaidta nepec? Padenquo. ¿Cuëte icsan bacuë chetequidta icpec? Padenquo. <sup>19-20</sup> Chetemaidbimboec muaquid bëdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncacimboen: “Nuquin Papan chiaid chiembi,” quec muaquid Nuquin Papan icsaido cuidacno nësecaindac —quepondash Esus.

*Nuquin Papa yacno puduednu, queuidte chiaid**(Duc 13.25-27)*

<sup>21</sup> Utsitsen Esusën chuipondash. —Ëbi caic: “Con Icbo mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomboen naquidquien abi yacno puduedtsiash. <sup>22</sup> Nuquin Papa yacno ëmbi yuedte ushën matses dadpeshun ëbi chuiuidendac. “Con Icbo mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” <sup>23</sup> qesho ëbimbo tantiec Nuquin Papan chiacpadec bëdamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bëdamboec tabadta —quepondash Esus.

*Shubu uaquidbimboecquid chiaid**(Duc 6.47-49)*

<sup>24</sup> Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bëdamboen natsiaque. Shubu uaquin bëdamboen tantiaquidbimboec mibi ictsiaque. Tantia. Chuinu. Bëdamboen tantiaquidën mananënquo shubu uaquin buintad nitsinquad. <sup>25</sup> Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid. <sup>26</sup> Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquo icquidbimboec iquéc. Tantienquo icquidën nadoquid. Acte cuidi cuëmanquiobi shubu uaquin badedi unëstsëccquidquo cuate nitsinquad. <sup>27</sup> Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëccquidbimboec ëbi tantiesa iquéc. Adquid Nuquin Papan cuidtequido neque. Ëbi tantiata —quequin chuipondash Esusën.

*(Mad 1.22)*

<sup>28-29</sup> Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëccquin chuïtsëccosh. Padnuen Esusënquo comapenen tantiaquin chuiposh —quecuededpondash matses dadpenquo.

**8***Esusën daicsaid bëdamiaid**(Mad 1.40-45; Duc 5.12-16)*

<sup>1</sup> Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpeshun tsibanampondash.

<sup>2</sup> Adnubien dada ushumbo yec daicsaidquo choshon Esus ismenuen danëshën sebudpondash. —Ëbi bëdamete bunquin mimbi ëbi bëdametsiaque. Ëbi bëdame, Icbo —caquien Esus: <sup>3</sup>—Ai, mibi bëdamete bunebi. Mibi bëdanendac —quequin mishtemaidquiobi mishnubi badedquo bëdampondash daicsaid nibëdquiec. <sup>4</sup> Adsho Esusën: —Utsibo chienquo yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën

chuiampicpadomboen nanuen: “Nuquin Papan bēdamioshi,” quequin Nuquin Papa menetequid buanquin ismec nidta —quequin Esusēn chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusēn bēdamiaid*

*(Duc 7.1-10)*

<sup>5</sup> Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. <sup>6</sup>—Tantia. Chuinu, Icbo. Con shubun icquid con yua shēquēquenquo iccosh. Natiambo yec unēstiadtsēcquo iccoshe. Bēdameta <sup>7</sup>—quesho tantiashun: —Ai, bēdamec nidnu. Nid —caquien: <sup>8</sup>—Padi. Mibi bēdamboshē icquidquo nec. Ēbibi icsactsēcquid icquin mibi con shubun puduedmetiapimbo iquebique. Nēshunquiobi bēdameta. Nidenquo icquin nēshunquiobi mimbi: “Bēdanta,” cac con yua bēdantsiashe. Mimbi tantiacpadomboen namequidquo mibi nec. <sup>9</sup> Ēbibic chuiquid dapan namiac sondado utsibo namequid nebi. Ēmbi: “Nid,” cac badedi nidec. Ēmbi: “Baded cho,” cac badedquo choec. Con yuan ėmbi: “Nata,” cac ėmbi chiacpadomboen naic. Mibi adquidquibidi neque. Con yua bēdameta —quepondash sondado chuiquid dapa.

<sup>10</sup> Adsho tantiashun Esusēn abi tsibambēquido chuipondash. —Bēdamboen nēidēn chuipec. “Comapenen tantiaquin chuiquinuidi con yua bēdametsiash,” quequin ėbi bēdamboen tantiaquid nec. Isadaidbo adquid nibēdec. Isadaidbon ėbi bēdiactsēc tantiabededtsec. <sup>11</sup> Tantia. Chuinu. Matses utsi icquimbi sondado chuiquid dapan ėbi bēdamboen tantiec. Adec nidaid utsi-utsiec yacnocquido isadaidpembo ėbi tantiaquido yanash Nuquin Papa yacno puduedendac. Ambo puduedash isadaidbo tsusedpabobēd tabadendac. Abadauan caid yec Acobo caid yec Isac caid yec quequidobēd tabadendac. <sup>12</sup> Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nēsecacno mibi nidmendac. Adoac mibi tēnquebudquiendac —quequin abi tsibambēquido isadaidbo chuipondash Esusēn. <sup>13</sup> Adshumbic sondado chuiquid dapa chuiquin: —Nidec nid. Mimbi tantiacpadece min yua bēdaneque —cac nidshun isquien bēdanac Esusēn chuibocpadequi.

*Petedon nachi Esusēn bēdamiaid*

*(Mad 1.29-31; Duc 4.38-39)*

<sup>14</sup> Adash yuec yuecpectsēc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. <sup>15</sup> Uesho istuidshun mēdinquin Esusēn bēdamepondash. Aden bēdamiac Esus pemepondash.

*Esusēn matses dadpen bēdamiaid*

*(Mad 1.32-34; Duc 4.40-41)*

<sup>16</sup> Petedon nachi bēdamiaid inchēshbudtsēqui Esus ismenuequin matses daicsaido dadpen bē-bēpondash. Bē-bēshobien podobitsi icsa dadpuedaido comapenec cuēdquin cuemeshumbic daicsaidotsen Esusēn bēdamebampondash. <sup>17</sup> “Nuqui icsaid ucquin nuqui daicsaidobi bēdamiac,” quequin ėndenquo Nuquin Papan Esusēn nate Isayas dada uamepampicpadomboen nanuen adopondash Esusēn.

*Abëd icte bunquido Esusën chiaid**(Duc 9.57-62)*

<sup>18</sup> Adashic abi isnuec matses dadpenquio datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. <sup>19</sup> Pudianec nidaneshobien Moisesën dada uampid chuibanquidën Esus chinuntuidpondash. —Con Icbo mibi caindambi. Mibëd nidendabi —caquien: <sup>20</sup> —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenenquio yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

<sup>21</sup> Adnubien abëd capucueno boed utsin: —Chiata, Icbo. Con pa unësoshe. Chococatambono —caquien: <sup>22</sup> —Padi. Cho. Ma unësaidën tantienquio yacbimboen ëbi tantienquio icquidon ma papa chococanu. Ëbëdtan bëdamboen naic cho —capondash Esusën amë unësaid chuiquin. Adobidanec nidanepondash chian yacno.

*Natiambo cunquenuc acte tēccuasquiaid Esusën ënëdmiaid**(Mad 4.35-41; Duc 8.22-25)*

<sup>23</sup> Chian budash Esus chedo cano antabëdtopondash. Adashic potenuc puduampondash. <sup>24</sup> Aden potenubi nënantanquio icnuc cunquetuidpondash. Adnubien acte comapenec tēccuasquiampondash. Adëc acte tēccuasquenuc cano acte ancushad-ancushadquiec yampondash cano mentoadtiadtsëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

<sup>25</sup> Adshobien tinquin: —Nuqui mentoadeque. Isucun, Icbo. Baded ëbi nashun —caquien: <sup>26</sup> —¿Atotsi quiaish dacuëde? Ëbi bëdiactsëc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquio ënëdpondash cano mentoadtsenquionobi. Actetsen tēccuasquenquio yampondash. <sup>27</sup> Adsho isashien: —¿Mitsipadquidënquio actebëdta cunquequid ënëdmepashba? —quecuededpondash Esusbëd icquido.

*Dada daëd dapuedaaido podobitsi icsabo Esusën cuemiaid**(Mad 5.1-20; Duc 8.26-39)*

<sup>28</sup> Aden chian potiash pudundonobien Cadada yacnocquid podobitsi icsa dadpen dapuedaaid dada daëd choshon Esus chuituidpondash. Aid daëd unësaïdo chococaid shëcuëmbi tabadpondash. Matses cuesunete bunquiec dacuëdampambo icsho isash aid yacno matses nidenquio icpondash. <sup>29</sup> Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

<sup>30</sup> Uano chancho dadpenshun natiacquin udquin pebededpondash. <sup>31</sup> Adnubien podobitsi icsabon aid dada daëd oncameoac: —Ëbitedi cuemiach chancho icbo-icboec dapuedtsiabi —quecuededpondash podobitsi icsabo. <sup>32</sup> Adsho tantiashun Esusën: —Ai, mimi tantiapadec nid —cac nïdash chancho icbo-icboec dapuednubi chancho abitedi macuësh budec acte nësebudec mentoadbudnepondash nibëdquiec yec.

Adec podobitsi icsabo dapuduenanec nidnubi dada daëd bēdambo yampondash.

<sup>33</sup> Adsho istanequien chancho pemequido aton matses chiec niqianec shubu dadpen yacno nidanepondash. Chancho mentoadbudneboedbēdta podobitsi icsabo dapuduemeboed uesquin chuituidpac caondash. —Nuqui dacuēdēmoedobi bēdambo yanosh — quequin<sup>34</sup> chuituidaquien anocquido abitedi Esus isec cho-chopondash. Adec cho-choshombien: —Dacuēdampambo mibi iqueque. Ēbi yacno choenda. Nidec nid —cabededpondash. Adoac Esus nidpondash.

## 9

*Shēquēquenquo icquid Esusēn bēdamiaid*  
(*Mad 2.1-12; Duc 5.17-26*)

<sup>1</sup> —Nid —cac nidanec chian budash cano antabēdtoshon chian potiash abi iccondacnobidi Esus choapondash. <sup>2</sup> Adnubien utsibon dada shēquēquenquo icquid Esus ismenuen aton uetechobi bēpondash. Bēsho isumbien Esusēn: —Ēbi caic: “Aidēn bēdametsiash,” qeshun bēac — quequin daicsaid chuipondash naden. —Dacuēdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bēdamboen ismembique —capondash Esusēn.

<sup>3</sup> Adsho tantiash aid datsidadash tabadquido Moisesēn dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec — quecuedepac caondash Esus caic.

<sup>4</sup> Uanuēsh adsho ambemi tantiashumbien Esusēn aido chuipondash. —¿Atotsi quequin mimbi ēbi chieshēmpē? <sup>5</sup> Ambi namiaid icquin ěmbi: “Nuquin Papa cuidmenquo icquin mibi bēdamboen ismembique” cac Nuquin Papan nēid cuidenquo iquendac. Adembidi ambi namiaid icquin ěmbi: “Caputa,” cac nēid capuendac. <sup>6</sup> Istac. Mibi ismembique. “‘Nuquin Papan chomiaid nec. Icsaidobi Nuquin Papa bēdamboen ismequid nec,’ mabi canu,” qeshun naimbique. Istac —quetanquin dada shēquēquenquo icquid chuiquin: —Caputa —capondash Esusēn. <sup>7</sup> Adoac bēdanash aton shubuno nidpondash. <sup>8</sup> Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bēdambo iquec —quecuedepondash isquido.

*Ēbēd iquec cho, quequin Esusēn Mateyo chiaid*  
(*Mad 2.13-17; Duc 5.27-32*)

<sup>9</sup> Adnubini con matses aton piucquid bedshunuec podqued cuēman tsadquid shubumpin tsadpondac. Con matses yuaquid ancaquid dapan: —Min matsesēn na ěmbi chiacdedi piucquid bedshun ēbi meneta —cac niondabi. Ambo tsadshobini Esusēn istuidpondash. Istuidshumbini Esusēn: —Nuquibi icnu. Cho —capondash. Adoac badedi tsibananec <sup>10</sup> nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbēd pec tabadnuec ēbēdtan piucquid bedshunquidobēdi con matsesēn: “Icsaido nec,” caidombo pudued-puduedpondash. <sup>11</sup> Adsho isumbien Esus chieshēnquido Padiseyobo caidon Esusbēd icquido chuituidpondash. —¿Atotsi quiash mibi chuiquid Esus caid icsaquidobēdi pec tabadpec? Icsambo iquec —capondash Esus chieshēnquidon.

12 Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquio. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuec nebi. 13 Nuquin Papan naden dada uamiampid pausudshun bëdamboen naic nid. “Ëmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Ëbibi matses bëdamboen ismequid nebi. Muaquido: “Bëdambo icquid nebi,” qesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ënëdta,” canuec nebi —quepondash Esus abi chieshënquido chiec.

*Esusën buna mëmunquido chiaid  
(Mad 2.18-22; Duc 5.33-39)*

14 Adnubien Uan acten mentoanquidbëd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquio nebi. Padiseyobo adembidi naquidquio nec. ¿Atotsieshun mibëd icquidon aden nainquio icpec? ¿Natiapimboda iquec? —caquien 15 Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic? Padenquio. Adquidbëdtan pec cuishonquec tabadquid. Icbo nibëdanan sedenquecuededquin buna mëmunquid. Ëbi nibëdanan ëbëd icquidon ëbiuidi tantianuen buna mëmunendac —quepondash Esus.

16 Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquio nedesquequid. 17 —¿“Machi sandono,” qeshun tsitsan shënimbida sandopadic? Padenquio. “Machi sebudnushe,” qeshun tsitsan shënin sandoenquio icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquio icquin ambi bëdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

*Champi uincuemiaidbëdta chido bëdamiaid  
(Mad 5.21-43; Duc 8.40-56)*

18 Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unëstiadsëcquio iccoshe. Mishec cho. Mimbi mishac bëdantsiashe —capondash. —Mibi con Icbo canu —quequin danëshën sebudquin ismepondash. 19 Adoaquien Esus aidbëdi nidpondash.

20-21 Nidnubien chido intac budted-budtedec seta 12tedi matamec bëdanenquio yec nacchoadbudquidën Esusën cachochtsëqui choquin: —Bëdamanquidën dashcute mishec bëdampatsiashe icmanendac —qeshun ismenquio icquin dashcute cuëmano mishtsac caondash. 22 Adoaquien bidiadquin isun Esusën chuipondash. —Dacuëdenda. Mibi: “Aidën nac bëdantsiabi,” quiacpadec mibi bëdanendac —Esus quenubi bëdampondash.

23 Aid bëdamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën



nacpadomboen shoncate shoncaquido. Nēdic comapenec sedenquecuedquido dadpen. Aidedi icpondash. <sup>24</sup> Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —qeshun Esus mamēnshumbedpondash. <sup>25</sup> Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. <sup>26</sup> Adsho isun champi unēsaid uincuemiaid chuibenepac caondash shubu utsin-utsinquien. Anocquido Capednaun caid yacno paequidotedishun tantianuc chuibeniāc caondash.

*Bēshuaid daēd Esusēn bēdamiaid*  
(Duc 18.35-43)

<sup>27</sup> Auēshquio puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquin ēbi bēdame —quebudquebudpondash. <sup>28</sup> Shubu utsin puduedash abēdi tabadshobien Esusēn: —“Ēbi bēdametsiash,” ĵcaindabi ique? —caquien: —Ai, adebi —quepondash.

<sup>29</sup> Adshobien aid daēdi bēmishquin: —Mimbi tantiacpadec bēdanta —cac <sup>30</sup> bēdampondash. Adsho isun Esusēn: —“Bēdamioshi,” quequin utsibo chienda —capondash. <sup>31</sup> Adoboqui anocquidotedi chuiben-chuibempac caondash.

*Esusēn onquesa bēdamiaid*

<sup>32</sup> Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash. <sup>33</sup> Bēacsho isun Esusēn podobitsi icsa dapuduemiāc bēdanash onquiampondash. Aden bēdamesho isash: —Nuquin nidaid Isadaid caidēnshun adoen ictenec —quecuededpondash isquido.

<sup>34</sup> Adnubien Esus chieshēnquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

*Esusēn matses tantiaquiaid*

<sup>35</sup> Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash. <sup>36</sup> Abi tantienquio icquido dadpen cho-chosho isash unēsquio icnuc shubiantiadquio icpondash Esus. —Abi isquid nibēdnuc bacuēbo icsamboec tabadac bimboec icsambo iquec. Nuquin Papa bēdamboen ismete chiabi yac tantienquio yec natia chieshēmēnec bēdamboec tabadtiapimbo iquec —quiash shubiantiadquio icpondash Esus.

<sup>37</sup> Adshumbic abēd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquio iqueque. <sup>38</sup> Nuquin Papa chianeta. “Matses dadpenshunquio mimbi bēdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

## 10

*Esusbëd icquido 12tedi chiaid*  
*(Mad 3.13-19; Duc 6.12-16)*

<sup>1</sup> Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuedaid mimbi cuemendac. Adembidi daicsaido abitedi mimbi bëdamendac —quequin chuipondashi nëidtedi. <sup>2</sup> Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. <sup>3</sup> Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. <sup>4</sup> Nëidic Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshënquido Esus bedmequid. Aidtedi abëd icquido icsho chuipondashi.

*Abëd icquido: Chuibeneta, caid*  
*(Mad 6.7-13; Duc 9.1-6)*

<sup>5</sup> Adshumbic: —Ëmbi chiacpadomboen chuibenenuec nidshun isadaidpembro chienda. Aido yacno nidenda. Nidaid cuëshë Samadia caid yacnoquidon shubu datambidanta. <sup>6</sup> Nuquin matses isadaidboudi chuibeneta. Bënudshun podqued tantienquio yacimboen nuquin matsesën Nuquin Papambo tantienquio iqueque. <sup>7</sup> “Mibi icsaid ënash bëdamboec tabadta. Nëbi abëd tabadtequido icmequin Nuquin Papan matses bëdamboen tabadmendac,” quequin chuibeneta. <sup>8</sup> Adembidi daicsaido bëdamequinc unësaido uincuemequinc dada ushumbo yec daicsaido bëdamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ëmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. <sup>9</sup> Aden chuibenec nidquin min piucquid buanenda. <sup>10</sup> Adembidi pete sandoaid buanenda. Dashcute utsibëdta tapucudte utsi sandoshon buanenda. Mibi tidinquete cueste abentsëqui buanta. Adec mëdadauidquio chosho isun mimbi bëdamiaidon: “Mibi bëdambo iquec. Ëbi yacno ushec cho,” mibi cac bëdambo ictsiash. Adembidi: “Mitsana nibëdsho isun mibi menenu,” mibi cac bëdambo ictsiash.

<sup>11</sup> Aden chuibenec shubu dadpen icquid yacno nidshun bëdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidën shubun ushta. Auëshquio nidabi yec aidën shubunuidi ushta. <sup>12</sup> Aidën shubun puduedshun: “Mibi isnuec chopobi,” cata. Adoshombic: “Nëid shubun icquido Nuquin Papan bëdambo icmepashun,” quequin aido bëdamboen ista. <sup>13</sup> Adoac anocquidon mibi bëdamboen iso: “Nuquin Papan bëdambo icmepashun,” mimbi canubi Nuquin Papan aido bëdambo icmendac. Anocquidon mibi chieshënsho Nuquin Papan aido bëdamboen istiapimbo iquec. <sup>14</sup> Shubu dadpen icquid utsi yacno mibi nidacsho anocquidon cuemiac naden ismeta. Auëshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. <sup>15</sup> Mimbi adosho isun matses cuidte ushëmbi

Nuquin Papan aido comapenen cuidendac. Ĕndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquo icquido comapenen cuidendac —quepondash Esus abēd icquido chiec.

*Esus tantiaquido chieshēnte chiaid*

<sup>16</sup> Adashic padpiden chuioaic: —Ĕmbi naid chuibenequido icsho utsinutsinquien mibi chieshēnendac. Bēdi nēish yua acte bunacbimboec chieshēmēnquido mibi cueste bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. <sup>17</sup> Mibi chieshēnquin cuesunetiadquio iguendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. <sup>18</sup> Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ēbi chuiquidon chuiquid dapabēda isadaidpembo Ĕmbi naid chuibanu,” ēbi quenuc mibi aden buanendac. <sup>19</sup> Adoac dacuēdenda. “Chuiquid dapa yacnoshon ¿atotsimbi chuiPATSIABA? ¿Adambi bēdamboen chuiPATSIABA?” quec dacuēdenda. Chuiquid dapa mimbi bēisnubi Nuquin Papan ambi tantiacpadomboen mibi oncamendac. <sup>20</sup> Aden aton Mayanēn ambi tantiacpadomboen mibi oncamendac —quepondash Esus.

<sup>21</sup> Adashic padpidec onquec: —Ĕbi chieshēnquidon ēbi tantiaquidotsen comapenen chieshēnendac. “Esus tantiaquid nec,” qeshun aton buchimbi aton utsi cuesunemendac. Amēmbi ambi tishmiaid cuesunemendac. Aton bacuēbombi chieshtoshon anibēda amē cuesunemendac. <sup>22</sup> “Esus tantiaquid nec,” qeshun matses dadpenshun aden chieshēnaqui chieshtoenquo icquin ēbi tantiasho Nuquin Papan abi yacno mibi puduedmendac. <sup>23</sup> Shubu dadpen yacno nidacsho chieshēnac shubu dadpen icquid utsi yacno cuenta. Anoshontsen Ĕmbi naid chuisho chieshēnoac shubu dadpen icquid utsi yacnotsen cuenoata. Adecuidi cuendeneta. Nēid nidaid Isadaid caidēn shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuēsh choaindabi.

<sup>24</sup> Mibi tantiamequid nebi. Ĕmbi tantiamiaido icsho ēbi icbocpadomboembidi mibi chieshēnendac. Abi chuiquid dapa chieshēnacpadembidi ambi namiaidotsen chieshēnquid. Icbo chieshēnquimbi yuabotsen chieshēnquid. <sup>25</sup> Adembidi Ĕmbi chiacpadomboen natiadquio icsho mibitsen chieshēnendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshēnendac —quequin chuipondash Esusēn abēd icquido chuiquin.

*Dacuēdenquo icquin chui, quequin chiaid*

*(Duc 12.2-7)*

<sup>26</sup> Adshumbic padpiden chuiquin: —Mibi chieshēnquido dacuēdēnenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsēcquin chiaid Nuquin Papan utsibo tantiamendac. Adembidi mimbi bēdamboen naidtedi Nuquin Papan utsibo tantiamendac. <sup>27</sup> Nēbi Ĕmbi mibitedictsēqui

chuiboed dacuëdenquo icquin utsibo chuibeneta. <sup>28</sup> Chuibenesho min dadauidtsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënnequid nësecanquid tantiate. Adquid Nuquin Papa icsho dacuëdënta.

<sup>29</sup> Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquo icti? Padenquo. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec. <sup>30</sup> Adembidi min manëdaid Nuquin Papan tambanaidquo nec. Aden min manëdaid abentsëc paëdsho aidën tantiec. <sup>31</sup> Aden min manëdaid tambanquid icquin padichucu bëdiactsëc tantiatsëcquin mibien comapenen tantieque. Mibi chieshënquido dacuëdënenda —quequin chuipondashi Esusën.

*Esus con Icbo nec, quequido chiaid*  
(Duc 12.8-9)

<sup>32</sup> Adshumbic padpiden chuiquin: —Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. <sup>33</sup> Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

*Esus tantiaquidobëdi cuëshëdte chiaid*  
(Duc 12.51-53; 14.26-27)

<sup>34</sup> Adshumbic padpiden chuiquin: —Ëmbi chuiboed tantiaquid: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëdendac. <sup>35</sup> Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac. <sup>36</sup> Aden aton shubun icquidombi ëbi tantiaquid chieshëndac.

<sup>37</sup> Padnubic aton matsesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiapadomboenuidtsëqui naquidën ëbi bëdiactsëc tantiatsëcquin ëmbi chiapadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiapadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec. <sup>38</sup> Utsibon chieshënac ëbi tantiatsëcboedi badedi chieshtoshon ëmbi chiapadomboen natiapimbo yantsiash. Adquidotsen ëbi tantiaquidpenquo iquendac. <sup>39</sup> Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiapadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Esusën chuipondashi.

*Nuquin Papan bëdambo icmete chiaid*  
(Mad 9.41)

<sup>40</sup> Adshumbic Esusën ëbi chedo padpiden chuipondash. —Mibi chieshënquido icnubi mibi bēdamboen isquid iquendac. Ēmbi naid mimbi chuisho tantiash: “Ai, abimbo caic,” gueshun ëbi tantiabenquin ëbi chomequidtsen tantiabenendac. <sup>41</sup> “Naden naindami,” quequin ambi chiaid chuibenquid Nuquin Papan bēdamboen isaido nec. Adquid shubu utsi yacno nidacsho isash: “Nuquin Papan chiaid chuibenquid choeque. Bēdamboen chuisho tantianu,” quequid icsho Nuquin Papan bēdamboen isendac. Adembidi abi tantiec ambi chiacpadec bēdamboec tabadquid Nuquin Papan bēdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” gueshun bēdamboen isquidotsen Nuquin Papan bēdamboen isendac. <sup>42</sup> Adembidi ëbi tantiaquid yec acte bundoacsho acte menequid Nuquin Papan cuidnanquin bēdambo icmendac. Adembidi utsibon Esus tantiaquido bēdamboen nashunsho Nuquin Papan bēdambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

## 11

*Uan acten mentoanquidën chuimiai*  
(Duc 7.18-23)

<sup>1</sup> Esusën: —Chuibenetan —cac abēd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbēd icoaic cho-chopondac.

<sup>2</sup> Adnubien Uanën Esus acten mentondaidēmbi quēnën nauedaid icquin Esusën naid tantiapac caondash. Adshumbic abēd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambēd icquidon Esus chuituidpondash. <sup>3</sup> —Uanën: “Chuitan,” cac chobi. ¿Ēmbi cainaid Nuquin Papan chomaidquioda mibi nepe? Mibi adquidpenquio icnuc ¿ada utsi chopatsiash? —caquien <sup>4</sup> Esusën: —Ēmbi nadatiambo icquin nabamboedbēdta ěmbi chuiboed Uan chiec nid. <sup>5</sup> “Bëshuacboedën isbenosh. Canite ic-saidi capucuenosh. Daushumbo icquid nami mishadenquio icquid bēdanosh. Pashuacboedën tantiabenosh. Adoshombic unēsaidi uincuemiosh. Adoshombic Nuquin Papa tantienquio icquido Nuquin Papan bēdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomaidquio nec,” quequin ëbi tantiendac. <sup>6</sup> Adshumbic nadentsen chuita. “‘Muambo nec, ëbi cainquio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bēdambo icmendac,’ quiosh,” quequin chiec nid —cac nidanepondash Uambēd icquido.

*Uan acten mentoanquid chiaid*  
(Duc 7.24-35)

<sup>7</sup> Aido nidanebon Esusën Uan acten mentoanquid chuiquin abi dat-sidadquido naden chuipondash. —Matses nibēdacno ¿atotsi quenuec nidonda? ¿Cunquequidën ishacunaid isnuecta nidtionda? Padenquio. <sup>8</sup> ¿Dashcute bēdaidquio dasiuidaid isnuecta nidtionda? Padenquio. Ic-sactsēcquid Uan dasiuidpondash. Dashcute bēdamboshē icquid dasiuidquido ancanquidën shubu dapan tabadquido nec. <sup>9</sup> Ad icnuc ¿atotsi

quenuec nidonda? “Naden naindambi,” quequin Nuquin Papan chiaid chuibenecquid chuisho tantianuec ma mibi nidondac. Adec Nuquin Papan oncamiaidquio Uan nec.<sup>10</sup> Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic.<sup>11</sup> “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi naban-sho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac.<sup>12</sup> Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac.<sup>13</sup> Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada adopondash? Padenquio. Ëndenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic.<sup>14</sup> Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquio Edias cuëmëdquid choendac,” quequin Ediasbimboecquid Uan chote chuipampic. Bëdamboen tantiaquin: “Nuquin tsusedpa Ediasbimboecquid Uan nec,” mimbi catsiac.<sup>15</sup> Bëdamboen tantiaquidën adembidi tantiatsiash —quepondash Esus abi datsidadquido chiec.

<sup>16</sup> Aden chuisho tantiash chieshtoshobien Esusën chuipondash naden. —Nuquin Papan chiaid tantienquio icquido yec nëmbo icquido ¿midapadquidoen nec? Bacuëbo nëishnanacbitsëcquieci mibi iquec. Bacuëbo: “Ëmbi chiacpadomboen nanuna,” queuidash ambi chiacpadomboen aton utsibon nainquio icsho isash nëishash chushcananquid.<sup>17</sup> “‘Cuëdënuna,’ queuidbosh ëbi cuëdënubi ma mibi cuëdënenquio icboc. ‘Sedenquenuna,’ queuidbosh ëbi sedenquenubi ma mibi sedenquenquio icboc,” quetsash bacuëbo nëishnanacbitsëcquieci ma mibi iqueyoc. Adec nëishëmënenquido yec icsambo ma mibi iqueyoc.<sup>18</sup> Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nëishash: “Ëmbi nacpadomboen naisa nec. Podobitsi icsa dapuedashien nechitec,” mibi quepondac.<sup>19</sup> Èbien nuquin matsesën piachamboen pequid nec. Adembidi actequid acquid nebi. Adsho isash nëishun ëbitsen icsamboen chuishunquin: “Petuïdi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimbi ëbi capec. Padnuen bëdamboen tantiaquidën Nuquin Papan chiacpadomboen nasho isun Uambëdta ëbi: “Bëdambo iquec,” caindac —quepondash Esus abi chieshënquido chiec.

*Shubu dadpen icquidën tabadquido cuidte chiaid*  
(Duc 10.13-15)

<sup>20</sup> Adshumbic Esusën padpiden chuipondash. —Nëbi shubu dadpen icquid shubu dadpen icquidquien comapenen tantiaquid icquin dadpen

nabanquin ismebeniombi. Aden ismiac: “Icsaboedi bēdamboec tabadtiadquio iquebi,” quetiadquidi chieshec adenquio iquec —queshun Esusēn naden chushcapondash. <sup>21</sup> —Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ēmbi aido ismebocpadomboen ismiac isadaidpembo cuidadenguio ictsempampic. Aden ismiaqui: “Ai, icsapobi,” quiash shubibudequi icsainquio yec ēnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido adtsempampic. <sup>22</sup> Nuquin Papan matses abitedi cuidte ushēn: “Nadatiambo icquin nabanquin ismiacmaido nec,” queshun Tido caid yacnocquido Sidon caid yacnocquidobēdta bēdiactsēc cuidendac. Adoshombic: “Comapenen tantiaquin ismiaqui tantienquio icquido nec,” queshun Codasin caid yacnocquidobēdta Betsaida caid yacnocquido comapenec sidquenuc cuidendac. <sup>23</sup> Adembidi nēmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquio yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ēmbi mibi ismebocpadomboen ismiac aidon abi icsaid ēntsempampic. Abi icsaid ēnsho Nuquin Papan cuidenguio ictsempampic. Cuidenguio yac nēbi aton matses abi ictsiash. <sup>24</sup> Nuquin Papan matses abitedi cuidte ushēn: “Comapenen tantiaquin ismiacmaido nec,” queshun Sodoma caid yacnocquido bēdiactsēc cuidendac. Nuquin Papan chomiaid icquin ēmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusēn chushcapondash.

*Esusēn dayacquiobimboecnuc icmete chiaid*  
(Duc 10.21-22)

<sup>25</sup> Adshumbic Esusēn Nuquin Papa chuipondash. —Mibi bēdamboshē iquec, Papa. Mibi yacnocquidotedishun Icbombo yec nidaidēn tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ēbi tantiamiabi iquec. Mimbi tantiamiac nēidon ēbi tantiec. Aden mimbi bēdamboen naic. <sup>26</sup> Mimbi tantiacpadomboen mimbi bēdamboen naic. Mibi bēdamboshē iquec, Papa —quequin Esusēn Nuquin Papa chuipondash.

<sup>27</sup> Adshumbic abi datsidadquido chuipondash. —Nuquin Papan ambi tantiaidtedi ēbi chuimec. Ēmbi naboedbēdta ēmbi nate abitedi con Pan ambentsēqui tantiec utsibon tantienquio icnuc. Adembidi Nuquin Papan natebēdta ambi naboed abitedi ēmbentsēqui tantiembi. Aden Nuquin Papa tantiaquin: “Nēidtedi matses bēdamboen tantiamembi,” queshun: “Nuquin Papa nadquio iquec,” quequin tantiamembi. <sup>28</sup> Ēbi tantiatata. Dayacquio yacimboecnuc mibi bēdambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidēn ēbi tantiaisho Nuquin Papa yacno puduedtequid mibi icmembique. Ēbi tantiatata. <sup>29</sup> Con Icho ēbi cata. Con yuambo icquin ēmbi chiacpadomboen nasho mibi bēdamboen isquin dayacquio yacimboecnuc mibi bēdambo icmembique. Ancanesambo yec bēdambo icquidini neque. Con Icho ēbi cata. Adsho mibi bēdambo icmembique. <sup>30</sup> Mibi ancainquio icquin dayacquio yacimboecnuc bēdamboen mibi tabadmembique. Con Icho ēbi cata —quequin chuipondash Esusēn.

## 12

*Esusbéd icquidon petsēcsho istuidshun chushcaid*  
(*Mad 2.23-28; Duc 6.1-5*)

<sup>1</sup> Adshumbic chonoadtemaid ushèn Esusbéd capucuenequin tied matanquin bundotsēcshun tiedèn caniquid èshchicshun petempi petsēccondambi. <sup>2</sup> Pesho istuidshumbini con tsusedpabon chiampid namequido padiseyobon: —Is. Mibéd icquido chonoadtemaid ushèmbi chonoadeque —capondash Esus chuiquin.

<sup>3</sup> Adoquien Esus: —Ma icsapenquio icpayoc. ¿Nuquin tsusedpa Dabidèn bundoshon ambi petemaidquio pepampid chuiquin dada uapampid isamboda ictio? <sup>4</sup> Aidèn Nuquin Papa tabadte shubu uashunaid abi puduedtemaidèn puduedshun ambi petemaid pan sanaid istuidpampic. Aid panèmpi nèish yua abided unès uaquidon petequid nepampic. Aid panèmpi bedshun abéd icquidobèdtan Dabidèn pepampic. Aden nuqui bédambo icquid caidèn ambi natemaidi napampic. <sup>5</sup> Adembidi chonoadtemaid ushèn natemaid chiaid niacquimbi nèish yua abided unès uaquidon aid ushèmbi Nuquin Papa tabadte shubu uashunaidèn puduedshun nacnendenepec. Nuquin Papan chiacpadomboen naiqui icsainquio icpec. <sup>6</sup> Nuquin Papa tabadte shubu uashunaid tantiaquin adopec. Aid shubu bédapabi icnuc bédamboshè icquid nebi. <sup>7</sup> Nuquin Papan naden chiaid mimbi bédamboen tantienquio iquec.

“Èmbi chiacpadomboen abentse-abentsen mimbi naic.

Adoquimbi èmbi chiaid utsi niaquec mimbi icsaido caido mimbi bédamboen istiapimbo iquec.

Adsho isun: ‘Mibi bédambo iquec,’ catiapimbo iquebi.”

quequin Nuquin Papan chiaid bédamboen tantiashun èbéd icquidon bédamboen nasho mimbi chushcainquio ictsenoc. <sup>8</sup> Tantia. Nuquin Papan chomiaid icquin chonoadtemaid ushè èmbi chiampid icnuc èmbi tantiacpadomboen aid ushèmbi èbi tantiaquido namembique —quepondash Esus èmbi petsēcsho istuidquido chiec.

*Mèicsatsaid bédamiaid*  
(*Mad 3.1-6; Duc 6.6-11*)

<sup>9</sup> Adanec nidec Nuquin Papan chiaid chuibante shubun puduedshun <sup>10</sup> isaquien mèicsatsaid icpondash. Adnubien padiseyobon: —Chonoadtemaid ushèmbi bédamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —qeshun Esus chuituidpondash. —¿Nadquid chonoadtemaid ushèmbi matses bédamequinda Nuquin Papan chiaid niacpec? —caquien <sup>11</sup> Esusèn: —¿Ada min nèish yua obeca caid icpec? Adquid chonoadtemaid ushèn shècuè uquèduc ampaèdacsho istuidshun ¿chiquenquioda mimbi icpatsia? Ai, mimbi chictsiaç. Chonoadtemaid ushèmbi mimbi chonoadquin chicpatsiaç. <sup>12</sup> Aden min obeca bédiaçsèc tantiec mibi bédapabi icnuc matses tantiaquioquin nashunquid bédamboshè ictsiash. Nadquid chonoadtemaid ushèmbi matses aden bédamboen nashunquidèn Nuquin Papan chiaid niaquenquio ictsiash —quequin Esusèn abi icsamenu caquido chuipondash.

<sup>13</sup> Adotanquimbien Esusèn mèicsatsaid chuiquin: —Mècueta —cac mècuc bédampondash aton mèdante abiuc daèdi bédambo yec. <sup>14</sup> Adsho isashien abi chieshènquido padiseyobo nèishquiopac caondash. Adec



nëishanec nidash aton matses utsibobèd: —Cuesunequimbien Esus ictiad —quecuededpac caondash.

*Esusën nate ëndenquimboshë chiampid*

<sup>15</sup> Adnubien Esus: —Ëbi cuesunetiadquoio iquec —quianec auëshquiobi puduanec nidpondash. Nidsho isumbien matses dadpenshun tsibanampondash. Adshumbic aidon bëaid daicsaidotedi bédamebampondash.

<sup>16</sup> Adshumbic ambi bédamiaiido chuiquin: —“Bédamioshi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus. <sup>17</sup> Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

<sup>18</sup> “Ëmbi chomiaid ëmbi chiacpadomboen naquidquoio nec.

Aid tantiaquiec bédambo iquebi.

Con Mayan bédambo icquid abëdi tabadmembli.

Adoac ëmbi bédamboen iste isadaidbobèdta matses utsibo abitedi bédamboen chiendac.

<sup>19</sup> Chushcanante bunenquoio yec ancanenquoio iquendac.

Chuiquid dapa ictiapimbo iquendac.

<sup>20</sup> Icsambo icquido yec shubiquido yec natiaic tabadquido yec daicsaido yec quequidon abi bëdiactsëc tantiabentsëcsho bédamboen isquin bédamboen tantiamendac.

Nuquin Papan chiacpadeccuidte ushë choabi icnuc adoendac.

<sup>21</sup> ‘Nuquin Papan tantiacpadomboen matses bédamboen namendac,’ queshun nidaid utsi-utsiec yacnocquidon matses dadpenshun aidi tantiendac.”

quequin Esusën bédamboen nate chuipampic Isayasën.

*Podobitsi icsan namiaidi Esus nec, quiaid*

*(Mad 3.20-30; Duc 11.14-23; 12.10)*

<sup>22</sup> Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa nepondash. Isenquoio yec onquenquoio icshobien Esusën bédamepondash. Adoac isbenequi onquiampondash. <sup>23</sup> Adsho isashien Esus datsidadquido: —Is. Comapenen tantiaquin nabanquidquido nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquoio Nuquin Papan chomiaidien nechitec —quecuededpondash.

<sup>24</sup> Adsho tantiash Esus chieshënquido padiseyobo: —¿Aidta nedic? Ma aidpenquoio neyoc. Betsibu caidën podobitsi icsan icbon namiaid icquimbien Esusën podobitsi icsa cuemehitec —quequin otacquoio tantiapänëdash.

<sup>25</sup> Adshobien Esusën aidon otacquoio tantiaid ambembi tantiashun naden chuipondash. —¿Adquidënda aton yuabi cuemepatsiash? Padenquoio. Chuiquid dapan aton yuabo nëishtanquin chushcac cuësh-cuëshëdec aton yuabo uesadec nietsiash. Aido nibëdnuc chuiquid dapa ictiapimbo ictsiash. Adecbidi shubu dadpen icquidën tabadquido chushcananash cuësh-cuëshëdec niquian shubu dadpen icboedi daëdpactsëc yanec. <sup>26</sup> “Betsibu caidbidi Satanas caidëmbi namiaquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquoio ictsiash. Satanasën cuemiac aibëdi aton yuabo cuësh-cuëshëdtsiash. Adnuc Satanas aton ichopenquoio yantsiash. <sup>27</sup> Mibëd icquidon podobitsi icsa dapuduedaid

cuemiac caosh. ¿Cuemesho isun mimbi ëbi chiacpadomboen: “Bet-sibu caidën namiaquien nachitec,” cainda ictio? Ma mimbi padenquo icpaboc. Mimbi adoac: “Mimbi icsamboen chiec,” quetsenosh podobitsi icsa dapuedaid cuemequido mibëd icquido. <sup>28</sup> Nuquin Papan Mayanën namiaquimbi podobitsi icsa cuemioc. Ëmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

<sup>29</sup> Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icbo uidënquo icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbien comapenen tantiaquidquo nec. Uidën uacbimboen nadatiambo icquin nabanquin aton yua cuemepombi.

<sup>30</sup> Ëbi con icbo cainquo icquido Satanasën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

<sup>31</sup> Adshumbic nadentsen chuipondash. —Nuquin Papan chiaid niacniacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquo icsho Nuquin Papan bëdamboen istiapimbo iquec.

<sup>32</sup> Ëbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquo icquin icsamboen tantiasho adembidi ënenquo icquin bëdamboen istiapimbo iquendac —quequin abi chieshënquido Esusën chuipondash.

*Bëdambo icquid nec, quequin tantiatie chiaid*

*(Mat 7.15-20; Duc 6.43-45)*

<sup>33</sup> Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. <sup>34</sup> Ma mibi adquidpenquo neyoc. Nis-ibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. <sup>35</sup> Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc. <sup>36</sup> Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. <sup>37</sup> Adoac abimbo chiec: “Ai, bëdamboen nadeniombi,” quesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” quesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

*Padiseyobon: Ëbi isme, quequin Esus chiaid*

*(Mad 8.12; Duc 11.29-32)*

<sup>38</sup> Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaidini nec,” quequin ëbi ismequin

nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

<sup>39</sup> Adoquien Esus: —Padi. Nuquin Papan chiaid niac-niaquec mibi icsamboshë iquec. Ëbi tantiate bunenquio icquimbi mimbi: “Ëbi isme,” ëbi capec. Adsho nëbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. <sup>40</sup> Chishcambiecquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. <sup>41</sup> Ëbi tantienquio yec mibi icsambo iquec. Padnuen Nuquin Papan chiaid Onasën chuibanac shubu dadpenquio icquid Ninibe caid yacnocquido badedi icsainquio yec ënëdpampic. Nuquin Papan chiaid chuibanquid Onas bëdambo icpampic. Ëbien bëdamboshë icquidquio nec. Adquid icquin nadatiambo icquin dadpen ismiaqui mimbi ëbi tantienquio iquec. Aden ëbi tantienquio icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. <sup>42</sup> Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidënsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquio Sadomonën bëdamboen chuipec,” quepampic. Ëmbien abitedi tantiaquid icquin nadatiambo icquin ismeuidpoc. Adoqui mimbi tantienquio icpec —quepondash Esus abi chieshënquido chiec.

*Abi nianaid podobitsi icsa dapuedoaid*  
(Duc 11.24-26)

<sup>43</sup> Adshumbic naden Esusën chuipondash. —Icsaquido mibi nec. Podobitsi icsa dapuedaidbimboecquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibëdacno yuec capucuen-capucuenec. Adtanequi: “Ëbi icbocnobidi dapuedoaid nidebi,” quianec choec. <sup>44</sup> Chonobi ambi niamboed matses: “Ëbi dapuedaid podobitsi icsa nibëdnuc bëdambo iquebi. Adquid chomeoatiapimbo iquebi. Ëmbimbo naic bëdamboec tabadquidquio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquio nëid nec,” quianec <sup>45</sup> abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedaid yec ënden icsambo icboedi aido dadpen dapuedaid yec buëdanquiec aid matses icsamboshë yanec. Adquio mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

*Anibëdi Esusën utsibo choaid*  
(Mad 3.31-35; Duc 8.19-21)

<sup>46</sup> Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi <sup>47</sup> utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien badedi nidenquio yec <sup>48</sup> Esus: —Utsitsen con ta caimbi. Adembidi utsitsen

con utsi caimbi —quetanquin <sup>49</sup> abèd icquido mèdquin ismepondash. — Nèid èbèd icquido con utsibo caimbi. <sup>50</sup> Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

## 13

*Piacbo èshè siaid chiaid*  
(*Mad 4.1-9; Duc 8.4-8*)

<sup>1</sup> Adtanec nidec chian budash cuèmano tabadtuidpondash.  
<sup>2</sup> Tabadtuidsho isash matses dadpenquo cho-choash tsucustucustsécquo yec Esus datsidadpondash. Adsho istanec cano dapa antabèdtoash cuèma anoentséc canon nuadquin Esusèn chuipondash cuèmano tabadquidon tantianubi.

<sup>3</sup> Adshumbic abi tantiate chuinen naden ompoacbimboen chuipondash. —Piacbo èshè siaid utsi-utsiec bédamboec caniec. Utsi-utsiec padenquo. <sup>4</sup> “Abitedi ansecanu,” caidi utsi-utsiec shècuè nibèdacno paèdec. Paèdacsho paèdaid uicchunèn chequid. <sup>5</sup> Èshè utsibic nidaid tsasimbo yacno siac badedi dèyucuidash <sup>6</sup> aton tapun nidaidèn puduedenquo icnuc ushè chènquequidèn badedi unèsquid. <sup>7</sup> Èshè utsibic nisanquid diadacno siaid dèyucash canidouidsécsho nisanquidèn dayunac unèsquid. <sup>8</sup> Padnuen èshè utsi-utsiec nidaid bédanquo siac dèyucash caniash dadpenquo èshèquid. Utsi-utsiec 100ted èshèquid icnubi utsi-utsiec 60ted èshèquid icnuc utsi-utsiec 30ted èshèquid —quepondash Esus.

<sup>9</sup> Adashic: —¿Min pabiate shècuè nibèdquietta iquec? Èmbi chuiboed bédamboec pausudta —quepondash Esus.

*Ompoacbimboen chiec nebi, quiaid*  
(*Mad 4.10-12; Duc 8.9-10*)

<sup>10</sup> Adsho tantiaishun abèd icquidon Esus chuipondash. —¿Atotsieshun ompoacbimboen nèid matses dadpen chie? —caquien <sup>11</sup> Esus nadpondash. —Utsibo tantiamenquo icquin Nuquin Papabèd tabadte chuiquin nèbi mibiuidtsèqui tantiamembi. <sup>12</sup> Nuquin Papa tantiatadquo icquidèn èbi tantiaisho bédamboen tantiamendambi. Nuquin Papa tantiauidtsècquidèn èbi tantienquo icsho èmbi ompoacbimboen chiac tantienquo ictsiash. <sup>13</sup> Ompoacbimboen aido dadpen chuibanembi. Èmbi naid isun èbi tantienquo iquec. Èmbi chuisho pamumèdacbimboen tantienquo iquec. Adsho aidon tantiatipimbo icnuc chiembi. <sup>14</sup> Nèidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

<sup>15</sup> Ai, èmbi chiaid tantiatipimbo iquec.

Ushacbimboen tantienquo yec pamumèdacbimboec  
chieshèmènquidombo iquec.

Èbi tantiate bunenquo iquec.

Èmbi chiaid tantiaquidombien paposhquiacbimboen bédamboen tantiabentsiash.

Pausunacbimboen tantiaishun èmbi chiacpadomboen natiadquo yansho aton chiesh bédametsiambi. Aton chiesh bédamete bunenquo iquec,”

quequin Nuquin Papan dada uamepampic —quepondash Esus abéd icquido chiec. <sup>16</sup> Adashic aidobidi chiec: —Isayasèn chiacpadomboen utsibon ëbi tantienquo icnubi mimbien ëbi tantiec. Ëbi isec mibi tabadec. Ëmbi chuibansho tantiash: “Ai, abimbo caic,” quec mibi bédambo iquec. <sup>17</sup> Ëbi chote chuipampidobédtan bédamboec tabadquido dadpenshun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatiadquio yequi tantiambobi unëspampic —quepondash Esus.

*Piacbo siaid sebadënquo chiaid*

(Mad 4.13-20; Duc 8.11-15)

<sup>18</sup> Adashic abi onquec: —Tantia. Ëmbi piacbo ëshë siaid quequin chuibod sebadënquo mibi chuinu. <sup>19</sup> Nuquin Papabéd tabadte chiaid piacbo ëshë siaidbimboecquid nec. Nuquin Papan chiaid chiaqui tantiadenquo icsho Satanasèn nac badedi bëshumpec. Uicchunën piacbo ëshë paëdaid badedi chiacbimboen adopec. <sup>20</sup> Utsibic Nuquin Papan chiaid chiaqui bëdiactsëc tantiauidtsash: “Bédambo iquec,” quec cuishonqueuidsec. <sup>21</sup> Adsho: “Nuquin Papan chiaid tantiaquid nec,” qeshun utsibon chieshënac badedi chieshtoshon tantienquo yanendac. Piacbo ëshë tapunuidtsash unësacbimboen adoendac. <sup>22</sup> Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unësacbimboen adoendac. <sup>23</sup> Padnuen utsibon tantiate nidaid bédan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquo icquin tantiabudec bédamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusèn.

*Ëshë icsambo icquid seuanaid chiaid*

<sup>24</sup> Adshumbic Esusèn naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedën caniquid pete adosbiecquid icbon siac caondash. <sup>25</sup> Adanec nidambic inchëshëmbi choshon chieshëmëncquidën ëshë icsambo icquidtsen daëd uain seuanaic caondash. <sup>26</sup> Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. <sup>27</sup> Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” qesho tantiash: “Icsambo icquidbëd tancandaëdec canidopacbob. ¿Mitsipaden sio?” quequin yuabon icbo chuipac caondash. <sup>28</sup> Adoquien: “Chieshëmëncquidëmbien seuanchitash,” cac: “¿Chicshunetanquindambi icpe?” yua qesho: <sup>29</sup> “Padi. Petebëdi chiquidtsiash. <sup>30</sup> Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusèn chuipondash.

*Esus tantiaquido dadpen yante chiaid*

(Mad 4.30-32; Duc 13.18-19)

<sup>31</sup> Adshumbic abi tantiaquido dadpen yante tantiamenuen Esusèn naden chuipondash. —Cuëte bacuë ëshëmpi <sup>32</sup> pistsëcquidi nuamboshë

caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac —quepondash Esus.

*Abi bëdamboen tantiate Esusën chiaid*  
(*Mad 4.33-34; Duc 13.20-21*)

<sup>33</sup> Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactëc nami uashun utsibëdta daëd uain cabiunac abichobi batambo yanec. Adembidi ëbi bëdiactëc tantiatsëcboedi ëmbi chiaid tantiash ëbi bëdamboen tantiaquid yanendac <sup>34</sup>—quequin Esusën chuipondash. Sebadënquo chienquo icquin ompoacbimboenuidi Esusën chuipondash. <sup>35</sup> Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquo chienquo icquin ompoacbimboenuidi chuibanendambi. Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambo-bidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

*Ëshë icsambo icquid seuanaid sebadënquo chiaid*

<sup>36</sup> Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmëncquidën ëshë icsambo icquid siaid nec,” quequin mimbi chuiboed en sebadënquo chui, Icho. Tantianu. ¿Atotsi chuitiadquo icquin aden chio? <sup>37</sup>—caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquo tantiamequin matses bëdambo icmequid nebi. <sup>38</sup> Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshëncquid Satanasën yuaido icsambo icquid siaidbimboecquid nec. <sup>39</sup> Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquo iquec. Adsho badedi cuidenquo icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. <sup>40</sup> Icsambo icquid tsindoshon nëdëncacimboen Nuquin Papan cuidte ushëmbi icsambo icquido cuidendac. <sup>41</sup> Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac <sup>42</sup> bedshun chian anëdënquiacno nësecaindac. Adoac natiaic mëyadbudec sidquequiendac. <sup>43</sup> Padnuen ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata —quepondash Esus.

*Nuquin Papabëd tabadte bunquiota, quiaid*

<sup>44</sup> Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquo icquid

istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” qeshun piucquid ompoampid bedpac caondash. Adomboen matsesën Nuquin Papabéd tabadte bunquin aton nauidi nainquoio icquin Nuquin Papan chiacpadomboenuidi nac bédambo ictsiash.

<sup>45</sup> Tantia. Casëdu bédaidquoio bunaidtsen mibi chuinu. Dadan casëdu bédaidquoio bunquin bednuen nibënenepac caondash. <sup>46</sup> Adshun bédaidquoio istuidash: “Nadquid utsi nibëdec,” quiash comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabéd tabadte bunquin matsesën ëbi tantiaquiac bédambo ictsiash —quepondash Esus.

*Nuquin Papan cuidte ushë Esusën chiaid*

<sup>47</sup> Adshumbic Esusën naden chuipondash. —Tantia. Mibi chuinu. Nuëcquid nibedachimboen naindami. Isadaidbon nuëcquid dadpenquoio bedte nëshaid dapa acte nënequin <sup>48</sup> nëshaid cubu-cubuctsëcquoio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. <sup>49</sup> Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedachimboen matses bédambo icquido Nuquin Papa yacno nidmequimbi <sup>50</sup> icsambo icquido chian anëdënquiacno nësecaindac. Adoac natiaic shubiquiendac —quequin Esusën Nuquin Papan cuidte chuipondash.

<sup>51</sup> Adshumbic: —¿Ada ëmbi chuiboedtedi tantie? —caquini: —Ai, tantiami —quepondac. <sup>52</sup> Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacbimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquoio mimbi chiendac —quepondash Esus.

*Nasaded yacno Esus nidad*

(*Mad 6.1-6; Duc 4.16-30; Uan 4.44*)

<sup>53</sup> Adanec auëshquiobi nidequi <sup>54</sup> abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? <sup>55</sup> ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. <sup>56</sup> Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquoio neyoc —quequin <sup>57</sup> Esus chieshënquin tantienquoio icpondash.

Adsho tantiashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuibansho tantienquoio icquid —quepondash Esus. <sup>58</sup> Adshun nadatiambo icquin nabanquin daëdpactsëc ismetsëccondash: —“Nuquin Papan chomiaidquoio nec,” quetiapimbo iquéc —qeshun.

## 14

*Uan acten mentoanquid**unēs uaid**(Mad 6.14-29; Duc 9.7-9)*

<sup>1</sup> Adnubien ancaquidēn Edodes caidēn Esusēn comapenen tantiaquin nabanaid chuisho tantiapac caondash. <sup>2</sup> Adshumbic aton yuabo chuipac caondash. —Uan pado acten mentoandened nepash icnui. Ēmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

<sup>3-4</sup> Edodesēn Uan cuesuniac caondaïd chuinu. Tantia. Uanēn: —Mimbi bedaid Edodias caïd min chidopenquio nec. Min utsi Uedipe caidēn chido bedshun Nuquin Papan chiaïd mimbi niaquec —cadoniaquien Edodesēn chieshtoshon uidēn uameshun Uan quēnēn nauedmepac caondash.

<sup>5</sup> Adshumbic Uan cuesunetiadquio icquimbi aton matses: —Nuquin Papan chiaïd chuibanquidquio nec —quesho tantiashun aïdo dacuēdēnquin Uan badedi cuesunengquio icpac caondash.

<sup>6</sup> Adshumbic Edodesēn: —Ēbi tishaid ushē nec —queshun matses dadpen aton shubun puduedmeshun pemepac caondash. Adnubien ambi inaidēn champin Edodesēn pemiaïdo baïdaquin ismepac caondash. Adsho isumbic Edodesēn: —Bēdamboenshē mimbi naic —queshun <sup>7</sup> naden chuipac caondash. —Tantia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quïash muatiapimbo iquebique. En ēbi chui —capac caondash Edodesēn. <sup>8</sup> Adoquien champin aton tita chuitampac caondash. Chuitanec choshon anin chiaïd chuituidpac caondash. —Uan acten mentoanquidēn mapi butetanquin pada-padaïd dapan ananshun baded ēbi mene —capac caondash champin Edodes chuiquin. Uanēn —Min bēnē nianshun utsi bedmec mibi icsaic —cac champin tita Uan cuesunemete bumpac caondash.

<sup>9</sup> Adoquien Edodesēn: —¿Atotsi quepequini ado? ¿Adoenquio ictiadtsimbi icpoba? —quequin ambi chuïboed niactiadquio icpac caondash. —Ēbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

<sup>10</sup> Adoac quēnēn tsadacnobi Uan mapi buteshun <sup>11</sup> mapi pada-padaïd ananshun buanshun champi menepac caondash yuabon. Adoquien champin ani menenun buampac caondash.

<sup>12</sup> Adnubien Uanbēd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

*Comapenen tantiaquin 5000tedi pemiaïd**(Mad 6.30-44; Duc 9.10-17; Uan 6.1-14)*

<sup>13</sup> Nidshumbic: —Mibi acten mentondaïd mapi butiaccosh —catuidpondash. Adsho tantianec cano antabēdtoshon chian potïash pudundoanec matses nibēdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dēquiadec podqued nidquidēn nidanepac caondash.

<sup>14</sup> Adnubien Esus matses nibēdacno istanec chian yacno choapondash. Choashun isquien abi cainec matses dadpen tabadec. Adsho isun aïdo tantiaquidquio icquin daicsaidotedi bēdamebampondash.



<sup>15</sup> Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien  
<sup>16</sup> Esusën: —Padi. Ma tabadnu. Mimbibi peme —capondashi.

<sup>17</sup> Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. <sup>18</sup> Adsho: —Aidtedtsëqui beccho —cac meniondambi.

<sup>19</sup> Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

<sup>20</sup> Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsëcquio iquec pete cuësh-cuëshaid napi uaid. <sup>21</sup> Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid*  
*(Mad 6.45-52; Uan 6.16-21)*

<sup>22</sup> Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. <sup>23</sup> Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

<sup>24</sup> Adnubien chian dapa potequi abëd icquidotsen inchëshpondash. Chian nënantanquio yanubi cunquetuidpondash. Adnuc acte comapenec tēcguasquiampondash uncadenquio yec. Comapenec acte ishcnudnuc cano mentoadtiadpambo icpondash.

<sup>25</sup> Adnubien badiadte anoentsëqui acte bëntse Esus chopondash.  
<sup>26</sup> Acte bëntse chosho isashini: —Podobitsi nec —quiash dacuëdtanec sidquecuededpondac. <sup>27</sup> Adshobini Esusën: —Ëbien neque. Dacuëdenda —capondash. <sup>28</sup> Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

<sup>29</sup> Adsho tantiashun Esusën: —En cho —caquien Petedo canonoeësh budanec acte bëntse Esus bëquedbanec niduidtsëccondash. <sup>30</sup> Esusuidi isec bëdamboec niduidtsequi acte comapenec tēcguasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien <sup>31</sup> Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

<sup>32</sup> Adtanec Petedobëdi cano antsadtonobien cunqueboedi cunquenquio yampondash. Actetsen tēcguasquenquio yanondash. <sup>33</sup> Adsho isun cano antabëdquidon: —Mibi bëdamboshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bédamiaid**(Mad 6.53-56)*

<sup>34</sup> Adashic chian potiasch Quenesaded yacno pudundopondash. <sup>35</sup> Pudundoshon isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. <sup>36</sup> Bë-bëshumbic: —Dashcuteuidtsëqui mishashi bédantsiash —queshun Esus chuituidquin: —Min dashcute cuëmano daicsaido mishme —cac mishmiaqui bédampondash abitedi.

**15***Padiseyobo icsaid Esusën chiaid**(Mad 7.1-13)*

<sup>1</sup> Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus ituidpondash. <sup>2</sup> Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc —quepondash Esus chieshënquido.

<sup>3</sup> Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. <sup>4</sup> Tantia. Mibi chuinu. “Titabëdta papa chieshënenquo icquin bédamboen tantiata,” quequin Nuquin Papan chiampidquo ma mimbi niacpaboc. Adembidi: “‘Con pa unëspashun,’ quec chieshëmënquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. <sup>5</sup> Aid niacquin nuquin tsusedpabon ambe-mbi chiaidien mimbi chiec. “Anibëdta amë naden cudasënac bédambo ictsiash,” mibi quepec. “‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën <sup>6</sup> cudasënac bédambo ictsiash,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. <sup>7</sup> “Nuquin Papa tantiaquidquo nebi,” quec muaquid mibi nec. Èndenquimboshë Nuquin Papan chuimiach nuquin tsusedpa Isayas caidën mimbi icsamboen tantiatie chuiquin dada uapampic naden.

<sup>8</sup> “Isadaidbo: ‘Nuquin Papambo tantiembi,’ quepec.

Adboedëmbi ëmbi chiaid niacquin ëbi tantienquo iquec.

<sup>9</sup> “Ma Nuquin Papan ëbi bédamboen isnu,’ queboedëmbi ëbi bédamboen tantienquo iquec.

Èmbi chiaidquo namenquo icquin aton matsesën chiaiduidi namepec,” quequin Isayasën Nuquin Papan chiaid dada uapampic —quequin Esusën abi chieshënquido chushcapondash.

*Ana shëcuënuësh choaid chiaid**(Mad 7.14-23)*

<sup>10</sup> Adshumbic abi isec datsidadquido ompoacbimboen chuipondash. —Tantia. Mibitedi chuinu. <sup>11</sup> Ana shëcuën puduedaidën matses icsaten mimbi dampec. ¿Adquidënda matses icsapec? Padenquo. Ana shëcuënuësh choaidëmbien matses icsatsiash —quequin Esusën chuipondash. <sup>12</sup> Adnubien abëd icquidon: —Mimbi aden chuiboed

tantiashun padiseyobon mibi chieshënosh, Icho —caquien: <sup>13</sup> —  
Dacuëndenda. Icsa bescatanquin tsindoshon nêdêncacimboen ambi  
tantiambi yaido ambembi chuiquido Nuquin Papan cuideque.  
<sup>14</sup> Dacuëndenda. Padiseyobo bëshuaidbimboec icquido neque. Bëshuaidên  
aton matses bëshuaid utsi bêdamboen buantiapimbo iquec. Buanuec abi  
shêcuë ampaëdtsiash. Adembidi Nuquin Papan chiaidpenquio namequin  
aton matses bêdamboen tantiametiapimbo iquec —quepondash Èsus  
abêd icquido chiec.

<sup>15</sup> Adshobien Petedon: —Mimbi ana shêcuënuësh choaid quequin  
chuiboed tantiambo iccombique. Aid sebadênquio chui. Tiantianu, Icho  
—caquien: <sup>16</sup> —¿Tantiamboda icco? <sup>17</sup> Chuinu. Tantia. Ana shêcuën  
puduedaid mimbi peboed min pucun uedoash chimute shêcuënuësh  
choec. Adquidên Nuquin Papan chiaid niacmenquio iquec. <sup>18</sup> Matses  
onquaiidimbi ana shêcuënuësh choaid caoc. Abibi uquêducuësh on-  
quec: “Adoembi,” quequin otacquo tantiaquin naic matses icsatsiash.  
<sup>19</sup> Icsambo icquido yec: “Ai, adoembi,” quequin otacquo tantiashun  
Nuquin Papan chiaid niactsiash nadquidên. Nêidic unês uanquid. Nêidic  
aton chidopenquio chudquid. Nêidic aton bënëpenquio chudmequid.  
Nêidic aben uequid. Nêidic ampequid. Nêidic muaquid. Nêidic icsamboec  
chuishumênquid. <sup>20</sup> Adquidtedi: “Ai, adote bunebi” quequin otacquo  
tantiash icsaquid nec. Padnuen penush mēpamēdenquio icquin Nuquin  
Papan chiaid niaquenquio ictsiash —quepondash Esus abêd icquido  
chiec.

*Isadaidpembo chidon Esus tantiaid*  
(Mad 7.24-30)

<sup>21</sup> Adanec auëshquiobi Esus nidpondash. Shubu dadpen icquid Tido  
caid anoentsëqui datambidanec choec shubu dadpen icquid utsi Sidon  
caid anoentsëqui chopondash.

<sup>22</sup> Adnubien anocquid cananeyabo chidon Esus cuëntuidpondash.  
—Tsusedpa Dabidên tsyuecquid Nuquin Papan namiaid icquin ëbi  
bêdamboen ista. Con champi podobitsi icsa dapuduedaid yec natiambo  
iqueque. Con champi bêdameta —caquien <sup>23</sup> Esusên êcbedenquio icpon-  
dash. Êcbedenquio yaqui chidon tsibanbanquin cuënbampondash. Adsho  
tantiashun Esusbêd icquidon: —Chieshanquiec cuêdpeque. Cuemepa —  
caquien <sup>24</sup> Esusên cuemenquio icquimbi aid chuiquin: —Nuquin Papan  
chiacpaden Isadaidbo matsesba Nuquin Papa bêdamboen ismete tanti-  
amenuec nebi. Bênudacimboec icquin Nuquin Papa tantienquio icsho  
aidoba tantiamenuec nebi —quepondash Esus.

<sup>25</sup> Adsho tantiash nidenquio yec chido cuêdboed Esus ismequin  
danëshên sebudtsec: —Ëbi nashunta, Icho. Con champi bêdameta —  
queshobien Esusên: <sup>26</sup> —¿Aton bacuëbo pemenquio icquimbi aton opa  
pemiacta bêdambo icpatsiash? Padenquio. Adembidi Nuquin Papan  
con matses caidotedi tantiamiabi utsibo ëmbi nashunac icsambo ictsiash.  
Isadaidboba tantiamenuec nebi —quepondash Esus.

<sup>27</sup> Adsho tantiashun chidon: —Ai, abimbo mimbi caic. Padnuen  
bacuëbon pequin paëdmiaid opashëmpin petsëcquid. Adembidi mimbi  
comapenen tantiaquin nabanaqui isadaidbo dadpen bêdanubi isadaid-  
pembo abentsëc tantiaquid icsho ëbi nashunquin con champi bêdameta

28 —caquien Esusën: —Ai. Ēbi tantiaquidquo mibi nec. Mimbi chiac-padec min champi bēdanendac —quesho tantianec aton shubuno nidshun isquien aton champi bēdanac Esusën chuinubi.

*Daicsaido dadpen Esusën bēdamiaid*

29 Adanec auēshquiobi nidec chian dapa Cadidia caid cuēman nidquid podquedēn nidanepondash. Adashic macuēsh dapa dectatoec poctsebi tabadtuidpondash.

30 Tabadtuidsho isun matses dadpenquo cho-choquin daicsaido dadpen Esus ismenuen bē-bēpondash. Tidinguequido yec bēshuaido yec shēquēquenquo icquido yec onquesabo yec daicsaido utsibotedi yec quenuc bē-bēpondash. Adsho Esusën bēdamebampondash. 31 Bēdamiac onquenquo icboedi onquianondash. Bēshuacboedēmbi isbenondash. Capuenquo icboedi capucuenondash. Daicsaido utsibo adecbidi bēdanondash. Adsho isquido nadpondash. —¿Adquidta ictenec? Nuquin matses isadaidbon tantiaidēn Nuquin Papan namiaid icquin bēdamepash icnui. Nuquin Papa bēdambo iquec —quepondash Esusën bēdamiaid tantiaish.

*Matses 4000tedi pemiaid  
(Mad 8.1-10)*

32 Adec tabadsho isashien Esus: —Nēido tantiac unēsquo iquec. Ēmbi nabansho isnuec choash 3tedec ushquin piac ambi bēboed pete naimēdaccosh. Ēmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash. 33 Adsho tantiaishun abēd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

34 Adoaquien Esusën: —¿Tetsi panēmpi iquec? —cac: —Sieteted ictsec. Nuēcquidēmpi daēdpactsēc ictsec —quesho 35 tantiaishumbien abi datsidadquido chuiquin: —Nēmba tabadbud —capondash. Adoac tabadbudpondash abitedi.

36 Adshumbic panēmpibēdta nuēcquidēmpi bedshun Nuquin Papa chuipondash. —Nēid mimbi uaid bēdambo iquec, Papa —queshun pete cuēsh-cuēshbantsēcshun abēd icquido menebampondash: —Pemeban —quequin. Adoac abitedimbo pemebampondash. 37 Aden pemiac abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsēcquo icnuc sandobampondambi. 38 Esusën pemiaido dadpenquo icpondash. Tambanac 4000tedi dada icpondash. Chido bacuēbobēdta tambanambo iccondambi. 39 Adashic: —Nidanec nid —quepondash Esus ambi pemebodo caic. Aido nidanenubi chian budash cano antabēdtoshon Esusën chian potepondash. Chian potiash nidaid Mactada caid yacno pudundopondash.

## 16

*Saduseyobon: Ēbi isme, quiaid  
(Mad 8.11-13; Duc 12.54-56)*

1 Pudundoanec nidshobi anocquidon abi chieshēnquidon Esus chui-tuidpondash. —“Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdta saduseyobon.

<sup>2</sup> Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquo badiadec,’ quequid. <sup>3</sup> Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiachimboen bëdamboen tantiatiadquidi Nuquin Papan nëbimbobi naid mimbi tantienquo iquec. <sup>4</sup> Icsambo icquid icquimbi mimbi: “Ëbi isme,” cadednepec. Nëbi mibi ismenquo iquembi. Nuquin Papan nuquin tsusedpa Onas chishcambiecquid dapan chebudacsho daëdec ushun ucbudmiacimboec unës uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

*Padiseyobon chiaid tantienda, quiaid*

*(Mad 8.14-21)*

<sup>5</sup> Adanec nidec chian budash cano antabëdtoshon chian poteoapondash. Chian potequien Esusbëd icquido: —Pete nianchitombi. Bëtiadquidi nepobi —quepondash. <sup>6</sup> Adshobien Esusën abëd icquido chuiquin: —Padiseyobëdtan saduseyobon naid pan bidiscametebimboecquid iqueque. Ista —caquien <sup>7</sup> tantienquo yec abëd icquido nadec onquecuededpondash. —Nuqui niamboed pete chiequi nepanui —quepondash. <sup>8</sup> Adsho ambembi tantiash Esus: —Ëbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquo. <sup>9</sup> ¿Bëshunashta mibi nepe? Pete 5tedtsëcboedi ëmbi 5000tedi pemiaidën napi uaid dadpen iccondaid ¿tantienquioda yano? <sup>10</sup> ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandboed tantienquioda yano? <sup>11</sup> ¿Aden comapenen tantiaquid icquimbidambi pete niamboed chuipadi? Padenquo. Pan bidiscamete pictsëc cabiunac pan abichobi nua bidisquiachimboecquid padiseyobobëdtan saduseyobon chiaid iquec —quepondash Esus.

<sup>12</sup> Aden chuisho tantiash abëd icquido nadpondash. —Pan chienquo icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

*Nuquin Papan Mado mibi nec, quiaid*

*(Mad 8.27-30; Duc 9.18-21)*

<sup>13</sup> Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien: <sup>14</sup> —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. <sup>15</sup> Adsho tantiashun Esusën: —Ma mimbibi. ¿tsutsi ëbi mimbi cao? —caquien <sup>16</sup> Petedo Simon caidën: —“Quidistu caid Nuquin Papan chomiaidquo nec,” caombi mibi. Aton Madombo mibi nec —capondash.

<sup>17</sup> Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquo icquin Nuquin Papan tantiamiaidquo mimbi abimbo chioc. <sup>18</sup> Tantia. Ëmbitsen mibi chuinu.

“Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yac bimboec chieshtoenquo icquid iquendac,” qeshun mibia ëbi tantiaquido chuiquid dapambo icmëndambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. <sup>19</sup> Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiec.

<sup>20</sup> Adashic abëd icquido abitedi chuioaic: —“Nuquin Papan chomi-aidquio nec,” quequin utsibo ëbi chienda —quepondash Esus.

*Abi unës uate Esusën chiaid  
(Mad 8.31–9.1; Duc 9.22–27)*

<sup>21</sup> Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidtedishun mëyanquioquin ëbi unës uamendac. Adoacsho chococac daëdec ushash uincuenendabi —quequin chuisho <sup>22</sup> tantiashun Petedon uanotantsëcquin tsadumbudshun Esus chuipondash. —Unësquo icnuc mimbi chieque. Aden chienda. Ma mibi unës uatiapimbo icpayoc —capondash Petedon. <sup>23</sup> Adoaquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquio iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquio mimbi chienquo iccoc —capondash.

<sup>24</sup> Adashic abëd icquidotedi chuioaic: —Ëbi tantiaquidon aton nauidi nainquo icquin ëmbi chiacpadomboen natsiash. Adsho chieshëmënquidon: “Unës uachitomane,” cac chieshtoenquo icquin ëbi tantiatsiash. Adquid ëbi tantiaquidquio nec. <sup>25</sup> Padnuen ëbi tantiatsëcquid: “Esus tantiasho unës uachitoshe,” quiash ëbi tantienquo yanec unësash Nuquin Papan cuidaidobëd nidendac. Padnuen chieshtoenquo icquin ëbi tantiaquid Nuquin Papa yacno tabadendac. <sup>26</sup> ¿Nuquin Papa tantienquo yec tabadecta matses bëdambo icpatsiash? Abi bunaidtedi bedquin Nuquin Papa tantienquo yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? <sup>27</sup> Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantie bëdamboec tabadquid Nuquin Papabëd tabadmequin Nuquin Papa tantienquo yec icsaquido icsano nidmëndambi. <sup>28</sup> Tantia. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

## 17

*Esus bëchamauanquiesho isaid  
(Mad 9.2–13; Duc 9.28–36)*

<sup>1</sup> Aden chiash 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchí Uan yec quetsëcñuc buanash macuësh dapa decatoash mananënquo tabadtuidpac caondash. <sup>2</sup> Tabadtuidshun isquien Esus utsiacimboec isadpec. Aton dashcutebëdi aton bëtantete ushëbimboec bëchamauanquiec yanac caondash.

<sup>3</sup> Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. <sup>4</sup> Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecñuc shubumpi uatsëcnuna, Icho. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi <sup>5</sup> abu ushu bëchamauanquiec icquidën isadenquo icnuc bëtimpac caondash. Adnubien abu ushu nënantanuëshquo Nuquin Papa onquiampac caondash. —Nëid con Madombo nec. Èmbi tanti-aidquo yec èmbi bëdamboen isaidquo neque. Nëidquo tantiata —quec dacuëdampamboec onquenubien <sup>6</sup> uinte paëdtampamboec dacuëdtanec uebudcuededpac caondash Petedo chedo.

<sup>7</sup> Adshobien Esusën camishquin: —Dacuëndenda. Nidto —cac <sup>8</sup> nidtoquin isquien Esus abentsëqui iquec.

<sup>9</sup> Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

<sup>10</sup> Adsho tantiash Petedo chedo: —“Nuquin Papan chomiaidquo nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien <sup>11</sup> Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. <sup>12</sup> Adquid Ediasbimboecquid chondash. Choacsho tantienquo icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac —quesho tantiashien: <sup>13</sup> —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

*Madompi dapuedaid podobitsi icsa cuemiaid*  
(Mad 9.14-29; Duc 9.37-43)

<sup>14</sup> Bëchamauanquiec ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. <sup>15</sup> —Con mado bëdamboen isquin bëdameta, Icho. Baded-badedquiec unësaneç cuëten pichiquianec. Adeçbidi unësaneç acten mentoadtsenaccosh. <sup>16</sup> Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenuo iccoshe. Mimbimbo bëdameta —caquien <sup>17</sup> Esusën ambo icquidotedi chuipondash. —Èmbi nadatiambo icquin nabanquin ismiaqui mimbi ëbi tantienuo iquec. Adsho isash chieshtoash cuintiadquio icchitebi. Adtiadquo yequi padenquo iquec nebique. Min mado beccho —cac

<sup>18</sup> bēsho istanquin Esusēn podobitsi icsa chushcapondash. —Padi. Daicsa uainda —cac podobitsi icsa cuenubi madompi bēdampondash.

<sup>19</sup> Adsho isun abēd icquidon Esus chuipondash utsibo tantiamenquo icquin. —Ēmbi: “Cuemenu,” cac ḷatotsi quiash podobitsi icsa cuenquo icposh? —caquien: <sup>20</sup> —Nuquin Papa bēdamboen tantiaquin mimbi bēdamboen natsenoc. Mimbi bēdiactsēc tantiatsec. Pete ēshēmpi mostasa caid pistsēcquidi siac nua yec canitsiash. Adechidi Nuquin Papa tantiatsecboedi: “Ambi natiapimbo ictequid nibēdec,” quequin abimbo tantiaquidquo yanshun comapenen tantiaquidbimboec mibi ictsiac. Adquidēn nēid macuēshquiobi cain: “Uquē manēd,” cac manēdtsiash. Aden mimbi: “Ēbi bēdamboen nameta, Papa,” quequin Nuquin Papa chianiac aidēmbi mimbi: “Ēmbi natiapimbo ictequid nec,” caid mibi bēdamboen nametsiash. <sup>21</sup> Nēbi ēmbi cuemeboed abembi cuentiapimbo icquid nec. Nuquin Papauidi tantianuen buna mēmunquin Nuquin Papa chianeshun adquid cuemequid —quequin Esusēn chuipondashi.

*Abi unēste Esusēn chuioid  
(Mad 9.30-32; Duc 9.43-45)*

<sup>22</sup> Adanec aton nidaid Cadidia yacnobi capucuenequimbi Esusēn abēd icquido chuipondash. —Ēbēd icquid abentsēcshun ēbi chieshēnquido ēbi bedmendac. <sup>23</sup> Bedshun ēbi unēs uamendac. Aden unēs uamiacsho chococaquini daēdec ushash uincuenendac —quesho tantiatanequien abēd icquido: —Unēsquo icnuc chiec —quiash shubiantiadtsēcquo icpondash.

*Chuiquid dapa menetequid piucquid Petedon istuida*

<sup>24</sup> Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ḷada min icbon dos dada uatsaid piucquid shocoshēmpi abentsēc menepatsiash? —cac <sup>25</sup> Petedo: —Ai, menetsiash —quepac caondash. Adanec nidec shubun puduedshobien Esusēn ambia Petedo chuipondash. —ḷAtotsi mimbi chie, Simon? Aton matsesēn na nacnemenuen ḷtsutsi chuiquid dapabon piucquid bedshumpec? ḷAda aton matses piucquid bedshumpec? Aido bedshunenquo icquin ḷada ambi bedaido aton yuabo piucquid bedshumpec? —caquien <sup>26</sup> Petedo: —Ma aton yuabo bedshumpaid yoc. Aton matses piucquid bedshunenquo iquec —quesho tantiasien: —Adembidi aton Mado icsho aton shubu nacnemenuen Nuquin Papan ēbi bedshuntiapimbo iquec. <sup>27</sup> Aden tantiaquimbi: “Nēishnushe,” queshun menenun nanuna. Chianēn ansemetan. Tauaquin ansemiaidī ancanshun anisquin 4 dada uatsaid piucquid shocoshēmpi abentsēc mimbi istuidendac. Aid bedshun piucquid bedshumēnquido menetanta. “Nē con icbon nabēdi con na nec,” quequin menetanta —capondash Esusēn. Adoac Petedon Esusēn chiacpadomboen menetampac caondash.

## 18

*ḷMitsicquid chuiquid dapa mimbi icmepatsia?*

*quequin chiaid  
(Mad 9.33-37; Duc 9.46-48)*



<sup>1</sup> Adshumbic abëd icquidon Esus chuipondash. —Abitedishun Ico bu icquiu matses mimbi namendac. Èbi chedo caic ¿mitsicquid mibëd tan chuiquid dapa mimbi icmepatsia? —guesho <sup>2</sup> tantiashun abi tabadacno nënantanquio bacuë tsaduntsëcshun Esusën chuipondash. <sup>3</sup> —Tantia. Mibi chuinu. Mitsanauidi tantieboedi nadquid bacuën amën chiacpadomboen nachimboen ëbi tantiaquiota. Adash ambi namiaid yanash Nuquin Papa yacno mibi puduedendac. <sup>4</sup> Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac. <sup>5</sup> Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

*Tantiabentsëcquido icsamete chiaid*

(Mad 9.42-48; Duc 17.1-2)

<sup>6</sup> Adshumbic padpiden chiec: —Èbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsamiente bunquidquio. <sup>7</sup> Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

<sup>8</sup> Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yachimboec icsainquio yec ënëdta. Taën capuec mibi icsaic. Tateshuniac caputiapimbo yachimboec icsainquio yec ënëdta. Ènëdenquio icsho Nuquin Papan mibi cuidendac. <sup>9</sup> Adecbidi ëshën isec mibi icsate bunquiec. Èshë chicshuniachimboec icsainquio yec ënëdacsho: “Bëdambo iquec,” catsiambi. Ènëdenquio icsho Nuquin Papan chian anëdënquiacno nësecaindac —quequin Esusën chuipondash.

*Matses ëbi tantiamete Nuquin Papa bunaid*

(Duc 15.3-7)

<sup>10</sup> Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquinobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquiu Nuquin Papa yacno puduedshun mimbi mamënsumboed Nuquin Papa chuinushe. Adtsëcquidëmpi mamënsnunenda. Èbi tantiabentsëcquido con Pan tantiaquieque. <sup>11</sup> Èmbitsen aido tantiembi. “Bënudaid istuidacchimboen ëbi tantienquio icquidobi ëbi tantiaquido icmenu,” quiaish mat-sesondabi —quepondash Esus.

<sup>12</sup> Adashic padpidec: —¿Mitsipadquio nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. <sup>13</sup> Aden istuidash comapenec cuishonquequid: “Con yua nibëdantsenquiac,” quiaish. Aton yua utsi yacno bëash abi ichoctedi icsho isash bëdambo icquid. Adecbidi matsesën ëbi tantiabensho isash Nuquin Papabëd cuishonquebi bënudaid istuidacchimboec. <sup>14</sup> Icsaido cuidacno matses nidmete Nuquin Papa bunenquio iquec. Matses bëdamboen isquiu abëd tabadmete Nuquin Papa bunquiec —quepondash Esus.

*Chieshënuquidobëdi onquete chiaid*

(Duc 17.3)

<sup>15</sup> Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshëmiantiadquio icchitosh,” qeshun nadoac bëdambo ictsiash. Aid abentsëqui chuiquin aibdëd bëdamboec onquequin: “Ëbi icsa uaquin Nuquin Papan chiaid mibi niac-niaccoc. Adec icsainquio yec ënëdta,” mibi cac: “Ai, adebi,” quiash mibëdi bëdamboec tabadtsiash Nuquin Papa tantiesabimboec icuidboedi. <sup>16</sup> Mimbi: “Icsainquio yec ënëdta,” caqui: “Padi. Adequi icsaibi,” qesho tantiashun ëbi tantiaquid utsi beduanshun aibdëdtan chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota. <sup>17</sup> Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec iccuededquido chuiquido chuituida. “Mimbitsen chuitanta,” cac aidontsen chiaqui tantienquio icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda. <sup>18</sup> Aden mimbi: “Esus tantiesabimboecquid neque. Cuëdënacno chomenquio ictiad,” casho Nuquin Papan: “Bëdamboen naic,” mibi catsiash. Adembi mimbi: “Adec icsaboedi icsainquio yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

<sup>19</sup> Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aibdëdtan mimbi Nuquin Papa chia-niac mimbi chiacpadomboen Nuquin Papan natsiash. <sup>20</sup> Ëbi tantiec daëd tabadnuc aibdëd con Mayan yec ëbëd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

### *Yuan bëdamboen istiapimbo yaid*

<sup>21</sup> Adec: —Icsa uanec chieshtomiantiadquio iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquio icquin bëdamboen ispe? Chieshënquin padpiden icsa uac ¿padpidendambi bëdamboen isoape? ¿Mëdante utsiuc daëd tauadoquin sietetedembi nashun padpiden bëdamboen isenquio icquin ënacta bëdambo icpatsiash? —caquien <sup>22</sup> Esusën: —“Mëdante utsiuc daëd tauadoec sietetedi” quequin daëdpactsëcquio mimbi chuipec. 70 por 7 caid ¿tedtsi icpec? Aidteden 490tedembi ënenquio icquin bëdamboen isoadoniac bëdambo ictsiash —quepondash Esus.

<sup>23</sup> Adashic abi onquec: —Nuquin Papan chiacpadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. <sup>24</sup> Abia chomiaidën piucquid dadpenquioshë bedshun aton icbo meniambo icpac caondash. <sup>25</sup> Adsho icbon: “Mimbi bedactedi beccho,” cac: “Nibëdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbobëdtabi cuësh-cuëshëdmeshun aidtedi piucquid bednu. Mibi icsambo iqueque,” cac <sup>26</sup> yua abi yuaquid ismequin danëshën sebudash: “Padi. Ëbi yuamenuen cuësh-cuëshëdmenda. Chiata. Yuecshun aidtedi bedshun mibi menenu nanu,” capac caondash. <sup>27</sup> Adoquien icbon bëdamboen isquin: “Padi. Ëbi menenda. Mibi utsibo yuamenuquio iquembique. Dacuëdenda. Nidec nid,” quequin icbon aton yua bëdamboen nidmepac caondash.

<sup>28</sup> Adoac nidquimbien aid yuan icbon bēdamboen isboedēn ambi: “Ma bēnu,” quequin piucquid daēdpactsēc meniaid yua utsi istuidpac caondash. Istuidshumbic bedtanquin tētēdinquin: “Mimbi bedactedi piucquid beccho. Unēs uachitomane,” caquin <sup>29</sup> aidtsen ambi piucquid bedshunondaaid ismenuen danēshēn sebudtsec: “Chiata. Ēbi unēs uainda. Yuecs hun bedshun mibi menenun nanu. Chiata,” quepac caondash yua utsi. <sup>30</sup> Adsho tantiashun icbon bēdamboen isboedēmbi chieshēnquin: “Padi. Mibi cuidmembi,” queshun quēnēn nauedmepac caondash. “Piucquid aitede abi menianenquo yacpadequi ma quēnēnuēsh mēyadbudchitono,” queshun nauedmiac caondash.

<sup>31</sup> Aden chieshēnquin quēnēn nauedmiacsho isumbien yua utsi-bon: “Chieshanquiec,” queshun icbo chuituidpac caondash. “Mimbi bēdamboen isboedēmbi mīn yua utsi quēnēn nauedmiac: ‘Piucquid menianenquo iquec,’ queshun,” quequin icbo chuipac caondash. <sup>32</sup> Adsho tantiashun icbon ambi cuidenquo icquin bēdamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi quesho: ‘Padi. Ēbi menenda,’ quequin mibi bēdamboen isombi. <sup>33</sup> ĴĒmbi mibi adobocpadomboen utsi bēdamboen istiapimboda icco? ‘Ma bēnu,’ queshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadece nēishun mibi cuidembi,” quepac caondash icbo. <sup>34</sup> Adshun quēnēn nauedmepac caondash. “Ambi bedactedi piucquid dadpenquo meniash ma puduemanu,” queshun quēnēn nauedmiac caondash. <sup>35</sup> Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista — quepondash Esus.

## 19

### *Chidobēd cuēshēdte Esusēn chiaid (Mad 10.1-12; Duc 16.18)*

<sup>1</sup> Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash. <sup>2</sup> Adec nidshobien matses dadpenhun tsibanampondash. Abi tsibanansho isun nidtuidshun daicsaidtedi Esusēn bēdamepondash.

<sup>3</sup> Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —ĴAtotsi mimbi chuipe? Dada uashun aton chidobi nidmete Ĵmitsipaden mimbi chuipe? En chui. Tiantianu —capondash.

<sup>4</sup> Adoquien Esus: —ĴNuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. <sup>5</sup> Adembidi: “Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquo yec aidbēd tantiananquiec dada aton chidobēd abentsēc yacximboec tabadquid,” quequin dada uaid ma mimbi ispaboc. <sup>6</sup> Aden Nuquin Papan tantiacpadomboen aton chido nianenquo yec aidbēdi tantiananquiec abentsēc yacximboec tabadac bēdambo ictsiash. Padnuen aton chido nianec aidbēdi cuēshēdian Nuquin Papan chiaid niactsiash. Adecbidi chido aton bēnē nianec icsaquid — Esus quesho <sup>7</sup> tantiashumbien abi chieshēnquidon: —ĴAbimboda mimbi

capadi? Nuquin Papan chiaid dada uaquin ¿atotsieshun Moisesën naden chuiampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chuipondash Esus chieshënquidon.

<sup>8</sup> Adsho tantiashun Esusën chuipondash. —Ai, Nuquin Papan chiapadec aton chidobëd bëdamboec tabadtiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiambo icpampic. <sup>9</sup> Tantia. Mibi chuinu. Aton chidobëd cuëshëdshun chido utsi bedquin Nuquin Papan chiaid niactsiash. Padnuen aton chidon bënëpenquo chudmesho istuidash aidbëd cuëshëdquin Nuquin Papan chiaid niaquenquo ictsiash —quepondash Esus.

<sup>10</sup> Adnubien abëd icquidon: —Adotiapimbo icte mimbi chuipec. Aton chidobëd cuëshëdenquo icte mimbi chuisho tantiashun: “Aton chido bedesambo dada bëdambo ictsiash,” caimbi —quepondash abëd icquido.

<sup>11</sup> Adsho tantiash Esus: —Ai, utsi-utsiec pabiate shëcuë nibëdabimboen ëmbi chiaid tantiatiapimbo iquec. Utsiboen aton chido bedash Nuquin Papan chiapadec bëdamboec tabadquid nec. <sup>12</sup> Utsibic mimbi chiapadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiacpadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ëmbi chuiboed tantiashun ëmbi chiacpadomboen nac bëdambo ictsiash —quepondash Esus.

*Esusën bacuëbo chiaid  
(Mad 10.13-16; Duc 18.15-17)*

<sup>13</sup> Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac. <sup>14</sup> Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacbimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash. <sup>15</sup> Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquo dayun uaquid Esusbëd onquiaid  
(Mad 10.17-31; Duc 18.18-30)*

<sup>16</sup> Adnubien dada caniampinquo Esus chuituidpondash. —Mibi bëdambo iquec. Bëdamboen chuiquidquo mibi neque. Ëbi chui. Padpidec unëstiapimbo icquid icmenun bëdambo icquid Nuquin Papan abi yacno puduedmetsiash. ¿Atotsi nasho Nuquin Papan ëbi bëdambo capatsiash? —caquien <sup>17</sup> Esusën: —¿Mitsipadquid bëdambo icquid cai? Nuquin Pauptidsëqui bëdambo icquid nec. Aidbëd tabadnuen ambi Moises dada uamiampictedi nata —capondash. <sup>18</sup> Adoquien cania: —Nuquin Papan chiaid ¿mitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquo chudenda. Min bënëpenquo chudmenda. Ampenda. Muainda. <sup>19</sup> Titabëdta papa chieshënenquo icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusën. <sup>20</sup> Adsho tantiash cania: —Aidtedi niaquenquo icquin nabanquidquo

nebi. Bacuëctšëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

<sup>21</sup> Adsho tantiashumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien <sup>22</sup> cania: —Con na dadpenquo icsho uesquin menetiapimbo iquebi —quiash shubiantiadtsëcquo ictanec nidpondash Esusën chiacpadomboen natiapimbo yec.

<sup>23</sup> Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidsëqui tantiec. <sup>24</sup> ¿Ada nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidsëqui tantiakin ëmbi chiacpadomboen natiapimbo yec Nuquin Papa yacno tabadiapimbo iquendac —quequin Esusën chuipondash.

<sup>25</sup> Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiashe? Nibëdchitequien iquec —quesho tantiashumbien <sup>26</sup> Esusën abëd icquido bëisquin naden chuipondash. —Matses namiantiapimbo icnuc Nuquin Papain namianquidquo nec. Ambi natiapimbo ictequid nibëdec —quepondash.

<sup>27</sup> Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien <sup>28</sup> Esusën: —Tantia. Mibi chuinu. Nuquin Papan ambi uaid abitedi chuca uabocnoëshquo ëbëdtan chuiquid mibitedi iquendac ëmbi abitedi namiacnuëshquo. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquieci chuiquid dapabo mibitedi iquendac. <sup>29</sup> Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadac bimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquo icnuc. <sup>30</sup> Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquo iquendac. Utsibic nëuëshquo chuiquidpenquo icboedi Nuquin Papa yacnoshon: “Bëdambo icquid nec,” quequin chuiquid dapac icmendac —quepondash Esus.

## 20

### *Chonoadquido chiaid*

<sup>1</sup> Adshumbic abëd icquido Esusën ompoacbimboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. <sup>2</sup> Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. <sup>3</sup> Ushë abucquo yanubi tied

icbon pete meniacno nidshun utsibo nainquo yec samëdsho istuidpac caondash. <sup>4</sup> Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac <sup>5</sup> tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. <sup>6</sup> Inchëshbudtsëqui nidoaquin utsibo nainquo yec samëdsho istuidoashun: “¿Atotsi quiash samëduidequi ique?” cac <sup>7</sup> samëdquido: “Chonoa uanquid nibëdosh,” quesho tantiashun tied icbon: “Mimbítsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

<sup>8</sup> Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ënquimbi meneta,” cac menequin tauapac caondash. <sup>9</sup> Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquido piucquid menepac caondash.

<sup>10</sup> Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” queshobi aidtedtsëcbidi piucquid menepac caondash. <sup>11</sup> Aidtedtsëcbidi meniaquien tied icbo chushcapac caondash. <sup>12</sup> “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtscëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquieq iquec. Èbi dadpen meniac bëdambo ictsiash,” quequin chushcapac caondash.

<sup>13</sup> Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc. <sup>14</sup> Mimbi bedboed buanec nid. Èbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? <sup>15</sup> ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. <sup>16</sup> Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusën.

*Abi unëste Esusën padpiden chuioid  
(Mad 10.32-34; Duc 18.31-34)*

<sup>17</sup> Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abëd icquido 12tedi icquid chuinen uanotantsëcquin buampondashi. <sup>18</sup> Buanshun chuipondashi naden: —Edusaden yacno nidacsho Nuquin Papan matsesmiad icsho ëbi chieshënkuido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidun ëbi bedshun: “Ma unës uamenu,” qeshun <sup>19</sup> matses utsibo isadaidpembo ëbi bedmendac. Aden bedmiac matses utsibon mamënsunquin ëbi cueshcaten

comapenen cueshcaindac. Adshumbic ëbi unës uanuen cuesten dectanendac. Aden unës uaqui daëdec ushash uincuenendabi —quequin Esusën abi unës uate padpiden chuioapondashi.

*Uanën titan chiaid  
(Mad 10.35-45)*

<sup>20</sup> Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiacpadomboen ëbi nashunta, Icbo —caquien: <sup>21</sup> —¿Atotsi cai? —capondash Esusën. Adoquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: <sup>22</sup> —Ëmbi naid tantienquo icquin mimbi chuipec —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

<sup>23</sup> Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

<sup>24</sup> Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. <sup>25</sup> Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. <sup>26</sup> Ëbi tantiaquido icquin mimbi adoengquo iquendac. “Bëdambo mibi iquec,” Nuquin Papa cametiadquido icquin utsibo tantiaquin mimbi utsibo nashuntsiac. <sup>27</sup> Bëdambo icquid ictiadquido icquin yuan aton icbo nashunacimboen mimbi utsibo nashuntsiac. <sup>28</sup> Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamiaid  
(Mad 10.46-52; Duc 18.35-43)*

<sup>29</sup> Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpeshun Esus tsibanampondash. <sup>30</sup> Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquido icquin ëbi bëdamboen ista, Icbo —quepondash Esus caic.

<sup>31</sup> Adsho tantiashun matses dadpeshun chushcapondash. —Padi. Chën. Adec cuëdec chieshanquiec mibi iqueque —caquien abi niacbidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquido icquin ëbi bëdamboen ista, Icbo —queopondash.

<sup>32</sup> Adoquien Esusën niduntidshun ëcbedpondash. —¿Atotsi chuinec ne? —caquien: <sup>33</sup> —Isbente bunquiebi, Icbo —quepondash.

<sup>34</sup> Adsho tantiash: —Unësquo iquec —quetanquin Esusën bëshuaid daëdi

bēmishpondash. Adoac abi daëdi bēdampondash. Bēdanshun aidēntsen Esus tsibanampondash bēshuacboedēmbi.

*Edusaden yacnoshon chuiquid dapabimboecnuc Esus bēdamboen isaid*

## 21

*Edusaden yacnoshon chuiquid dapabimboecnuc Esus bēdamboen isaid  
(Mad 11.1-11; Duc 19.28-40; Uan 12.12-19)*

<sup>1</sup> Adanec nidequi shubu dadpen icquid Edusaden caid anoentsēqui macuēsh dapa Odibos caid poctse shubu daēdpactsēcquid Bedpaque caid yacno Esus nidpondash. Adshumbic anoentsēqui choshon abēd icquido daēd chuipondash. <sup>2</sup> —Nēid podquedēn nidquin shubu daēdpactsēc yacno nidshun cabayobitsecquid aton bacuē caniatsecbēdta mimbi bad-edquoio istuidendac. Istuidshun tēnēshaid tēdiadsho tēchicta. <sup>3</sup> Mimbi tēchicsho isquidēn: —¿Atotsi acnun nai? —cac: —Nuquin Icho: “‘Bedtan,’ quiosh,” mimbi cac: “Ai, buantan,” quendac —quequin Esusēn chuipondash. <sup>4</sup> Ambi Esusēn nate chiaid Nuquin Papan con tsusedpa dada uamiampicpadomboen nanuen Esusēn adopondash. Naden dada uapampic.

<sup>5</sup> “Shubu dadpen icquid Sion caidēn tabadquido chui. Edusaden cain Sion capec.

‘Is. Mibi chuiquid dapa cabayobitsecquidēn bacuē caniatsec catsadtoash choeque. Ancanenquoio yec bēdamboshē icquidquoio neque. Is,’ quequin chui,”

quequin dada uapampic. <sup>6</sup> Aden dada uampicpadomboen ambi: —Bedtan —caidon bedtampondash.

<sup>7</sup> Adotanquin cabayobitsecquid anibēdta caniatsec bēacshobimbi con dashcute bēntse dasiuidboed chictanquin casanondac. Aden ēmbi cabayobitsecquid casansho isash caniatsecquēn Esus catsadtopondash.

<sup>8</sup> Adanec nidsho istanquin matses dadpenshun aton dashcute abi dasiuidaid bēntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun.

<sup>9</sup> Matses dadpen bēyuc nidnubi aidtedbidi tsyuec nidpondash. Abitedi cuēdēnidpondash.

“Adeduya. Nuquin tsusedpa Dabidēn tsyuecquid Nuquin Papan namiaid yec mibi bēdamboshē iquec.

Nuquin Papan chomiaid yec mibi bēdamboshē iquec.

Mibi chomequid Nuquin Papatsen bēdamboshē iquec. Adeduya,” quec cuēdēncuededpondash.

<sup>10</sup> Adec Edusaden yacno matses dadpenquoio cuēdēnidec nidsho isashien Edusaden yacnocquido: —¿Tsutsi tantiec cuēdēncuededpec? —quepondash. <sup>11</sup> Adsho tantiashun Esusbēd nidquido: —Esusquoio tantiec nec. Nuquin nidaid cuēshē Cadidia caidēn shubu dadpen icquid Nasaded caid yacnuēsh caniondaid Nuquin Papan chiaidquoio chuiquid Esus tantiec nec —quepondash.

*Esusēn chushcaquin cuemiaid  
(Mad 11.15-19; Duc 19.45-48; Uan 2.13-22)*



<sup>12</sup> Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquo puduednquo yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpectsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” qeshun pichicametsiash —quequin aton nëish yua menequin piucquid dadpenquo bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. <sup>13</sup> —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,” quequin Nuquin Papan chiacpadomboen aton shubun puduedshun aid chianetiadquidi mimbi adoenquo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

<sup>14</sup> Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

<sup>15</sup> Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën naban-sho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuededsho tantiash nëishquiopondash. <sup>16</sup> Adshumbic: —Icsambo iquec —qeshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuipampic —quepondash Esus. <sup>17</sup> Adanec nidec shubu dadpen icquid Betania yacno nidash ushtuidpondash.

*Esusën cuëte unës uaid  
(Mad 11.12-14, 20-26)*

<sup>18</sup> Badiadnubi ënden auctbidi nidoaic Edusaden yacnobidi nidoapon-dash. Piabi nidec bundoshon <sup>19</sup> podqued cuëman nidquid cuëtempicueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquio icpec. Adsho isumbien Esusën: —Adequi bacuësambo yec unësta —capondash. Adoac badedquio unëspondash.

<sup>20</sup> Adosho isun abëd icquidon: —¿Atotsi quiash badedquio unëshosh? —caquien <sup>21</sup> Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquo icquin: “Nuquin Papan ambi chiacpadomboen naquidquido nec,” qeshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash. <sup>22</sup> “Ambi chiacpadomboen naquidquido Nuquin Papa nec,” qeshun mimbi aid chianiac mimbi

chiaid Nuquin Papan mibi nashuntsiash —quequin Esusën abëd icquido chuipondash.

*¿Tsuntsin: Naic nid, cac nai? quequin Esus chuimiaid*

*(Mad 11.27-33; Duc 20.1-8)*

<sup>23</sup> Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tiantianu —caquien <sup>24</sup> Esusën: —En mimbia chui. Èmbia tiantianu. Mimbi chuisho tantiashun ëbi namequidtsen chuinu. <sup>25</sup> ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoaquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad. <sup>26</sup> Nuqui: “Ambembi napondash,” qesho tantiashun nëmbo icquidon nëishënushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. <sup>27</sup> Adashien Esus padpiden chuioaic: —Tsauid. ¿Tsundan chiaquien nachitondash? —qeshobien: —Mimbi chienquio icsho tantiashun ëbitsen ëbi namequid chienquio iquembi —capondash Esusën abi chieshënquido cuidquin chuiquin.

*Mado daëdshun nacbimboecquido chiaid*

<sup>28</sup> Adshumbic Esusën padpiden chuipondash. —Tantia. Mibi chuinu. Èmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: <sup>29</sup> “Padi,” quec chieshuidboedi yuec-yuecpectsëtanec: “Tiedimbi neshcatanchitec,” quiaish neshcaic nidac caondash.

<sup>30</sup> Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. <sup>31</sup> ¿Mitsicquidën aton papan chiacpadomboen napac caondash? En chui. Tiantianu —caquien Esus chieshënquido: —Abia chiac chieshuidboedën —qesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidac bimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. <sup>32</sup> Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquo iccondac. Aton papan chiaid niacquid bimboecquid mibi nec —quepondash Esus abi chieshënquido chiec.

*Abi chieshënquido icsaid Esusën chuioaid*

*(Mad 12.1-12; Duc 20.9-19)*

<sup>33</sup> Adshumbic Esusën abi chieshënquido ompoacbimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacenpac caondash.

Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedn caniquid chetequid iquec. Aid chequin ëbi neshcashunta,” utsibo canec ënapen nidpac caondash. <sup>34</sup> Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. <sup>35</sup> Adec aton ichon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. <sup>36</sup> Aden cuemiaïd choshon chuituidaquien ichon nidboedtedpenquo dadpenquo aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

<sup>37</sup> Adoacsho tantiash aton madombo caic: “Bedtan,” quepac caondash. “Con mado cuesunenquo icquin ëmbi chetequid menetsiash,” qeshun aton madotsen nidmepac caondash <sup>38</sup> Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” qeshun <sup>39</sup> tied tsitsuno buanshun cuesunepac caondash —quequin Esusën chuipondash.

<sup>40</sup> Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied ichon napatsiash? —quesho <sup>41</sup> tantiash datsidadquido: —Aïdo icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

<sup>42</sup> Adsho tantiashun Esusën: —Ai, abimbo caic. Adembidi ambi chomiaïd chieshënsho Nuquin Papan mibi cuidendac. ¿Nuquin Papan chiaïd isabida ictio? Naden chiampid ma mimbi ispapoc.

“Buintad bëdambo icquid istuidashi: ‘Nëidquio shubu uanun nitsinembi,’ quetiadquidi isuidacimboen Nuquin Papan namiaïd chieshënac.

Aden buintad isuidaïd utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaïd tantiosh.

Adsho isun: ‘Nuquin Papan namiaïd bëdambo iquec,’ caimbi,” quequin dada uapampic. <sup>43</sup> Aden ambi namiaïd ëbi chieshënsho isash mibi caic Nuquin Papa nadpec. “Ëmbi con matses caïd isadaïdbo ëbi bëdamboen tantiametiadquidi chuiquid dapabon namenquo icsho isun utsibotsen: ‘Ëbi chuiquid icta,’ caindambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac. <sup>44</sup> Mibien Nuquin Papan cuidtequido nec. Cuëte uebudquin catashac canite uesadec podquëd-podquëdacimboecnuc mibi comapenen cuidendac —quepondash Esus abi chieshënquido chiec.

<sup>45</sup> Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash. <sup>46</sup> Adshumbic Esus cuesunemenuen bedtiadquio icquimbi bedenquo icpanëdash. —Abi datsidadquidon: “Nuquin Papan chiaïd chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquo icpanëdash.

## 22

*Cacuidanaid chiaid*  
(Duc 14.15-24)

<sup>1</sup> Adshumbic Esusën padpiden ompoacbimboembidi chuipondash naden. <sup>2</sup> —Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaid mibi chuinu. <sup>3</sup> Chuiquid dapan aton yuabo chuiquin: “ ‘Con icbon madon chido bedequē. Aidbēd cuishonquenuen pec cho,’ quequin ěmbi tanti-aidotedi chuitan,” cac yuabon chuitanaquī choenquīo icpac caondash.

<sup>4</sup> Adsho isumbien chuiquid dapan aton yua utsibo chuiquin: “Nēish nua bēchichoquidquīo dadpen codoquiaccoshe. Padpiden chuitan,” cac chuitanoaquī <sup>5</sup> choenquīobidi icpac caondash. Adec cacuidanquīec abentsēc aton tied nantan nidnubi utsi piucquid bednuequin ambi aton na menebante shubuno nidpac caondash. <sup>6</sup> Utsimbic abi: “Pec cho,” cashobi yuabo mēyanquin cuesun secapac caondash.

<sup>7</sup> Adoshobien chuiquid dapan nēishtanquin shēpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nēdēncapac caondash. <sup>8</sup> Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. <sup>9</sup> Ěmbi: ‘Pec cho,’ cacmaidobi chuibenetan. Podquedēn nidquin mimbi istuidaidtedi: ‘Pec cho,’ cabenetan,” cac nidshun <sup>10</sup> ambi istuidaidtedi chuibenetanac matses dadpenquīo pec cho-chopac caondash. Icsambo icquidobēdi bēdambo icquido cho-choash chuiquid dapan shubun puduedash pec tabadte quēnē dapan tabadcuededpac caondash tsucus-<sup>11</sup>tsucustsēcquīo yec.

<sup>11</sup> Adshun chuiquid dapantsen puduedshun isquien dashcute bēdaidquīo dasiuidabi icquid abentsēc tsadtsec. <sup>12</sup> Adshobien chuiquid dapan: “¿Atotsi quiash dashcute bēdaidquīo dasiuidambobi cho, buchi?” caquī ěcbedenquīo yec tsadec. <sup>13</sup> Adshobien chuiquid dapan: “ ‘Chido bedacno isnuec dashcute bēdaidquīo dasiuidquid,’ quepadenec. Mibi icsambo iqueque. Mibi cuidnu,” queshun aton yuabo chiec: “Shēbunshun buanshun icsano netan,” capac caondash. Adoac taneshun netanac mēyadquīec natiaic shubiquīopac caondash.

<sup>14</sup> Adembidi Nuquin Papan ambi matses bēdamboen iste dadpen tantiamiaquī utsin-utsinquin tantienquīo iquendac. “Abi yacno puduednu,” queuidboedi bēdambo icte bunenquīo yec abi tantiatiapimbo icsho Nuquin Papan comapenen cuidendac. Utsi daēdpactsēquīen Nuquin Papan tantiacpadec abēd tabadtequid iquendac —quequin Esusën chuipondash.

*Chuiquid dapa piucquid menete chiaid*  
(Mad 12.13-17; Duc 20.20-26)

<sup>15</sup> Adsho tantianec nidash abi chieshēnquido padiseyobo: —Esus icsamboen chuimenuna. Icsamboen chuisho tantiashun bedshun unēs uamechitono —queshun ambi chuibanquin tantiamiaido chuipac caondash. <sup>16</sup> —Icsamboen chuimetan —caquīen chuiquid dapa Edodes caid tantiaquidobēdtan icsamboen chuimenuc cho-choshon chuituid-pondash. —Bēdamboen chuiquid mibi neque. En ěbi chui. Tantianu. Muesambo icquin Nuquin Papan chiacpadec bēdamboec tabadte mimbi

abimbo chuipoc. Matses dacuëdënenquio icquin Nuquin Papan chi-aidquio mimbi chuipoc. <sup>17</sup> Adquid icquin ¿atotsi mimbi chuipe? Tanti-  
 anu. Chui. Nuquin matses yuaquid chuiquid daba Sesad caidën:  
 “Pucquid shocoshëmpi dadpen beccho,” cac nuqui meniac ¿ada bëdambo  
 icpatsiash? —capondash. <sup>18</sup> Adoquien Esusën ambembi tantiashun:  
 —Bëdambo icquid damianquiec mibi muambo nec. ¿Atotsieshun ëbi  
 icsamboen chuimetiadquio ique? —quetanquin: <sup>19</sup> —Chuiquid daba  
 menetequid piucquid shocoshëmpi beccho —ambi cac <sup>20</sup> bësho bedshun  
 Esusën chuipondash. —¿Në tsutsibimboecnuc dada uaid në iquec?  
 ¿Tsutsi cuëmëdquidbëdta dada uac? En chui. Tanti-  
 anu —caquien: <sup>21</sup> —Ma nuqui yuaquid chuiquid dapambo Sesad neyoc —  
 quepondash. Adsho tantiashumbien Esusën: —Abibimboecnuc dada uaid  
 abi cuëmëdquid dada uaid bedtequid shocosh icnuc Sesadën na neque.  
 Icbon: “Beccho,” cac meneta. Adecbidi Nuquin Papa nuquin Icbombo  
 neque. Aidën chiacpadomboen nabanta —quequin Esusën bëdamboen  
 chuipondash. <sup>22</sup> Adsho tantiash icsamboen chuimetiadquio icboedi:  
 —Bëdamboen chuipoc —quetanec nidanepondash.

*Matses uincuemete chiaid*  
 (Mad 12.18-27; Duc 20.27-40)

<sup>23</sup> Adnubien aid ushëmbi Saduseyubo: —Matses unësaid uincue-  
 sambo nec —quequidotsen: —Esus icsamboen chuimenu —quec cho-  
 chopondash. <sup>24</sup> —Bëdamboen chuiquidquio mibi neque. Mimbi chuisho  
 tanti-  
 anu. ¿Mitsipaden mimbi chuipatsia? Nuquin tsusedpa Moisesën  
 naden chuiquin dada uapampic. “Aton chido bedash bacuë tishmiabi  
 unësacsho aton utsin aid chido bedshun: ‘Con buchin bacuëbo nibëdeque.  
 Con buchin madobimboecnuc tishmenu,’ quequin tishmequid,” que-  
 quin Moisesën dada uapampic. <sup>25</sup> Aid tantiaquin chuinu. Dada aton  
 utsibobëd tabadpac caondash. Aton utsibo seistedi icpac caondash.  
 Bëyucquid aton chido bedashi bacuë tishmiabi unëspac caondash.  
 Adsho isun abi tsibanquidën aidën chido bedash <sup>26</sup> bacuë tishmiambo-  
 bidi unësoapac caondash. Adsho isun aid tsibanquidën aid chidobidi  
 bedoashic bacuë tishmiambobidi unësoapac caondash. Adenuidi abi  
 tsibanquidën abi tsibanquidënquien aton buchi unësan-unësanquien aid  
 chidouidi beduid-beduidpac caondash. Bacuë tishmiabi-tishmiabiec  
 abitedi unësbudnepac caondash. <sup>27</sup> Adashic bacuë tishambobi aid chido-  
 sen unëspac caondash. <sup>28</sup> Aid abitedi uincuemi-  
 ac ¿mitsicquidën chido ic-  
 patsiash? —caquien <sup>29</sup> Esusën: —Nuquin Papan chiaidquio tantienquio  
 icquin Nuquin Papan nadatiambo icquin nabanquin uincuemete mimbi  
 tantienquio iqueque. Chuinu. Tanti-  
 anu.

<sup>30</sup> Uincuemi-  
 ac dadan aton chido bedesa. Adembidi amën aton champi  
 menesa. Nuquin Papan abi yacnoshon uaido mayan bëdabobimboec  
 matses uincuemi-  
 aido iquendac. Aden uincuemi-  
 aidën chido bedesa  
 —quepondash Esus. <sup>31</sup> Adshumbic padpiden chuipondash. —Ambi  
 unësaid uincuemete chuiquin Nuquin Papan dada uamepampid ¿is-  
 banabida ictio? Ma mimbi aid isbampaboc. <sup>32</sup> Naden dada u-  
 pampic. “Abadauan caid yec Acobo caid yec Isac caid yec quequid-  
 dishun ëbi Papa capec,” quepampic Nuquin Papa ënden unësampid  
 chiequi. Unësun matses tantienquien mimbi danec. Unësash aton dada

chodquiambic aton tantiate unësambo icnuc abi Nuquin Papa tantiat-siash —quepondash Esus. <sup>33</sup> Adsho tantiasch abi datsidadquido: —¿Mitsipadquid nepec? Bëdamboenshëen chuipec —quepondash.

*Moisesën dada uampid chiaid*

*(Mad 12.28-34)*

<sup>34</sup> Aden unësaid uincuemetu chuisho tantiaschumbien Saduseyobon padpiden: —En chui —cainquio icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. <sup>35</sup> Chochuquin abentsëcshun Nuquin Papan Moises dada uamiampid tantiaquidquido icquin chuimetuidpondash. <sup>36</sup> —Chuiquidquido mibi neque. En ëbi chui. Tiantanu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? —caquien <sup>37</sup> Esus: —“Nuquin Papa tantiaquiec ambi chiapadec tabadte bunquiota,” quequin <sup>38</sup> chiampidba naic Nuquin Papan chiapadec mibi bëdamboec tabadtsiandac. <sup>39</sup> Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadachimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. <sup>40</sup> Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënquido chuiquin.

*Nuquin Papan chomiaidquido chiaid*

*(Mad 12.35-37; Duc 20.41-44)*

<sup>41</sup> Adshumbic Esusëntsen abi icsamboen chuimete bunquido Padiseyobo chuipondash. <sup>42</sup> —Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? —capondash Esusën abibi cadquimbi. Adoquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

<sup>43</sup> Adsho tantiaschumbien Esusën: —¿Bëdamboenda chuidio? Mimbi chiapadquid aton mado icsho ¿atotsieshun Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

<sup>44</sup> “Nuquin Papan con Icbo naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icbo mibi camenu,’ quequin Nuquin Papan con Icbo chiendac.”

quequin Dabidën dada uapampic. <sup>45</sup> Con mado cainquio icquin con Icbo capampic Dabidën. ¿Atotsieshun mimbi: “Dabidën mado nec,” quequin tantiape? —caquien <sup>46</sup> ëcbedenquido yec otacquo tabadpondash. Esusën bëdamboen chuisho tantiasch: —Icsamboen chienquien icchitec. Ëmbi padpiden: “Icsamboen chuimenu,” cac bëdamboembidi chuiotsiasch —qeshun abi chieshënquido abitedishun Esus padpiden chuimenquido icquin ënaccondash.

## 23

*Bëdambo icquid damianquido tanenda, quiaid*

*(Mad 12.38-39; Duc 11.43, 46; 20.46)*

<sup>1</sup> Adshumbic Esusën abëd icquidobëdta abi datsidadquido tantiamequin chuipondash. <sup>2</sup> —Tantia. Moisesën dada uampid chuibanquidobëdta tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. <sup>3</sup> Aden Moisesën dada uampid abimbo chiac adenuidi mimbi nac bëdambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. <sup>4</sup> Chieshëmëncquido nec. Nuquin Papan chiaid nametiadquidëmbi tsusedpabon ambembi chiaid dadpenquoio namepec chushcanquin. “Matsesën aidtedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquoio iquec.

<sup>5</sup> Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec queshun matses ismenuenuidi naic. Adembidi aton dashcute tëdiadte nacnuequein: “ ‘Nuquin Papa chianequidquido nec,’ ma ëbi canu,” queshun sedquid shoyonaid ënapenpactsëcncucuididicash matses ismenuec matses tabadacno capucenepec. Adec Nuquin Papa chianequid damianquiec. <sup>6</sup> “Chuiquid dapa nec,” cameteuidi bunec. Isedec puduedash: “Chuiquid dapa icsho ichon abëdi tsadmequid,” quiash icbobëdi tsadte bunquiec. Nuquin Papan chiaid chuibante shubun puduedash: “Tsiusio dapambo nec,” camenuc utsibobëd tabadenquoio yec tsusiobobëduidi tabadquid nec. <sup>7</sup> “Chuiquidquido yec mibi bëdambo iquec,” camete bunquiec matses dadpen tabadacno nidtenepec.

<sup>8</sup> Mibitsen adenda. Utsibo: “Mibiuidtsëqui bëdambo iquec, Icbo,” camenuc adenda. Min Icbo abentsëcquiobi ëbi iquec. Èbi abentsëqui con Icbo cata. Con yuabo yec con utsibo mibi neque. Bëdamboec isnanta. <sup>9</sup> Adembidi mibi chuibanquid chuiquimbi: “Mibiuidtsëqui bëdambo iquec, Papa,” cainda. Nuquin Papauidtsëqui aden chuuta. <sup>10</sup> Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Èbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquido utsi nibëdec.

<sup>11</sup> Padnuen ambi chiacpadomboen utsibo nashunquidquido utsibo dëniacte bunenquoio icquid Nuquin Papan bëdamboshë catsiash. <sup>12</sup> Utsien abibi cadequi: “Èbiuidtsëqui bëdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquoio icsho Nuquin Papan bëdambo caïndac —quepondash Esus abi datsidadaido chiech.

*Abi chieshëncquido Esusën chushcaid*

*(Mad 12.40; Duc 11.39-45, 52; 20.47)*

<sup>13</sup> Adshumbic abi chieshëncquidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” queshobi mimbi bëdamboen chienquoio iquec. Èmbi Nuquin Papabëd tabadte bëdamboen chuisho mimbi tantienquoio iquec. Aden tantienquoio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiametiapimbo iquec.

14 Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquido damenuen utsibo tantiamequinuidi buëdpambo cuëdquin Nuquin Papa chiacimboen mibi chianepec. Aid abimbo mibi chienquido iquec. Adec chieshanquiecsho isun Nuquin Papan mibi comapenen cuidendac.

15 Nuquin Papan cuidtequido mibi nec. Mimbi tantiacpadomboenuidi tantiamenuen mibi matses utsibo chuiben-chuibenec. Nidaid utsi-utsiec yacno nidshun mibi chuibenesho tantiaquido mibi tantiacpadquido yanash Satanasën yuambo yanec Nuquin Papan cuidtequidombo iquendac.

16 Nuquin Papan cuidtequido mibi nec. Isadaidbo chuiquid icquin bëdamboen tantiamenuen mibi icchitec. “Nuquin Papa utsi uatiapimbo yacpaden abimbo caimbi,’ quequid muaisa nec. Muaquidën Nuquin Papan chiaid niacquid,” quetiadquidi mibi adenquido iccoc. “Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquido iccoc. Padenquido yec: “Nuquin Papa tabadte shubu uashunaid dapan icquid shocosh piu nacnenaidquido utsi uatiapimbo yacpaden abimbo chiombi,’ quequid muesa nec,” quechitequien mibi iquec. 17 Aden tantienquido icquin mibi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bëdapenquioda icpec? “Aid bëdamboshë icnubi aid nuntan icquid bëdiactsëc bëdambo iquec,” caimbi. Mimbien icsamboen tantiec. 18 Nadentsen mibi icsamboen chiec. “Nuquin Papa tabadte shubu uashunaid dapa yacnoshon: Mabi Nuquin Papan bëdamboen isnu, quequin nëish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquido iccoc. “Nuquin Papa mabi bëdamboen isnuquin pichicatequid nëish utsi uatiapimbo yacpaden abimbo caimbi,’ quequid muesa nec,” mibi quepec. 19 ¿Adenda mibi bëdamboen chuipe? Pashuacimboen mibi bëdamboen tantienquido iquec. ¿Mitsicquid bëdambo iquec? “Mabi Nuquin Papan bëdamboen isnu,” quequin nëish pichicate nacnenaid dapa bëdambo icnu aidën pichicatequidi nëishquido bëdapabi ictsec. Nuquin Papamboen bëdamboshë iquec. 20 Nëish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nëish abitedi chiaidbidi nec. Adembidi ambi: “Mabi bëdamboen isnu,” caid Nuquin Papatsen chuipec. 21 Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mibi chiec. 22 Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidën chiaidquido tantiec: “Abimbo cacimboen chuiquid icsaquid nec,” quetiadquidi mibi adenquido iccoc.

23 Bëdambo icquid damianquid yec Nuquin Papan cuidtequido mibi nec. Nuquin Papan chiaid abentsëqui tantiatsecquin min tiedën canitsëcquid musuquëmpi bedshun Nuquin Papa mibi menepec. Aden menequid icquimbi mibi Nuquin Papan chiaid utsi dadpen niac-niacpec. Chieshëmianquid icboedi: “Ëbi bëdamboen ista,” quesho bëdamboen istiapimbo mibi iquec. Adembidi bëdambo icquidi muauaquin mibi tsusio icsamboen cuidmec. Adembidi mibi Nuquin



Papa abimbo tantienquoio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquoio icpaboc. <sup>24</sup> Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nësamëdpanumbobi acacimboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

<sup>25</sup> Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbëdta dëshote chieshquin cachocuidtsëqui dapan-shun anauc ampanambo icquidi ampanaid damianacimboec mibi bëdamboec tabadquid damianquiec. Nuquin Papan chiaid dadpen nainquoio icquin mitsanauidi bednuen mibi bunaiduidi mimbi napec. <sup>26</sup> Pamumëdachimboec tantiatiapimbo mibi iquec. Dëshote abichobi bëdamboen ampanacimboec icsaid ucudash bëdambo icta. Adec icsainquoio yec ënëdash Nuquin Papan chiacpadec mibi bëdamboec tabadtsiac.

<sup>27</sup> Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi. <sup>28</sup> Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid  
(Duc 11.47-51)*

<sup>29</sup> Nuquin Papan cuidtequidombo mibi nec. Nuquin Papan oncami-aidobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacnempec. <sup>30</sup> Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquoio ictsenëdac. Èmbien bëdamboen itsenëdac,” qeshun mimbi aido chococacno nacnempec. <sup>31</sup> Adoboedëmbi nuquin tsusedpabon bëdambo icquid unës uampicpadomboen adoante bunquin mimbitsen chieshtoshon adoaindac. <sup>32</sup> Ai, nuquin tsusedpabon Nuquin Papan oncamiampid unës uacpadombota —quepondash Esus abi unës uate chiec.

<sup>33</sup> Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. <sup>34</sup> Icsaido icsho isun: “Ma Nuquin Papan bëdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. <sup>35</sup> Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cuesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquoio cuesunepampic. Aidtedi unës uampido tantiaquin aido unës uaquido

cuidachimboen Nuquin Papan mibitsen cuidquiendac. <sup>36</sup> “Yuecshun min tsyuecquido cuidendac,” quec nenquo iquebi. Nēbi caimbi — capondash Esusēn abi chieshēnquido chuiquin.

*Edusaden yacnocquido Esusēn shubi uaid*  
(Duc 13.34-35)

<sup>37</sup> Adshumbic Esusēn chuiopondash. —Tantia, Edusaden yacnocquido. Mibitsen chuinu. Mibi tantiac unēsquo iquec. Mibi yacnobidi tabadquin Nuquin Papan oncamaidon chuisho nuquin tsusedpabon unēs uapampic. Ademebidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Ademebidi mimbi nēbi naindac. Adquidombo icsho mibi tantiaquiemi. ¿Mitsipadec cachina aton bacuē cudaspec? “Penushe,” quiash aton bacuēmpi nua shocoshon madadec cudasquid. Adecbidi: “Satanasēn yuanushe,” quiash cudasquieci mibi Nuquin Papa bēdamboen ismete tantiametiadquo iccobi. “Tantiamenu,” cac tantiate bunenquo mibi icchitoc. <sup>38</sup> Ēbi nidambic ēbi tantiatiapimbo icsho Nuquin Papan namiac min shububēdtabi mibi nibēdamendac. <sup>39</sup> Nēbi mimbi ēbi isenquo yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēsh choquid bēdambo iquec,” min matses quendac —quequin Edusaden yacnocquido Esusēn chuipondash.

## 24

*Nuquin Papa tabadte shubu uashunaid nibēdante chiaid*  
(Mad 13.1-2; Duc 21.5-6)

<sup>1</sup> Adash Nuquin Papa tabadte shubu uashunaid daquēnē uacno tabadanec nidequi Esusbēd icquido Nuquin Papa tabadte shubu uashunaid caic: —En is, Icho. Nēid shubu bēdamboen nacnenaidquo neque —quepondash. <sup>2</sup> Adsho tantiashun Esusēn: —Mimbi isboedquo cuēnote bēdamboen nacnenaid matses utsibon cuēnote chic-chiquendac nibēdquiecnuc —capondash.

*Nuquin Papan cuidte ushē chiaid*  
(Mad 13.3-13; Duc 21.7-19)

<sup>3</sup> Adanec nidequi macuēsh dapa Odibos caidēn pudundoec poctsebi tabadtuidshun abēd icquidon utsibo tantiamenquo icquin Esus chuipondash. —En mibi chote chui. Tantienu. “Nēbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nēbi nec,” quepe? —capondash abēd icquidon. <sup>4</sup> Adoquien Esusēn naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chui-chitec,” quenda. <sup>5</sup> Adquido choshon: “Nuquin Papan chomiaidquo Quidistu caid nebi,” quequin muaquin chiaqui dadpenshun: “Ai, abimboen mimbi caic,” capendac.

<sup>6</sup> Ēbi choabi icnuc: “Matses dadpenquo cuesnan-cuesnanac caosh,” quecuededendac. Adsho tantiash dacuēdenda. Nuquin Papan matses abitedi cuidte ushē choabi icnuc ambi tantiacpadec matses adonanendac. <sup>7</sup> Adecc matses utsi dadpen icquido matses utsibobēd cuesnanendac. Nidaid utsi-utsiecc yacno pete nibēdquiecc icted-ictedendac. Nidaid utsi-utsiecc yacno nidaidquiobi comapenec uēdēquedenendac. <sup>8</sup> Adsho isash

chido bacuë nëncuenacsho isun: “Nëbien tishchitec,” quequin tantiacbimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

<sup>9</sup> Adashic abi onquec: —Ëmbi chiapadquio icnuc chieshëmënquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpen-shun ëbi tantiaquido chieshënquiendac. <sup>10</sup> Adoac ëbi tantiatsëcboedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

<sup>11</sup> Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpen-shun: “Ai, abimboen mimbi chiec,” caindac. <sup>12</sup> Matses dadpenquio icsamboecshë tabadsho isun ëbi tantiatsëcboedëmbi ëbi tantienquio yanendac. <sup>13</sup> Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

<sup>14</sup> Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

*Matses icsamboshë icquid chote chiaid*  
(Mad 13.14-20; Duc 21.20-24; 17.22-24)

<sup>15</sup> Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiapadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec. <sup>16</sup> Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsiash.

<sup>17</sup> Adec cuenec shubu dayun icquido puduedenquio yec: “Con na bednu,” quenquio yec umanucuëshi cuenac bëdambo ictsiash. <sup>18</sup> Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsiash. <sup>19</sup> Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac. <sup>20</sup> Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushënquio cuemenquio icpashuni,” queoata. <sup>21</sup> Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmënquiec tabadendac. Nuquin Papan tauamboen matses uac adec tabadenquio ictenec. Nëbi adec tabadenquio iquec. Aido icsamboecshë tabadquido nibëdanambic utsibo adquidpenquio yanoaindac. <sup>22</sup> Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquio icsamboen tabadmenquio icquin ënëdmendac —quepondash Esus.

<sup>23</sup> Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin icsamboen chuioidac. Adsho tantiashun: “Nuquin Icho Esus choashen nec,” cainda.

<sup>24</sup> Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiad nebique. Is,” quequin nadatiambo icquin nabanquin ismendac. Adsho isun dadpeshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiaido yec adtiapimbo iquendac. <sup>25</sup> “ ‘Chieshëmënkuido iquendac,’ quequin tantienquio icquidën ëbi tantienquio yanushe,” queshun: “Aden ëbi tantiaquido chieshënquidac,” quequin chiombi —quepondash Esus.

<sup>26</sup> Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque. <sup>27</sup> Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquio isenquio icpadic? Ai, isec. Adembidi ëbi choasho matses abitedishunquio isendac. <sup>28</sup> Adec choendabi. ¿Ada edeste pisen chec budenquio icpadic? Ai, budec. Adecbidi Nuquin Papan cuidte ushë chonoc choendabi —quepondash Esus.

*Abi chote Esusën chiaid*  
(*Mad 13.24-37; Duc 21.25-33*)

<sup>29</sup> Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquio yanendac. Inchëshën ushëtsen chënquenquio yanendac. Uispa chedo paëdbudnendac. Uispabimboecquid abitedimbo uëdëquendac. <sup>30</sup> Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquio yec chosho isash cuidadtequido abitedimbo dacuëdec natiaic shubiquidac. <sup>31</sup> Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsiutsec yacno nidshun ëbi tantiaquido abitedimbo bedtanendac.

<sup>32</sup> Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc secud-uquiaid isun: “Nëbi seta taëec,” quequin tantiaquid. <sup>33</sup> Adembidi ëmbi chuiboed isun: “Nëbimbobi Esus choec,” quequin tantiata. <sup>34</sup> ¿Muectabi nedi? Ëmbi chuibocpadquio iquendac. Ëmbi chiapadec yanabi matses abitedi nibëdantiapimbo iquendac. <sup>35</sup> Abimbo caimbi. Abu nibëdanendac. Nidaidsen nibëdanendac. Padnuen ëmbi chuiboedquio nibëdantiapimbo iquendac. Bënudenquio iquendac. Ucuttiapimbo iquendac. Ëmbi chuibocpadquio iquendac —quepondash Esus abëd icquido chiec.

*Esus chote ushë tantienquio icte chiaid*  
(*Mad 13.32-33; Duc 17.26-35*)

<sup>36</sup> Adashic abi onquec Esus: —Ëbi chote tantienquio iquembi. “Aid ushënquio choendabi,” quetiapimbo iquebi. Adembidi mayan bëdabon

tantienguo iquec. Ĕmbibi Nuquin Papan Madonquiobi tantienguo iquembĭ. Nuquin Papanuidtsĕquien tantiec. <sup>37</sup> Matses ěbi caic: “Nĕbi choec,” quetiapimbo icnuc choendabi. Noen cano nacnenubi ĵmit-sipaden aton matses icsambo icquidon tantiapampic? <sup>38</sup> Nidaid abichobi mauanabi icnuc: “Nuquin Papan nuqui cuidendac,” quequin tantienguo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. <sup>39</sup> Aton matses: “Nĕbimbobini Nuquin Papan cuidchitec,” quenquo icnubi ue dapambo choec mauanquidĕn matses abitedimbo unĕsbudnepampic Noe ambi cano anshubu uaidĕn nuadtonobi. Adecbidi Nuquin Papan cuidtequido ěbi caic: “Choec,” quenquo icnubini choendac.

<sup>40</sup> Choquin Nuquin Papa yacno tabadmenuen beduamendambi. Ĕmbi: “Bedtan,” cac tied nantan dada daĕd icsho istuidshun ěbi tantiaquid abentsĕc icsho beduanendac. Utsibic ěbi tantiesa icsho nianendac. <sup>41</sup> Adembidi Nuquin Papa yacno tabadmenuen chido daĕdshun macueso istuidshun abentsĕc ěbi tantiaquid icsho aid abentsĕc beduanendac. Chido utsibic ěbi tantiesa icsho nianendac.

<sup>42</sup> Aden ěmbi chuiboed tantiashun: “ĵNĕbida con Icho chopeba?” quequin ĕnenquo icquin tantiata. Ĕbi chote mimbi tantienguo iquec. <sup>43</sup> ĵ “Nĕbi ampequidĕn ampec,” quequinda tantiapadic? Padenquo. Tantiatquidĕnquien aid ushĕnquo aton na bĕdamboen isquin ampemenquo ictsiash. Aden tantienguo icquin: “Ampesho isnu,” quequin ĕnenquo icquin isquid. <sup>44</sup> Adembidi ěbi chote ushĕ mimbi tantienguo ye. ĵ “Nĕbida nuquin Icho chopeba?” quec Nuquin Papabĕd tabadte bunec bĕdamboec tabadta. Matses dadpen: “Nĕbien chochitec,” quenquo icnubini choendac —quepondash Esus abĕd icquido chiec.

*Esus bĕdamboen cainte chiaid*  
(Duc 12.41-48)

<sup>45</sup> Adshumbic abi bĕdamboen cainte Esusĕn chuipondash. —Tantia. Aton icho tantiaquin yua bĕdambo icquidĕn naid mibi chuinu. Icbon: “Ĕbi nidan mibĕdta yuaido pete sandoaid musucshun ĕmbi chiacpadĕn ĕmbi chiacpadĕnquien menianeta,” cac yua bĕdambo icquidĕn adotsiash. <sup>46</sup> Adnubien icbon choshon ambi chiacpadomboen yuan nasho isun bĕdamboen istsiash. <sup>47</sup> Adshumbic aton yua chuitsiash. “Bĕdamboen tantiaquid mibi neque. Con yua utsibo namequin con natedi dayun uata,” catsiash icbon yua bĕdambo icquid caquin. <sup>48</sup> Padnuen yua icsambo icquid: “Ĕndenquimbo con icho nidondash. Choenquien icchitec. Con nauidi nanu,” <sup>49</sup> quiampatsiash. Adshumbic chieshtoshon abĕdta yuaido cuesanetsiash. Adashic icsambo icquidobĕdi icsamboec tabadtsiash. <sup>50</sup> Adec: “ĵNĕbida con icho chopeba?” quenquo icnubien aton icho chotsiash. <sup>51</sup> Choshon ambi chiacpadomboen nainquo icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bĕdambo icquid damianquido cuidacno icsamboshĕ yacno nidmendac. Adoac natiac shubiquiendac —quequin abi bĕdamboen cainte Esusĕn chuipondash.

*chiaid*

<sup>1</sup> Adshumbic Esusën ompoacbimboen chuiquin abi chote ushë tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aibdëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-icboen buanuen sanambededpac caondash. <sup>2</sup> Aid chido 5tedi tantienquo icquido icnubi 5tedbidi bëdamboen tantiaquido icpac caondash. <sup>3</sup> Tantienquo icquidon: “Tabote bëchi naimëdsho cushtonon buanu,” quenquo icquin bëchi uesadbudtsaid taboteuidtsëqui sananquin caimpac caondash. <sup>4</sup> Padnuen bëdamboen tantiaquidon naimëdsho cushtonoequin tabotebëdta sedunten cushtoaïd bëchi sananquin caimpac caondash. <sup>5</sup> Aden cainaqui: “Chido bedtanu,” quianec nidboed choenquo icsho isash abitedi ushcastoash ushcuededpac caondash. <sup>6</sup> Inchësh poctsemboen: “Choeque. Bëquednu. Nid,” cac <sup>7</sup> isucunshun chidobon tabonoen tabote dëbedpac caondash. Adoshon bëdamboen tantiaquidon ambi bëboed bëchi cushtonobien <sup>8</sup> icsamboen tantiaquidon: “Bëchi becho. Con na naimëdeque,” caquien bëchi bëboedën <sup>9</sup> bëdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. <sup>10</sup> Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashpac caondash. <sup>11</sup> Adnubien bëdamboen tantienquo icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” <sup>12</sup> caquien chido bedquid: “Padi. Èmbi tantiacmaïdo mibi nec,” quepac caondash.

<sup>13</sup> Èmbi chuiboed tantiaishun chido icsamboen tantiaquido tanenda. Bëdamboen nabi icsho: “Èmbi tantiacmaïd mibi neque. Puduedenda,” aïdo cacbimboen èmbitsen Nuquin Papa yacno puduedmenquo icquin cacumechitomane. Èbi chote ushë tantiadengquo icnuc: “¿Nëbida con Icho chopeba?” quequin èbi bëdamboen tantiec èmbi chiapadec bëdamboec tabadta —quepondash Esus abëd icquido chiec.

*Icbon piucquid daëd uaid chiaid**(Duc 19.11-27)*

<sup>14</sup> Adshumbic abi tantiaquidon ambi chiapadomboen nate Esusën ompoacbimboen chuioapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. <sup>15</sup> “Nëidën bëdamboen tantiaquidquiduo icquin con piucquid èbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiactsëc tantiaatsëcquin adembidi èbi con piucquid daëd uashuntsëctsiash,” qeshun utsitsen piucquid abentsëcquiobi menetsac caondash. Adanec nidpac

caondash icbo. <sup>16</sup> Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed uidictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. <sup>17</sup> Adembidi piucquid 2ted meneboedën 2bidi daëd uapac caondash 4tedi icnuc. <sup>18</sup> Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

<sup>19</sup> Yuecquio ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac <sup>20</sup> sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien <sup>21</sup> icbon: “Ai, con na daëdpectsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Èbëd cuishonquec tabadec cho,” capac caondash. <sup>22</sup> Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien <sup>23</sup> icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

<sup>24</sup> Adnubien piucquid abentsëcquiobi meniondaidën chieshquidëntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquo icsho isash chushcanquidquo mibi nec. <sup>25</sup> Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien <sup>26</sup> icbon: “Chieshquieci mibi icsac. Èmbi chiacpadomboen nambo mimbi iquec. Èbi caic: ‘Ancanquid icquin ëbi chushcanushe,’ queshun <sup>27</sup> nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” <sup>28</sup> quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. <sup>29</sup> Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaid niacquid bëdamboen tantiamenquo iquendambi. <sup>30</sup> Aid yua icsambo icquid cuidacimboen Nuquin Papan ëbi tantiesabo cuidquiendac. Ambi icsaido cuidquiacno nësecac natiaic shubiquiendac —quepondash Esus abëd icquido chiec.

### *Matses nashunesa cuidte chiaid*

<sup>31</sup> Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. <sup>32</sup> Adshumbic matses abitedimbo cho-chomequin tsidadmendambi. Adshumbic icbon aton nauidquo tsinacacimboen ëbi tantiaquido naden chiendambi. <sup>33</sup> “Èbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. <sup>34</sup> Adshumbic ëbi tantiaquido padpiden chuioaindambi. “Èbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido

icmeshun ëbëdi tabadmendambi,' quequin Nuquin Papan tantiaidombo yec ëbëdi bëdamboec tabadec cho. <sup>35</sup> Mimbi ëbi nashundenec. Bundoacsho mimbi ëbi pemedenedec. Acte bundoacsho ademvidi mimbi ëbi acmedenedec. Mimbi isacmaidquio icsho mimbi ëbi yuedtenec. <sup>36</sup> Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenedec," caindambi. <sup>37</sup> Adoquien bëdamboec tabadquido: "Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. <sup>38</sup> ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. <sup>39</sup> Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec," ëbi caindac. <sup>40</sup> Adoac naden chiendambi. "Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacbimboen mimbi utsibo nashundenec. Ëbëdi tabadec cho," caindambi.

<sup>41</sup> Adoshombic ëbi tantiesabotsen chiendambi. "Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. <sup>42</sup> Ëmbi chiacpadomboen ëbi tantiaquido nashunesambo mibi ictenec. Bundoacsho mimbi ëbi pemenquio ictenec. Acte bundoacsho mimbi ëbi acmenquio ictenec. <sup>43</sup> Mimbi isacmaid icsho mimbi ëbi cacumedenedec. Dashcute nibëdsho mimbi ëbi menenquio ictenec. Daicsacsho isash mibi ëbi datsadenquio ictenec. Quënën nauedacsho mimbi ëbi istanenquio ictenec," caindambi. <sup>44</sup> Aden chiaquien: "Tantiadenquio icnuc mimbi chiec. 'Pete bundopash,' quequin tantienquio iccondambi. 'Acte bundopash,' quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc mimbi chuipec," caindabi ëmbi chiacpadomboen naisabon. <sup>45</sup> Adoac naden chiendambi. "Ëbi tantiaquido nashunenquio icquin ëbibi nashunenquio yacimboen ëmbi chiacpadomboen naisabo mibi neque. Nuquin Papan cuidacno nid," caindambi. <sup>46</sup> Adoac icsamboec tabadquido ënenquio icquin cuidacnombo nidnubi bëdamboec tabadquido Nuquin Papa yacno ënëdenquio yec tabadendac —quequin Esusën chuipondash.

## 26

*Esus bedshun unës uanuequin chiaid*  
(*Mad 14.1-2; Duc 22.1-2; Uan 11.45-53*)

<sup>1</sup> Aden abi chote ënquin chuitanquimbic abi unës uatetsen abëd icquido Esusën chuipondash. <sup>2</sup> —Daëdec ushun nuquin matsesën obeca bacuë unës uaindac. Tsusedpabon: "Ma con mado unës uainquio icnu," queshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten decdamendac —quepondash Esus.



<sup>3</sup> Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. <sup>4</sup> Adashic: —Nëbien Esus unës uametiad utsibo ismenquo icquin bedshun. <sup>5</sup> Nuquin matses obeca pec tabadnuc bedenquien ictiad. “Esus bëdambo icquidi cuesunec,” queshun obeca penuec cho-choquidon nuqui cuesnushe —quepac caondash.

*Chidon Esus machiuinaid*  
(*Mad 14.3-9; Uan 12.1-8*)

<sup>6</sup> Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. <sup>7</sup> Puduedshun pec samëdshobien chidon puduedshun ambi piucquid dadpenquo menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —queshun. <sup>8</sup> Adsho isumbien Esusbëd icquidon: —¿Adenda bëdamboen nai? Ma icsambo yoc. <sup>9</sup> Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

<sup>10</sup> Adsho tantiahubien Esusën: —¿Atotsieshun chido chushcai? Èbi bëdamboen tantiaquin èbi ismequin bëdamboen nashunebique. Chushcainda. <sup>11</sup> Mimbi chuiboed piucquid nibëdquido ënëdenquo yec mibëdi tabadendac. Èbien mibëdi tabadenquo yanendac. <sup>12</sup> Èbi unës uashun chococate tantiacbimboen machiuinoshibique. Chushcainda. <sup>13</sup> Èmbi chiaid chuibeniacnoshon nëid chidon èbi machiuimboed chiendac —quepondash Esus abëd icquido chiec.

*Udasën Esus bedmenun piucquid bedaid*  
(*Mad 14.10-11; Duc 22.3-6*)

<sup>14</sup> Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. <sup>15</sup> Nidshumbic chuituidpac caondash. —Utsibo ismenquo icquin mibiuidtsëqui Esus bedmenu. ¿Tetsi piucquid èbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded èbi bedme —quequin. <sup>16</sup> Meniac bedanec nidec: —¿Mitsishunquiemi utsibo ismenquo icquin Esus bedmepeba? —quepanëdash Udas. Adashic Esusbëdi tabadoaic chopondash.

*Unësnush abëd icquidobëd Esus pec tabadaid*  
(*1Cod 11.23-26*)

<sup>17</sup> Adnubien Esusbëd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquo icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: <sup>18</sup> —Edusaden yacno nidshun èmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiapadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid <sup>19</sup> —cac nidquimbi shubu icbo chuituidac caondash. Adoac: —Ai, ma chobono —quesho tantiahubien abia nidboedon aidën shubun puduedshun penuen nësh yua obeca codocapcondash. Adnubien Esus chedo puduedpondash.

<sup>20</sup> Inchëshëmbi abëd icquido 12tedbëd samëdquin Esusën pepondash. <sup>21</sup> Pec samëdquin Esusën chuipondash. —Tantia. Mibi chuinu. Ëbi chieshënquido ëbi bedmequid abentsëc nëmbobi iquec —quesho tantiashun <sup>22</sup> unësquo yanshun abentsëcshun abentsëcshunquien Esus chuipondash abëd icquidon. —ĴËbida cai, Icbo? —quequin abi chuishobien <sup>23</sup> Esusën: —Ëbëdtan pete codocaid ënë punquid ëbi bedmequid nendac. <sup>24</sup> Ëbi Nuquin Papan chiaid dada uamepampicpadquid matsesmiad yec unësendabi. Padnuen ëbi bedmequid comapenen cuidtequidquo nec. Anin aid tishenquo icpatecnëdan. Cuidac nati-aquiendac —quepondash Udas caic.

<sup>25</sup> Adoaquien Udasën abi bedmequidënquo: —ĴËbida cai, Icbo? —caquien: —Ai, mibibimbi caic —capondash. Adoac Udas puduenanec nidpondash.

<sup>26</sup> Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi. <sup>27</sup> Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtocaid pictsë-pictsen acbampondambi. <sup>28</sup> Aid actequid acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiata —capondashi.

<sup>29</sup> Adashic: —Nadquid actequid padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec. <sup>30</sup> Adashic cuëdënten abentsec cuëdëdash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid*  
(*Mad 14.26-31; Duc 22.31-34; Uan 13.36-38*)

<sup>31</sup> Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niquendac. Nuquin Papan naden chuipampic. “‘Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. <sup>32</sup> Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

<sup>33</sup> Adoaquien Petedo: —Mibi cuesnuec cho-chosho isash utsibo dacuëdec niquenuec ëbimboen cuenenquimbo ictsiandac —queshobien <sup>34</sup> Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien <sup>35</sup> Petedo: —Pada. Adtiapimboeni iquec. Chieshëmënuquidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo

iquendabi. Mibëdquiobi unëstsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

*Quetsemani caid yacnoshon Esusën Nuquin Papa chiaid*  
(*Mad 14.32-42; Duc 22.39-46*)

<sup>36</sup> Adanec nidequi cuëte dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

<sup>37</sup> Adashic Petedobëdta Sebedeyon mado daëd buanec nidpondash. Udictsëc nidequi unësquio yanec shubiantiadtsëcquio yampac caondash. <sup>38</sup> Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiaash unësquio iquebi. Ëbi yacpadec ushenquio yec nëmbobi isec tabadta —quianec <sup>39</sup> udictsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquio icpatsia, Papa? Mimbi: “Ai, mibi unës uamenquio iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësendabi —quepac caondash Esus Nuquin Papa chiec.

<sup>40</sup> Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin isti-apimboda icco? <sup>41</sup> “Satanasën icsamenushe,” queshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec —capac caondash Esusën Petedo chedo chuiquin.

<sup>42</sup> Adtanec padpidec nidoashun Nuquin Papa chuioaic: —Ëbi unës uametiadquio icquin ëbi unës uameta, Papa. Ëbi unës uametiapimbo icquin mimbi ëbi unës uamenquio ictsiac. Mimbi tantiacpadomboen nata, Papa —quetanec <sup>43</sup> choaquin isquien Petedo chedo ushoaic ushcas mëmuntiapimbo yec.

<sup>44</sup> Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

<sup>45</sup> Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd ichoedëmbi icsambo icquido ëbi bedmeque. <sup>46</sup> Nidnu nid. Is. Ëbi bedmenuec ëbi bedmequid choeque —quepondash Esus Udas chosho isash.

*Abi chieshënquidon Esus bedaid*  
(*Mad 14.43-50; Duc 22.47-53; Uan 18.2-11*)

<sup>47</sup> Adnubien Udasën Esusbëd ichoedën bedtanac matses dadpen cuesantiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash. <sup>48</sup> Ambi bedtanaidobëd cho-choquimbien Udasën: —“Nëid Esus nec,” quequin adoendambi —abi quiacpadembi <sup>49</sup> Esus tansudcatuidpondash: —Chobi, Icbo —quequin. <sup>50</sup> Adoaquien Esusën: —Ëmbi tantiaboedquio mibi nec. Ëmbi adoboedënquiobi mimbi tantiacpadomboen nata —queshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

<sup>51</sup> Aden Esus bedshobien abéd icquidèn abi tsiusudaïd chështe chictanquin chuiquid dapan yua pateshunepondash. <sup>52</sup> Adoshobien Esusèn: —Padi. Chèn. Min chështe tsiusudoata. Cuesanquid icsho adembidi cuid-nushe. <sup>53</sup> ¿Tantienquioda ique? Èmbi chiac con Pan ambi abi yacnoshon uaido mayan bédabo dadpenquioshè èbi cudasmenuen chometsiash. <sup>54</sup> Nuquin Papan aden èbi cudasmiaç bedadtiapimbo icsho ¿mitsipaden Nuquin Papan chuiquin dada uamiampicpadomboen èbi naden bedpat-siash? —capondash pateshunianquid chuiquin.

<sup>55</sup> Adashic abi bedquido chiec: —¿Atotsi quenuc chështebèdta cueste sanambededtsècquiec èbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidèn badiadquidènquien Nuquin Papa tabadte shubu uashunaid daquènè uaidèn puduedshun chuide-neshobi ma mimbi èbi bedenquio icboc. <sup>56</sup> Padenquio icboedombi Nuquin Papan tantiacpadènquiobi mimbi èbi bedec. Èbi bedte chuiquin Nuquin Papan nuquin tsusedpa dada uamiampicpadomboen mimbi èbi bedec —quequin Esusèn chuïnubini niquepondac: —Cuenenquio ictsiabi —queboedi.

*Caipas caïd yacno Esus buanaïd*

(*Mad 14.53-65; Duc 22.54-55, 63-71; Uan 18.12-14, 19-24*)

<sup>57</sup> Adnubien chuiquid dapambo Caipas cuëmèdquid yacno Moisesèn dada uampid chuibanquidobèdi tsusio utsibo cho-chopac caondash. Adnubien ambobi Esus bèpac caondash. <sup>58</sup> Adnubien Petedo uanoshon isbèec tsyuec chopac caondash. Choash chuiquid dapabo tabadacno daquènè uaidèn puduedpac caondash. Adashic Esus mèyansho isnuec puduedash chuiquid dapan namiaïdo sondadobèdi tsadtuidpac caon-dash Petedo.

<sup>59</sup> Adnubien cho-choboedo tsusio dapabo: —Esus unès uamenuen: “Esus icsasho isombi,” quequin muaquidon chuïsho tantianuna —qeshun chomiac muaquido dadpenshun: —Esusèn icsamboen nasho isombi —quequin chuïpac caondash. <sup>60</sup> Aden Esusèn naïd muaquin chuiquin Èsus unès uatiadquio icquid chiamo icpac caondash. Adnubien muaquid daèdshun chuituidpac caondash. <sup>61</sup> —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daèdec ushquin nainendambi,” ma Esus quepondac —quepac caondash.

<sup>62</sup> Adshobien chuiquid dapabo chuiquidèn Esus chuiquin: —¿Atotsi quenuc ado? ¿Atotsi nèïdèn chiec? —caquien <sup>63</sup> Esusèn èbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaïdquio aton Madombobida mibi nepe? —caquien <sup>64</sup> Esusèn: —Ai, mimbi chiaïdquio nebi. Tantia. Mibitedi chuïnu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuèsh padpidec choec abu ushu yacnuèsh choshobini mimbi isendac —quepac caondash Esus.

<sup>65</sup> Adsho tantiaç chuiquid dapambo chieshtotanquin aton dashcute bèntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naïd utsi chuïsho tantiatiapimbo iquebi.

Ambibi Nuquin Papa muauasho tantiashun <sup>66</sup> ¿Atotsi natiadquoio ique? —caquien abēdtan chuiquid utsibo: —Adquid cuidquid quedeneque. Unēs uamequimbien ictiad —quecuededpac caondash.

<sup>67</sup> Adshumbien Esus chieshēnquin bēcuishtuabudnetanquin mēshēbudtanquin mēdanten bēse-bēsepac caondash. Bēse-bēsesho istanquin utsibontsen istiapimbo icnuc Esus dashcuten bēpuctanquin mēdanten bēcues-bēcuespac caondash. <sup>68</sup> Bēcuestanquin: —“Nuquin Papan madombobien nec,” canu. En chui. Tantuanu. ¿Tсандan mibi naoshe? —cabededtsēcquien mamēnshumpac caondash Esus.

*Esus caic: Ęmbi isacmaid nec, quequin Petedon chiaid*

*(Mad 14.66-72; Duc 22.56-62; Uan 18.15-18, 25-27)*

<sup>69</sup> Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbēd ma mibi icpaboc —caquien: <sup>70</sup> —Tantiadenquoio icnuc mimbi chiec. Ęmbi isacmaidquoio mimbi chiec —quec Petedo muaic taēpac caondash.

<sup>71</sup> Adanec daquēnē uaidēn puduedte shēcuē dayun nidash nidtuidpac caondash.

Adshobien chido yua utsin: —Nasaded yacnocquid Esusbēd ma nēid icpaboc —caquien <sup>72</sup> Petedo: —Ma Ęmbi isacmaidquoio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

<sup>73</sup> Adash yuec-yuecpectsēcshumbien ambo tabadquidontsen Petedo chuipac caondash. —Aidbēd icquidien mibi nec. Cadidia yacnocquid onquiabimboec ma mibi onquepayoc —quesho tantiash <sup>74</sup> Petedo: —Comapenen Nuquin Papan cuidchitoshe muasho. Abimbo caimbi. Ma Ęmbi isacmaidquoio neyoc —queoapac caondash.

Adec 3tedec Petedo muanubien cachina bēnē cuēdampac caondash. <sup>75</sup> Adsho tantiashun Petedon Esusēn chuiboedquoio tantiactampac caondash. —Cachina bēnē cuēdanabi icnuc mimbi Ębi caic: “Ęmbi isacmaid nec,” capendac tedesteden —quequin Esusēn chuiboedquoio tantiactanec umanuc puduenanec nidec Esus muauabosh natiaic shubinidpac caondash.

## 27

*Pidato caid yacno*

*Esus buanaid*

*(Mad 15.1; Duc 23.1-2; Uan 18.28-32)*

<sup>1</sup> Adnubien chuiquid dapabo aton tsusio utsibobēdi Esus isec ushenquio badiadpondash. Badiadshun Esus chieshēnquin: —Nuqui yuaquid ancanquid Esus unēs uamec nidnu. Nid —queshun <sup>2</sup> podo cataneshun ancanquid Pidato cuēmēdquid ismenuen Esus buampac caondash.

*Esus bedmequid Udas tētaniadaid*

<sup>3</sup> Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ęmbi bedboed piucquid shocoshēmpi 30ted meneoatanu —quianec abi meneboed tsusiobo menenuc nidpac caondash. <sup>4</sup> Nidshun tsusiobo chuituidpac caondash. —Icsachitobi. Unēs uanuequido bēdambo icquidi bedmechitombi. Nēid mimbi meneboed mibi menenuc chobi. Nē bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic.

<sup>5</sup> Adoaguien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

<sup>6</sup> Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. <sup>7</sup> Matsu nacnenquidën tied bedquin nëïd menenuna. Nuquin matsespenquoï isedquido unësacsho ambo chococanun aid tied bednuna —queshun piucquid meniac caondash. <sup>8</sup> Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. <sup>9</sup> Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaïdbon piucquid shocoshëmpi 30ted meneuidaid bedoashun <sup>10</sup> matsu nacnenquidën tied bedquin meneoapondash,’ quequin Nuquin Papan chiaïd dada uaombi,” quepampic Edemias.

*Pidato caidën Esus chuimiaiïd*

(*Mad 15.2-5; Duc 23.3-5; Uan 18.33-38*)

<sup>11</sup> Adnubien isadaïdbo yuaquid ancanquid Pidaton Esus bëacsho chuïpac caondash. —¿Min matses isadaïdbo chuïquid dapamboda mibi nepe? —caquien Esusën: —Ai, aid nebi —capac caondash. <sup>12</sup> Adnubien abi chieshënquidon muaquin Esusën naïd Pidato chuïpac caondash. Adsho tantïashun Esusën ëcbedenquoï icpac caondash.

<sup>13</sup> Adshobien Pidaton Esus padpiden chuïoaguin: —Mibi icsaïd dadpen chuïpec. ¿Tantienquïoda ique? ¿Ëcbedantiapimboda ique? —caquien <sup>14</sup> ëcbedenquoï icpac caondash Esusën. —Nëïdon muauac nebi —quequin chïenquoï icsho tantïash: —Adquid tantïambo iquëmbi —quepac caondash Pidato.

*Esus unës ua, quequin chiaïd*

(*Mad 15.6-15; Duc 23.13-25; Uan 18.38–19.16*)

<sup>15</sup> Nuquin Papan isadaïdbo unës uainquoï icquin matamiampïd tantiate ushëmbi seta utsin-utsinquoï Pidaton quënën nauedaïd isadaïdbo abentsëc cuemedeneç. Pidaton: —¿Tsutsi abentsëquïmbi cuemepe? —cac isadaïdbon chïacpadquid abentsëc cuemedeneç. <sup>16</sup> Esus bëabi icnuc uïmanëmënquïdquoï Badabas cuëmëdqïd nauedpac caondash.

<sup>17</sup> Adnubien Esus cuidte chuïsho tantianueç cho-choash dadpenquoï tabadpondash. Adsho isumbien Pidaton: —¿Tsutsi abentsëquïmbi cuemepe? ¿Badabastambi cuemepe? ¿Nëbi mimbi bëboed Esus Quidistu caïd-tambi cuemepe? —capondash. <sup>18</sup>—Esus chieshënquidon: “Nuqui padenquoï yanuc nuqui dëniaqueç Esus chuïquid dapa yanushe,” quesahun Esus bëaccosh. Nëmbo tabadquïdon: “Esusquoï cueme,” capashuni —quequin tantiaquin aden chuïpanëdash Pidaton.

<sup>19</sup> Adashic matses icsaïdo cuidte chuïnueç tsadte dapan abucquoï tsadtopondash Pidato. Adshobien yuan chuituidpondash. —Min chïdon: “Chuitan,” cac chobi. Esus caic: “ ‘Aïd dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quïosh’ quequin chuitan,” min chïdon cac chobi mibi chïec —quequin aton yuan chuituidpac caondash.

<sup>20</sup> Adnubien Esus chieshënquïdo tsusiobon ambo tabadquïdo chuïbudpondash. —Pidaton: “¿Mitsicquïdimbi cuemepe?” cac: “Badabas

cuemequin Esus unēs ua,” cado-cadota —cac: —Ai, adoendambi — quecuededpondash.

<sup>21</sup> Adnubien Pidaton padpiden: —¿Mitsicquidimbi cuemepe? — caquien ambo tabadquidon: —Badabas cuemeta —cadonepondash.

<sup>22</sup> Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unēs ua. Cuesten dectanquin unēs ua — quecuededpondash.

<sup>23</sup> Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buēdanquiec cuēdec: —Cuesten dectanquin unēs ua —quecuededpondash.

<sup>24</sup> Adsho —Padi icnuna —caqui niacbidanquiec adequi unēs uate bunquiec cuesantiadpambo yansho isash: —Acte beccho —quepondash Pidato. Bēacsho tasun dapan cushtotanec mēpamēdquin abitedi ismepondash. Adashic Esus caic: —Nēid unēs uametiapimbo iquebi. Nēid unēs uamete bunec mibien cuidadtequidombo nendac. Ēmbien adotiapimbo iquec. Mēpamēdec bēchish ucuadacimboec mimbi icsamiaid ucudebi — quiash mēpamēdquin ismepondash Pidaton. <sup>25</sup> Adsho tantiashien: —Con nabobēdtsēqui adequi cuidadtequidombo icnuna —quecuededpondash abitedimbo.

<sup>26</sup> Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unēs uatan — quequin sondado buamepac caondash Pidaton.

*Esus mamēnshunaid*  
(*Mad 15.16-20; Uan 19.2-3*)

<sup>27</sup> Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamēnshumbedepac caondash unēs uanumbi. <sup>28</sup> Abi dasiuidaid ēnapen icquid chicshun: —¿Chuiquid dapada nedi? —quequin dashcute piumbo icquid dasiuintanquin <sup>29</sup> mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacimboen sananuc abiucshun cuate sanamepac caondash. Adshumbic aton matses chuiquid dapa ismiacimboen mamēnshunquin: —Is. Isadaidbo chuiquid dapambo neque —qeshun danēshēn sebudquin Esus ismepac caondash. <sup>30</sup> Adshumbic dacuishtucatanquin ambi cuate sanameboed bedshuntanquin aidēmbi matombudnepac caondash. <sup>31</sup> Aden mamēnshuntanquin ambi dasiuimboed chictanquin aton dashcutebidi dasiuinoapac caondash. Adoshon: —Ma unēsnuquin cuesten dectanec nidnu. Nid —quequin Esus buampac caondash.

*Esus cuesten dectanaid*  
(*Mad 15.21-32; Duc 23.26-43; Uan 19.17-27*)

<sup>32</sup> Buanquin Esus abi dectante cuate yuēmemebanquimbi dada nidaid Sidene caid yacnuēsh choquid Simon cuēmēdquid Esusēn yuēmiaid sondadon chiadtomebidampondash. <sup>33</sup> Adobidanec nidec macuēsh dapa yacno matses mapi canitebimboec isadquid Codocota caid yacno chopondash.

<sup>34</sup> Choshombien sondadon uba chinaid actequid paēmbi dauē nēcushaid Esus meneuidpondash. —Nē. Ac —cac pictsēc tantanec: —Padi —quepondash aguenguio yec. <sup>35</sup> Adshobien cuate napotiaid bēboedēn dectampondash. Dectanshumbic ambi chicshumboed Esusēn dashcute bednuequin sondadobon abi cuēmēdquidtedi dada uabanshun

tëchun sandoshon cadotanequin dada uatempi puduemaiid isbanquin Esusën dashcute bedbampondash. <sup>36</sup> Adash: —Esus unëso isnu —quec sondado tabadcuededpondash.

<sup>37</sup> Adshumbic: —“Nadquid icsho cuidquin unës uac,” quequin ma isquidon tantianu —qeshun cuate cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. <sup>38</sup> Ampequid daëd cuesten èquë dectambudcuenquin dectantanquin nënantanquio Esus dectampondash.

<sup>39</sup> Adshobien podqued cuëmanquio Esus diadsho isbidanequin chieshënequin chuipondash. <sup>40</sup> —“Nuquin Papa tabadte shubu uashunaid chic-chictanquin daëdec ushquin nacenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash. <sup>41</sup> Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënshunec nadpondash. <sup>42</sup> —Utsibo ismenuembien comapenen tantiaquin matses bédamechitosh. Adembidi comapenen tantiaquin nacenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. <sup>43</sup> “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu —quepondash tsusiobo. <sup>44</sup> Adnubien abëdta cuesten dectamboedon ampequidontsen Esus mamënshumpondash.

*Esus unësaid*

(*Mad 15.33-41; Duc 23.44-49; Uan 19.28-30*)

<sup>45</sup> Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. <sup>46</sup> Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun èbi bédamboen isenquio yano, Papa Edoen? —quec adondash.

<sup>47</sup> Adec cuëdsho tantias isquido nadpondash. —Edias yampid cuënchitequien nec —quiampondash. <sup>48</sup> Adnubien Esus isec tabadquid abentsëc titinqueanec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cuate dëdectanshun abuc sananec: —Chishmenu —queuidpondash. <sup>49</sup> Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

<sup>50</sup> Adnubien padpidec buëdanquiec cuëdtanec Esus unëspondash. <sup>51</sup> Esus unësnuubi Nuquin Papa tabadte shubu uashunaid yacnuësh: —“Quënë uquëducquidën Nuquin Papa tabadtembo nec,” caidën utsi puduednushe —qeshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bédamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. <sup>52</sup> Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaïdo abentse-abentsec uincuenanec chopac caondash. <sup>53</sup> Esus uincuenanec uincuenaidon shubu dadpen icquid Edusaden caïd yacno nidshun matses dadpen ismepac caondash.



<sup>54</sup>Nidaid uëdëquenuc dacuëdampambo icsho isashien: —Esus unëso isnu —quash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

<sup>55</sup>Adnubien chidobo Cadidia yacnuësh Esusbëd choquin abi codocashumboedo Esus unëso isnuec ancuenhshun isec tabadpac caondash. <sup>56</sup>Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

*Esus chococaid*

(*Mad 15.42-47; Duc 23.50-56; Uan 19.38-42*)

<sup>57</sup>Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. <sup>58</sup>Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. <sup>59</sup>Aden bedtanshun Osen Esus dashcute bëchish nibëdquidënquo nuamboshë icnuc datanedonepac caondash. <sup>60</sup>Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. <sup>61</sup>Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

*Esus nauedaid isec sondado tabadaid*

<sup>62</sup>Isadaidbon obeca bacuë unës uacpadën Esus unës uamiash abentsec ushashi chonoattemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. <sup>63</sup>—Esus nadpadenec. “Unësash daëdec ushah uincuenendabi,” quec muapadeneque. <sup>64</sup>Daëdec ushquin min sondado Esus nauedaid cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictiashe. Min sondado: “Cudasta,” quequin chuita —capac caondash Esus chieshënquidon. <sup>65</sup>Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëdta,” cata —capac caondash. <sup>66</sup>Adoaquien isadaidbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo iquebi,” ma quenu —queshun bucun bëbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

## 28

*Esus uincuenaid*

(*Mad 16.1-8; Duc 24.1-12; Uan 20.1-10*)

<sup>1</sup> Esus unëshon abentsec ushah abi chonoattemaidëntsen abentsecbidi ushah dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. <sup>2</sup> Choash

isec tabadnubi nidaid uëdëquiampac caondash. Adnubien Nuquin Papan abi yacnoshon uaid mayan bëda abucüesh budtanquin cuënote dapa bëtashaid shëcbempac caondash. Adtanec cuënoten tsadtopac caondash. <sup>3</sup> Mayan bëda yec abu bed-bedquiabimboec ushëmboshë bëchamuanquieic icpac caondash. Aton dashcute adquiobidi bëchish nibëdquieic ushumboshë icpac caondash. <sup>4</sup> Adec dacuëdampambo icsho isashien unësaid cudasquido sondado dacuëdtanec uëdëquec tantiadempambo yec padishbudnepac caondash abitedi.

<sup>5</sup> Adnubien mayan bëdan Madia chedo chuipac caondash. — Dacuëdenda. Cuesten dectanquin unës uaboed Esus isnuec mibi tabadec. <sup>6</sup> Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuioapac caondash. <sup>7</sup> —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien <sup>8</sup> auëshquiobi chidobo dacuëdboedi cuishonquec titinquianec nidanepac caondash.

<sup>9</sup> Titinquianec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. <sup>10</sup> Adoaquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

*Esus uincuenasho isun sondadon muauaid*

<sup>11</sup> Madia nidnubien Esus nauedaid isquido sondado abi chomeboedo isadaidbo chuiguideo chiec chopac caondash. Mayan bëda chonoc Esus uincuenboed chuituidpac caondash.

<sup>12</sup> Adoaquien isadaidbo chuiguideon aton chuiguidec utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquio menepac caondash. <sup>13</sup> —Mimbi isboedquio chienquio icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. <sup>14</sup> Mibi caic: “Sondado ushtoac caosh,” quequin chiac mibi chuiguidec dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun <sup>15</sup> piucquid meniac bedanec nidec isadaidbo chuiguideon chiacpadec muapac caondash sondado. Adembidi nëbi isadaidbo dadpenshun: “Esus ampiac,” quequin chuioaic.

*Ëbi chuibeneta, quequin Esusën chiaid*

(*Mad 16.14-18; Duc 24.36-49; Uan 20.19-23*)

<sup>16</sup> Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac. <sup>17</sup> Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —queshun danëshën sebudpondambi. Utsibombien: —¿Con Icbombobida nepeba? —capondash.

<sup>18</sup> Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu. <sup>19</sup> Nidaid utsi-utsiec yacno nidshun ëbi tantiaquido icmenuen

matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta. <sup>20</sup> Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquio iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

## MADCOSËN DADA UAID

*Bëyuc choshon Uanën Esus chote chiaid  
(Mat 3.1-12; Duc 3.1-18; Uan 1.19-28)*

<sup>1</sup> Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bèda chuinu. Tantia.

<sup>2</sup> Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ênshun mibi cainquidombo iquendac, mado.

<sup>3</sup> Shubu nibëdacnoshon comapenec onquequin mibi chotequid aidën chuibanendac naden:

Nuquin Icbo choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

<sup>4</sup> Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ênshun Nuquin Papan chiaid tantiaquin nabanta. Aden tantiaquidquio icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën.

<sup>5</sup> Aden Uanën chuibanubien matses dadpen tantianu quec chodedchodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. <sup>6</sup> Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaïd tsuquid niondash. Shioshbimboecquid shuishun pequid niondash. Bacun chequid niondash. <sup>7</sup> Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bédamboshëcquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? quec tsadebi. <sup>8</sup> Mibi acten mentoquid nebi; aidien abipadquiocquid aton Mayan menianquidquio nendac —quepondash Uan.

*Esus acten mentoaid  
(Mat 3.13-17; Duc 3.21-22)*

<sup>9</sup> Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. <sup>10</sup> Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemoec Esusbëd icnuec budpondash. <sup>11</sup> Aden budmetanec ambi bëcadoacnoëshi: —Mibentsëcquiobi

icsho ëmbi tantiaidquio mibi nec, mado. Ëmbi bédamboen isaidquio mibi nec —quepondash aton Papa Esus chiec.

*Esus Nuquin Papan chiaid niacmenuequin Satanasën tanaid*

(Mat 4.1-11; Duc 4.1-13)

<sup>12</sup> Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. <sup>13</sup> Ambo tsadquimbi ushë abentsëc nidmec utsi choaid abutometsëcquieq tabadpondash. Ambo tabadshobi Nuquin Papan chiaid niacmenuequin tanu quianec mayan icsan icho Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bédabon cho-choshon nashumbededpondash.

*Cadidia yacnoshon tauamboen chuibanaid*

(Mat 4.12-17; Duc 4.14-15)

<sup>14</sup> Ambo yec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. <sup>15</sup> —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiaata —quepondash Esus comapenec onquec.

*Ëbëd iquec cho Esusën abia caido*

(Mat 4.18-22; Duc 5.8-11)

<sup>16</sup> Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. <sup>17</sup> Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. <sup>18</sup> Adsho tantiaash nëshaid abëd icquid menianec abi chuiquidbëd nidanepondash.

<sup>19</sup> Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. <sup>20</sup> Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

*Mayan icsa Esusën dapuduemiaid*

(Duc 4.33-37)

<sup>21</sup> Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. <sup>22</sup> Aden chuisho tantiaashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. <sup>23</sup> Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: <sup>24</sup> —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin

ëmbi tantiaid mibi nec —quec mayan icsa dapuduedtsaid onquepondash. <sup>25</sup> Adoaquien: —Otacquoio tabad —quetanquin: —Dapuduen —capondash Esusën. <sup>26</sup> Adoac comapenec abi dapuduedaid uëdëquenec sidquianec dapuduempondash.

<sup>27</sup> Adsho isash: —¿Abimbodambi ispo? ¿Mitsipadquidquoio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. <sup>28</sup> Adec onquecuededash auëshquoio nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabedpondash.

*Simonën nachi bëdamiaid*  
(Mat 8.14-15; Duc 4.38-39)

<sup>29</sup> Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. <sup>30</sup> Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. <sup>31</sup> Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquoio bëdampondash. Adec bëdanash nidtoshon codocashun abi choquidtedi pemebampondash Simonën nachin.

*Esusën dadpen bëdamiaid*  
(Mat 8.16-17; Duc 4.40-41)

<sup>32</sup> Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. <sup>33</sup> Bë-bëash Simonën shubu shëcuë cuëmano puduedabi tabadcuuededpondash. <sup>34</sup> Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquicpondash.

*Shubu nibëdacno Nuquin Papabëd onque Esus onquiaid*  
(Duc 4.43-44)

<sup>35</sup> Adashic badiadte anoentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash. <sup>36</sup> Esus nidacshobi isucunshun Petedo Simombëd icquidën nibënampondash. <sup>37</sup> Aden nibënquin istuidashi: —Mibi isec cho-choquidtedishun mibi nibëmbededec —quepondash Esus caic.

<sup>38</sup> Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. <sup>39</sup> Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapudueoapondash.

*Nami mishac tantiadenquiocquid bēdamiaid**(Mat 8.2-4; Duc 5.12-13)*

<sup>40</sup> Aden Esusēn chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ēbi bēdame —quequin Esus chiec comapenec cuēdpondash.

<sup>41</sup> Adec cuēdshobi nēid isash unēsquo iquebi quequin ēquēducshun tantiaquin mishec Esus: —Mibi bēdamembique. Bēdambo icta <sup>42</sup> —quenubi daicsaid nibēdquo yec bēdampondash.

<sup>43</sup> Aden bēdametanquin nidmepondash: —Nidec nid. <sup>44</sup> Nidquimbi, Esusēn bēdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbicquid daēd meneta Moisesēn chiapadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesunaidēn intac puntanequin intac mibi daseccashun dēbimbicquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec. <sup>45</sup> Adsho tantiaboshombi niachidanquin Esusēn bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

**2***Cuembo yec uishquiaid Esusēn bēdamiaid**(Mat 9.2-8; Duc 5.18-26)*

<sup>1</sup> Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. <sup>2</sup> Dadpen cho-choash puduedash tsucus-tsucustsēcquo yec tabadnubi adecbidi shēcuē cuēmano tabadpondash. Adec tabadsho isun Esusēn Nuquin Papa yacno shubu abentsēquēn tabadte iquec quequin chuibampondash. <sup>3</sup> Adnubien cuembo yec uishquiaid bēc dada daēd-daēdquiec 4ted cho-chopondash. <sup>4</sup> Cho-choshon matses tsucus-tsucustsēcquo yec tabadsho isun dectatoshon macano nacnenaid chic-chictanquin Esusēn dayunquo uishquiaid imbudpondash. <sup>5</sup> Aton dayunquo imbudsho isun Esusēn bēdamec quequin abi imbudboedēn tantiec quequin ambibi tantiapondash Esusēn. Adashic: —Mado, mibi cuidenquo yec mibi icsaid bēpiscudobi —quepondash Esus.

<sup>6</sup> Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. <sup>7</sup> ¿Atotsi quiash adec Esus onquepeque? Tantanu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bēpiscudquid nec, quetsēcquiec tabadpondash.

<sup>8</sup> Aidon tantiaid tantiec nadpondash Esus: —¿Atotsieshun aden mimbi icsamboen tantiape? <sup>9</sup> ¿Mibi cuidenquo yec mibi icsaid bēpiscudobi

quequin ëmbi chiaidquoio bédantequidpenda nedic? Adecbidi, ¿Mibi icsambochoedi mibi bédanoque. Nidtoson mibi imbudboed chiadtoson buanec nid quequin ëmbi chiaid bédantequidpembidida neoadic? <sup>10</sup> Ai, adquidquibidi nec. Mibi cuidenquoio yec mibi icsaid bëpiscudobi queboed chidon tishac matses yanaid yequi chuiquidquoio Esus nec quequin tantiesabo mibi nepec. Adquid icsho ëbi tantiamenuequin <sup>11</sup> cuembo yec uishquiaid naden chiembique Tantia. Mibi icsambochoedi mibi bédamiombique. Nidtoson mibi imbudboed chiadtoson buanec nid —capondash Esusën. <sup>12</sup> Adoquien nidtoson abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsëcquiec onquish Nuquin Papan naid nec quec cuëdëncuededpondash.

*Ëbëd iquec cho Esusën Debi caid*  
(Mat 9.9-13; Duc 5.27-32)

<sup>13</sup> Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen chochoapondash. Cho-choasho isun Nuquin Papan chiaid chuibanoapondash Esusën. <sup>14</sup> Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na utsibon buan-buansho isun piucquid bedshunquid Debi nepondash. Ademebidi nidaid utsi yacnoshon aton na bë-bësho isun piucquid bedshunoquid Debi nepondash. Isadaidpembo ancaquidën, Con matsespembon piucquid bedshunta, cac bedshunoquid Debi nepondash. Adshobien: —Ëbëd iquec cho —Esusën cac: —Ai, mibëd nidnu. Nid —quianec badedi Esus tsibananec Debi nidpondash.

<sup>15</sup> Adshumbic Debin shubuno nidshun Esusbëd icquidon pepondash. Ashunquibidi aton na buansho isun piucquid bedshunquid Debipadquidën utsin-utsinquien pepondash. Ashunquibidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. <sup>16</sup> Aden adquidbëdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantianu. Ëbi chui —quepondash padiseyobo Esusbëd icquido chiec.

<sup>17</sup> Adsho tantiashien Esus: —¿Dada bédambocquidta dauëchoquidën bédametequid nedic? Padenquoio. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëbëd icquid mibi iquendac quequin chuiquid nebi —quepondash Esus.

*¿Atotsi quiash mibëd icquid buna mëmunesa nec? quiaid*  
(Mat 9.14-17; Duc 5.33-39)

<sup>18</sup> Adnubien abi chuiquid quënën nauedan aid tantiec unësquiocquin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquiocquin buna mëmunoapondash. Aden buna mëmunsho isanec nidequi Esus yacno nidash Esusbëd icquidon buna



mëmunenquo icsho isash utsibo: —¿Atotsieshun Uambëd icquidon adem-bidi padiseyobobëd icquidon buna mëmunubi mibëd icquidon buna mëmunenquo icpec? Tantuanu. Chui —quepondash.

<sup>19-20</sup> Adoaquien Esus: —Aton chido bednun pambid meniac chidon codocasho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquo iquec. Yucash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquo yampec.

<sup>21</sup> “Adembidi dashcute shë nibëdta chucambocquid bëtuscaisa mat-ses nec. Shë nibëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. <sup>22</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiapadec pausudnu qeshun mibi icsaid ënacsho isun Nuquin Papan pausunendac —quepondash Esus.

*Chonoadtemaid ushë icbo nebi quiaid*  
(*Mat 12.1-8; Duc 6.1-5*)

<sup>23</sup> Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbëd icquidon pepondash. <sup>24</sup> Adshobien: —Mibëd icquido is. Chonoadtemaid ushën chonoadeque. Abi chuiquid mibi iquec ¿atotsi quiaish, Padi. Chën, quenquo ique? —quepondash padiseyobo Esus caic.

<sup>25</sup> Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda? <sup>26</sup> Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tanti-aquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

<sup>27</sup> Aden chuishumbic naden padiseyobo Esusën chuioapondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yucash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. <sup>28</sup> Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënkuido padiseyobo chiec.

### 3

*Mëuesadaid Esusën bëdamiaid*  
(*Mat 12.9-14; Duc 6.6-11*)

<sup>1</sup> Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi <sup>2</sup> Esus chieshënkuido

padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquiec padiseyobo tabad-cuededpondash. <sup>3</sup> Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

<sup>4</sup> Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

<sup>5</sup> Adoac quien nëishtanquimbi abi chieshëncquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. <sup>6</sup> Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

*Esus yacno matses dadpen choaid*

<sup>7</sup> Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. <sup>8</sup> Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiaash cho-chopondash. <sup>9</sup> Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquio caic. <sup>10</sup> Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. <sup>11</sup> Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. <sup>12</sup> Adoac quien: —Padi. Aden ëbi chienda —quepondash Esus.

*Abëd 12ted icquid Esusën tantiamenu caid  
(Mat 10.1-4; Duc 6.12-16)*

<sup>13</sup> Adashic macuësh dapa yacno nidnushi abëd 12ted icquido chomeshun nadopondash: <sup>14</sup> Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. <sup>15</sup> Adembidi mayan icsa dapuduedaid dapuduemequidbidi mibi icmembi quequin abëd icquido Esusën chuipondash. <sup>16</sup> Ambi tantiamenu caid nëidtedi icpondash: Simon cashumbic Esusën Petedo capondash, <sup>17</sup> utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash.

18 Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. 19 Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidedi Esusën tantiamequin chuiquin ismiaido niondash.

*Bedtsibu caidën dausunaid Esus nec quiaid*

(*Mat 12.22-32; Duc 11.14-23; 12.10*)

20 Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquo icpondash. 21 Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

22 Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

23 Adoaquien Esus: —Mimbi icsamboen tantieque. Mibi chuibanu. Tantiec tabadta. ¿Mayan icsan icbo ambi dapuduedmiaid dapudue-mequidta nepadic? Padenquo. 24 Adquiecbidi shubu icbo abëd icquido cuëshëdmesa nec. 25 Icbon abëd icquido cuëshëdmiash shubu abentsëquën tabadiapimbo iquendac. 26 Adembidi ambi dapuduedmiaid dapuduemias adquidën icbo ictiapimbo Satanas iquec. Icbo icnuequid abëd icquid puduemesa nec. 27 Dadpenshun icbo Satanas nec. Adquid icquin ambi matses dapuduedmiaid dëniacanquidënuidquido nadatiambocquin nabanquin cuemepec. Adquid icquin ëmbi nac mayan icsa dapuduedaid Satanasën yua icboedi icbombo tantiec bëdambo yanec ëbëd iquendac. 28 Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboeđi, Icsaobi, Papa, qesho tantiashun Nuquin Papan aid pauquendac. 29 Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquo iquendac. Adquid ënëdenquo yec icsaquid nendac —quepondash Esus 30 Satanasën tantiamiac mayan icsa dapudemequid Esus nec abi caquido chiec.

*Esus yacno aton utsibo anibëd choaid*

(*Mat 12.46-50; Duc 8.19-21*)

31 Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec. 32 Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. 33 Adoaquien Esus: —Adquid utsi chuinu. Tantiata. 34 Në tabadquido ëbëd icquido neque. Is —quepondash Esus abëd iccuededquido chiec. 35 Adashic: —Nuquin

Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi — quepondash Esus.

## 4

*Tantiamequin pete ëshë nësecain chiaid*  
(*Mat 13.1-9, 18-23; Duc 8.4-15*)

<sup>1</sup> Adashic padpidec chian cuëmano nidshun Esusën tantiamequin chuibanoapondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. <sup>2</sup> Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: <sup>3</sup> —Tied icbo pete ëshë nësecanuec aton tied yacno nidquid. <sup>4</sup> Adec nësecanuec nidshun pete ëshë nësecac maisec pudun-pudunaid uicchunën chequid. <sup>5</sup> Adnubien nidaid cuënote dadpen samëdacno utsi-utsiec paëdash badedquio dëyucuidtsash <sup>6</sup> tapunenquio iquec ushën shoedec. <sup>7</sup> Adnubien pete ëshë utsi-utsiec nisanquid dëyucacno paëdash dëyucash caniduidtsascho nisanquidën bëtinac podo sinash bacuëtiapimbo iquec. <sup>8</sup> Adnubien nidaid bëdambo yacno paëdaid dëyucaid caniash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

<sup>9</sup> Aden chiash: —Ëmbi chuiboed tantianu quiash bëdamboen tantiec papuduedta —quepondash Esus.

<sup>10</sup> Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibamboed tantianu. Ëbi chui —capondash Esus chuiquin.

<sup>11</sup> Adoquien: —Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc. <sup>12</sup> Aden chiac:

“Nuquin Papan nabamboed isto-istoboedi ma padenquio tabadteneyoc. Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

<sup>13</sup> Aden chiasic: —¿Mimbitsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibansho mimbi tantiapë? Ëmbi chuiboed nad iqueque. Tantia. Chuinu. <sup>14</sup> Pete ëshë sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. <sup>15</sup> Nidaidën paëdash pete ëshë dëyuctiapimboesho uicchunën chiaidbimboec matses utsi-utsiec iquec. Adquid Nuquin Papan chiaid tantiash papuduednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. <sup>16-17</sup> Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsi-bon mamënsnunac badedquio tanties a nebi quendac. <sup>18-19</sup> Nisanquid dëyucacno pete ëshë paëdash dëyucash caniduidtsascho nisanquidën bëtinac podo sinash bacuësabimboec matses utsi-utsiec iquec. Adquid

Nuquin Papan chiaid tantiauidash abi bunaid, abi nënaid, abi icsaid aيتدi tantiaquin Nuquin Papan chiaid tantiesa yanshun bēdamboec tabadaid ismesa yanec. Adquidēn Nuquin Papan chiaid tantiaquid utsi icmetiapimbo iquec. <sup>20</sup> Ēshē utsibic nidaid bēdamboecquidēn paēdash dēyucash caniaash dadpen bacuē icquidbimboec matses utsi-utsiec iquendac. Adquid Nuquin Papan chiaid tantiadonec bēdamboec tabadquin utsi ismequid nec. Aden ismiac Nuquin Papan chiaid tantiaquid daēdpactsēc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshē yanendac —quepondash Esus abēd icquido tantiamenuc.

*Tabote nënantan nanac chēnquiacimboec ictiad quiaid*  
(Duc 8.16-18)

<sup>21</sup> Aden chuishumbic abēd icquido naden Esusēn chuipondash: — ħTabote icbon ambi dayun uaboed taboshon tsadte tēdion nanshun isaidta nedic? Adembidi ħTabote matsun bētashun isaidta neoadic? Padenquo. Nēnantan tabote nanac chēnquiacimboec ismenu quec ictiad. <sup>22</sup> Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adembidi con mado chuiban quenquiocboedēmbi nēbi ēbi ismec ma con mado chuibanu quequid con Pa nec. <sup>23</sup> Ambi chiaid tantianu qeshun tantiaquiec papudedta —quepondash Esus.

<sup>24</sup> Aden chiash Esus: —Chiaid bēda tantiatequidquo iquec qeshun tantiaquiec papuedquid icta. Aden chiaiduidi tantiec papuedquid abipadquid bēdamboecquid ambia tantiaquidēn Nuquin Papan mibi icmendac. <sup>25</sup> Adquid ambi tantiadoniaidquo iquendac. Aden tantienquioctēcquidēn tantiaid bēda uesadendac nibēdquiec —quepondash.

*Ambi siaboed icbon isenquiocnoc bacuēc quiaid*

<sup>26</sup> Adec onquequin abēd icquidquo chuishumbic cho-choquidtsen naden Esusēn chuipondash: —Nuquin Papan shubu abentsēquēn tabadec caidaidquo chuibanu. Tantiata. Nidaid bēdan tiedēn caniquid pete ēshē siash <sup>27</sup> tabadquin cainquidquo icbo nec. Dadpen ushquin ambi seboed isenquo yec icbo tabadnubi <sup>28</sup> ambi seboed dēyucash caniec tauitanec bacuēc. <sup>29</sup> Ambi siaid isenquiocnoc canitanec bacuēcsho badedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidēn isenquiocnobi. Papuedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

*Mostasa caid ēshē chiaid*  
(Mat 13.31-35; Duc 13.18-19)

<sup>30-32</sup> Adec onquequin chuibanashic Esus: —Nadquo Nuquin Papan shubun icquido iqueque. Chuinu. Tantia. Mostasa caid pistsēc ēshēmpi ictsēcquid nēsecaid dēyucash nuamboshē caniec cuidi-cuidipambo iquec shubu-shubupambo yec podoc. Ambo uicchunēn shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

<sup>33</sup> Aden chuibanshumbic adomboembidi Esusēn chuibampondash. Aden chuibanash, aيتدedquo tantiapec abibi qeshumbic aden chiaid

chuiquin ëmpondash Esusën. <sup>34</sup> Aden abited chuibanshumbic abëd icquiduidtsëqui bëdamboen tantiamequin chuipondash.

*Acte tēcçoasquiaid ënëd cac ënëdaid*  
(*Mat 8.23-27; Duc 8.22-25*)

<sup>35</sup> Adashic abi ushëmbi inchëshbudtsëc cano antabëdtoanec Esus: — Chian uquë cuëma utsiuc nuquiuuidtsëqui nidnu. Nid —quiampondash abëd icquido caic. <sup>36</sup> Aden chiac chian cuëman tabadcuededquido niananec badedquio nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash. <sup>37</sup> Aden potenubien cunquequid dapan acte tēcçoasquequin cano acte uemiaidën mentoadtsempondash Esus tëtöadec ushnubi. <sup>38</sup> Adec uec usho: —Cunquequid dapan acte tēcçoascaidën nuqui mentoeque. Isucunta, icho —quequin Esus timpondash.

<sup>39</sup> Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tēcçoasqueque. Ënëd —cac badedquio ënëdoapondash acte.

<sup>40</sup> Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic. <sup>41</sup> Adec Esus cuënnubi badedquio cunquequid dapa ënëdposh. Adecbidi acte tēcçoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquipoondash abëd icquido.

## 5

*Mayan icsa dadpen dapuedaid bëdamiaid*  
(*Mat 8.28-34; Duc 8.26-39*)

<sup>1</sup> Adshumbic acte tēcçoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. <sup>2</sup> Ambobi choash pudundosho mayan icsa dapuedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. <sup>3</sup> Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid ichoedi nadatiambo yanshobi mëtanetiapimbo yampac caondash. <sup>4</sup> Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi nibëdpac caondash. <sup>5</sup> Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

<sup>6</sup> Aidi abi yacno Esus canon chosho isanec titinquianec choash: —¿Tsusio, ada cho? —quiashic: <sup>7</sup> —¿Mibëd icquidtabi nedi? Mimbi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuedaid Esus chiec. <sup>8</sup> Adec mayan icsa dapuedaid abi onqueshobien Esusën: —Dapuduen —cashic: <sup>9</sup> —¿Ttsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotëdi dapuedondaid nebi —quepondash mayan icsa dapuedaid abentsëc yacimboec onquec.

<sup>10</sup> Adashic: —Mibi nadatiambocquid cadoque. Ĕbitedi chian anĕdĕnquiacno nidmenquiocnuequin ĵnĕid nidaidĕn adabi tabadmetsia? —quepondash mayan icsatedi.

<sup>11</sup> Adnubien macuĕsh potseshun chanco dadpeshun pec tabadpondash. <sup>12</sup> Aden pec tabadsho isashien: —ĵAda mimbi ĕbitedi chanco dapuduedmetsia? —quepondash mayan icsa Esus caic.

<sup>13</sup> Adoaquien: —Dada dapuduencuededash chanco dapuduedcuededta —Esusĕn cac dapuduencuededash acte dapa quiusudacnombo comapenec niquec pudun-pudunec mentoadbudnepondash chanco nibĕdquiec.

<sup>14</sup> Adsho isash chanco pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec cho-chopondash. <sup>15</sup> Esus yacno cho-choshon mayan icsa dapuduedaid bĕdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidĕn tantienquiocboedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsĕcquiec tabadcuededpondash. <sup>16</sup> Adec tabadsho isun mayan icsa dapuduedaid bĕdamequin chanco dapuduedmesho isboedon cho-choquido tantiamenuen chuibampondash. <sup>17</sup> Aden chuisho tantiashun cho-choedon: —Nĕmbo tabadenquo yec nidec nid. Mibĕd tabadtiapimbo iquebique —capondash comapenen Esus chushcaquin.

<sup>18</sup> Adsho tantiash cano yacno nidequi cano Esus antabĕdtonobien mayan icsa dadpen dapuduemoed choash: —Mibĕd icte bunebi. ĵAdabi buane? —quepondash. <sup>19</sup> Adoaquien: —Padi. Min shubuno nidtan. Ambo nidshun mibi bĕdamequin mayan icsa dadpen dapuduemeboed Nuquin Papa tantiaquin chuiban. Nuquin Papan ĕbi ad icsho unĕsquiocquin dapuduemiac quequin chuiban —quepondash Esus. <sup>20</sup> Aden Esusĕn chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusĕn naid chuiban-chuibampondash. Aden chuiban-chuibansho tantiacquidtedi, Adopenshenda Esusĕn bĕdamiash, quec abibi onquec tabadcuededpondash.

*Nua intac budaid bĕdameshun champi unĕsaid bĕdamiaid*

*(Mat 9.18-26; Duc 8.40-56)*

<sup>21</sup> Adshumbic canon Esusbĕd icquidon padpiden abi chobocmibidi chian poteoapondash. Adec chosho isash matses dadpen chian cuĕmano padpidec cho-choashun mananuc Esus pudundotsĕcshobi badedquo tsucus-tsucustsĕcquio yec datsidadpondash. <sup>22</sup> Adnubien Nuquin Papan chiaid chuibante shubun tabadquido isquid, Aido cuĕmĕdquid, chopondash. Adec choquimbi Esus istuidash mibi bĕdambocquid nec quequin ismenuc Esus taebudshun: <sup>23</sup> —Con champi unĕseque. Aid mishquin bĕdamec cho —cac <sup>24</sup> Aidobĕdi Esus nidpondash.

Adec nidshobi matses dadpeshun tsibanampondash. Tsucus-tsucustsĕcquio yec nidquin Esus tsibanampondash. <sup>25</sup> Esus tsibanquidquo chido utsi icpondash. Aid chido seta 12ted matamec intac budash bĕdanenquiocquid icpac caondash. <sup>26</sup> Dauĕ meniaqui bĕdanenquo icpac caondash. Dauĕchoquid utsi-utsien piucquid menequin dauĕ bedshun chequi bĕdanenquo yec intac nuambo yampac caondash aton

piucquid naimëdnubi. <sup>27</sup> Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidëntsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. <sup>28</sup> Aden aton dashcuteuidtsëqui mishec bëdampatsiash icmane qeshun mishtsequi bëdampac caondash. <sup>29</sup> Intac bëdanenquiocquid Esus mishec bëdampac caondash. Ëmbi tantiacpadquiequi bëdanobi quequin ambibi tantiapondash.

<sup>30</sup> Adec chido bëdanubien ëmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

<sup>31</sup> Aden chuisho tantiashun abëd icquidënquo: —Tsucus-tsucustsëcquio matses dadpen iquec, ¿tsuntsimbini mishosh, quecta ique? —capondash.

<sup>32</sup> Adec abëd icquid cuëdnubi onquenquiocquin, ¿Midaquidënquo mishoshibique? Isnu, abibi quequin matses utsi-utsien bëispondash Esusën. <sup>33</sup> Aden bëisbanubi, ëmbi mishoc quenquo yec bëdamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bëdanaid chuibampondash. <sup>34</sup> Adoquien Esusën: —Champi, mimbi tantiacpadquiequi mibi bëdanoc. Dada icsambo icboedi nëbi dada bëdambo mibi iqueque. Bëdambo yec nid —capondash chido chuiquin.

<sup>35</sup> Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

<sup>36</sup> Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ëbi tantiata —quepondash Esus.

<sup>37</sup> Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobëdta Acobo Uan, Acobon utsimbo aidtedi buanec Esus nidpondash. <sup>38</sup> Adec nidequi Aidon shubuno choquin comapenec shubicuededsho tantiatuidpondash. <sup>39</sup> Aden tantiequi puduedash Esus: —¿Atotsi quec comapenec shubicuedede? Champi unësenquo yec ushac bimboec uec nec —quepondash.

<sup>40</sup> Adshobien tantiesa icquin mamëshumbededpondash. Adoquien aidtedi puduemiasch champin tita aton papa chedo abëd icquidbëd champi yacno Esus puduedpondash. <sup>41</sup> Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. <sup>42</sup> Adoac badedquo isucunash nidtoash capupondash. Champi seta 12ted icquid niondash. Aidi bëdانشo isun abitedishun, Adopenshenda iquec quequin isbededpondash. <sup>43</sup> Aden champi bëdameshun Esusën: —Ëmbi naboed utsi chienda. Abimbo caimbi. Abentsëcquiobi chienda —capondash. Aden chuitanequi: —Champi peme —quepondash Esus.

## 6

*Abi icnëdacnoshon Esus chieshënquido*  
(Mat 13.53-58)

<sup>1</sup> Auëshquo puduanec nidequi abi icnëdacno Nasaded caid yacno Esus choapondash. Abëdi abëd icquido chopondash. <sup>2</sup> Ambo tabadashich chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden



chuibansho tantienquiocquid abentsëc: —¿Mitsishun chuibansho tantia-  
ashun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin  
nabampec? —queoapondash.

<sup>3</sup> Adnubien utsi: —Nëmbocquid, cuëte nacnenquid, Osen mado nec —  
queoapondash.

Adnubien utsi: —Ani Madia nec. Aton utsibo nëidtedi nëmbo tabadquid  
nec. Nëidic Acobo, utsibic Ose, utsibic Udas, utsibic Simon. Nëmbobidi  
aton chibi chedo tabadoaic —quetsëcquiec tabadec onquecuededec  
chieshcuededpondash.

<sup>4</sup> Aden chieshënaqui Esus nadpondash: —Utsi yacno nidshun Nuquin  
Papan chiaid chuibansho tantiaquid dadpen icnubi abi yacno chuibansho  
chieshënquid aton matses iquendac. Aton shubun icquido adecbidi  
iquendac —quepondash Nasaded yacnocquido chiec. <sup>5</sup> Aido abi  
chieshënquid icsho isun nadatiambocquin nabantiapimbo icpondash.  
Ëbi bédamepec quequin tantiaquidquio daëdpactsëc icsho mishquin  
bédamepondash. <sup>6</sup> ¿Atotsi quiash ëmbi chiaid tantiatipimbo icpec? Adem-  
bidi nadatiambocquin nasho istiapimbo icpec quepondash Esus abibi  
onquec.

*Abëd icquido Esusën nidmiaid*

*(Mat 10.5-42; Duc 9.1-6)*

Adashic auëshquiobi puduanec nidaniash shubu daëdpactsëc yacno  
puduedcuenequin Nuquin Papan chiaid Esusën chuibenepondash.  
<sup>7</sup> Adec cuenadquin chuibanequi abëd icquido caic: —Cho —quetanec  
tabadtuidpondash. Adec tabadtuidash Esus: —Nëbi mibi daëdshun-  
daëdshunquien chuibanec nid. Chuibanquimbi mayan icsa dapuduedaid  
dapuduemeta. <sup>8</sup> Nidquin dadpen mitsana sauedshun buanenda.  
<sup>9</sup> Tapucudte sandadia caiduidtsëqui tapucudash nidaneta. Adecbidi utsi  
bedenquio yec mibi dasiuidaiduidtsëqui dasiuidec nidaneta. <sup>10</sup> Shubu  
dadpen yacno nidash mibi yuedaid shubun puduedash ambouidi  
tabadquin chuibanta. Auëshquio puduanec nidequi shubu dadpen yac-  
nobidi nidshun adquiecbidi tabadquin chuibanoata. Adenuidí naquin  
chuibanta. <sup>11</sup> Mibi yuedquid nibëdsho isash nidaneta. Auëshquio nidash  
shubu ënëdacno choash, Nëmbo icquido tantiate icsachoquid yec abibi  
cuidatquido nec, Papa. Adquid icsho isun abi capuaid nidaid pututedi  
tasequequin Nuquin Papan chiacpadomboen ismeta —capondash Es-  
usën abëd icquido chuiquin.

<sup>12</sup> Aden Esusën chiaquien nidanepondash. Adec nidshumbic, mibi  
icsaid ënshun padpiden tantianu quenquiocquin Nuquin Papan chi-  
acpadomboen nabanta quequin chuibampondash Esusën nidmiaidon.  
<sup>13</sup> Adembidi mayan icsa dapuduedaid dadpen dapuduepondash  
aidëmbidi. Adembidi nënquid dadpen daicsaid chedo cuëte bacuë  
bëchichoquid ënë dachinquin bédameoapondash Esusën nidmiaidon.

*Uan acten mentoanquid mapi butiaid*

*(Mat 14.1-12; Duc 9.7-9)*

<sup>14</sup> Adnubien, Chuibanquimbi Esusën nadatiambocquin nabanosh,  
quequin isboedon ancanquid Edodes chuipondash. Aden chuiban-  
chuibanac dadpenshun Esusën nabanaid tantiapondash. Aden tan-  
tiash: —Uan acten mentoanondaaid mapi butemeboed uincuempash

icnui. Adec uincuenshun nadatiambocquin nabanec nepanui — quecuededpondash tantiaquido.

<sup>15</sup> Adnubien utsibo: —Ediasien nechitec. Nuquin Papan chiampicpadquiec choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

<sup>16</sup> Adnubien Edodes: —Ëmbi mapi butemiondaid, Uan pado, uincuem-pash icnui —quepac caondash.

<sup>17</sup> Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: <sup>18</sup> —Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën. <sup>19</sup> Adoquien Uan Edodiasën chieshëquin: —Uan cuesunemetiadquidi mibi nec —quepac caondash aton bënë Edodes caic. <sup>20</sup> Uan bëdamboquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bëdambo iquec. Aidën chuisho tantiash bëdambo iquebi, abibi qeshumbic Edodesën chomedednepac caondash chuisho tantianuen.

<sup>21</sup> Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnoquido chuiquid dapabobidi chomeoapac caondash. <sup>22</sup> Aden aidtedi cho-chomias tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bëdamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ëbi chui. <sup>23</sup> Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

<sup>24</sup> Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

<sup>25</sup> Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuitidquin.

<sup>26</sup> Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: <sup>27</sup> —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin <sup>28</sup> maspanën nandoshon bëshun champi meniac bedshun champin aton

tita menetuidpac caondash. <sup>29</sup> Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

*Dada 5000ted Esusën pemaiad*

(*Mat 14.13-21; Duc 9.10-17; Uan 6.1-14*)

<sup>30</sup> Adambic Esusbëd icquido ambi nidmeboedo Esus yacno choshon ambi nabamboedbëdtabi ambi chuibamboed chuibampondash. <sup>31</sup> Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

<sup>32</sup> Aden chiashic cano antabëdtoanec matses nibëdacno nidpondash aitedtsëqui. <sup>33</sup> Adec nidsho isash matses dadpen abi nidte yacno tantiec: —U nidanec —quiash titingue choec abia cho-chopondash. Abia titinguequid cuensho isash utsi-utsiec dadpen titinguec cho-choapondash.

<sup>34</sup> Adec aitedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdabimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

<sup>35</sup> Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. <sup>36</sup> Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

<sup>37</sup> Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

<sup>38</sup> Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

<sup>39</sup> Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. <sup>40</sup> Adoac ambi chiacted-tedquiec tabadbudpondash.

<sup>41</sup> Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash. <sup>42</sup> Menebanac piash: —Padi. Piombi —quecuededpondash pequido. <sup>43</sup> Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. <sup>44</sup> Peboedo dada caniaid tambanac 5000ted icpondash. Aton chidon aton bacuëbëdtambi pepondash. Aido tambanenuicquid dadatedictëqui tambampondash 5000ted iquec quequin.

*Acte bëntse Esus choaid*

(*Mat 14.22-27, 34-36; Uan 6.16-21*)

<sup>45</sup> Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu —quepondash Esus abëd icquido caic. <sup>46</sup> Adoac

canon potenubi matsestedi nidmianec matses nibèdacno macuèsh yacno Nuquin Papa chuinuec Esus nidpondash. <sup>47</sup> Adnubien inchèshbudtsèqui abèd icquido acte nënantanquo canon noadpondash. Ambobi noadnubi Esus abentsèqui mananuc tsadpondash. <sup>48</sup> Ashunquo Esusèn isaquien abèd icquido bèdiactsècquo nidquimbi comapenen cano uncapondash cunquequid dapan bèded-bèdednubi. Adnubien cachina cuèdanabi badiadiapimboconoc acte bèntse choquin abèd icquido Esusèn ismetuidpondash. <sup>49</sup> Datantsensho isash, Mayambien nechitec, quequin ambibi tantiec sidquecuedec <sup>50</sup> dacuèdcuededpondash.

Adsho isumbien: —Èbibi nebique. Dacuèdenquo yec tabadta —capondash Esusèn. <sup>51</sup> Aden chuitanec cano antsadtonobi comapenec cunqueboedi ènèdpondash. Aid ènèdsho isash: —Adquidshenda nepec —quepondash abèd icquido. <sup>52</sup> Panèmpi daèdpacksèc ictsècquid matses dadpen menebamboedèn naid nec quequin tantienquiocpondash. Adembidi Esus acte bèntse capusho isun, Nadatiamboquin naquidèn naidbidi nec, quequin tantienquo icoapondash pamunac bimboecquin.

<sup>53</sup> Ashunquo chian potiashic nidaid Quenesaded caid yacno choshon cano nëshpondash. <sup>54</sup> Aden nëshash mananuc pudundosho isec anocquido, Aidi bèdamianquid nec, quequin ambibi tantiaquimbi <sup>55</sup> daicsaid aton ueten nandoshon Esus yacno bè-bèpondash. <sup>56</sup> Adecbidi shubu dadpen yacno-yacnomboec Esus puduedcuenesho isun adembidi anocquidon, Bèdamequid nec, qeshun daicsaido bè-bèpondash. Adoac —Min dashcute èbi mishme —capondash bè-bèaidon. Aden ambi tantiacpaden Esusèn dashcute mishash bèdancuededpondash.

## 7

### *Nuquin Papan paucaid* (Mat 15.1-20)

<sup>1</sup> Adashien Edusaden caid yacnoèsh padiseyobobèdi isadaidbo tsusedpabon chiaid tantiaquin chuiquido Esus yacno choshon, <sup>2</sup> Èmbi mishboed mishtemaid ictsias, quesa iquec tsusedpabon chuinëdacadquiec mëpanudabi Esusbèd icquidon pesho ispondash. <sup>3</sup> Padiseyobo isadaidbobidi yec tsusedpabon chuinëdacadquiec penush mëpanudanequid nec. <sup>4</sup> Tiedèn caniquid ambi piucquid menequin bedacnoèsh choec adecbidi penush tsusedpabon chuinëdacadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsiutsiec dadpen iquec. Ambi chuinëdacadomboen dèshotetsen cachonouidi dapanquidquibidi nec. Adembidi matsu nacnenaïd cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacadomboen naquidquio nec.

<sup>5</sup> Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaïd tantiaquid neoaic. Adeç tsusedpabon chuinëdacadquiec Esusbèd icquido mëpanudenquiocsho isash padiseyobo: —Atotsieshun mibèd icquidon tsusedpabon chuinëdacadomboen nainquiocquin mëpanudabi pepec —quepondash Esus caic.

<sup>6</sup> Adoquien Esus: —Isayasèn èndenquo dada uaquin mibitedi bèdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bédambocquid nec quequin chiacpadomboen tantiesa isadaidbo nec.

7 Abia Yampidënquo Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquo nec.”

8 Aden tsusedpabon chuinëdacpadomboen nabanquin Abia Yampidënquo chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

9 Aden chuishumbic adomboembidi chuoiaic: —Badedquo Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape? 10 Nuquin Papan chiacpadomboen Moisesën dada uampid nad iquec: “Titan papabëdta chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. 11 Mibien tsusedpabon chuinëdaid tantiaquin adoesa nec. Papan na naimëdasho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuoiaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec.

12 Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. 13 Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

14 Aden Nuquin Papan chiacpadomboen niacquido chiashic: —Utsibo, tantiec cho. Mibi bédamboen chuinu. Bédamboec papuedta.

15 Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. 16 Ëmbi chiaid tantiaquin utsi chuibanta —quepondash Esus.

17 Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiane —quepondash abëd icquido. 18 Adoquien: —Utsitedishun tantienquo icbocpadquido mibitedi neque. Tantiã. Mimbi piaidën mimbi tantiaid icsabudtiapimbo iquec. 19 ¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auëshquio chimu nëncuenash puduenec —quepondash abëd icquido caic.

20 Aden chiec onquiashic: —Mimbi tantiacpadquiequi mibi icsabudec.

21 Chido mimbi inacmaid isash chudtiadquido iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquido iquebi quequin mimbi tantiacpadomboen mimbi ampec. Cuesunetiadquido iquebi quequin mimbi tantiacpadomboen mimbi cuesunepec. Utsin chido chudtiadquido iquec quequin mimbi tantiacpadomboen aidi mimbi chudpec. Dada utsin ëbi bëdaidquicsho ispec quequin mimbi tantiacpadomboen min bënëpenquo chudmequid

mibi nec. <sup>22</sup> Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquo mibi yamp-pec. Mibibi icsambocquid nec quiash chieshëmënquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icsho isash chieshënquid mibi icpec. Utsi icsamboen chuiquid mibi nendac. Utsin chuisho, Ëbentsëqui tanti-aquidquo nebi, quequin mamënshunquid mibi nendac. Adembidi nasho mamënshunoaquidbidi mibi nendac. Ëmbia tantiaquid nebi, quequin mimbibi nabanaid icsa isash bëdambo iquec quec mibi mamë nec tsadec. <sup>23</sup> Ëmbi chuiboedtedi icsaquidën naid nec. Aden tantiaquid icsabudte nec —quepondash Esus.

*Sidopenisia caid yacnoësh chido ambi tantiacpadquiec bëdanaid*  
(Mat 15.21-28)

<sup>24</sup> Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno choash shubun puduedash: —Nëmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon. <sup>25</sup> Adoac: —Esus chosh —qesho tantiashien mayan icsa dapuduedaidën tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec. <sup>26</sup> Isadaidpembon chido nidaid Sidopenisia caid yacnocquid niondash. Aidi Esus tauebudash: —Con champi mayan icsa dapuduedaid dapudueme, tsusio, —quepondash comapenen chiec.

<sup>27</sup> Adoaquien Esus: —Mabi con matses isadaidboba bëdamenuc choboc. ¿Bacuëbo cubudabicnubi opashëmpida pete menequin anin bënëpadic? Padenquo. Adembidi, ¿isadaidbotedi bëdamiabidambi matses utsibo, isadaidpembo, bëdamepadi? —quepondash Esus.

<sup>28</sup> Adsho tantiashien chido: —Icbo, mimbi bëdamboen chiec. Padnuen anin meniac bacuëbon pete sananaid cuëshëmpi pädtsacsho opashëmpin ambibi bedshun pec. Adembidi mimbi nadatiambocquin nabanac isadaidbo dadpen bëdanubi isadaidpembo abentsëc tantiaquid yec bëdanoapec —quepondash chido.

<sup>29</sup> Aden chidon chuishobien: —Bëdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusën isadaidpembon chido chuiquin.

<sup>30</sup> Adsho tantianec choec shubun puduedquin isaquien aton champi uebocno ënden mayan icsa niqian bëdanash abi ushaidëmbi uec.

*Pashu buëd onquenquiocquid Esusën bëdamiaid*

<sup>31</sup> Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capuceniash choapondash. <sup>32</sup> Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bëdame —capondash.

<sup>33</sup> Adsho tantiashun iccuededquido ismenquiocnuen uidtsëc dada icsa buanshun aton mëdante bushbi pashun pabiate pausuntanquin

chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash. <sup>34</sup>Aden amishec abuc isec: —Epata —quepondash. Paucud, quec adpondash Esus. <sup>35</sup>Adec Esus cuëdnubi pashu buëd onquenquiochoedi tantiadcuenash onquiampondash.

<sup>36</sup>Aden pashuaid bëdamiash: —Esusën naid nec quequin chienda —quepondash Esus. Adoboqui niachidanquin chuibampondash. <sup>37</sup>Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

## 8

### *4000ted matses Esusën pemiaid* (Mat 15.32-39)

<sup>1</sup>Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: <sup>2</sup>—Mates bunec tabadsho isash unësquio iquebi. Daëdec ushec ëbëd tabadquin aton pete uesquin piac. <sup>3</sup>Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

<sup>4</sup>Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

<sup>5</sup>Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

<sup>6</sup>Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. <sup>7</sup>Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiembi, Papa —queshun: —Nëidtsen meneban —Esusën cac menebanoapondash. <sup>8</sup>Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. <sup>9</sup>Peboedo dada caniaid dadpen 4000ted icpondash. Chidon aton bacuëbobëdtambi pepondash. <sup>10</sup>Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

### *Nadatiambocquin nata. Isnü, padiseyobo quiaid* (Mat 16.1-4; Duc 12.54-56)

<sup>11</sup>Aden potiaish tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnü —capondash Esus chuiquin.

<sup>12</sup>Adsho tantiash, Ëbi tantiesa nec, quec unësquio yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquembi. Abimbo caimbi —quepondash Esus. <sup>13</sup>Aden chianec nidec cano antabëdtoanquin uquë cuëma utsiuc poteoapondash.

*Nuquin Papan chiaidbëdta ambi chiaid daëd uaquin chuiquid padiseyobo*  
(Mat 16.5-12)

<sup>14</sup> Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. <sup>15</sup> Aden potequimbî Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquec. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane queshun ambi tantiacpadomboen nabanenda —capondash Esusën abëd icquido chuiquin.

<sup>16</sup> Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

<sup>17</sup> Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacimboecta tsadpo? <sup>18</sup> Adecbidi ¿Ëmbi chuibanaid tantienquio yec pashuacimboecta tsadoapo? <sup>19</sup> ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

<sup>20</sup> Adoaquien: —Adembidi, ¿nëbi siete panëmpi bedshun matsesën paiad napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

<sup>21</sup> Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

*Betsaida caid yacnoshon bëshu bëdamiaid*

<sup>22</sup> Adshumbic Betsaida caid yacno poteoapondash Esusbëdtambidi. Aden potiaish chosho isun bëshuaid bëpondash anocquidon. Aden bëshun ishequin: —Nëid bëshumbo neque. Mibi bëdamaianquidquio icquin mishquin bëdame —capondash Esus chuiquin. <sup>23</sup> Adsho Esusën bëshu mëdinanquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi isequé? Ëbi chui —capondash Esusën.

<sup>24</sup> Adsho tantiash Esus isquin: —Bëdamboen isenquiocquin cuëte podo inchëshquio yacimboecnuc mibi isembi —capondash bëshuaidën. <sup>25</sup> Aden chuishobi Esusën bëshuaid padpiden bëmishoaquien bëucudquipoondash bëdamboen isec. <sup>26</sup> Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

*Quidistu mibimbo neyoc, Petedo quiaid*

(Mat 16.13-20; Duc 9.18-21)

<sup>27</sup> Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

<sup>28</sup> Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen cho-miaidien Esus nechitec, quenubic; utsi-utsiec, Nuquin Papan chiaid



ëndenquimbo chiampidpadquidien Esus nechitec, quec —quepondash abëd icquido Esus caic.

<sup>29</sup> Adsho tantiashun: —Ma mibitedishun ¿atotsibi cai? —capondash Esusën.

Adoquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiabimboen chuiuoic.

<sup>30</sup> Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid  
(Mat 16.21-28; Duc 9.22-27)*

<sup>31</sup> Aden chuishun abi unës uate tantimequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. <sup>32</sup> Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

<sup>33</sup> Aden Petedon chuisho tantiash auchbidi bidadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

<sup>34</sup> Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. <sup>35</sup> Esus tantiaquin ambi chiacpadomboen nanu queboedi unësmene quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmene quenquiocquin ëbi chuibanec tabadquid Nuquin Papa yacno tabadendac. <sup>36</sup> Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic? <sup>37</sup> ¿Nuquin Papa mitsana menecta abi yacno puduedpatsia? Padenquio. <sup>38</sup> Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

## 9

<sup>1</sup> Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

*Esus bëdaidquio icmiaid  
(Mat 17.1-13; Duc 9.28-36)*

<sup>2</sup> Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. <sup>3</sup> Abi dasiuidaid dashcute icboedi nac-nacquo yampac caondash. <sup>4</sup> Edias, Moises, aid daëd ënden yampidi Esusbëd onquesho ispac caondash Esusbëd choboedon. <sup>5</sup> Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aited icnuc —quepac caondash Petedo. <sup>6</sup> ¿Atotsimbi chuipe? quetiapimbo yec dachuëdcuededquin aden chuipac caondash Petedon.

<sup>7</sup> Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bëdamboen tantiata —capac caondash Nuquin Papan.

<sup>8</sup> Adsho isbanquin isaquien Esusbëd choboeduidi icoapac caondash.

<sup>9</sup> Adanec macuësh yacnoësh budtanequi: —Mimbi isboed nëbi chienda. Ëbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën. <sup>10</sup> Adsho tantiash utsi chienquo yec abi uincuemete ¿mitsipadquo icpec? quec abibi onquecuedepac caondash Esusbëd choboedo.

<sup>11</sup> Adec onquecuededash: —Nuquin Papan chomiaidquo choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

<sup>12</sup> Adoaquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquo yec matsesash nëbi tabadsho matsesën chieshënquin mëyanendac quequin chuipampid nec. <sup>13</sup> Ediasën chiampicpadquiec Uan acten mentoanquid chopondash. Aidi choacsho abi bunacpadoemboen abi chieshënquidën mëyanac. Ëndenquimboshë Edias chiec onquequin dada uampicpadoemboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

*Mayan icsan buëd onquetiapimbo icmiaid Esusën bëdamiaid  
(Mat 17.14-21; Duc 9.37-43)*

<sup>14</sup> Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpodash.

<sup>15</sup> Adnubien Esus chosho isash iccuededquido, Bëdamaianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

<sup>16</sup> Adoaquien: —¿Atotsi quec ëbëd icquidbëd comapenec onquecuedede? —quepondash Esus.

<sup>17</sup> Adshobien: —Chuiquid Dapa, mibi ismenuen con mado bëombi. Mayan icsan buëd oncamenquo yaid nec. <sup>18</sup> Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquo yanesho, Bëombique. Bëdame, cauidombi mibëd icquido chuiquin. Adoaqui bëdamenquo iccosh —quepondash mayan icsan buëd onquetiapimbo icmiaidën papa.

<sup>19</sup> Aden chuisho tantiash abëd icquido caic: —Esus nadatiambocquid nec quequin ëbi tantiesa mibi nepec. ¿Tedectsi icshun ëmbi chiacpaden mibi tantiabempe? Mibi tantiesa icsho ¿mitsipadembimbi tantiampe? —queshumbic: —Madompi bec cho —capondash Esusën.

<sup>20</sup> Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëcbacush-ëcbacushpambo yec cuididiquepondash.

<sup>21</sup> Adsho isash: —¿Tedtsi seta matamec ad iccondashe? Chui. Tantienu —quepondash Esus madompin papa chiec.

Adoaquien: —Bacuë ictsequi ad iccondash. <sup>22</sup> Cuëte dëtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bédamequidquio icquin ëbëdta tantiaquin ëbi con mado bédameshun —quepondash madompin papa Esus caic.

<sup>23</sup> Adoaquien: —¿Mibi bédamequidquio icquin ëbi con mado bédameshun quecta ique? Nuquin Papa nadatiambocquin naquid nec quequin tanti-aquidën tantiacpadomboen Nuquin Papan naindac —quepondash Esus.

<sup>24</sup> Adsho tantiash: —Tantiëmbi. Èmbi abimbo tantienquiocsho isun ëbi tantiampe, Icho —quepondash madompin papa Esus caic.

<sup>25</sup> Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adëmbidi tantiametiapimbo icmequidbidi mibi neque. Ambo tabadenquio yec dapuduen —capondash Esusën.

<sup>26</sup> Aden chiaquin sidquec madompi cuididiquenubi dapuduempon-dash. Adnubien unësacimboec madompi uesho isash: —Unësosh —quepondash isquido. <sup>27</sup> Adnubien madompi mëdintanquin Esusën uëtsëndopondash. Adoac abëmbi nidtopondash.

<sup>28</sup> Adnubien shubun puduedacsho: —¿Atotsieshumbimbi mayan icsa da-puduemetiapimbo icpo? —quepondash abëd icquido Esus caic utsibon tantienquiocnobi.

<sup>29</sup> Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

*Abi unës uate chuioaid  
(Mat 17.22-23; Duc 9.43-45)*

<sup>30-31</sup> Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adëc Esus onquepondash. <sup>32</sup> Aden chuisho bëdamboen tantienquio yequi dacuëdec ëbi bëdamboen tantiamequin chui quetiapimbo icpondash abëd icquido.

*¿Mitsicquid chuiquid dapa icpec? quequin chiaid  
(Mat 18.1-5; Duc 9.46-48)*

<sup>33</sup> Adanec shubu dadpen icquid Capednaun caid yacno Esus choapon-dash. Adëc choash shubun puduedshun: —¿Podquedën choec atotsi chiec onquecuedo? —capondash Esusën abëd icquido chuiquin. <sup>34</sup> Adsho tantiash cuëdenquiocpondash abëd icquido. ¿Esusbëd icquid mitsicquid

chuiquid dapa icpeque? Tiantanu, quec onquequin ambi chiaid chienquio yec tabadpondash. <sup>35</sup> Adec tabadnubi abi tsadacnoëshi: —Cho — quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

<sup>36</sup> Adec onqueshumbic bacuëmpi abentsëc mëdintanquin abëd icquid tabadacno nënantanquio tsadumbudpondash. Aden tsadumbudshun bacuë icuquequi: <sup>37</sup> —Esus tantiaquid nebi quequin ismequin bacuë yuedquin nashunquid ëbi yuedquin nashunac bimboecquid nendac. Èbi yuedquin nashunquid ëbi chomiondaid Nuquin Papa yacno yuedquin nashunoac bimboecquid neoaindac —quepondash Esus abëd icquido chiec.

*Nuqui chieshënesa nuqui bëdamboen chuibanquid nec quiaid*  
(Mat 10.42; Duc 9.49-50)

<sup>38</sup> Adnubien utsin naid chiec Uan onquedopondash: —Icho, mimbi chiacpadomboen utsin chuisho tantiapombi. Aidën: “Esus nadatiambocquin naquidquio nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquio mibi neque. Adenda quequin chuiquid —quepondash Uan.

<sup>39</sup> Adoaquien Esus: —Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. <sup>40</sup> Nuqui chieshënesa nuqui bëdamboen chuibanquid adquid nec. <sup>41</sup> Abimbo chiembique. Tanta. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

*Icsa uanquin tantiabenabicquid ismequid cuidendac quiaid*  
(Mat 18.6-9; Duc 17.1-2)

<sup>42</sup> Abi Esusën onquequin chuibanec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta tëtaneshun acte dapa nënepatecnëdan. <sup>43-44</sup> Adembidi mimbi icsamboen tantiaquin mishaid ëntiapimbocquin ismedeniadic adomboembidi utsin tantiec. Bednu quenquio yec mëtaniac bimboec tsad ënëdenquio yec chian anëdënquiacno nidmane quiash. <sup>45-46</sup> Adecbidi capuquin mibi icsaid mimbi ismebeneque. Capunu quequin tantienquio yec tateshuniac bimboec tsadta ënëdenquio yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. <sup>47</sup> Adecbidi ëshën isec mibi icsaid ëntiapimbocquin mimbi ismedoniac adomboembidi utsin tantiec. Èshë chicshuniac bimboec tsad ënëdenquio yec chian anëdënquiacno nidmane quiash ma mibi tsadacpadec mimbi ismiaid tsadoapanu. <sup>48</sup> Icsa uadenequin ënenquio yash unësash chian anëdënquiacno nidash unësenquiocshobi chodquiaid pequid macun mibi pendac. Ènëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. <sup>49</sup> Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yampec. <sup>50</sup> Sa batamboquid bëdambo iquec. Sa batambochoedi batapenquio yec icsasho ¿mitsipadentsi batambo icmeoapec? Sa batamboquid casecac

daëdash batambo yacpadec utsibëd bëdamboec tabadta —quepondash Esus.

## 10

*Aton chido bedshun nidmequid*

*(Mat 19.1-12; Duc 16.18)*

<sup>1</sup> Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanoapondash Esusën.

<sup>2</sup> Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bëdambo iqueque? Tantuanu. Chui —capondash Esus chuiquin.

<sup>3</sup> Adoaquien: —¿Atotsi quequin Moisesën chuiampic? — queoapondash Esus.

<sup>4</sup> Adoaquien: —Aton chido bedash bunenquio yanshun, Con chido icsambocquid nec, quequin ambi tantiapaden aton bënëdada uashun nidmiacsho isash, Padi, quenquiocpampic Moises —quepondash padiseyobo.

<sup>5</sup> Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. <sup>6</sup> Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. <sup>7</sup> Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec. <sup>8</sup> Aden aton chido bedash tabadequi matses abentsëc ichoedi daëdec. Matses daëd ichoedi abentsëc yacbimboec tabadec. <sup>9</sup> Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

<sup>10</sup> Aden chiash shubun puduedacsho: —Mimbi chuiboed ëbitedi tantiame —capondash abëd icquidon.

<sup>11</sup> Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. <sup>12</sup> Adembidi chido aton bënëdada aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

*Esus yacno bacuëbo bë-beaid*

*(Mat 19.13-15; Duc 18.15-17)*

<sup>13</sup> Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. <sup>14</sup> Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aido nec. <sup>15</sup> Abimbo chiembique. Tantia. Nuquin Papan chiaid bacuëbon badedquio tantiapaden tantiesa Nuquin Papa yacno puduedtiapimbo iquendac —quepondash Esus. <sup>16</sup> Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

*Na dadpen icquid chiaid*  
(*Mat 19.16-30; Duc 18.18-30*)

<sup>17</sup> Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: — Chuibanquin tantiamanquid, bëdambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

<sup>18</sup> Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauidtsëqui bëdambocquidquo nec <sup>19</sup> — quequin chiec abi onquec: —¿Nuquin Papan nadomboen nata quequin dada uamiampittedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

<sup>20</sup> Adoaquien: —Abimbo chiembique. Tantia, Icho. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

<sup>21</sup> Adsho tantiash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

<sup>22</sup> Adsho tantiash choboed mamënenquo yec unësquo yec nidpondash con na menebantiapimbo iquebi quiaish.

<sup>23</sup> Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

<sup>24</sup> Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec. <sup>25</sup> Adembidi shëcuën puduedte nidaidën capuquid dapan badedquo tantiatipimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatipimbo iquec. Ambi tantiacpadequi puduedte bunec —quepondash Esus.

<sup>26</sup> Adsho tantiash abëd icquido, ¿Abimbobida capec? quetsëcquiec onquecueddpondash. Adec tabadequi: —Ambi tantiacpadequi puduedtiapimboconoc ¿tsutsi puduedquid icpeba? —quepondash abëd icquido Esus chiec.

<sup>27</sup> Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimboconoc Nuquin Papambien abi yacno yuedanquid mibi tantiamendac —quepondash Esus.

<sup>28</sup> Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon

abitedimbo nianondash. ¿Atotsi ëbitedi menetsia? —quepondash Petedo Esus chiec.

<sup>29</sup> Adoaquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimboesho <sup>30</sup> daëd uaquin Nuquin Papan menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tanti-aquido mibëd icquid dadpen iquec. Adquid icnuc mibi chieshënquidbidi iquendac. Yucash ënëdenquio yec Nuquin Papan shubun mibi tabadendac mibi chieshënquid nibëdacno. <sup>31</sup> Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid*

*(Mat 20.17-19; Duc 18.31-34)*

<sup>32</sup> Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquie abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuiouanu —quiash Esus nitudidshun chochosho isquin naden abi mëyante chuiquin tauapondash: <sup>33</sup> —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onqueducuedash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. <sup>34</sup> Aden meniac bedshun aidon ëbi oncain mamëshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid*

*(Mat 20.20-28)*

<sup>35</sup> Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadamboen ëbi daëdi nashunquioda mimbi icpe? —quepondash.

<sup>36</sup> Adoaquien: —¿Atotsimbi mibi nashuneque? Ëbi chui. Tantuanu —capondash Esusën.

<sup>37</sup> Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdta Esus chuiquin.

<sup>38</sup> Aden aid daëdshun chiaquien: —Tantienquiocquin mimbi chioc. Icsaquid matsteddi nec, quequin Nuquin Papan aid cuidenquiocquin ëbi aton madombo bëdamboequidded cuidendac. ¿Ada ëbipadquid mibi icpatsia? —capondash Esusën.

<sup>39</sup> Adoaquien: —Ai, adquid tantiembi —quepondash.

Adoaquien: —Ai, adomboembidi mimbitsen tantiendac — quepondash Esus. <sup>40</sup> Aden chiec abi onquec: —Abuc nidash chuiquidquo iquec con dayunquo equè tsadbudcuenec tsadec cho, quetiapimbo iquebi. Nuquin Papambien ambi tantiaidquo aden chiendac. Èmbi padenquo iquec —quepondash Esus Uambèdta Acobo chiec.

<sup>41</sup> Aden Esusën chiaqui abèd icquidquo utsitedi Acobobèdtan Uanën chuibod tantiash nèishcuededpondash. <sup>42</sup> Adec nèishash tabadsho isash: —Cho —quepondash Esus. Aden chomiash: —Utsi namequid isadaid-pembo nec quequin mimbi tantiec. Aidon matses utsi yuaquin mëyanquin namebanec. <sup>43</sup> Aden namesa mibi nec. Chuiquid dapa icnu quiash utsi nashunquid icta. <sup>44</sup> Adecbidi tsusio icnu quiash yuabimboe yec utsin namiaid icta. <sup>45</sup> Adquid icnuec Nuquin Papan madombo mat-sesash nidaidèn tabadobi. Ancanquid iquenquo yec nashumènquidquo nebi. Adquid yec matses icsaid bedshunash èbided cuidadec unèsendabi —quepondash Esus.

*Bëshuaid, Badtimeyo cuëmèdquid bédamiaid*

*(Mat 20.29-34; Duc 18.35-43)*

<sup>46</sup> Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmèdquid podqued cuëman tsadpondash. Pucquid bednu quequin cainec podqued cuëman tsadpondash. <sup>47</sup> Ambo tsadquimbi, Esus Nasadèd caid yacnocquid choec, quequin utsin chiac: —Esus, Chuiquid Dapa, Dabidèn madon, èbi tantiaquin nashun —quequin chiec cuèdpondash bëshuaid.

<sup>48</sup> Adec cuèdsho tantiashun: —Esus cuënenquo yec otacquo tsad — cabededpondash utsibon.

Adnubien: —Chuiquid Dapa, Dabidèn madon èbi nashun — quepondash bëshuaid comapenec cuèdoaic.

<sup>49</sup> Adoac nidtuidshun Esusën: —Cuënquid chome —capondash.

Adoaquien: —“Chome,” queque. Nidtoash nid —capondash utsibon.

<sup>50</sup> Adsho tantiash bëshuaid aton dashcute bèntsecquid chicanec bad-edquo nidtoanec Esus yacno chopondash. <sup>51</sup> Adec chosho isun: — ¿Atotsimbi mibi nashumpeba? —capondash Esusën.

Adoaquien: —Iste bunebi, Icho —quepondash bëshuaid.

<sup>52</sup> Adoaquien: —Esusën èbi bëshuaid bëuquec quequin mimbi tantiac-padquiec mibi bédanoque. Nidec nid —Esus quenubi isbenquiopondash bëshuaidèn. Adec bédanshun Esus nidsho isun tsibampondash.

## 11

*Chuiquid dapabimboec yec Edusaden yacno Esus choaid*

*(Mat 21.1-11; Duc 19.28-40; Uan 12.12-19)*

<sup>1</sup> Adec nidequi Edusaden anoentsèqui Esus chopondash. Edusaden anoentsèquid Bedpaque caid icpondash. Edusaden anoentsècbidi Betania caid icoapondash. Aidedi macuësh Odibos caid potsembo icpondash. Ambo choash èbèd icquid daèd shubuno nidmenu quequin tantiec nad-pondash Esus: <sup>2</sup> —Nè shubu dadpen yacno nidec nid. Ambo nidshun cabayobiecquidèn bacuè caniabictsècquid tènèshac tsadsho mimbi istu-idendac. Aidi matses catsadabicquid neque. Aidi istuidshun tènèshaid



têchicshun sananquin bêta. <sup>3</sup> Aden bedsho isun, ¿Atotsi canun aid bede? cac, Bêoaimbi. Nêid nuquin icbo bunaid nec, cata. Mimbi aden chiac, Buanec nid, quendac —quepondash Esus abêd icquid daêd chiec.

<sup>4</sup> Aden Esusën chiaquien abi daêdi nidpondash. Adec nidanequimbi cabayobiecquid caniabictscquid shubu shêcuê cuêmano têngshac tsadsho istuidshun têngshaid têchicpondash. <sup>5</sup> Aden têngshaid têchicsho isun: —¿Mitsipaden tantiaquin êmbi têngshaid mimbi têchiqueque? Tantianu. Chui —capondash anocquidên.

<sup>6</sup> Adoaquien: —Têngshaid têchicshun bêta, con icbo quebocpaden naimbi —capondash têchicquidên.

Adoaquien: —Buanec nid —queoapondash.

<sup>7</sup> Adoac Esus yacno buampondash. Aden bêshun aton dashcute bêtsecquid chicshun cabayobiecquid capucpondash ma chuiquid aidên catsadtonoeshun. Adoaidên Esus catsadtopondash. <sup>8</sup> Adembidi chuiquid Esus nec quequin ismequin utsibontsen aton dashcute bêtsecquid chicbededshun podqued ansambampondash ma chuiquid dapa bêdamboquid capunueshun. Adembidi tantiaquin utsibon budêdbiecquid podo tebededshun podqued ansambanoapondash. <sup>9</sup> Aden ansambanash matses dadpen bêyucanec nidanenubi Esus nênantanquio nidnuc aidtedbidi tsyuec choquin tsibambêpondash. Adec abitedi nidanec Esus tantiec nadec cuêdêncuededpondash: —¡Adeduya! Nuquin Papan bêdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuêmêdquidên tsyuecquid, shubu abentsêqui tabadquido chuiquid dapambo choec nec. <sup>10</sup> Êbi chuiquid dapa Nuquin Papan abuc tabadquidên chomiaid Esus nec. Nuquin Papa bêdamboshê iquec. ¡Adeduya! —quec cuêdêncuededpondash Esusbêd nidquido.

<sup>11</sup> Adec cuêdêncuededequi Edusaden yacno cho-chopondash. Choashic Nuquin Papa tabadte shubu uashunaid quênê dadpen yacno nidash Esus puduedpondash. Adec puduedshun abitedi isbanash ushê budtsambi Betania caid yacno nidaneoapondash Esus.

*Cuête bacuêesa chiaid*  
(*Mat 21.18-19*)

<sup>12</sup> Abadiadtsashi Betania yacnoêsh nidanec Esus bundopondash. <sup>13</sup> Adec bundoshombi cuête icueda caid podo buntac-buntacpambo an-cuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuêashida neque? —quianec nidpondash. Adec nidquimbi icueda podouidquico icsho ispondash. Ushê utsin bacuêtiadquidi bacuêabi podopac. <sup>14</sup> Ad icsho isun Esusën: —Adequi bacuêesa icsho ma matsesën chenquio icpanuna —capondash. Aden chuisho tantiapondash abêd icquidon.

*Nuquin Papa tabadte shubu uashunaid yacnoshon cuemiaid*  
(*Mat 21.12-17; Duc 19.45-48; Uan 2.12-22*)

<sup>15</sup> Aden cuête chuibêtsenec choequi Edusaden yacno choapondash. Ambo choashic Nuquin Papa tabadte shubu uashunaidên puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidên capuquidbêda podochoquid chedo menebanquidên tsadtetsen nebudquin icbotedi puduemampondash. <sup>16</sup> Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa

tabadte shubu uashunaid neque. Adec nasiadec capuenda —capondash Esusën chushcaquin. <sup>17</sup> Aden chushcasic: —¿Ëbi tabadte shubu uashunaid matsesën ëbi onquianete shubu iguendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. <sup>18</sup> Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabad-cuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. <sup>19</sup> Adnubien inchëshbudtsëqui Edusaden yacnoësh nidoapondash Esus.

*Cuëte bidiquiaid*

*(Mat 21.20-22)*

<sup>20</sup> Abadiadtsashi Edusaden yacno nidoaquimbi cuëte icueda caid bidiquiacsho istuidpondash. <sup>21</sup> Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaie. Is, Icbo —quepondash.

<sup>22</sup> Adoaquien Esus: —Nuquin Papa nadatiambocquin nabanquid nec, quequin tantiaquiota. <sup>23</sup> Abimbo chiembique. Nuquin Papa nadatiambocquin nabanquidquio nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. <sup>24</sup> Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. <sup>25</sup> Aden Nuquin Papa chuinish mibi utsin icsambocquin naid tantienquio yec bëpiscudta. Adsho abucshun isash Nuquin Papan mimbi icsa uanquin naid tantienquio yec bëpiscudendac. <sup>26</sup> Adenquio mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iguendac —quepondash Esus abëd icquido caic.

*¿Mitsicquidën chuibanta caid mibi ne? quiaid*

*(Mat 21.23-27; Duc 20.1-8)*

<sup>27</sup> Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: <sup>28</sup> —¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

<sup>29-30</sup> Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Mates mentondaidën, Uan padon Nuquin Papan chuimi-acpadomboen nabanquinda nadiondash? Padenquio, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusën tsusiobo chuiquin.

<sup>31</sup> Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidën chiaid tantienquio icconda? quetsiash Esus. <sup>32</sup> Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuënoten seshunetsiash

—quecuededpondash. <sup>33</sup> Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

## 12

*Tied icbo nashunta quequin chiaid*  
(*Mat 21.33-46; Duc 20.9-19*)

<sup>1</sup> Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquo nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nactemposh. Aden nactenshun uba ampensushe queshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

<sup>2</sup> “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. <sup>3</sup> Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. <sup>4</sup> Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

<sup>5</sup> “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

<sup>6</sup> “Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembidi. Aidi chosho isun, Tied icbon madombo nec, queshun bëdamboen istsiash, queshun aton madombo nidmeposh.

<sup>7</sup> “Aden nidmiac ancuenquo chosho isash, Tied icbon madombo choeque. Is. Aton papa unësan aton papa yacpadec icbo icoanushe queshun tied icbo nuqui icnun aidi cuesunenuna, quecuededposh tied icbo nashunquido.

<sup>8</sup> “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. <sup>9</sup> Adoacsho tantishun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

<sup>10</sup> Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia. “Shubu uanuequidën buintad isuidaids utsin abia nitsinaid icoaposh. Adquiobidi Nuquin Papan chuimiaid matsesën tantiauidaids iquendac.

<sup>11</sup> Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquo tantiec”

—quepondash Esus Nuquin Papan chiampidquio chiec. Nuquin Papain shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

<sup>12</sup> Adsho tantiash, Ëbitedishun isuidaïdbimboecnuc chuibanec quequin tantiec isadaïdbo tsusiobo Esus bedtiadquio icpondash. Adnubien Esus onquesho dadpeshun tantiabedeppondash. Dadpen icsho isash dacuëdcuededec Esus bednu quenquio yec nidanepondash chieshëmënuquido isadaïdbo tsusiobo.

*Bec cho quequin bedshunquid nec, quequin chiaïd*

(*Mat 22.15-22; Duc 20.20-26*)

<sup>13</sup> Isadaïdbo tsusiobo nidshun padiseyobo edodesbobëdta istuidshun: —Nëidon Esus icsamboen chuimetsiash —queshun aïdo Esus yacno nidmepondash. <sup>14</sup> Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaïdpembo ancaquid, Sesad cuëmëdquid nec. ¿Aden meniaïd bëdambo iquec, quequin Nuquin Papan chiaïdta nepec? <sup>15</sup> ¿Adambi menepeba? —quepondash padiseyobobëd edodesbo Esus caic.

Adoaquien, Ëbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

<sup>16</sup> Adsho tantiashun bëpondash. Adoaquien: —Sananquin isme. ¿Tsut-sibimboecnuc dada uaid iqueque? Chui. Tantianu —capondash Esusën.

Adoaquien: —Isadaïdpembo ancaquid, Sesadbimboecnuc dada uaid nec —quepondash.

<sup>17</sup> Adoaquien: —Ai, aïdën na nec. Aïd bec cho, quescho meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bëdamboen chuïsho tantiash, Bëdamboenshenda tantiapec, quequin ambibi tantiec Esus chieshënuquido tabadcuëdedeppondash.

*Abuc tabadequi, ¿mitsicquidën chido neque? chui quiaïd*

(*Mat 22.23-33; Duc 20.27-40*)

<sup>18</sup> Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aïdo nepondash. Aïdo cho-choash nadpondash: <sup>19</sup> —Moisesën dada uapampid nad iqueque. Tandia. chuïnu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaïdbimboec ma icpanuna, quequin chuipampid nec —quepondash saduseyobo. <sup>20</sup> Aden chuishumbic: —Aden nata quequin Nuquin Papan chiaïd icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. <sup>21</sup> Adsho isun abi tsibanquidën aïd chidobidi bedshun bacuë tishmiambo yec unësoapondash. Adembidi abi tsibanquidën <sup>22</sup> aton utsi unësan aïd chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. <sup>23</sup> Adec unësash abuc tabadequi, ¿mitsicquidën chido aïd icpatsiashe? Chui. Tantianu —capondash saduseyobon Esus chuïquin.

<sup>24</sup> Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic.  
<sup>25</sup> Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. <sup>26</sup> Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtempa abibi nëdënqesho istanec nidtuidquin nadec Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. <sup>27</sup> Nuquin Papan chiacpadpenquiocquin Moisesën dada uapampid nec quequin mimbibu muaquin chienda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuec.

*Naden nata quequin chiaid ¿mitsicquid adquidpadquid utsi nibëdpec? quiaid*

*(Mat 22.34-40)*

<sup>28</sup> Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiash Esus icsamboen chuimenuc aidtsen: —Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

<sup>29</sup> Adoaquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icho Nuquin Papa nec. Nuquin Icho Abentsëcquiobi iquec. <sup>30</sup> Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. <sup>31</sup> Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

<sup>32</sup> Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec. <sup>33</sup> Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen isti-apimbo iquendac —queopondash choboed.

<sup>34</sup> Aden choboedèn bēdamboen chuoasho tantiash: —Nuquin Papan shubu abentsēquēn tabadaid mimbi bēdamboen tantiatsempoc — quepondash Esus.

Adoac Esus icsamboen chuimenu quetiapimbo icpondash utsibo.

*¿Tsuntsin mado Quidistu nepec? quiaid*  
(*Mat 22.42-46; Duc 20.41-44*)

<sup>35</sup> Abi icsamboen chuimenu equid utsi nibēdnuc Nuquin Papa tabadte shubu uashunaidēn tabadquimbi Esusēn Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidēn mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. <sup>36</sup> Naden Nuquin Papan Mayanēn Dabid chuimiampic:

“Icho utsi icsho mibi chiembique. Tantia, mado, quequin chiec Icho Dapa nadpampic:

Ēquē con dayun abiucquio cainec tsadec cho ma mibi chieshēnquidtedi mimbi namiaid ma icpanu,”

quequin chuipampic. <sup>37</sup> Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidēn icbo yec ¿mitsipadectsi Dabidēn tsyuecquid icoapec? — quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bēdamboen chiec, quequin comapenen tantiapondash.

*Nuquin Papan chiaid tantiamequidon chuisho tantienda quiaid*  
(*Mat 23.1-36; Duc 11.37-54; 20.45-47*)

<sup>38</sup> Aden tantiamequimbi Esusēn nadopondash: —Tsusedpabon nadomboen nata quequin chiaid tantiamequidēn chuibancho tantienda. Aido nadquid iqueque. Tantia. Tsusiobimboec isadnu quiash abi dasiuidaid ēnapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton matses dadpen yacno capuquid nec. <sup>39</sup> Adomboembidi ēbi isoanu quiash Nuquin Papan chiaid chuibante shubun puduedash tsusiobēd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. <sup>40</sup> Aido bēdamboen nashumbimboen nianten na ampequid nec. Adembidi bēdamboequid nec camenuen yuen Nuquin Papa chiec. Adquid comapenen cuidtequid nendac —quepondash Esus.

*Nuquin Papa tantiaquin nianten meniaid*  
(*Duc 21.1-4*)

<sup>41</sup> Aden chiashic aton na bedtequid sandote tabēcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidēn nacentsiash quequin aton na bedtequid bē-bēquin sandobansho isec tsadpondash. Adec tsadquin isquimbi aton na dadpen icquidēn aton na bedtequid sando-sandonobi <sup>42</sup> aton na daēdpactsēcquidquio niant choquimbi aton shocosh piucquid daēdquibictścquid sandopondash aton na utsi nibēdquiocnoc.

<sup>43</sup> Adosho isun abēd icquido chomeshun Esusēn nadopondash: — Abimbo chiembique. Tantia. Niant aton na bedtequid dayun uanu

quenquioctscquin Nuquin Papa tantiaquioquin sandoquidquo nec ut-sibon aden sandoenquiocnobi. <sup>44</sup> Utsibon aton na bedtequid dadpen uesenquiocquin sandobededposh. Aido daëdpactsc icquid sandoachimboen sandoquido nec quequin tantiembi. Adquidpenquio niantec nec. ¿Bednun tedtsimbi dayunoape? quenquiocquin aton na daëdquioctscquidi nibëdquiocnoc sandoposh nianten. Dadpen icquid sandoachimboen sandosho aid isembi —quepondash Esus.

## 13

*Nuquin Papa tabadte shubu uashunaid chic-chicte chiaid*  
(Mat 24.1-2; Duc 21.5-6)

<sup>1</sup> Aden chianec Nuquin Papa tabadte shubu uashunaidën puduenu-bien: —Nuquin Papan shubu cuënote nacnenaid bëdaidquio iqueque. Is, Icho —quepondash abëd icquid abentsëc Esus caic.

<sup>2</sup> Adoaquien: —¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquidendac —quepondash Esus.

*Abitedi naimbudte tauanun ismete chiaid*  
(Mat 24.3-28; Duc 21.7-24; 17.22-24)

<sup>3</sup> Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon: <sup>4</sup> —Cuënote nacnenaid nebudte mimbi chuiboed ¿mitsipadën nebudte icpeque? Tiantianu. Èbi chui. Adembidi aidi tauanun ismete ¿atotsi icoapeque? Tiantianu. Aid chuioa —capondash.

<sup>5</sup> Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isbanquiota. <sup>6</sup> Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. <sup>7</sup> Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëdenda. Ad icnuc abitedi naimbudte ushë choabi iquendac. <sup>8</sup> Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcudendac canchednuec. Adecbidi bunquiotec iquendac. Aidtedi icsamboshëccquid taëyendac.

<sup>9</sup> “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. <sup>10</sup> Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. <sup>11</sup> Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibì tantiec tsadenda. Nuquin Papan Mayanën mibi tantiamiacpadomboen mimbi chuibanendac.

12 “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tanties aicquin aton papan chiaid niacquin adembidi aton titan chiaid niacoaquin cuesunemendac. 13 Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquo yec unësash Nuquin Papa yacno nidacsho bëdambo icmiaid mibi iquendac.

14 “Adnubien Nuquin Papa chieshënte ushë choendac. Aid chonoc Edusaden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushe quiash anoentsëqui icquido cuenenquiochoedi ma cuempanuna. Abimbo chiembique. Bëdamboen tantiata caimbi. 15 Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquo yec cuenta. 16 Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquo yec badedquo cuenta. 17 Bacuë usunquid adecbidi bacuë chishmequin buanquid badedquo cuentiapimbocsho mëyampec. Adquid tantiec utsibo unësquo icchitec. Nuquin Papa chieshënte ushë icsamboshë iquendac. Adnuc badedquo cuenta. 18 Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquo cuempanu. 19 Comapenen Nuquin Papa chieshënquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. 20 Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac. 21 Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquo icta. 22 Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papapenquo aid nec, quequin Nuquin Papambo tantiata. 23 Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota —capondash Esusën.

*Nuquin Papan madombo choaid*  
(Mat 24.29-35, 42-44; Duc 21.25-36)

24 Aden chiash abi onquec: —Adnubien Nuquin Papa chieshënte ushë nidan inchëshquo yanendac. Badiadën ushëbëdtabi inchëshën chënquequid nibëdquiocnoc unës uaindac. 25 Adecbidi uispa paëdtedpaëdtendac. Adecbidi abuc tabëcaid nibëdnuc ambo icquido Satanashëd icquido ¿mitsimbo nuqui cuempeba? quendac.

26 “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquo iquequi ëbi choasho isendac matsesën. 27 Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido



bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

<sup>28</sup> Aden chiashic: —Abi chiembique. Tantia. Suc seccuduquiac nëbi cunquecuenec, quequin matsesën tantiec. <sup>29</sup> Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. <sup>30</sup> Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac. <sup>31</sup> Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiouidi iquendac.

*Nëid ushënquio tauadoendac, quetiapimbo matses iquec quiaid*

<sup>32</sup> “Adnuc nëid ushënquio Nuquin Papa chieshënquin tauaindac quetiapimbo matses iquec. Ambi uaido mayan bédabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquiobien adquid tantiaquid nec. <sup>33</sup> Aid tauadote ushë choaid tantiatiapimbocquin Nuquin Papan chiaid niacmane queshun isbanquin nabanta. <sup>34</sup> Nad iqueque. Tantia. Chuinu. Ûtsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. <sup>35</sup> Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiaata. Adembidi inchëshpotsambo chopatsiash queshun adembidi tantiaquiota. Adembidi, cachina cuëdanubi chopatsiash, queshun isucunshun tantiadenequiota <sup>36</sup> ëmbi tantienquiocnoc con icbo chochitondac, queshun. <sup>37</sup> Adquiecbidi bëdamboec tabadquin Nuquin Papan chiaid isted-istedta Nuquin Papa chieshënuquidën niacmenushe queshun —quepondash Esus.

## 14

*Esus cuesunete bunaid chiaid*  
(*Mat 26.1-5; Duc 22.1-2; Uan 11.45-53*)

<sup>1</sup> Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe queshun isadaidbo tsusiobon Esus nibëmbededpondash. <sup>2</sup> Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.

*Esus unësec queshun nacbimboen noadte machiuinte chiaid*  
(*Mat 26.6-13; Uan 12.1-8*)

<sup>3</sup> Adnubien Betania caid yacno tabadquin Esusën Simonën shubun puduedshun pepondash. Simon daushac bimboecquid, nami mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

<sup>4</sup> Aden machiuinsho isash utsibo nëishun: —¿Atotsieshun machiuino? <sup>5</sup> Noadte menequin piucquid dadpen bedshun aton na nibëdquid dadpen menetsiandac —quec onqueuededpanëdash Esus machiuimboed chido chushcaic. <sup>6</sup> Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bëdaidquio nec. <sup>7</sup> Badiadquidën-badiadquidënquiec ënëdenquio yec aton na nibëdquid ënabi iquec. Aidi menenu qeshun mimbi menepec. Èbien nashuntiapimbo iquendac. <sup>8</sup> Èbi unësabicnuc nëid chidon tantiaquin chococanuequin nachimboen noadte machiuimpaboc. <sup>9</sup> Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

*Esus bedmembali, Udas quiaid*  
(Mat 26.14-16; Duc 22.3-6)

<sup>10</sup> Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. <sup>11</sup> Adec nidequi isadaidbo tsusiobo yacno choshon Esus mibi bedmembali quequin chuituidac bëdambo icpac caondash aido. Adembidi: —Esus ëbi bedmesho isun piucquid mibi menembali —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

*Nidaidën capuquidded cuesuniaid abëd icquidobëdtan piaid*  
(Mat 26.17-29; Duc 22.7-23; Uan 13.21-30; 1Cod 11.23-26)

<sup>12</sup> Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembali nacnem-patsia? —quepondash Esusbëd icquido.

<sup>13</sup> Adsho tantiash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aidbëdi nidta. <sup>14</sup> Aden aid tsibanec puduedash, ¿Èbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. <sup>15</sup> Aden chiac buanshun dectatomesun abuc quënë dapa mibi ismendac. Ambo pete sante cuate iquendac. Ashunquio penun nacnenta —quepondash Esus ambi daëd chuimiaid caic.

<sup>16</sup> Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

<sup>17</sup> Adnubien inchëshbudtsëqui aid daëdtsëqui yacno Esusbëd icquid utsibo chopondash. <sup>18</sup> Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

<sup>19</sup> Adsho tantiash, Icsambo iquec, quequin tantiec: —¿Èbida chienquio ique? —quepondash abëd icquidtedi.

<sup>20</sup> Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënkuido bedmendac. <sup>21</sup> Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquiopatecnëdan —quepondash Esus.

<sup>22</sup> Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piad con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

<sup>23</sup> Adembidi dëshote bedshun uba caid acatequid icnuc Nuquin Papa padpiden chuishun abëd icquido menebanac apcondash.

<sup>24</sup>—Nëid acquin Esuseded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata. <sup>25</sup> Uba caid ënë nidaidëshun padpiden aquenquiocquimbi Nuquin Papan shubunshun acatequid chuca mibëdtambi aquendambi —quepondash Esus abëd icquido caic.

<sup>26</sup> Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid*

*(Mat 26.30-35; Duc 22.31-34; Uan 13.36-38)*

<sup>27</sup> Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tanta, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëndac,”

quequin Nuquin Papan chuipampid nec. <sup>28</sup> Unës uac uincuenash Caididia yacno ëbia nidoaindabi. Mibitsen ambo nidta —capondash Esusën abëd icquido chuiquin.

<sup>29</sup> Adoquien: —Esus tantiaquid nebi quenquio utsitedi icnuc ëbien padenquio iquec —quepondash Petedo.

<sup>30</sup> Aden Petedon chuisho tantiash: —Abimbo chiembique. Tanta. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

<sup>31</sup> Adsho tantiash: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi —quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid*

*(Mat 26.36-46; Duc 22.39-46)*

<sup>32</sup> Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

<sup>33</sup> Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash.

<sup>34</sup> Adquio iquec: —Ëbibi unësquioshë yec udictsëc nidebi. Chieshtomane queshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec. <sup>35</sup> Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec.

<sup>36</sup> Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio iquembi queshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

<sup>37</sup> Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiash yuecpectsëc iquec ushenquoio yec tabadtiapimboda icco? <sup>38</sup> Chieshmane queshun Nuquin Papa chuita Nuquin Papan chiaid niacmenuequidën Satanas caidën chiaid tantiamane queshun. Chieshenquoio iquebi quiash dacuëdash badedquoio mibi chieshendac —quepac caondash Esus.

<sup>39</sup> Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. <sup>40</sup> Adtanec choashumbic abëd chobedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquoio tabadpac caondash.

<sup>41</sup> Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquoio yec isucun. Nuquin Papan madombo chidon tishac matsesaïd ëbi icsho nëbimbobi ëbi chieshënquidon bedmeque. <sup>42</sup> Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

*Esus bedshun buante chiaid*

(Mat 26.47-56; Duc 22.47-53; Uan 18.2-11)

<sup>43</sup> Aden chuinubien Esusbëd icboedquiobi Udashbëd matses dadpen cho-chopondash. Cho-choquid utsi-utsiec chështe sanampamboec chonobi utsi cüeste sanampamboec chopondash. Aïdted Udasën chiac isadaïdbo tsusiobon chomiaïdo nepondash.

<sup>44</sup> Esus bednuequid tantiamenuen ambiabi Udasën: —Ëmbi tanchocaid mimbï bedtequid nendac. Aidquiobi bedshun buanta. Cuenushe queshun bëdamboen ista —capac caondash. <sup>45</sup> Aden chiashic aidobëdi choquimbi: —Icho —quequin Udasën Esus tanchoccatuidpondash.

<sup>46</sup> Aden Udasën tanchoccasho isun Esus bedpondash. <sup>47</sup> Adnubien anocquid abentsëcshun chështe sananquin isadaïdbo tsusio dapan ancaïdën pabiate auc abentsëc pateshunepondash.

<sup>48</sup> Adnubien: —¿Cuesanquid Esus nec, queshun utsin cüeste sananubi utsibon chështe sananec ëbi bedecta cho-choec ne?

<sup>49</sup> Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbï bedenquiocpo? Nuquin Papan chiacpadomboen nëbi mimbï ëbi bedec, —quepondash Esus abi bedquido caic. <sup>50</sup> Adec onquesho tantiaishun cuenquin abëd icquidtedishun Esus niampondash.

<sup>51</sup> Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi. <sup>52</sup> Aden bedac dasiuidte bëdaïdquoio nianec dadauidquoio cuempondabi.

*Isadaïdbo tsusiobo iccuededacno Esus buante chiaid*

(Mat 26.57-68; Duc 22.54-55, 63-71; Uan 18.12-14, 19-24)

<sup>53</sup> Adnubien, isadaïdbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaïdbo tsusiobo utsibo iccuededec tabadpondash. <sup>54</sup> Aden Esus buanubi tsyuec choquin Petedo cuemboedën tsibananec isadaïdbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. <sup>55</sup> Adec Petedo tsadnubien Esus unës uate

bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. <sup>56</sup> Abimbo chiacbimboen dadpenshon chuibededpondash. Aden chuiquin abentsëcshun chiacpadomboen chienquiocquin utsin chuiopondash.

<sup>57</sup> Adnubien, Chuinu. Tantia, qeshun Esusën chiacbimboen utsi uain chuipondash utsibon. <sup>58</sup> Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. <sup>59</sup> Aden abentsëcshun chuinubi utsin aden chienquiocquin chuipondash.

<sup>60</sup> Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

<sup>61</sup> Adsho tantiash ëcbedenquio yec otacquo nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queoapondash isadaidbo tsusio dapa Esus caic.

<sup>62</sup> Adoquien Esus: —Ai, aidi nebi. Nuquin Papan madombo matse-said abuc nidoashic Nadatiambocquidën dayun abiucquo tsadash abu ushun ëbi chosho matsesën isendac —quepondash Esus.

<sup>63</sup> Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? <sup>64</sup> Nuquin Papa icsamboen Esusën chuisho mimbi tantioc. ¿Midapaden mimbi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoquien: —Icsambo iqueque. Unës uametiad —quecuededpondash.

<sup>65</sup> Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Ëbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

*Esus ëmbi tantiacmaidquio nec quiaid*

*(Mat 26.69-75; Duc 22.56-62; Uan 18.15-18, 25-29)*

<sup>66</sup> Adnubien Petedo umanuc daquënë uaidën tsadnubi isadaidbo tsusio dapan yua chido chopondash. <sup>67</sup> Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

<sup>68</sup> Adoquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

<sup>69</sup> Adec Petedo ambo tsadsho chido yuaidën istuidtanquin padpiden: —Esusbëd icquidquio nëid nec —quequin anocquido chuiopondash.

<sup>70</sup> Adoquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

<sup>71</sup> Adoaquien: —Ëmbi tantiacmaidquio nec quequin abimbo chiemi. Ëmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

<sup>72</sup> Adnubien cachina padpidec cuëdpondash. Adsho tantiahsun, “Cachina daëdec cuëdabicnuc ëmbi tantiacmaidquio Esus nec, quequin mimbi chiendac tedestedec onquequin,” quequin Esusèn chioshi quequin tantiec unësquio yanec shubianquiopondash Petedo.

## 15

### *Pidato yacno nidshun Esus meniaid*

(*Mat 27.1-2, 15-31; Duc 23.1-5, 13-25; Uan 18.28-19.16*)

<sup>1</sup> Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamquido. Adec iccuededash onqueshun Esus mëtaneshun buanshun isadaidpembro ancaquid Pidato caid menepondash. <sup>2</sup> Aden meniac Pidato: —¿Isadaidbo ancaquidta mibi neque? Ëbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

<sup>3</sup> Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquio yec Esus tsadpondash. <sup>4</sup> Adec tsadsho isun: —¿Ëcbedanenquio yec otacquioda tsade? Mibi icsaid dadpen nëidon chuibanec —Pidaton caqui <sup>5</sup> adquiecbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusèn iquec, quequin ambibi tantiec Pidato tsadpondash.

<sup>6</sup> Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. <sup>7</sup> Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. <sup>8</sup> Adnubien Pidaton seta utsin quënën nauedmiaid abentsëc ambi nidmiondacadpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

<sup>9</sup> Adec onquesho tantiahsun Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. <sup>10</sup> Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. <sup>11</sup> Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. <sup>12</sup> Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

<sup>13</sup> Adoaquien: —Cueste nitsinshun dectan —quec comapenec cuëdcuededpondash isadaidbo.

<sup>14</sup> Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

<sup>15</sup> Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe qeshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

*Sondadon Esus mamënshumbededaid chiaid*

<sup>16</sup> Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. <sup>17</sup> Choshon dashcute abichobicquid bëdaidquio bedshun ancanquid dasiuidacimboecnuc dasiunshun pinchuc-pinchucquid mauete uashun Esus matoncashun <sup>18</sup> ancanquid cuënacpaden cuë nec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. <sup>19</sup> Adoquimbi ancanquidën sanante cueste bëdaidquioimboecnuc sananguin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. <sup>20</sup> Aden mamënshumbedequin mëyanshun dashcute bëdambocquid ambi dasiuiamboed dachicshun aton dashcutebi dasiunshun cuesten dectanuequin Esus buampondash.

*Esus cuesten dectante chiaid*

(*Mat 27.32-44; Duc 23.26-43; Uan 19.17-27*)

<sup>21</sup> Aden abi dectante cueste Esusën buantiapimboecnoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash. <sup>22</sup> Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. <sup>23</sup> Ambo choshon uba sicaid paëacsho paëmbocquid dauë cacushtanquin meniac aque-nquiocondash Esusën. <sup>24</sup> Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëchun sandoshon cadotanequin dada uatsaidëmpi puduemaiid isbanquin Esusën dashcute bedbampondash.

<sup>25</sup> Ushë dectatoec 9 yanuc Esus cuesten dectampondash. <sup>26</sup> Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. <sup>27</sup> Cuesunetanquin ampequid daëd ëquë dectambudcuenshun nënantanquio Esus dectampondash. <sup>28</sup> “Dectanquin icsaquidbëdta dectanendac,” quequin Nuquin Papan chuimiampicpadembi napondash. <sup>29</sup> Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbededpondash. Adec cuenquin mamënshunquin: —Nuquin Papa tabadte shubu uashunaid chichanshun daëdec ushqin chuca uaimbi, quequin chiec mibi onquiondaque. <sup>30</sup> Abimbo chuiquid yec unëstiapimboquid nebi quianec mibibi budta —cabidanepondash.

<sup>31</sup> Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantamequid chedo onquecuededec: —Utsi-utsien bédamequimbi utsi unèsacsho uincuemboed yec mètoccaid abembi chiquidtiapimbocquid nec —quepondash isadaidbo tsusiobo Esus caic. <sup>32</sup> —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamënshunubi abédta dectanaidën adembidi chuiopondash.

*Esus unès uate chiaid*  
(*Mat 27.45-56; Duc 23.44-49; Uan 19.28-30*)

<sup>33</sup> Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash. <sup>34</sup> Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuédpondash. Aton onqueten: Papa Edoen, ¿atotsieshumbini bidiaquin isenquio ique? quec adpondash Esus.

<sup>35</sup> Aden Nuquin Papa Esusën chuisho tantiaquido, Nuquin Papa cuë nec, quenquio yec: —Edias cuëneque. Tanta —quepondash.

<sup>36</sup> Aden tantianubi badedi titinqueshun sicaid mucambocquid nēcushtanquin puntanquin cuate dēdectanshun acmenuequin èccuēscadonequi: —Chiata. Edias Esus bedec chonoshe caimbono —quepondash.

<sup>37</sup> Adnubien comapenec cuēdec Esus unèsbudpondash.

<sup>38</sup> Esus unèsbudnubi abi inchëshacimbocnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daédquio yec. <sup>39</sup> Adec Esus cuēdbud-cuēdbudec unèsō isash: —Abimbo chuiquid nioish. Nuquin Papan madombo nēid nec —quepondash sondado chuiquid uquē tsadbudec.

<sup>40</sup> Adnubien ancuenquio isec chidobo nēidtedi tabadpondash: Madia Mactada caid yacnocquid; Madia utsi, Acobo bushcuuctsēcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. <sup>41</sup> Aidon Esus Cadidia caid yacno capusho isun abi nashumboedo nepondash. Aidobēdtan isquido chido utsibo Edusaden yacno choshon Esus buansho isun tsibanquido icpondash.

*Esus chococate chiaid*  
(*Mat 27.57-61; Duc 23.50-56; Uan 19.38-42*)

<sup>42</sup> Adashic biednes ushë budtsambi: —Inchëshbudtsēqui seis icnuc chonoadtemaid ushë chonoshe Esus unèsoshe chococatanu —quianec Esus tantiaquid utsi nidpondash. <sup>43</sup> Aidi, Ose Adimateya caid yacnoshon tishaid Pidato yacno nidpondash. <sup>44</sup> Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Èndenda unèsaccosh? quequin tantiesa icquin sondado chuiquid Pidaton chomeshun: —¿Ada Esus unèsosh? —capondash.

<sup>45</sup> Adoac: —Ai —quesho tantiashun: —Ai, bedshun buanta —capondash Pidaton Osē chuiquin.

<sup>46</sup> Adoac nidshun unèsaid dabidiate bedshun Esusën dada imbudshun dataneshun macuësh dapa cuēnote shēcūē uaqin ambi nacnenaidën nauedshun cuēnote dapan bētashpondash. <sup>47</sup> Aden Osen Esus chococasho



Madia Mactada caid yacnocquidbëdtambi Madia, Ose utsin titan ispondash.

## 16

### *Esus uincuenta chiaid*

(*Mat 28.1-10; Duc 24.1-12; Uan 20.1-10*)

<sup>1</sup> Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. <sup>2</sup> Bedtsash badiadtsëcnubi dominco ushë caidën Esus chococacno nidanequi: <sup>3</sup> —¿Tsuntsin cuënote shëcnepeba? —quec onquecuededpac caondash.

<sup>4</sup> Adec onquequin ancuenquo isquien cuënote ënden shëcniac. Cuënote dapa yuëmbocquid nepondash. <sup>5</sup> Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquo tsadpondash. Aidi isash dacuëdcuededec tabadpac caondash chidobo.

<sup>6</sup> Adec dacuëdec tabadsho isun: —Dacuëdenquo yec tabad. Esus cuesten dectanaid mimbi nibënaid tantiembi. Uincuenash nidac. Nëmboi nanac ueuidoshe. Is. <sup>7</sup> Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsibobëdta chuituidec nid —quepondash nëbi caniquid chidobo chiec.

<sup>8</sup> Aden chuisho tantiash uëdëquequi chococaid shëcuënuësh pudue-nanec titinquec dacuëdec onquenquo yec nidanepac caondash chidobo.

### *Esus abuc indote chiaid*

(*Mat 28.16-20; Duc 24.13-53; Uan 20.11-23*)

<sup>9</sup> Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. <sup>10</sup> Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. <sup>11</sup> Esus uincuenash capusho isombi, Madia qesho tantiash, Aidquo mimbi isambo iquec, quec tantienquo yec tabadcuéd-pondash.

<sup>12</sup> Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. <sup>13</sup> Aden ismiac aid daëdi auchidi Edusaden yacno nidshun ambi isboed chuiopondash. Adembidi tantienquo icoapondash utsibon.

<sup>14</sup> Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi ipcoc. Chobique. Is —capondash Esusën.

<sup>15</sup> Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matstededi mimbitsen chuiban. <sup>16</sup> Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc.

<sup>17</sup> Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiochoedëmbi tantiaquin ëbi chuibanendac. <sup>18</sup> Adecbidi, nisinquio piaqui bidisquenquio iquendac. Adecbidi, unësmenuequin acmiaqui unësenquio iquendac. Adembidi, utsi unëstsencho mishac bëdanendac. Nuquin Papan nadatiambocquin namiaidënquio adobanendac —quepondash Esus.

<sup>19</sup> Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash. <sup>20</sup> Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Ëmbi abimbo chuiboedquio mimbi isec aidquio tantianeta. Padi. Aidtedi dada uaombi.

## DUCASËN DADA UAID

Mibi ismenuequin dada uaquid Ducas nebi.

<sup>1</sup> Utsin-utsinquien ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

*Uan, acten mentoanquid tishte chiaid*

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. <sup>9</sup> Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tēchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash. <sup>10</sup> Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. <sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash. <sup>13</sup> Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. <sup>15</sup> Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. <sup>17</sup> Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid

niaochedi min madon chiac Nuquin Papan chiaid naquidquo iquendac. Nuquin Icbon matses aido icmenuen min madon chuibanendac — quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: — ¿Mitsipadentsimbi mimbi chuiboed tantiape? Con chidobëdi tsusio budpobi — capanëdash.

<sup>19</sup> Adoaquien: — Èbibi, Cabaded nebi. Nuquin Papan abëd tabadquin namiaidquo nebi. Nuquin Papan ambi chiacpadomboen mibi chuimenuen chomiaid nebi. <sup>20</sup> Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquo icsho mibi eme uaindac. Min chidon bacuë tishan padpidec mibi onquianoaindac — quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenquicsho isash, Baded puduenquiocpec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenuequi buëd cuëdenquiocpanëdash Sacadias. Adsho isun: — Ushquin isacimboen isbenac — cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. <sup>24</sup> Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. <sup>25</sup> Adec tabadec Nuquin Papan naid chiec nadec Edisabed onquepanëdash: — Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Èbi tantiaquin Nuquin Papan usundomiaid nebi — quepanëdash Edisabed.

### *Esus tishendac, quequin chiaid*

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. <sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. <sup>28</sup> Adec choshon: — Mibi tantiaquin Nuquin Papan bëdamboen icmiaidquo mibi nec. Nuquin Icbo mibëdi tabadendac — capanëdash Cabadedën.

<sup>29</sup> Adoaquien Madia, ¿Atotsi quepeba? quequin otacquo tantiec tsadpanëdash. <sup>30</sup> Adec tsadsho isun Cabadedën: — Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. <sup>31</sup> Chuinu. Tantiata. Bacuë usundoshon min mado mimbi tishendac. Tishun, Èmbi tishaid Nuquin Papa yacno yuedanquidquo nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. <sup>33</sup> Adec tsusedpa Acobon tsyuecquido ënenquiocquin chuiquid dapa min mado Esus iquendac — quepanëdash Cabaded Madia chiec.

<sup>34</sup> Adoaquien: — ¿Mitsipadentsimbi bacuë usundoshon bacuë tishpe? Chudabicquid nebi — quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquoio Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiochoedëmbi nëbi bacuë usundoac. Usundoenquioquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquio nec —quepanëdash Cabaded.

<sup>38</sup> Adoaquien Madia: —Ai, con Icbon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

*Madia Edisabed isedec nidaid*

<sup>39</sup> Adashic, aton na nacnenanec Madia tsusedpa Udan tsyuecquidon nidaid macuësh yacno badei nidpanëdash. <sup>40</sup> Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan bédamboshë icmiaidquio mibi nec. Mimbi usundoaid adembidi bédamboshë icmiaidquio nec. <sup>43</sup> Nuquin Icbon tita mibi yec ¿atotsi quiash ëbi isnuec cho? <sup>44</sup> Mibi isec chobi, mibi quesho ëmbi tantianubi, Cuishon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bédambo icted-ictedendac —quepanëdash Edisabed Madia chiec.

*Nuquin Papan naid chiec Madia cuëdënaid*

<sup>46</sup> Adnubien Madia nadec onquec cuëdëmpanëdash:

“Nuquin Papan naid chuibanu. Tantia.

<sup>47</sup> Ëbi usundomiaid Nuquin Papa yacno Yuedanquid nec, quequin tantiec bédambo iquebi.

<sup>48-49</sup> Ëbi ambi namiaid icsho bédamboen isquin Nuquin Papan naosh. Adoacsho, Nuquin Papan bédamboshë icmiaid Madia nec, quequin abite-dishunquio tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadacbimboecnuc adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

<sup>52</sup> Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

<sup>53</sup> Ambi chiaid tantiec bédamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bédamboec tabadebi quequid unësacsho cacumiac uano tabadendac.

<sup>54</sup> Chuiquid Dapa Abentsëcquiobi chidon usundoendac, quequin ambi tsusedpa chuimiampicpadomboen Nuquin Papan ëbi usundomiac.

<sup>55</sup> Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpanëdash. <sup>56</sup> Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

### *Uan tishaid*

<sup>57</sup> Adnubien Edisabedën bacuë tishthe ushë chonoc dada bacuë tishpanëdash. <sup>58</sup> Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsinquidotedi Edisabedbëd bëdambo icpanëdash.

<sup>59</sup> Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi <sup>60</sup> Edisabed: —Padenquio. Abi cuëmëdquid Uan nec —quepanëdash.

<sup>61</sup> Adoquien utsibo: —Min matses utsi Uan cuëmëdquid nibëdec —qeshun <sup>62</sup> Sacdias ismenuequin mëdante uic-uiccaquin: —Abi cuëmëdquid chui. Tantianu —capanëdash utsibon.

<sup>63</sup> Adoquien dada uate bedshun, Abi cuëmëdquid Uan nec, quequin dada uaquin Sacdiasën ismepanëdash.

Adoquien: —¿Abimboda mimbi cape? —quecuededpanëdash utsibo.

<sup>64</sup> Adnubien Nuquin Papan oncameoac Nuquin Papan naid Sacdiasën chuibanpanëdash. <sup>65</sup> Aden chuibansho tantiash: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibanpec? —quecuededpanëdash utsibo.

Aden tantianec aton shubuno nidaneshun ambi ishoedbëdtabi ambi tantiaboed utsibon chuipanëdash. <sup>66</sup> Adoac: —¿Mitsipadquidquio aton mado nepec? —quecuededpanëdash Sacdiasën mado Nuquin Papan tantiamiaidquio isbededec.

### *Sacdias oncamiaid*

<sup>67</sup> Adnubien Uanën papa Sacdias Nuquin Papan Mayanën oncamiac nadec Esus chiec onquepanëdash:

<sup>68</sup> “Nuquin Papa isadaidbon Icho nec, quequin chuibanuna. Aidën isadaidbo icsaquid icscho cuidnushe quiash abided cuidadquid chomiac mayan icsan yuaid icboedi aidën mënchictequidquio isadaidbo iquendac.

<sup>69</sup> Abi mënchicquid nadatiamboquid nendac.

Tsusedpa Dabidën tsyuecquidquio aid nendac.

<sup>70</sup> Ambi chuimiaidon chiampicpadembi

Nuquin Papan adquidquio icmianac.

<sup>71-73</sup> Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chieshënkuido

nidiapimbo yacnombo abi yacno yuedanquid

Nuquin Icho Abentsëcquiobi nec.

<sup>74</sup> Abi cudasquin mënchicaid yec dacuëdenquio yec

Nuquin Papan namiaidombo iquendac.

<sup>75</sup> Adquid yec icsaisa abipadquio bēdamboec tabadquid icsho nuqui aidēn isendac ēnenquiocquin.”

Adec Esus chiec onquiashic nadec aton mado chiec Sacadias onqueoa-panēdash:

<sup>76</sup> “Adnubien nēbi Nuquin Papan chomiaid chuibanquidquio mibi nec, quequin utsibon mibi cuēnendac, mado.

Nuquin Icbo choec, quequin utsibon tantiabicnuc bēyuc tantiashun abi chuiquidquio mibi iquendac.

<sup>77</sup> Adquid icquin mibi icsaquid icsho cuidnushe quiash

abided cuidadquid tantiasho isash Nuquin Papa mibi icsaid tantienquio yec bēpiscudendac,

quequin chuibanquid mibi iquendac, mado.

<sup>78</sup> Nuquin Papan matses tantiaguin naquidquio icquin

abipadquidquio icsaisa abi yacnoshon chomiaidquio iquendac.

<sup>79</sup> Aidēn tantiamiac unēsash abi iquendac.

Adquid shubu abentsēquēn tabadacpadecec tabadendac, quequin mimbi chiendac, mado,”

quec Uanēn papa Sacadias Nuquin Papan Mayanēn oncamiac on-quepanēdash.

*Matses nibēdacno Uan tabadcueniaid*

<sup>80</sup> Adashic, Sacadiasēn bacuē Uan caniacsho Nuquin Papan tantiamiaid yequi matses nibēdacno tabadcuenepanēdash ambi Esus chuibante ushē choabicnuc.

## 2

*Esus tishaid*

*(Mat 1.18-25)*

<sup>1</sup> Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ¿Embi ancaido isadaidbo aton nabēdta tedtsi iqueque? Isquin tantiata, quequin Sidenio cuēmēdquid chuipanēdash. <sup>2</sup> Sidenio nidaid Sidia caid yacnocquido chuiquid, cobednadod caid icpanēdash.

<sup>3</sup> Min tsusedpa tishampid yacnoshon mibi cuēmēdquid mitsanabēdtabi dada uanuec niddan, cac abēd icquido buanec isadaidbo nidanepanēdash.

<sup>4</sup> Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanēdash. <sup>5</sup> Aton chido Madia bacuē nua usunquidbēdi Ose abi cuēmēdquid aton nabēdtabi

dada uanuec Beden yacno chopanēdash. <sup>6</sup> Ambo choquin aton bacuē nuambo usumanēdash. <sup>7</sup> Ambo matses dadpen cho-choash shubu abitedi puduedash tsucus-tsucustsēcquio tabadnuc nidaidēn capuquid tabadacno puduedshun ambi bēyuc usundoaid Madian tishpanēdash. Tishun dashcute cuēsh-cuēshun dapucshun nidaidēn capuquidēn pete sanaid cuesten ambi bēyuc tishaid dada bacuē Madian nampanēdash.

*Obeca pemebanquin buanquido Nuquin Papan uaidon chiaid*

<sup>8</sup> Aden Beden yacnoshon Esus tishnubien shubu nibēdacno obeca dadpen pemebanquin buanquido inchēshbudtsēcqui choec

tabadtuidpanëdash. <sup>9</sup> Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chênquenuc obeca pemebanquin buanquido dacuëdcuededpanëdash. <sup>10</sup> Dacuëdsho isash: —Chiaid bëda chuinuec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac. <sup>11</sup> Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup> Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieç uesho istuidash, Nuquin Papan chomiaid Quidistu nec, mibi quependac. <sup>13</sup> Aden chieç Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chieç nadec cuëdëncuededpanëdash:

<sup>14</sup> “Nuquin Papa abucquio tabadquid abitedi uaquidquio bëdamboshë iquec.

Nuquin Papan bëdamboen isaïdo ma abëdi tabadpanuna,” quec cuëdëmpañëdash. <sup>15</sup> Adec cuëdënash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. <sup>16</sup> Adec nidshun nidaidën capuquidën pete santen bacuë nanacsho istuidpanëdash. <sup>17</sup> Isanec nidquimbi ambi isboedbëdta ambi tantiaboed chiac <sup>18</sup> tantiaquidtedi: —¿Midapadquidien capec? —quecuededpanëdash. <sup>19</sup> Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

<sup>20</sup> Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chieç onquecuededpanëdash.

*Nuquin Papa tabadte shubu uashunaid yacno Esus buanaid*

<sup>21</sup> Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpanëdash.

<sup>22</sup> Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash. <sup>23</sup> Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. <sup>24</sup> Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdamboequid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio



icpanëdash. Aidi isadaidbo chuiquid dapa abentsëcquiobi cainquidquo icpanëdash. Aidi Nuquin Papan aton Mayan meniaidquo icpanëdash. <sup>26</sup> Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquo choacsho unësabicquien isendambi, quequin tantiapanëdash. <sup>27</sup> Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquo nanuen aton bënëbëdtambi Madian Esus bëpanëdash. <sup>28</sup> Esus bësho isun Simeyonën Esus bedshun icucquin Nuquin Papan naid naden chuibampanëdash:

<sup>29-30</sup> “Abitedishun Icho icquin mimbi ëndenquo chiampid nëbi nëid isembi.

Nëid isash unësmene quenquo yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaid icsho ma abitedishunquo ispanuna.

<sup>32</sup> Nëidëmbi mimbi tantiacpaden chuibanquin isadaidbo bëdambo icmendac,” quepanëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. <sup>34</sup> Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuiopanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uquë nësecaindac. Min mado tantiaguid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpeshun icsamboen chuidedchuidendac. <sup>35</sup> Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquo yec, Con madon natiambo iquebi, mibi quendac —quepanëdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënë be-dac abëdi seta 7ted matamiash tabadnubi <sup>37</sup> aton bënë unësapanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenepanëdash. <sup>38</sup> Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiapaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash. <sup>40</sup> Ambo tabadnubi aton bacuë Esus dada bëdambo yec canicuempanëdash. Aidi comapenen tantiaquidquo Nuquin Papan bëdamboen isaidquo icpanëdash.

*Canicuenash Nuquin Papa tabadte shubu uashunaidën Esus tabadaid*

<sup>41</sup> Adashic, Ëmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc

Madia Osebëd Edusaden yacno nidoapanëdash. Nuquin Papan chi-acpadequi setan-setanquieq nidentenapanëdash. <sup>42</sup> Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. <sup>43</sup> Adec ambo nidashic nami uabicquid petequid tantiaid ushëtedi tantiec tabadtenapanëdash. <sup>44</sup> Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenapanëdash. <sup>45</sup> Aden nibënquin istuidabi yec Edusaden yacno padpidec nidoapanëdash. <sup>46</sup> Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. <sup>47</sup> Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpanëdash. <sup>48</sup> Adnubien, ¿Mitsipadquid con mado nepec? quequin otacquo Madian tantiapanëdash. Aden tantiequi: —¿Atotsiquiash ëbi daëdi tantienquio yec nëmbo choash mibi tabade, mado? Unëshquiocquin papabëdtambi mibi nibëmbeniombi —capanëdash anin.

<sup>49</sup> Adoquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? <sup>50</sup> Aden Esusën chuisho anibëdtan Osen tantienquiocpanëdash.

<sup>51</sup> Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenapanëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantidenapanëdash.

<sup>52</sup> Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

### 3

*Esus choec, quequin Uan mentoanquidën chiaid  
(Mat 3.1-12; Mad 1.1-8; Uan 1.19-28)*

<sup>1</sup> Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash. <sup>2</sup> Ancanquid aitedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacdiasën madó matses nibëdacnombo tabadshobi Nuquin Papan, Ëmbi chiaid chuibanta, capanëdash. <sup>3</sup> Adoac acte Odan caid cuëmëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquio yacnimboen

Nuquin Papan mibi bēdamboen isendac. Ĕmbi tantiaid icsa nainquiocquin ĕnu, mibi qesho tantiashun mibi acten mentono, quequin cho-choquid cho-choquidquien Uanĕn chuidednepanĕdash.

<sup>4</sup> Ĕndenquimbo Nuquin Papan tantiamic Isayasĕn Uan chuiquin dada uampicpadequi Uan icpanĕdash. Naden Isayasĕn Uan chuiquin dada uapampic:

“Mates nibĕdacnombo tabadquidĕn ĕcauanshun naden chiendac: Nuquin Icbombo choeque. Aid tantianu, quequin mimbi tantiaid icsa ĕmbanta.

<sup>5</sup> Umbo ancuenquio chosho isnu quequin cuembocnoc andĕdshun ambescabanacimboen abimbo chuiquidĕnquio chiaid tantianu, quequin mimbi tantiaid icsa ĕmbanta.

<sup>6</sup> Aden ĕnshun Nuquin Papa yacno puduedmianquid chuiquid dapa abentsĕcquiobi cuembocnoc mimbi tantiabenendac,” quequin Isayasĕn Uan tishabicnuc chuiquin dada uapampid nec.

<sup>7</sup> Aden ĕnden chiampicpadequi Esus bĕyucanequin acten mentomenuec cho-choquid dadpen icsho Uanĕn nadopanĕdash: —Nisin bacuĕ anipadquid nec. Aidbimboecquid icsambocquid mibi neyoc. Mibi adquid icsho isun ĵtsuntsin Nuquin Papan cuidnushe qeshun ambi mĕnchictequid icta, quequin mibi chiosh? ĵAidĕn chiaid tantiashta acten mentomenuec cho? <sup>8</sup> Mentomete bunquin mimbi tantiaid icsa ĕnshun bēdamboec tabadquin utsibo ismebanta. Nuquin tsusedpa Abadauan Nuquin Papan bēdamboen isaidquio icpampic. Ambi tishmi-aidĕn tishmiaid caidaid ĕbi icsho Nuquin Papan bēdamboen isaidquio nebi, quequin tantienda. Abadauampadquid ambi chiaid tantiaquid bunquin, Mates icta, Nuquin Papan cac cuĕnotebi mates iquendac —quepanĕdash Uan. <sup>9</sup> Adequi onquebudec: —Cuĕte icsatedi matenu, quequin cuĕte bacuĕesa dĕdshun mateshun icbon nĕdĕncaquin tauiec. Adquiecbidi tantiaid icsambocquid cuĕshĕdmenu, qeshun bēdamboec tabadaid ismesa cuĕshĕdmeshun chian anĕdĕnquequid Nuquin Papan nĕnendac —quepanĕdash Uan.

<sup>10</sup> Adoaquien: —Chian anĕdĕnquequid Nuquin Papan nĕsiate ictiapimbocquin ĵatotsimbi napeba? —quepanĕdash iccuededquido.

<sup>11</sup> Adoaquien: —Mibi dasiuidaid daĕd icsho dashcute nibĕdquid isun mitsana abentsĕc meneta. Adembidi pete nibĕdquid icsho isun meneta —capanĕdash Uanĕn.

<sup>12</sup> Adecbidi ancanquid dapan mates utsin na bedtequid nĕidted bedta caidotsen acten mentomenuec cho-chopanĕdash. Choshon Uanĕn chuibansho tantiash: —Chian anĕdĕnquequid nĕsiate ictiapimbocquin ĵatotsimbi napeba? —quepanĕdash.

<sup>13</sup> Adoaquien: —Ancanquid dapan chiatedtsĕqui bedta. Muaquin mitsana daĕd uanuequin bedenda —capanĕdash Uanĕn aido chuiquin.

<sup>14</sup> Adashic, adecbidi sondado cho-choash: —ĵAtotsimbi napeba? —quepanĕdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidĕn, Nĕidtedi menenu, cac, Utsi bec cho, quenda —capanĕdash Uanĕn sondado chuiquin.

<sup>15</sup> Aden Uanĕn chuibansho tantiash: —ĵTsutsi nepec? ĵNuquin Papan chomiaidta nepec? —quecuededpanĕdash cho-choquido.

<sup>16</sup> Adsho tantiash: —Mibi acten mentoquidquo nebi. Padnuen ëbipadquidpenquo nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho jatotsieshun aid choec quequin chuiquidquo Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquo icmendac aton Mayanën. Adoac ënsho isun pauquendac —quepanëdash Uan. <sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibanpanëdash: —Mín utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash. <sup>20</sup> Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

*Esus acten mentoaid*  
(*Mat 3.13-17; Mad 1.9-11*)

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcniانع <sup>22</sup> dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquo mibi nec, mado. Adembidi ëmbi bëdamboen isaidquidquo mibi nec —quepanëdash aton Papa.

*Esuquidistun tsusedpabo chiaidtedi*  
(*Mat 1.1-17*)

<sup>23</sup> Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiash, Nuquin Papan mado nec, quenquo yec matses onquepanëdash. Esusën papapenquo Ose icnëdash. Madia aton tita icho icnuc Esusën tsusedpabo nëidtedi iquec: aton buchido Edi cuëmëdquid icpanëdash. <sup>24</sup> Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, <sup>25</sup> aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, <sup>26</sup> aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, <sup>27</sup> aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, <sup>28</sup> aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën

papabic Ed cuëmédquid, <sup>29</sup> aidën papabic Osue cuëmédquid, aidën papabic Ediesed cuëmédquid, aidën papabic Odin cuëmédquid, aidën papabic Matic cuëmédquid, <sup>30</sup> aidën papabic Debi cuëmédquid, aidën papabic Simeyon cuëmédquid, aidën papabic Uda cuëmédquid, aidën papabic Ose cuëmédquid, aidën papabic Onan cuëmédquid, aidën papabic Ediaquin cuëmédquid, <sup>31</sup> aidën papabic Medeya cuëmédquid, aidën papabic Menan cuëmédquid, aidën papabic Matata cuëmédquid, aidën papabic Natan cuëmédquid, <sup>32</sup> aidën papabic Dabid cuëmédquid, aidën papabic Isai cuëmédquid, aidën papabic Obed cuëmédquid, aidën papabic Bos cuëmédquid, aidën papabic Sadomon cuëmédquid, aidën papabic Nason cuëmédquid, <sup>33</sup> aidën papabic Aminidad cuëmédquid, aidën papabic Adan cuëmédquid, aidën papabic Eston cuëmédquid, aidën papabic Pades cuëmédquid, aidën papabic Uda cuëmédquid, <sup>34</sup> aidën papabic Acobo cuëmédquid, aidën papabic Isac cuëmédquid, aidën papabic Abadauan cuëmédquid, aidën papabic Tade cuëmédquid, aidën papabic Nacod cuëmédquid, <sup>35</sup> aidën papabic Seduc cuëmédquid, aidën papabic Dacau cuëmédquid, aidën papabic Pedec cuëmédquid, aidën papabic Ebed cuëmédquid, aidën papabic Sada cuëmédquid, <sup>36</sup> aidën papabic Cainan cuëmédquid, aidën papabic Adpashad cuëmédquid, aidën papabic Sen cuëmédquid, aidën papabic Noe cuëmédquid, aidën papabic Damec cuëmédquid, <sup>37</sup> aidën papabic Matusaden cuëmédquid, aidën papabic Enoc cuëmédquid, aidën papabic Aded cuëmédquid, aidën papabic Macadaded cuëmédquid, aidën papabic Cainan cuëmédquid, <sup>38</sup> aidën papabic Enos cuëmédquid, aidën papabic Sed cuëmédquid, aidën papa abia uampid Adan cuëmédquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

## 4

### *Satanas Esus icsamete bunaid* (*Mat 4.1-11; Mad 1.12-13*)

<sup>1</sup> Adshumbic, Matses nebi, quequin Nuquin Papan chiacpaden nanuen acten mentomepanédash Esusën. Aden Uanën acten mentoquien Nuquin Papan Mayanën chiacpadec acte Odan caid yacnoësh puduanec matses nibédacnombo nidash tsadpanédash. <sup>2</sup> Ushë utsi nidash utsi choaid abuctotsécquiecnuc ambobi tsadpanédash. Aidtedi ushqin penquo yash Esus bundopanédash.

<sup>3</sup> Bundoacsho isash Nuquin Papa chieshënquid choash Satanas nadpanédash: —Nuquin Papan madombo icquin penun cuënotebi pete icta cata —capanédash Satanasën Esus chuiquin.

<sup>4</sup> Adoquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanas caic.

<sup>5</sup> Adoshombic, macuësh dapa abucquio yacno Esus buanshun Satanasën badedquio nidaidtedi ismebampanédash. <sup>6</sup> Ismiash: —Nidaidën icquidtedishun icbo icmiaidquio nebi. Abitedi con na nec. Ēmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibédendac. <sup>7</sup> Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmambi —quepanédash Satanas Esus caic.

<sup>8</sup> Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icombo neque. Aidën namiaidquio icta” —quepanëdash Esus Satanas caic.

<sup>9</sup> Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta. <sup>10</sup> Naden dada uapampid iqueque. Tantia. Chuinu.

“Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

<sup>11</sup> Aidombi min taën tsasimbocquid tincanushe qeshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

<sup>12</sup> Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

<sup>13</sup> Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuquin Esus tanun nanuna, quequin ambibi tantianec Esus nianec Satanas nidpanëdash.

*Nasaded yacnoquido Esus bunesabo*

(*Mat 4.12-17; 13.53-58; Mad 1.14-15; 6.1-6*)

<sup>14</sup> Adashic, Nuquin Papan Mayanën tantiamiaidquio iquequi mat-ses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. <sup>15</sup> Adnubic, Nuquin Papan chiaid chuibante shubu utsin-utsinquieced puduedcuenequin Nuquin Papan chiaid Esusën chuibampanëdash. Aden chuisho tantiashe, Nuquin Papan chiaid tantiaquidquio Esus nec, quec cuëdëncuededpanëdash.

<sup>16</sup> Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash. <sup>17</sup> Nidtosho isun Nuquin Papan chiaid Isayas cuëmëdquidën dada uapampid anocquidën Esus menapanëdash. Aden aid meniac sananquin seccudoabanquin isbanec nadec Esus onquepanëdash:

<sup>18</sup> “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Qüënësh nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuquin chuibanta caidquio nebi.

<sup>19</sup> Aidën Nuquin Icbon bëdamboen iste chuibanta caidquio nebi.”

<sup>20</sup> Adec isec onquequin nainshun dada uaid bidicashun menish tsadpanëdash Esus. Adec tsadsho shubu nuntan icquidtedishun bëisbededpanëdash. <sup>21</sup> Adoac: —Nuquin Papan chiaid mimbi tantiaiboed nëbimbobi tauadoec —quepanëdash Esus abibi chiadequi.

<sup>22</sup> Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

<sup>23</sup> Adoaquien: —Bèdamequid yequi abibi daicsambo yanash bédamiadacsho isash, Bèdamequidquio nec, quequin matsesèn tantiapec, quequin chuipampid nec. Èmbi Capednaun yacnoshon nabambocpadomboen nêshuntsen nabansho isun, Nadatiambocquin nabanquid nec, quequin mibitedishun tantiapec. <sup>24</sup> Abimbo chiembique. Tantiata —quiash Esus abi onquec: —Nuquin Papan èmbi tantiamiacpaden chuibanta caidèn abi caniacnoshon chuibansho tantienquiocquid icpec. <sup>25</sup> Èndenquimboshè adomboembidi Nuquin Papan èmbi tantiamiacpaden chuibanta caid Edias cuëmédquidèn chuibansho tantiesa icpampic. Aidi icnubien isadaidbon bènuu chidobo dadpen icpampic. Aido adquid icnubien seta abentsèc chotsècnuc matamec aton pete nibèdquiec yanubi isadaidbon bènuabo bunec tabadpampic. <sup>26</sup> Adec bunec tabadsho isun, Isadaidbon bènuu yacno nidta, quenquiocquin isadaidpembon bènuu yacno pemenuec nidta cac Edias nidshun ambi chiacpadomboen isadaidpembon bènuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsèqui icpampic. <sup>27</sup> Adashic, adecbidi isadaidbo abi daushumbo yacno mishac mishadenquio yachimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidèmbi isadaidbo daushumbocquido bédamenquiocquin isadaidpembon abentsèc Naman cuëmédquid Ediseyon bédamepampic. Èbi bédamepec, quequin tantiec aton nidaid Sidia caid yacnoèsh choacsho Ediseyon Naman bédamepampic —quepanèdash Esus.

<sup>28</sup> Aden Esusèn isadaidpembon nashumpampid chuisho tantiasch iccuededquido isadaidbo comapenec nêishpanèdash. Isadaidpembobèd isadaidbo ictiapimbo iquec, quec iccuededquido nêishpanèdash. <sup>29</sup> Adec nêishash nidanec nuntanuèsh puduenanec shubu ènèdacno nidshun acte dapa quiusudacnombo nebudnuequin Esus buampanèdash. <sup>30</sup> Aden nidmiaquien matses dadpen icquid natusasch Esus nidpanèdash.

*Mayan icsa dapuedaid cuemete  
(Mad 1.21-28)*

<sup>31</sup> Adec abi caniacnoèsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanèdash. Ambo choash chonoadtemaid ushè icnuc Nuquin Papan chiaid chuibante shubun puduedshun Nuquin Papan chiaid chuibanpanèdash. <sup>32</sup> Aden chuiban-sho tantiasch: —Àmbia tantiaquidèn chiacpaden chuibanquidien Esus nechitec —quecuededpanèdash anocquido.

<sup>33</sup> Aden Esusèn chuibanubien Nuquin Papan chiaid chuibante shubu nuntan mayan icsa dapuedaid icpanèdash. Aidi comapenec sidquetanec onquec: <sup>34</sup> —¿Nasaded yacnocquid Esus caid atotsi quec mibi cho? ¿Èbipadquidtedi naimbudmenuecta cho? Èmbi isaid mibi nec. Nuquin Papan bédamboen isaidquio, icsapenquiocquidquio mibi nec —mayan icsan caquien: <sup>35</sup> —Otaquio tabad. Adec tabadec dapueda —Esusèn cac mayan icsan abi dapuedaid tacpanèn nebudec icsa uainquio yec dapuduempanèdash.

<sup>36</sup> Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan

icsabo dapuduenchitequien nec —quepanëdash Capednaun yacnoquido. <sup>37</sup> Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantianëdash.

*Daicsambocquid dadpen Esusën bëdamiaid*  
(*Mat 8.14-17; Mad 1.29-34*)

<sup>38</sup> Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

<sup>39</sup> Simonën nachi yacno choash dayunquio nidtuidéc: —Chumbocquid dauebudta —Esus quenubi badedquio dauebudpanëdash. Adéc dauebudash nidtoshon codocashun Esusbëd icquido pemepanëdash Simonën nachin.

<sup>40</sup> Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. <sup>41</sup> Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantiasun: —Nuquin Papan chomiaid nec, quequin ëbi chiec adéc onquenda —Esusën cac mayan icsa ënëdpanëdash.

<sup>42</sup> Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquio yec ëbëdi tabadta —capanëdash istuidquidon.

<sup>43</sup> Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuéc nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

<sup>44</sup> Aden chiashic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

## 5

*Abëd tabadmenuen chomiaid*  
(*Mat 4.18-22; Mad 1.16-20*)

<sup>1</sup> Adashic chian Quenesadéc caid cuëmambi tabadquin Esusën Nuquin Papan chiaid chuibancho tantiec iccuededquido dadpen tabadpanëdash.

<sup>2</sup> Adnubien masi yacno aton cano daëd nëshun icbon aton nëshaidtedi pambampanëdash. <sup>3</sup> Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededéc tabadshobi cano antsadquin Esusën chuibampanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoaquien: —Icbo, inchëshhëmbi nuëcquid bednuec nëshaid nënebnequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash. <sup>7</sup> Adsho isun abëdtan nuëcquid beduidboedo cuënquin, Cadoec cho, quequin ismiac aido cano



utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icho, ëbëd iquenquio yec nidaneta. Icsambocquid nebique —capanëdash Esus chuiquin. <sup>9</sup> Abëd icquidobëdtan nuëcquid dadpen bedboed tantiadempambo iquéc, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. <sup>11</sup> Aden chi-aquien aton cano acte cuëman nëshanec aton natedi nianec, Esusën chi-acpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid*  
(Mat 8.1-4; Mad 1.40-45)

<sup>12</sup> Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

<sup>14</sup> Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chi-aid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

<sup>15</sup> Adnubien Esusën bëdamesho isquidon Esusën bëdamiaid chuibanac matses dadpen Esusën chiaid tantianuec cho-chopanëdash. Adechidi, daicsambocquido bëdanuec cho-choacsho Esusën bëdamepanëdash. <sup>16</sup> Adashien matses nibëdacnombo nidash Nuquin Papa chiec onquepanëdash.

*Dada shëquëquenquiocquid bëdamiaid*  
(Mat 9.1-8; Mad 2.1-12)

<sup>17</sup> Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuéc Esus icpanëdash. <sup>18</sup> Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi <sup>19</sup> matses tsucus-tsucustsëcquiocsho isash pudedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bédamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

<sup>21</sup> Aden chuisho tantiaish padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bëpiscudquidquio nec —quepanëdash ambibi tantiacpadeq onquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquio yec bëpiscudtequidquio nendac ëmbi chiaidquio bédantequidpenda nedic? Adecbidi, ¿Mibi icsambochoedi mibi bédanoque. Nidtoash nidta, quequin chiaid bédantequidpenda nedic? <sup>24</sup> Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac. Nuquin Papan chuimiaidquio nec mibitedi camenuen dada shëquëquenquiocquid naden chiembique Tanta. Nidtoash nidquin min di buanec nid —capanëdash Esusën dada shëquëquenquiocquid chuiquin. <sup>25</sup> Adoac nidtoshon aton di bedanec Nuquin Papan naboeid chuibanecui aton shubuno nidpanëdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanëdash: —Aden bédamiaid isenquiochoedëmbi nëbimbobi aid isbempombi —quecuededpanëdash.

*Debi, ëbi tsibanec cho, quequin Esusën chiaid*  
(Mat 9.9-13; Mad 2.13-17)

<sup>27</sup> Adashic, capucuenequin Debi cuëmëdquid Esusën istuidpanëdash. Debi nec qeshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac <sup>28</sup> Debi nidtoanec aton natedi nianec Esus tsibananec nidpanëdash.

<sup>29</sup> Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. <sup>30</sup> Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

<sup>31</sup> Aden chuisho tantiaish Esus nadpanëdash: —Ëbi bédamec cho, quenquio bédambocquid iquec. Daicsambocquidien, Ëbi bédamec cho, quendac. <sup>32</sup> Adecbidi, Nuquin Papan bédamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

*Buna mëmunaid*  
(Mat 9.14-17; Mad 2.18-22)

<sup>33</sup> Aden Esusën chuibancho tantiaishun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna

mëmunenquiocquin peshun sicaid actenec —quepanëdash padiseyobo Esus chiec.

<sup>34</sup> Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec. <sup>35</sup> Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

<sup>36</sup> Aden chuibanequi abi Esus onquec: —Dashcute chuca cuëshun dashcute shë nibëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. <sup>37</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. <sup>38</sup> Adembidi, ëmbi ënden tantiauidi tantianu, quequin Nuquin Papan nëbi chiaid pausudtequid bëda tantiauidquid yanec ic-sabudendac. Mibi adquid iquec, quequin tantiaquin utsi chiacbimboen Esusën padiseyobo chuipanëdash. <sup>39</sup> Adashic ambi ënden chiaid tantienquiochoedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

## 6

### *Chonoadtemaid ushë tantiaquid*

(*Mat 12.1-8; Mad 2.23-28*)

<sup>1</sup> Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchichshun abëd icquidon bitsi tsucucashun pebededpanëdash. <sup>2</sup> Aden pesho isquin padiseyobon: —¿Atotsieshun chonoadtemaid ushën chonoadpeque? Tantianu. Èbi chui —capanëdash Esusbëd icquid chuiquin.

<sup>3</sup> Adoaquien: —¿Tsusedpa Dabid caidbëd icquidon piasquin pepampid tantiamboda ique? <sup>4</sup> Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: <sup>5</sup> —Èbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchichshun bitsi tsucucasho isash: Mimbi icsamboen naic, quetiapimbo iquebi.

### *Mëuesadaid bëdamiaid*

(*Mat 12.9-14; Mad 3.1-6*)

<sup>6</sup> Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup> Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnun, quequin padiseyobon caimbededpanëdash. <sup>8</sup> Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

<sup>9</sup> Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid

ushë nëid neque? ¿Mibi nëbi bēdametiapimbo iquebi, quequindambi chuipe? ¿Adoac daicsaid utsi-utsiec unēssec? —quepanēdash Esus.

<sup>10</sup> Aden chuishumbic iccuededquido isbanquin: —Ēbi mēd —cac Esus mēdequi mēuesadaid bēdampanēdash.

<sup>11</sup> Adec mēuesadaid bēdansho isashien comapenec nēishash: — ¿Mitsipadentsimbi Esus acpe? —quec onquecuededpanēdash abi chieshēnquido.

*Esusën, Ēbi chuibeneta, caido*

*(Mat 10.1-4; Mad 3.13-19)*

<sup>12</sup> Adashic, ushë utsin macuēsh yacno matses nibēdacno Nuquin Papa chiec onquenuec nidash inchēshēn ushenquoio yec Nuquin Papa chiec Esus onquepanēdash. <sup>13</sup> Badiadshun abēd icquido dadpen chomeshun, Ēbi chuibeneta, quequin 12tedictsēqui chuipanēdash. <sup>14</sup> Nēidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; <sup>15</sup> utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; <sup>16</sup> utsibic, Udas, Acobon mado; utsibic, Udas Iscadiote, yuecshun Esus chieshēnquido Esus bedmequid. Aidtedi, Esusën, Ēbi chuibeneta, caido icpanēdash.

*Nuquin Papan bēdamboen isaido icnuc ambi icsamboen isaido*

*(Mat 4.23-25; 5.1-12)*

<sup>17</sup> Adashic macuēsh yacnoēsh abēd 12ted icquido pada-padambo yacno budash abi tsibanquido dadpen icsho isash Esus nīdtuidpanēdash. Nēidted icpanēdash: Nēidic, Edusaden yacnoēsh choquido; utsibic, Acte Dapa cuēman shubu dadpen icquid Tido caid yacnoēsh choquido; utsibic, Sidon caid yacnoēsh choquido. Aido Esusën chuibansho tantianuec cho-choash tabadnubi, Ēbi bēdamepec, quequin tantiec utsibo choash tabadpanēdash. <sup>18</sup> Adec choquido mayan icsa dapuduedaid icsho isun Esusën dapuduemepanēdash. <sup>19</sup> Adsho isun nadatiambocquid Esus neque. Mishnu, queshun mishequi bēdancuededpanēdash.

<sup>20</sup> Adshumbic abēd icquidombo isbanquin naden Esusën chuibampanēdash:

—Nēmo mibi icnuc mitsana nibēdtenesho isun Nuquin Papan bēdamboen isaido iquec abuc nidan con natedi mitsana nendac.

<sup>21</sup> “Nēuēshquoio bundodenesho isun Nuquin Papan bēdamboen isaido yec abuc ēbēd tabadec bundoesa iquendac.

“Nēuēshquoio matses Nuquin Papan chiaid tantiesa icsho isash unēsquoio yec shubidednequid Nuquin Papan bēdamboen isaid yec abuc nidash ēbēd tabadec bēdambo iquebi quependac adquido.

<sup>22</sup> “Esus tantiaquid icsho chieshēnquin pudued cainquoio yaid adembidi mua uaquin chuishunaid Nuquin Papan bēdamboen isaidquoio nec.

<sup>23</sup> “Adomboembidi ěmbi ěndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaidēnshun adoaid iquec Nuquin Papa yacno choacsho ambi bēdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

<sup>24</sup> “Padnuen, con na dadpen iquec, quequin tantiec bēdamboec tabadebi, quesho Nuquin Papan icsamboen isaido mibi nec. Nidaidēnshun mimbi bedteniaiduidi tantiec Nuquin Papa yacno

puduedtiapimbocquid mibi iquendac. Nidaidèn bēdamboec tabadquin ènden bedondaidi mibi nec.

<sup>25</sup> “Nidaidènshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bēdambo iquebi, quec mamēnec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bēdambocquid nec, quequin mibi dadpeshun chuïsho tantienda. Adomboebidi mua uain Nuquin Papan èndenquimbo chuïmiaïdpembon chuïpampic. Aidon chiaïd tantiashun tsusedpabon Nuquin Papan chiaïd tantienguïo yanampic. Adquido Nuquin Papan icsamboen isaïdo nec —quepanēdash Esus.

*Mibi uïmanēnquïdo tantiaquin nabanta, quïaid*

*(Mat 5.38-48; 7.12)*

<sup>27</sup> Aden chiashic abi Esus onquec: —Èmbi chiaïd tantiaquïdquïo nadiqueque. Chuïnu. Tantiata. Mibi chïeshēnquïdo bēdamboen tantiaquin nabanta. <sup>28</sup> Adembidi mibi icsamboen chuïquïd bēdamboen chuïta. Adembidi, èbi icsamboen naquïdo bēdamboen tantiaquin cuidenda, Papa, quequin Nuquin Papa chuïta. <sup>29</sup> Adembidi mibi cuesquïd cuidenda. Adembidi mibi icsamboen nadenesho cuidenquïocquin adembï bēdamboen nabanta. Adembidi ampequin min dashcute bedanec nidsho isun, Chiata. Dadamicquïdtsen buan, cata. <sup>30</sup> Utsibic, aton na nibēdquïd, Bec cho, qesho meneta. Adembidi utsin mitsana ampesho isun cuidenquïocquin bēdamboen naoata. <sup>31</sup> Adembidi èbi bēdamboen nashuntïadquïdï nepec quequin mimbi tantiacpadomboen utsi tantiaguïn nashunta.

<sup>32</sup> “Èbēd tantïananquïduïdï tantïanu, quec ¿bēdamboda mibi icpe? Padenquïo. Adembidi Esus tantïesan abïpadquïocquïdo tantiec.

<sup>33</sup> Adecbidi, Èbi bēdamboen tantiaquin nashunquïduïdï tantiaquin nashunoanu quec ¿bēdamboda mibi icpe? Padenquïo. Esus tantïesan adembidi nashunquïdquïo nec. <sup>34</sup> Adecbidi, Èbi menequïduïdï menenu, quec ¿bēdamboda mibi icpe? Padenquïo. Esus tantïesan adenuïdï menec.

<sup>35</sup> Naden nata, quequin chuïnu. Tantiata. Mibi chïeshēnquïd icsho aid tantiaquin bēdamboen nabanta. Adembidi mibi meniantïapimbocquïd, Bec cho, qesho, Yucash cuidnanun nanuna, quenquïocquin meneta. Mimbi adoshï isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquïdo Nuquin Papan nacpadomboen nabanquïd nendac. Adquïdo aton mado iquendac. <sup>36</sup> Nuquin Papan abi chïeshēnquïdo nashundenïacpadomboen mibi chïeshēnquïdo nashundeneta —quepanēdash Esus.

*Icsambocquïd nec, quequin chienda, quïaid*

*(Mat 7.1-5)*

<sup>37</sup> Aden chuïbanashic Esus abi onquec: —Èmbi tantiacpadomboen naisa icsambocquïd nec, quenda. Adesa abi yacno choacsho Bēdambocquïd neque. Puduedme, Nuquin Papan caïndac. Adecbidi, Icsambocquïd iquec. Aid cuidtiadquïdï Nuquin Papa nec, quenda. Adenquïo icsho Nuquin Papan cuidenquïoctequïd mibi iquendac. Mibi icsamboen tantiaquin utsin nashï isash cuidnanenquïo yec

bèpiscudta. Adquid, Cuidnu, quenquo yec mimbi icsamboen tantiaquin naid Nuquin Papa bèpiscudendac. <sup>38</sup> Aton na nibèdquid bédamboen tantiaquin meneta. Adembidi, mibi tantiaquin abi utsibèd bédamboec tabadtequid Nuquin Papan mibi menendac. Utsi tantiaquin mimbi meniactpadomboen mibi tantiaquin bédamboen tabadmetequid daèd uashun Nuquin Papan mibi meneoaindac —quepanèdash Esus.

<sup>39</sup> Aden chuishumbic utsin tantienquo ictequid abèd icquido naden Esusèn chuipanèdash: —¿Podquedèn nidnu quec bèshuaid utsi bëyucampecta nidtic? Nidnu, quianec nidec abi daèdi nidaid shècuè ampaèdpatsiash. <sup>40</sup> Adembidi tantianuequidèn abi tantiamequid dèniactiapimbo iquec. Tantiamiac abi tantiamequidpadquid iquendac —quepanèdash Esus.

<sup>41</sup> Adoshombic adembi tantiamequin naden Esusèn chuipanèdash: —¿Atotsi quiash utsi bètsiadaid pistsècquid isequi mibi bètsiadaid dapa isadtiapimbo icpec? ¿Mibibi bètsiadaid dapa bèbedadabicquin mitsipadentsi mimbi utsi bètsiadaid pistsècquid bedshunuen ispe? <sup>42</sup> Adembidi, utsin tantiaid icsa abentsèc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ènta, quequin utsi chuipe? Mimbi tantiaid icsa nibèdacimboen mimbi chuipeque. Adoenda. Mimbi tantiaid icsa ènshun utsin tantiaid icsa icsho isun èmenuequin chui —capanèdash Esusèn.

*Cuète abipadquid aton bacuè nec, quequin chiaid*  
(Mat 7.17-20; 12.34-35)

<sup>43</sup> Adoshombic, adembidi Esusèn chuipanèdash: —Cuète bédan bacuè adquiobidi bacuèec. Cuète icsan bacuè adquiobidi bacuèoaic. <sup>44</sup> Chetequid isun cuète dada matsesèn tantiec. Aden tantiec nisanquidèn bacuè isash, Dadain bacuè nec, quenquo matses iquec. Adecbidi, echo bacuè isash, Bata nec, quenquo matses icoaic. <sup>45</sup> Adembidi bédamboen tantiaquidèn ambi tantiacpadomboen utsi bédamboen tantiaquin nabanendac. Adecbidi ambi tantiacpadec bédamboec onquec. Adembidi icsamboen tantiaquidèn ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanèdash Esus.

*Tantiaquidquo icnuc tantiauidquid nec, quequin chiaid*  
(Mat 7.24-27)

<sup>46</sup> Adoshombic: —¿Atotsieshun, Con Icbo mibi nec, queshumbi èmbi chiacpadomboen naisa mibi ne? <sup>47</sup> Èbi yacno choshon èmbi chuibansho tantiaquiash nidshun nadomboen naquidquo iqueque. Chuinu. Tantiata. <sup>48</sup> Cunquequid dapan chimeshnushe queshun shubu uaquidèn shècuè èquèduc uèdèshcashun buintad nitsinquid. Adembidi, nati- amianquiec cametequid yanabicnuc tantesa uainquiocnuen èbi tantiaquidquo icquin èmbi chiaid papuduedshun adomboembidi nabanquid nec. Adquidèn tantesa uainquo iquendac. <sup>49</sup> Utsibic nad iqueque. Tantia. Èquèduc uèdèshcabi nitsinaid cunquequid dapan chimeshunendac. Adecbidi, èmbi chiaid papudueduidsacpadomboen nabanenquo yec natiamanquid chonoc abi papudueduidsaid bèpiscudendac. Adquid uquè nèsecatequid nendac —quepanèdash Esus.

## 7

*Sondado chuiquidën tantiaid**(Mat 8.5-13)*

<sup>1</sup> Aden iccuededquido chuiquin nainash Capednaun caid yacno Esus nidoapanëdash. <sup>2</sup> Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadsëcquoio icpanëdash. <sup>3</sup> Aton yua unëstiadsëcquoio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

<sup>4-5</sup> Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadsëcquoio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bédametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adec aidobëd Esus nidshobi sondado chuiquidën chomiaid utsibo choquin bëquedtuiddash nadpanëdash: —Sondado chuiquidën chomiaid nebi. Aidën chiaid chuinec chopobi. Naden chuita, caposhi: “Padicnuna, Icbo. Icsambocquid nebique. Mibi bédambocquid iquec con shubun puduedenquioctiadquidi mibi nec. <sup>7</sup> Èbi icsambocquid iquec mibi bëquedec nidenquiocobi. Mibi bédamequid yec con shubun puduedenquiocquin mibi yacnoshombi, Bédanta, mimbi cac con yua bédampec. <sup>8</sup> Èbien sondado chuiquid nec. Èmbi nidta cacpadquiequi sondado nidec. Adecbidi, Cho, èmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuiipombi —quepanëdash sondado chuiquidën chuitan caido Esus caic.

<sup>9</sup> Adoaquien: —¿Abimbobida cai? —qeshun ambi chiaid tantiamenuequin iccuededquido Esusën bësbanquin nadopanëdash: —Chuinu. Tantiata. Sondado chuiquid isadaidpembo ëbi tantiaquidpadquid isadaidbo nibëdec —quepanëdash Esus. <sup>10</sup> Aden chiaquien sondado chuiquidën chuitan caido auchbidi nidoash shubun puduedshun sondado chuiquidën yua bédamiaid istuidpanëdash.

*Nianten mado uincuen uaid*

<sup>11</sup> Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. <sup>12</sup> Adec nidequi Nain tsasi uaid quënë shëcuë anoentsëqui choquimbi unësaid bëquido bëquedtuiddash. Unësaid epa icnubi ani niantë icpanëdash. Niantebëd Nain yacnocquido dadpen chochopanëdash. <sup>13</sup> Adec cho-choec niantë shubisho isash Esus unësquio yec: —Shubienquio yec ënëd —quepanëdash. <sup>14</sup> Adec, Ènëd, quetanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuidsho isun: —Abuido, uëtsëdtota —cac <sup>15</sup> uëdtsëdtoash tsadec unësboed onquepanëdash. Adsho isash ani caic: —Në, unësboedi min mado uincuenoshe. Abëdi nidec nid —capanëdash Esusën.

<sup>16</sup> Aden unësaid uincuenesho isash cho-choquido: —Adopeshenda uincuemec —qeshun Nuquin Papan naid chuibampanëdash. Aden

chuihanec: —Nuquin Papan matses bédamboen isnuen ambi chomi-aidquo nuquibéd icmiosh —quec isquido onquecuededpanédash.

<sup>17</sup> Aden isash nidshun unésaid uincuemiaid isquidon chuibansho isadaidbon nidaid Udeya caid yacnocquidon tantiabempanédash. Adem-bidi chiac dëuequidontsen tantiapanédash.

*Ëbitedishun cainaid mibi nec, quequin Uanën chiaid*

*(Mat 11.2-19)*

<sup>18</sup> Adnubien, acten mentoanondaid Uan cuëmédquid quënën nauedaid icsho abéd icquidon Esusën nabanaid chuibampanédash. Adoquien abéd icquido daéd chomeshun Uanën nadopanédash: <sup>19</sup> —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daédi Esus yacno nidpanédash.

<sup>20</sup> Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanédash Uanën chomiaido Esus caic.

<sup>21</sup> Aden chiaquien icsambocquid bédamequinc, mayan icsa dapuduedaid dapuduequinc, bëshuaid bédamequinc caquin Esusën ismebampanédash. <sup>22</sup> Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unésaid uincuemiosh. Adembidi aton na nibédquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ëmbi aden nabansho isun tantesa uainquiocquin Nuquin Papan bédamboen isaidquo nendac, Esus quiosh quequin Uan chuitanta —quepanédash Esus Uanën chomiaid daéd chiec.

<sup>24</sup> Adashic, Uanën chomiaido nidambi iccuedquido tantiamebanuec Uan chiec Esus nadpanédash: —¿Atotsi isnuec matses nibédacno nidonda? ¿Cunquequidën ishcunaid isnuecta niddionda? <sup>25</sup> ¿Aid isnuec nidenquo yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquo. Dashcute ushumbocquid dasiuidquido aton na dadpenquo icquido ancanquid dapan shubun tabadquido nec. <sup>26</sup> Ad icnuc, ¿atotsi isnuec matses nibédacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibédacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. <sup>27</sup> Ëbi cain naden Uan Nuquin Papan chuimiampid nec: “Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

<sup>28</sup> “Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibédec. Aidën ëbi chotequid chuibanac choshon ëmbi nabansho isenquo icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanédash Esus.



<sup>29</sup> Aden Esusèn chuibansho tantiash: —Nuquin Papan naid bēdambo iquec —quepanēdash Uanēn mentobanondaido. <sup>30</sup> Utsiboen ambi tantiaid icsa ēnenquo icquin Uan Esusèn chuisho tantiash, Nuquin Papan naid bēdambo iquec, quetiapimbo aido icpanēdash. Aido padiseyobobēd matsesèn naden nata quequin chiaid tantiaimequido icpanēdash.

<sup>31</sup> Aden Uan chiash Esus: —¿Nuquin Papan chiaid nēbi chuisho tantiesa mitsipadquid nepeque? <sup>32</sup> Adquid chuinu. Tantia. Ambi tantiacpaden naisa icsho isash bacuēbo yacimboec nēishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidēn Nuquin Papan chuimiaidēn nabansho icsamboen ispec. <sup>33</sup> Nua cubudquin pesa Uan icsho isash, Mayan icsa dapuduedaid nec, queposh Uanēn chuisho tantiesa. <sup>34</sup> Ēmbi peshun acsho isec, Nua peshun tantienquiocquin acquid nepec. Aidbidi icsambocquidobēd icquid nec, ēbi caposh. <sup>35</sup> Aden tantienquiocquid, Bēdamboen tantianu, queshun bēdamboen tantiaquidēnquo chuibansho tantiash abi tantiaimequidpadquid iquendac —quepanēdash Esus.

### *Chidon Esus tanoshcaid*

<sup>36</sup> Adashic, Ēbi yacno pec cho, padiseyobo abentsēcshun cac aiddēd nidash shubun puduedash pete santen cuēshnudash Esus uepanēdash. <sup>37</sup> Adec Esus puduedash uesho isquidon chiac utsin, Icsambocquid nec, caid chido choquin noadte bēda danoshquete aton shubumpichobi bēpanēdash. <sup>38</sup> Aden bēequi Esus yuedacno choash puduedshun abi bēdamequid Esus istuidash, Ēbi bēdamequid bēdambo iquec, quequin ambibi tantiec shubiec Esusèn taēno tsadbudshun aton bēunēn tapascapanēdash. Aden tapascac taē chucusho isun aton manēdaidēn taucshun taē tachocabanshun noadte bēdan chidon tanoshcapanēdash. Chidon aton na bedtequid dadpen menequin comapenec noadte bēda bedshun Esusèn taē tanoshcapanēdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ēmbi yuedaid Nuquin Papan chuimiaid iquec, Ēbi mishquid icsambocquid nec,” quequin chido mishmenquo icpec, quepanēdash Simon.

<sup>40</sup> Adoaquien, tantiaquidquo icquin Esusèn: —Mibi tantiaimequin chuinu. Tantiata, Simon —capanēdash.

Adoaquien: —Aden chuiban. Ttianu —quepanēdash Simon.

<sup>41</sup> Aden tantiashun Esusèn Simon ambi tantiaid icsa tantiamenuen utsi chuiquin nadopanēdash: —Bec cho. Yuecshun menenun nanuna, quepondash daēd. Abentsēcshun dadpen bedshunubi utsin daēdpectsēc bedshumpondash. <sup>42</sup> Aden bedshunshun yuecshun ambi bedshunacted abi daēdi meniantiapimbo icpondash. Adsho isun: “Padi. Mimbi bedondaaid ēbi cuidenda,” quequin abi bedshunēdaidēn abi daēdi chuipondash. Adoacsho, ¿Mitsiquid abi bedshunēdaid ēnenquiocquin tantiec bēpiscudenquo icpec? —quepanēdash Esus Simon caic.

<sup>43</sup> Adoaquien: —Ambi dadpen meneshun cuidenda caidien nechitec —quepanēdash Simon.

Aden chiaquien: —Ai, bēdamboen tantiaquin mimbi chioc —quiash <sup>44</sup> Simon ismenuec Esus chido yacmi bidiadshun naden chuipanēdash: —Min shubun puduedacsho mimbi taē pante ēbi menenquioccoc. ¿Nēid chido isquindactio? Aidēmbien aton bēunēn taē chucu uashun aton manēdaidēn con taē bēchishaid ucposh. <sup>45</sup> Min shubun ēbi puduedsho isun tanchocanasa mibi nec. Padnueni ēbi puduedacsho isun nēid chidon

ëbi tantiaquioquin yuen con taë tachoccaniosh. <sup>46</sup> Bëchin manosh-canesa mibi iccoc. Padnueni nëid chidombi noadte bēdan tanoshcaniosh. <sup>47</sup> Adembidi mibi chiembique. Tantiata. Mayan icsa dadpenshun tantiamiaid icsho nëid chido bēdamepombi. Aden bēdamiashic abi icsaid tantienquo yec bēpiscudpobi. Ēmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daēdpactsēc mibi icsaidtedtsēcibidi icpec. Adquid icsaid bēpiscudebi ëbi quenuc ëbi bēdiactsēc tantiatsec mibi nashumēnec —quepanēdash Esus Simon caic.

<sup>48</sup> Aden Simon chiashic chido caic: —Icsaquid nec, quenquiocquin icsainquo yac bimboecquid mibi isembi —quepanēdash Esus chido chuioaic.

<sup>49</sup> Adsho tantiash: —Icsainquo yac bimboecquid mibi isembi, quec ġmitsipadquid Esus nepec? —quepanēdash iccuededquido. <sup>50</sup> Aden iccuededquidon tantianubi chido caic Esus: —Ēbi tantiaquid yec Nuquin Papa yacno puduedquid mibi neyoc. Bēdamboec tabadaid tantiamiaid mibi iqueque. Dacuēdenquo yec nidta —quepanēdash chido caic.

## 8

### *Chidobo abi nashunquido*

<sup>1</sup> Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsēqui yac bimboec nidaidēn tabadaid chuibenepanēdash. Abi bēdamequid tsibananec chidobo nidpanēdash.

<sup>2</sup> Ambi mayan icsa dapuduemiaidobēdtan ambi bēdamiaidon Esus tsibanampanēdash. Madia, Macada yacnoshon tishaid chedon Esus tsibanampanēdash. Mayan icsa 7ted dapuduemiaid Madia icpanēdash. <sup>3</sup> Abēd nidquid utsi Uana icpanēdash. Aidēn bēnē Chusa cuēmēdquid, ancanquid dapa Edodesën shubu nuntan nacnemequid icpanēdash. Abēd nidquid utsibic, Susana icpanēdash. Chido utsibo dadpen Esusbēd capucuenepanēdash. Aidon aton na dadpen icnuc Esusbēd icquidon aton na nibēdsho isun menebampanēdash.

### *Pete ëshē sequid*

(*Mat 13.1-23; Mad 4.1-20*)

<sup>4</sup> Aden chuibenias tabadtuidtsēcubi ambi chuiquin tantiambeodo cho-choquin tsibanampanēdash. Cho-chosho isun, Mibibimboecnuc chiemi, quenquiocquin Esusën nadopanēdash: <sup>5</sup>—Tiedēn caniquid pete ëshē sianuec aton tied yacno nidquid icbo. Adec nidshun tiedēn caniquid pete ëshē secabanac maisec utsi-utsiec podqued nantan paēdacsho mat-sēsēn manenubi utsi-utsien uicchunēn chec. <sup>6</sup> Utsibic, cuēnote dadpen samēdacno secac badedquio dēyucuidtsash nidaid ēquēduc tapun nidenquo iquec bidiquequid. <sup>7</sup> Utsibic, nisanquid dēyucacno secac aidbēdi dēyucash canidouidsacsho nisanquidēn bētīnac unēsquid. <sup>8</sup> Utsibic, nidaid bēdan secac dēyucash canias dadpen ëshēendac —quepanēdash Esus.

Aden chuibanashic: —Tantiate bēdambocquidēn ěmbi chuiboed tantiapec —quepanēdash.

<sup>9</sup> Adoaquien: —ġMitsipadquid tantiaid mimbi chuiboed icpec? Ēbitedi tantiamequin chuioa —capanēdash abēd icquidon.

<sup>10</sup> Adoaquien: —ġMitsipadequini Nuquin Papa yacno tabadpe? queboedēmbi nēbi mimbi tantiabenecc. Padnuen utsibon tantienquo yaid aid iquec. Aden chiac:

“Ĕshĕ bĕdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bĕdambocquid icquimbi tantiesa icquin ma abimbo chiaid tantienquiocpanuna”

—quepanĕdash Esus.

<sup>11</sup> Aden chiashic: —Ĕmbi chuiboed nad iqueque. Tantia. Chuinu. Tiedĕn caniquid pete ĕshĕ icbon siaidbimboecquid Nuquin Papan chiaid nec. Ĕshĕ siacno nidaidbimboecquid matsesĕn tantiate nec. <sup>12</sup> Podquedĕn nidaid tsasimbocquidbimboecquid nad iquec. Nuquin Papan chiaid tantiaŝ papuduedtiapimboesho Satansĕn bĕpiscudmiaid adquid nec. <sup>13</sup> Cuĕnote dadpen samĕdacno nidaidbimboecquid nadquid iquendac. Nuquin Papan chiaid tantiaŝ, Bĕdambo iquebi, quiashic natiamianquiec cametequid icnuc aid tantiec Nuquin Papan chiaid papudueduidquid iquendac. <sup>14</sup> Nisanquid dĕyucaid dadpen yacno nidaidbimboecquid nad iquec. Nuquin Papan chiaid tantiaŝ abi bunaid, abi nĕnaid, ambi natequid adquid tantiaquin Nuquin Papan chiaid bĕtashacimboec icnuc bĕdamboec tabadaid ismesa yampec. Aden bĕdamboec tabadaid ismesa yanuc utsin Nuquin Papan chiaid tantiatiapimbo iquendac. <sup>15</sup> Nidaid bĕdabimboecquidien nad iquec. Nuquin Papan chiaid tantiadonec bĕdamboec tabadquin utsi ismequidquio nec. Adquid natiamianquid chonoc tantesa uainquiocquin ĕnenquiocquin ismendac. Aden ismiac Esus tantiaquid utsi dadpen yampec —quepanĕdash Esus ambi chuiboed abĕd icquido tantiamenuc.

*Tabote nĕnantan nanac chĕnquiacbimboecquid*  
(*Mad 4.21-25*)

<sup>16</sup> Aden chuishumbic naden Esusĕn chuioapanĕdash: —Tabote taboshon matsun bĕtashesa. Adembidi tsadte tĕdion tabote nanesa icbo nec. Ma ĕmbi yuedaidon isnueshun nĕnantan tabote nanquid. <sup>17</sup> Adomboembidi mibi ompoquin chuibanaid Nuquin Papan ompoenquiocquin chuibanendac. Adomboembidi mibi tantiamenquio yaid aidĕmbi chuibanendac. <sup>18</sup> Ad icnuc ĕmbi chiaid bĕdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bĕdamboen tantiambi, qeshun papuduedmenquiocquin bĕdamboen ismesa nec. Aden ambi tantiauidaĭd uesadendac —quepanĕdash Esus.

*Aton utsibo aton titabĕd choaid*  
(*Mat 12.46-50; Mad 3.31-35*)

<sup>19</sup> Adashic, Esus isec aton utsibobĕd aton tita chopanĕdash. Chochoshon matses dadpen nuntan tabadsho isun, Ĕbi choaid chuita, cac <sup>20</sup> shubun puduedshun: —Titabĕd min utsibo choshon umanucshun mibi cainec mibĕd onquete bunquin —capanĕdash Esus chuiquin.

<sup>21</sup> Adoquien: —Adquid chuinu. Tantia. Nuquin Papan chiaid tantiaŝhun nabanquido ĕbĕd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanĕdash Esus.

*Acte tĕccoasquesho ĕnĕdmiaid*  
(*Mat 8.23-27; Mad 4.35-41*)

<sup>22</sup> Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ushtopanëdash. Adec ushnuvien cunquequid dapa comapenec cunquenubi acte tēccoasquequidēn acte uemiac cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: —Nuqui mentoadequē. Isucun, Icbo —quec comapenec cuëdpanëdash abëd icquido. Adsho tantiash isucunash niddtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tēccoasqueque. Ënëd —Esusën cac badedquio acte tēccoasquequid ënëdoapanëdash. <sup>25</sup> Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tēccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduemequin bëdamiaid  
(Mat 8.28-34; Mad 5.1-20)*

<sup>26</sup> Adshumbic, acte tēccoasquec ënëdan nidaid Cadidia yacno chian cuëma utsiuc Esusbëd icquidon poteoaic nidaidëmpi Cadada caid yacno aido nidpanëdash. <sup>27</sup> Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien <sup>29</sup> mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

<sup>30</sup> Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoaquien: —Sinco midted dapuduedondaid nebi —quepanëdash mayan icsa dapuduedaid onquec. <sup>31</sup> Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic <sup>32</sup> chanco dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac <sup>33</sup> dapuduenequi chanco mayan icsa dadpen dapuduedash acte quiusudacno chanco comapenec niqec chian pudun-pudunec mentoadbudnec nibëdquiec unësbunepanëdash.

<sup>34</sup> Adsho isash chanco pemequin isquido titinquianec shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapuduemequin bëdamiaid isquidon ambi isboed dacuëdquido

chuiapanëdash. <sup>37</sup> Aden chiac: —Nëuëshquio nidenquio icpec — quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapuduequid bëdamiaid Esus chiec.

<sup>39</sup> Adoquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduequid bëdamiaid nidanec aton shubu yacno choshon anocquidtedi Esusën naid abi mayan icsa dapuduequid bëdamiaid chuibanoapanëdash.

*Chido intac budaid bëdanaid icnuc champi uincuemiaid*  
(Mat 9.18-26; Mad 5.21-43)

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> — Con champi abentsëc tishaid unësanekuidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquid bëdampanëdash.

<sup>45</sup> Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otac-quo tabadcuëdedpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

<sup>46</sup> Adoquien: —Matses abentsëcshun ëbi mishosh. Èmbi nadatiamboc-quin natequid bëuesadtsac —quepanëdash Esus.

<sup>47</sup> Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoquien: —Mimbi tantiacpadquiec mibi bëdanaye. Dacuëdenquio yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantimequid min shubuno nidnunda —capanëdash abi yacnoësh choquidon Aido chuiquin.

<sup>50</sup> Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

<sup>51</sup> Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aited buanec Aido

cuëmédquidèn champi yacno Esus puduedpanédash. <sup>52</sup> Ambo puduedshun anocquido unèsquio yec shubisho tantiashun: —Mibi shubieque. Ënédta. Champi unèsenquio yec usheque —capanédash Esusèn.

<sup>53</sup> Adsho tantiashun, Champi unèsacsho isombi, quequin Esus tantienguiocquin shubiquidon mamènshumbededpanédash. <sup>54</sup> Mamènshumbedednubi Esusèn Aïdo cuëmédquidèn champin médante mēdinquin: —Nidto, champi —comapenen cac <sup>55</sup> aton tiboedte unèsabi yec champi badedquio nidtopanédash. Champi nidtoshō isash: —Peme —quepanédash Esus. <sup>56</sup> Aton champi nidtoshō isash: —Adopenshenda iquec —quepanédash ani amēbēdi.

Adoaquien: —Mimbi isboed chuibanenda —quepanédash Esus.

## 9

*Esusèn ēbi chuibeneta, quequin ambi nidmiaïdo*  
(*Mat 10.5-15; 14.1-12; Mad 6.7-29*)

<sup>1</sup> Adashic ambi ēbi chuibeneta caïdo 12tedtsēqui chometanquin Esusèn nadopanédash: —Ëmbi nadatiambocquin nabanacpaden mibitedishun nabanendac. Mayan icsa dapuduemequinc daicsaïdo bēdamequinc cain mibi capucueniacnoshon mimbi ismebenendac. <sup>2</sup> Nēbi mibi nideque. Adec capucuenequin chuibenequimbi bēdamebeneta. <sup>3</sup> Nidquin cueste uidèn nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. <sup>4</sup> Adec nidash mibi yuedquidèn shubun puduedshun ëmbi chiacpadomboen nabanec anouidi tabadta. <sup>5</sup> Mibi nidacno mibi yuedquid nibēdsho isun naden nata. Mimbi tantiaïd icsa mibibi cuidadte nec, quequin nidaïd putu tasequequin ismeta —capanédash Esusèn abēd icquido chuiquin.

<sup>6</sup> Aden chiac nidash abēd icquido abi yuedacno puduedash tabadquin Esusèn chiacpadomboen Nuquin Papabēd tabadaïd chuibanquimbi daicsaïdo bēdamebenepanédash.

<sup>7</sup> Adnubien Esusèn nabansho isquidon Edodes chuibampanédash. Edodes Cadidia yacnocquido ancaquid icpanédash. Aden Esusèn nabanaïd chuisho tantiashun, ¿Tsdain nepec? Edodesèn caquien,

Acten mentoanondaïd, Uan cuëmédquid uincuempash icnui, quenubien; <sup>8</sup> Edias Nuquin Papan ambi chiaïd chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanédash, quequin chuipanédash Esusèn nabansho isun chuiquidon Edodes tantiamequin.

<sup>9</sup> Adoaquien: —Mambi uincuentiapimboconoc Uan mapi budtemiondac. ¿Tsdain ëmbi tantiacmaidquio adobanquid icpec? —quiashic Esus iste bumpanédash Edodes.

*Matses dadpen pemiaïd*  
(*Mat 14.13-21; Mad 6.30-44; Uan 6.1-14*)

<sup>10</sup> Adashic ambi nidmeboedo Esus yacno padpidec choapanédash. Choashumbic ambi nabamboedtedi chuibampanédash. Aden chuibansho tantiash Esus abēd icquido bēyucanec shubu dadpen icquid Betsaïda caïd anoentsēqui nidpanédash. <sup>11</sup> Aïdo nidsho isun cho-choquidon tsibanampanédash. Adsho isun Esusèn Nuquin Papa yacno tabadaïd chuibanquimbi daicsaïdo bēdamepanédash.

<sup>12</sup> Adashic ushë budtsan Esusbëd icquidombo Esusën dayunquo choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icsho isunda cho-choquidtedi pemenuëquin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanenquo icquimbi dadauidquo, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen tabadmepanëdash. <sup>16</sup> Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdamboquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

*Chuiquid dapa abentsëcquiobi iquec, quiaid*

(Mat 16.13-19; Mad 8.27-29)

<sup>18</sup> Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquo yec Quidistu caid ma mibi neyoc —quepanëdash.

*Abi unëste chiaid*

(Mat 16.20-28; Mad 8.30-9.1)

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. <sup>22</sup> Aden comapenen chiashic Esus: —Ëbi mat-sesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaimequido yec quec aidedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquo nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquo iquendac adquid. Nidaidën tabadaiduidi tantiaquid iquec Nuquin Papa yacno nidenuo iquendac. <sup>24</sup> Cuesunenu cac unësmene quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenquo iquendac. Utsibo, Esus

tantiaquid nebi, quiashic abi cuesunenuequid icnuc adecbidi Esus tantiaquid nebi, queoapec. Adquid unēsash Nuquin Papa yacno tabadendac.<sup>25</sup> ¿Atotsieshun Nuquin Papa yacno tabadaid tantienquo yec nidaidën bēdamboec tabadnuequin bedted-bedtede? Mimbi bedaidënquo Nuquin Papa yacno puduedtiapimbo mibi iquec.<sup>26</sup> Esusbēdtabi ambi chiaid tantiaquid nebi nidaidēnuēsh quetiapimbocquid icsho adquidi ěmbi tantiaid nec, queoatiapimbo iquendabi con pa yacnocquidtedishun tantianubi.<sup>27</sup> Nad iquendac. Tantiaquiota. Chuinu. Ębi tantiaquid dadpen yansho ěnabicquid utsin-utsinquien isendac —quepanēdash Ęsus.

*Esus bed-bedquesho istiapimbo yaid*

(*Mat 17.1-8; Mad 9.2-8*)

<sup>28</sup> Aden chiashic Esus mēdante utsiuc tauadoec ushash Nuquin Papa chiec onquenuc macuēsh yacno nidoapanēdash. Petedo, Uan, Acobo aited buanec macuēsh yacno Esus nidpanēdash.<sup>29</sup> Adec macuēsh yacno nidash Nuquin Papa chiec Esus onquenubi aton bēsbed aton dashcutebēdi nac-nacquo ushē chēnquiabimboec icpanēdash.<sup>30</sup> Adsho isnubien badequid dada utsi daēd choash adquiobidi Esusbēd nidec. Nēidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid.<sup>31</sup> Aid daēdi Esusbēd tabadquin Nuquin Papan tantiampicpadec Edu-saden yacnoshon Esus unēs uate ushē chiec onquecuededpanēdash.<sup>32</sup> Adnubien Esusbēd choboedo abēd icquido 3ted ushcasmash tabadtuidquin Esusbēd utsi daēd nac-nacquiocquid dasiuidac bimboec bed-bedquesho isbededpanēdash.<sup>33</sup> Esusbēd daēd nidtuidsho isash Petedo nadpanēdash: —Nēmbobi iquec bēdambo iquebique. Nēmbobi mibi tabadmenun abentsēc chotsēc nuc shubumpi uanuna, Icbo. Abentsēc mitsana, utsibic Moisesën na, utsibic Ediasën na, quequin shubu uanuna —quepanēdash Petedo.

<sup>34</sup> Adec Petedo onquenubien abu ushun isadenquiocnoc abitedi bētimpanēdash. Adsho isash Esusbēd choboedo dacuēdpanēdash.

<sup>35</sup> Adnubien abu ushunuēsh onquec: —Nēidic ěbēd icte bunquidquo, con madombo, ěmbi bēdamboen isaidquo neque. Aidën chiaidquo tantiaata —quepanēdash Nuquin Papa Esusbēd icquido tedestedshun isenquiocnobi.

<sup>36</sup> Adec onquiash ěnēdambi Esusuidtsēqui nidsho abēd icquidon ispanēdash. Adoshombic Esusbēd icquidon ambi isboed utsibo chienquiocpanēdash.

*Mayan icsa dapuedaid madompi*

(*Mat 17.14-21; Mad 9.14-29*)

<sup>37</sup> Adashic badiadash macuēsh dapa yacnoēsh Esus budsho isash bēquedec matses dadpen cho-chopanēdash.<sup>38-39</sup> Cho-choash abentsēc nadpanēdash: —Con mado abentsēc icquid mayan icsa dapuedash icsambo iccoshe. Isec chota. Aidën bedto-bedtoac badedquo sidquianesho aidēmbidi bedshun bēcunedeniac con mado ěbacushaniosh. Dapuduenenquo icquin con mado aidën uimambo icmedeniosh.<sup>40</sup> Adsho isash choshon mibēd icquido chuiquin, Dapudumeta, cauidombi. Adoac mayan icsa dapudumenuequin aidon tanac dapuduenenquo iccosh —quepanēdash dada abentsēc Esus caic.



<sup>41</sup> Adoaquien ambi nianaïdo caic Esus nadpanëdash: — Nadatiambocquid Nuquin Papa nec, quequin tanties mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiosho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. <sup>42</sup> Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

<sup>43</sup> Adsho isash: —Nuquin Papan nadatiambocquid naid uinsadpambo iquec —quecuededpanëdash isquido.

*Abi unëste chuioaid*  
(*Mat 17.22-23; Mad 9.30-32*)

<sup>44</sup> Adoaquien: —Chuinu. Bëpiscudenquiocquid tantiaquiota. Matsesasho nëbi bëdmendabi —quepanëdash Esus abi unës uate chiec.

<sup>45</sup> Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquo tabadcuëdedpanëdash abëd icquido.

*¿Tsutsi chuiquid dapa icpec? quequin chiaid*  
(*Mat 18.1-5; Mad 9.33-37*)

<sup>46</sup> Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

<sup>47</sup> Adoaquien Esus tantiaquidquio icquin bacuëmpi chomeshun aton dayunquio tabëcash: <sup>48</sup> —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio ichoedi aidquobi Nuquin Papan chuiquid dapa icta caindac —quepanëdash Esus abëd icquido caic.

*Abimbo tantiaquid ëbëd icquid nec quiaid*  
(*Mad 9.38-40*)

<sup>49</sup> Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquid naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

<sup>50</sup> Adoaquien: —Adquid, Padicnuna, cainda. Nadatiambocquid naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

*Esus bunesabo, Samadia yacnocquido*

<sup>51</sup> Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd

icquido ada mimbi yuedpatsia? —caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

<sup>54</sup> Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

<sup>55</sup> Adoaquien: —Padicnuna. ¿Matses unësmenuectabi chodio? —quianec <sup>56</sup> shubu daëdpactsëc yacno nidoapanëdash abëd icquidobëd.

*Esus tsibante bunquidën natequid*

(*Mat 8.19-22*)

<sup>57</sup> Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

<sup>58</sup> Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

<sup>59</sup> Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icho —quepanëdash.

<sup>60</sup> Adoaquien: —Nuquin Papa yacno tabadnu quequin unësaid choco-caquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

<sup>61</sup> Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

<sup>62</sup> —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

## 10

*Abi bëyucanec nidquid 72ted icquido*

(*Mat 11.20-27; 13.16-17*)

<sup>1</sup> Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. <sup>2</sup> Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. <sup>3</sup> Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. <sup>4</sup> Ëbi chuibenec nidanequin mitsana buanenda. Mitsana bedtequidbëdta shictoate buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. <sup>5</sup> Shubun puduedshun naden shubu icho chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. <sup>6</sup> Aden chiac shubu icho bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icho ëbi chieshënquid ictsiash. Adquid yec mimbi chiaid tantianu quesa aid shubu icho icpec. Adquid icsho Nuquin Papan abi bëdamboec tabadte aid shubun icquido menenquio iquendac. <sup>7</sup> Mibi yuedacnoudtsëqui

tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

<sup>8</sup> “Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup> Ambobi tabadquin daicsaid bédameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. <sup>10</sup> Shubu dadpen yacno choshon mibi yuedquid nibëdsho isun aton podquedën nidquin naden chuita: <sup>11</sup> Nuquin Papan chomiaid mibi chuinuec chobi. Èbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. <sup>12</sup> Aden chiashic aido chiec abi Esus onquec: — Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Èbi choabicnuc Sodoma yacnocquido icpampic. Èbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

<sup>13</sup> Aden ambi nidmetequid 72ted icquido chuibanshumbic utsibo isacimboen Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ènden yampido isadaidpembon ëmbi nadatiambocquin nabansho isun, Icsaquid nebi, queshun unësquiocnoc shubiquin abi icsaid ëntsempampic. <sup>14</sup> Aden Tido yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Èbi tantiesa icsho Nuquin Papan mibi comapenen cuidendac. <sup>15</sup> Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquo. Èmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacimboec onquec.

<sup>16</sup> Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

<sup>17</sup> Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapudenta ëmbi caitedi mayan icsa dapuduepsh, Icho —quecuededpanëdash ambi nidmiaido 72ted icquido ambi naboed Esus chuibanec.

<sup>18</sup> Adoaquien: —Èmbi nadatiambocquin nabanquin tantiamiac mibitedishun mayan icsa dadpen dapuduebedednubi abi dëniacacimboecnuc bedquetanacimboec Satanas abucuësh badedquo paëdsho isec niobi. <sup>19</sup> Èmbi nadatiambocquin nabanacpadquid

mibitedi icmebanombi. Aden mibitedi adquid icmiacsho mibi chieshênquidon mibi icsa uatiapimbo iquendac. Mibi chieshênquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunên mibi setiapimbo icoaic. Adquidbimboec mibi chieshênquid icsho ëmbi chiacpadomboen nabanac mibi icsa uatiapimbo iquendac. <sup>20</sup> Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmédquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

<sup>23</sup> Aden iccuededquido chuibanshumbic naden ambi 72ted icquido nidmian choboeduidtsëqui Esusën chuoapanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

*Utsi tantiaquin bëdamboen naquidquio*

<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacpadpenquo yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Èsusën chuimeboed: —¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. <sup>31</sup> Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin ademvidi uano datanoaposh. <sup>33</sup> Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin <sup>34</sup> aton dayun tsadbudshun cuestanquin nianaidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. <sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. <sup>36</sup> Aden chuishumbic: —Ëmbi chui-boed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

<sup>37</sup> Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chui-boedbimboecnuc utsibo tantiaquin nashunoata —quepanëdash Esus.

### *Madtan nabanubi Madian tantiaid*

<sup>38</sup> Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. <sup>39</sup> Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. <sup>40</sup> Adec tsadquin Madian tantianubi Madtan ambi natiadquo yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icho —capanëdash Madtan Esus chuiquin.

<sup>41</sup> Adoaquien: —Mimbi natiadquo yaid dadpen tantiaquidquo mibi iqueque. <sup>42</sup> Ëbi tantiaquidquo icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

# 11

## *Nuquin Papa chiec onquianete (Mat 6.9-15; 7.7-11)*

<sup>1</sup> Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icho —capanëdash.

<sup>2</sup> Adoaquien: —Nuquin Papabëd onquequin naden chuita:  
“Bëdambocquidquo mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadom-boenuidi naic.

Adomboembidi matses abitedishunquo napashun, Papa.

<sup>3</sup> Tantiaquidquo, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

<sup>4</sup> Adecbidi utsin ëbi chieshënsho cuidenquo yec ëbi abi icsaid bëpiscudacpadquiequi ëbi icsasho cuidenquo yec bëpiscudoata, Papa. Adembidi, Satanasën icsa uanushe queshun ëbi cudasquin dayun uata, Papa, quequin chuita”  
—quepanëdash Esus.

<sup>5</sup> Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? <sup>6</sup> Inchëshpotsembo pete bedshunuec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidi mibi meneoaimbi,’ quepatsiac mibi mibëd nashunanquid caic.

<sup>7</sup> “Adoaquien, nuntanëshi: ‘Padi. Shëcnandombi. Con bacuë ishcunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

<sup>8</sup> “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquo. Mimbi nidenquiocquin chuidonesho tantiashun mimbi chuiboedtedi mibi menepatsiash —quepanëdash Esus.

<sup>9-10</sup> Aden chiec abi onquec: —Adomboembidi Nuquin Papa chuidonesho mimbi bedtiadquo yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

<sup>11</sup> “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? <sup>12</sup> Adembidi, ¿Cachinan bacuë bec cho, queshoda mimbi chichun menedi? <sup>13</sup> Padenquo. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiashun menenquioda mibi ictic? —quepanëdash Esus.

*Bedtsibun namiaid Esus nec, quequin chiaid  
(Mat 12.22-30; Mad 3.19-27)*

<sup>14</sup> Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadem-pambo yec iccuededquid dadpen tabadcuededpanëdash. <sup>15</sup> Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

<sup>16</sup> Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

<sup>17</sup> Aden chuisho tantiash tantiaquidquio yec abi icsamboen chuimenuequido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiatic abëd icquido nibëdenquioda ictic? <sup>19</sup> Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? <sup>20</sup> ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. <sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

<sup>23</sup> Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

*Abibi dapuduemoed mayan icsa dapuduedoaid*

*(Mat 12.43-45)*

<sup>24</sup> Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. <sup>25</sup> Adec nidshun abi dapuduemoed naden istuidposh. Mayan icsa nidan, Ëbibi bëdambo iquéc. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemoed choshon aid abentsëcquio <sup>26</sup> istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

<sup>27</sup> Aden Esusën chiambien iccuededquid chido: —Mibi tishacsho shuma chishmiondaid Nuquin Papan bēdamboen isaid icpec —quepanēdash Esus caic.

<sup>28</sup> Adoquien: —Aden nasho padenquoio. Nuquin Papan chiaid tantiashun nabansho Nuquin Papan bēdamboen isaidquio nec —quepanēdash Esus chido caic.

*Onasën ismiampicpaden ismiaid*  
(*Mat 12.38-42; Mad 8.12*)

<sup>29</sup> Adnubien abi yacno cho-choash utsi dadpen iccuededsho isun Esusën nadopanēdash: —Nēbi nidaidēn tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquoio iquendac. Nuquin Papan Onas ismiampicpaden ismiaid mimbi isendac. <sup>30</sup> Ninibe yacno nidshun ambocquido icsaid cuidte Nuquin Papan chuimiapaden Onasën amopenen chuisho tantias, Abimbo chuiquid nec, qeshun abi icsaid Ninibe yacnocquidon ěmbededpampic. <sup>31</sup> Utsibic, Nuquin Papan dadpen tantiamiaid, Sadomon iquec qesho tantias chuiquid dapa chido Sadomonēn chiaid tantianuec ěnapenuēsh choshon tantias, Abimbo iquec, quepampic. Nuquin Papan matsesën naid icsa ambi naid bēdabēdta chuibante ushē chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bēdamboen tantiaquin chuiquid dapa Sadomon icmepampic. Abitedi tantiampidquio nēmbobi iqueque. Ĕmbi chiaid tantiata. <sup>32</sup> Adembidi, matses icsaidbēdta ambi bēdamboen naid Nuquin Papan chuibante ushē chonoc Ninibe yacnocquidon Onasën chiaid tantiapadomboen Nuquin Papan chiaid abimbo iquec, quequin tantienquoio icsho Nuquin Papan mibitedi isendac. Nuquin Papan chuimiac Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen mibi icsaid bedshunash abided cuidadtequid nēmbobi iqueque. Ĕmbi chiaid tantiata —quepanēdash Esus abibi chiadequi.

*Tabote taboshon bētashenquoio yachimboec abi bēdamboec tabadaid ismequid*  
(*Mat 5.15; 6.22-23*)

<sup>33</sup> Aden chuishumbic Esusën abi chuibanec: —Tabote taboshon ompoesa. Adembidi matsun bētashesambo icbo nec. Ma ěmbi yuedaidon isnueshun tabote nēnantan nanquid. <sup>34</sup> Adoaidbimboec min tantiate iquec. Min tantiate bēdambocquid icquin bēdamboec tabadquin ismequid mibi nendac. Bētashacimboec min tantiate icnuc icsamboen ismequid mibi nendac. <sup>35</sup> Con icbo ěbi bednuec choec qeshun bēpiscudenquiocquin isted-istedta. <sup>36</sup> Min tantiate icsaisa icsho Nuquin Papan chiapadomboen tantiaquidquio aidi nec, quequin utsibon mibi isendac —quepanēdash Esus.

*Nuquin Papan icsamboen isaidquio*  
(*Mat 23.1-26; Mad 12.28-40; Duc 20.45-47*)

<sup>37</sup> Aden Esusën chuibanshobien padiseyobo abentsēcshun: —¿Ada ěbi yacno pec nidtsia? —capanēdash. Adoac aidbēdi nidash pete sanaid cueste dayunquoio Esus tsadbudpanēdash. <sup>38</sup> Adec Esus tsadsho isash,



¿Adpecshenda iquec. Penush mëpamëdenquoio Esus icpec? quec abibi onquequin padiseyobon Esus yuedquidëmbi tantiapanëdash.

<sup>39</sup> Adoaquien, tantiaquidquoio iquec Esus nadpanëdash: —Ëndenquimbo padiseyobon peshun acnun dêshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampansenquoio mimbi icpec. Mibitedi adquoio iquec. Nesquin bëchish uquec dapanudquin mimbi tantiaid icsa ënenquoio mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquioda icpampic. <sup>41</sup> Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

<sup>42</sup> Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquoio mibi nec, padiseyobo. <sup>43</sup> Adembidi, tsusio dapabimboecsho bëdamboen isplashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtene. Adomboembidi tantiec matses iccuededacno nidequi, Ëbi bëquedquidon ëbi tsusio dapabimboecsho isash onquequin chuiplashuni quec mibi capuec. Aden tantiaquid Nuquin Papan icsamboen isaidquoio mibi nec. <sup>44</sup> Adembidi, matses unësaid chococate manenushe qeshun ismequin mabiunu, quenquoio yapadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiemi, quiash utsibo tantiaquid abentsëc: —Padiseyobo chuiquin ëbipadquido mimbi chuiopaec —quepanëdash.

<sup>46</sup> Adoaquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aidted matsesën natiapimbo icpec. Adsho isash, Mimbi natequid dadpen iqueque. Mibi nashunu, qesa icsho Nuquin Papan icsamboen isaid mibi nec.

<sup>47</sup> “Adembidi, Nuquin Papan chuimiad dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacimboen mimbi shubumpi uabanec. Ëmbi shubumpi uaido isun utsibon bëdamboen isplashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiado cuesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquoio mibi nec. <sup>49</sup> Ëmbi chiacpaden chuibanta, cabicquin naden Nuquin Papan chuipampic. Ëmbi chuimiad utsi-utsien aton matsesën mëyampec. Utsi-utsien mëyanshun cuesunepec, quec Nuquin Papa abitedi tantiaquidquoio adpampic. <sup>50</sup> Aden

min tsusedpabo Nuquin Papan chuimiai don chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiai tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. <sup>51</sup> Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai, Nuquin Papan chiaid tantiesatedi ambi chuimiai do cuesuniampidpadquido nëbi icquid neoaic.

<sup>52</sup> “Nuquin Papan naden nata quequin chiaid tantiambi, qeshun utsibo tantiamenquiocsho Nuquin Papan icsamboen isaïdo mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaïduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaïduidi tantiaquido chiec.

<sup>53</sup> Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash. <sup>54</sup> Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Èbitedishun chuimiac Nuquin Papan chiaïd icsamboen Esusën chuïtsiash. Aden icsamboen chuisho tantiash, Nuquin Papan chomiaïd nec, quec mibi muasho tantiashun, Unës uametiadquio iquebi, quequin Esus chiambi, quequin tantiaquin Esus chuimepanëdash padiseyobon.

## 12

### *Natiamiantequidbëdtabi dayacmetequid*

*(Mat 10.28-31)*

<sup>1</sup> Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucustsücseqquo yec tabadpanëdash. Aido tsucustsücseqquo yec tabadnubien abëd icquido Esusën nadopanëdash: —Sicaïd nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaïdbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaïdta nec, quequin Nuquin Papan chiaïd bëdamboen ista. <sup>2</sup> Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. <sup>3</sup> Inchëshën min nuntanuësh mibi icsamboec onquiaïd Nuquin Papan matsestedi tantiamequin chuibanendac. Nuntanuësh shoshquequin mimbi chiaïd Nuquin Papan matsestedi tantiamenuen chuioaindac.

<sup>4</sup> “Adembidi chuïnu. Tantiata. Mibi cuesunenuequid dacuëdënenda. Adquïdën mibi cuesunequin mibi nibëdametiapimbo iguendac. <sup>5</sup> Nuquin Papauïdtsëqui dacuëdënta. Icsadednequid icsho aïdën mibi cuesunemeshun chian anëdënnequid nësecaindac. Adoanquiduidtsëqui dacuëdënta. <sup>6</sup> Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun

aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. <sup>7</sup> Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

*Esus tantiaquid nebi, quequin utsibon tantianubi chiaid  
(Mat 10.32-33; 12.32; 10.19-20)*

<sup>8</sup> “Abi chiembique. Tantaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. <sup>9</sup> Adecbidi, utsibo icnubi, Esus tantiaquid nebi, quetiapimboquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bëdabo chiendambi. <sup>10</sup> Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquio yacimboec bëpiscudta, Papa, qesho tantiash aidën icsamboen chienquio yacimboec Nuquin Papa bëpiscudendac. Nuquin Papan Mayanën tantiamiac nasho isash, Satanäsën tantiamiaid nec, quequid icpec. Aidën chiaid bëpiscudenquiocon Nuquin Papan abi yacno adquid yuedenquio iquendac.

<sup>11</sup> “Adembidi chuinu. Tantaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiamequé —quepanëdash Esus abëd icquido caic.

*Aton na dadpen icquidën tantiaid icsa*

<sup>13</sup> Adashic, abi datsidadquid abentsëcshun: —Con pa unësan con pan na dadpen con buchïn bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

<sup>14</sup> Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. <sup>15</sup> Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icho nadposh: <sup>17</sup> ‘Con tiedën caniquid bacuë dadpen iqueque. ¿Atontsimbimbi aïdtedi dayun uapeba? <sup>18</sup> Naden naimbi. Tiedën caniquid ëshë dayun uate shubu shënitedi chicbanshun aïdtedi nuamboshëcncuc shubu uabanuna. Aden nuamboshëcncuc shubu uashun aidënquio con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aguendambi. Aden naic, Bëdambo iquebi,’ quec aton na dadpen icquid abibi onqueposh.

<sup>20</sup> “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

<sup>21</sup> Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unēsash Nuquin Papa yacno tabadtiapimbo iquec —quepanēdash Esus.

*¿Atotsimbi napeba? quesa icta, quequin chiaid*

*(Mat 6.25-34)*

<sup>22</sup> Aden iccuededquido chuishumbic Esusën abēd icquido nadopanēdash: —Aton na dadpen icquidēn tantiacpaden tantienda. ¿Con na nibēdnuc atotsimbi pepeba? quec dacuēdenda. Adecbidi, ¿Atotsibi dasiuidpeba? quec dacuēdenda. <sup>23</sup> Bēdamboec tabadnuequin mibi piasteuidi tantienda. Adembidi, Con dada bēdambo icmenuequin, Dashcute bedteuidi tantienda. <sup>24</sup> ¿Uicchunēnda ambibi cuēte ēshē siac bacuēacsho chepadic? Padenquio. Adecbidi, ambi dayun uatequid shubu nibēdnubi aton na nibēdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? <sup>25</sup> Adecbidi, ¿mibi unēste ushē abimbo chonoc, Padi, quepecta mibi icti? Padenquio. <sup>26</sup> Adec mibi unēste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuētempi chuinu. Tantia. ¿Cuētempinda aton bacuē ictequid daēdcapec? Padenquio. Adoengquio yaid aton bacuē ictequid bēdaidquio iquec. Cuētempi bacuē ictequid bēdaidquio yacpadquid chuiquid dapa Sadomonēn dashcute adquio ictiapimbo icpampic. <sup>28</sup> Padnuen cuēte bacuē ictequid bēdaidquio icboedi badedquio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bēdiactsēc tantienda. <sup>29</sup> Aden tantienquio yec ¿Atotsimbi peshun aque? quec dacuēdenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbēdta èbi bedmedonec, quequin tantiec tabadta. <sup>31</sup> Adembidi, Nuquin Papabēd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

*Abi yacno choacsho meniaid*

*(Mat 6.19-21)*

<sup>32</sup> “Nuquin Papan abi yacno mibi chomeque. Dacuēdenda, èbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibēdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidēn bedtemaidquio iquendac. Capishton petemaidquio aid iquendac. <sup>34</sup> Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanēdash Esus.

*Chieshenquiocquin caintequid*

*(Mat 24.45-51)*

<sup>35-36</sup> Aden chuishumbic Esusën nadopanēdash: —Aton icbo u isec nidan con icbo chonoshe quiash dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bēdambo icmequin

nadopec: “Ëmbimbo mibi pemenu. Nëmbo tabadec cho,” qeshun ambi yuaid icbonquo pemequin bédambo icmendac. <sup>38</sup> Adembidi, icbo inchëshpotsembo choshon abi nashunuequin cainquido icsho icbon bédambo icmiaido iquendac. Adembidi, cachina cuëdanabi badiad-abicnuc choshon abi cainquido icbon bédambo icmiaido iquendac. <sup>39</sup> Adquidpenquo icbo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquo ictsenobi, quependac icbo. <sup>40</sup> Adquiecbidi ampequid choacbimboec Nuquin Icbo choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

<sup>41</sup> Aden Esusën chuisho tantiaash Petedo: —¿Utsi chuiquin mibëd icquidouidi tantiamenuenda chio? ¿Abitedi tantiamenuenda chio? Tantiu. Ëbi chui —quepanëdash Esus caic.

<sup>42</sup> Adoaquien: —¿Icbon chiac mitsipadquiocquin ambi namiaido bédamboen napeba? Adquid chuinu: Pete tambanshun musucshun ëmbi namiaid utsitedi bédamboen menebanta, quequin ambi namiaid utsi abentsëc chianec icbo nidac. <sup>43</sup> Adec nidashic choshon ambi chiacpaden ambi namiaidën chieshenquiocquin nabanacsho isun icbon bédambo icmiaid nendac. Adquid naden chuipec: Ëbi nidan chieshenquiocquin mimbi nabanoque. <sup>44</sup> Ëmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshënquin cuesbanshun ambentsëqui nua peshun tantienquo yanquin aquec. <sup>46</sup> Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac. <sup>48</sup> Aton icbo bunaid tantiaicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquo iquendac. Adembidi, icbon dadpen meniaidon dadpen meneoatiadquid nendac —quepanëdash Esus.

*Utsibëd bédamboec tabadnu quesa icquin cuëshëdmequid  
(Mat 10.34-36)*

<sup>49</sup> Aden chiashic abi onquec: —Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bédamboec tabadtsiandac, quec tsadebi. <sup>50</sup> Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi. <sup>51</sup> ¿Nidaidënshun abitedi bédamboen tabadmenu quectabi chodionda? Padenquo. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquo yec cuëshëdec adquid. <sup>53</sup> Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquo yec cuëshëdendac. Adecbidi aton tita ëbi tantiaquid icnuc con tapadquid icnu quenquo yec aton champi

cuëshêdendac. Shubu utsin, aton champi ëbi tantiaquid icnuc aton tita padenquio yec cuëshêdendac. Shubu utsin aton chaya ëbi tantiaquid icnuc aton babanën padenquio yec cuëshêdendac. Shubu utsin, aton babanën ëbi tantiaquid icnuc aton chaya padenquio yec cuëshêdendac — quepanêdash Esus. Abi tantiesia cuëshêdtequid chuibanec.

*Nuquin Papan ismiante isun nad iquendac, quequin tantiaid*  
(Mat 16.1-4; Mad 8.11-13)

<sup>54</sup> Aden abêd icquidombo chuishumbic Esusën naden iccuededquido chuioapanêdash: —Inchësh chosho isec, Ue choec, quiacpadec choec. <sup>55</sup> Adecbidi, ushë chênquec chosho isash, Chumbo yampec quiacpadec iquec. <sup>56</sup> Aden isquin mimbi ëmbi nidaidënshun ismiaidbêdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiãid isumbi tantien-quiocquin mibi icsaid ênenquio ique? —quepanêdash Esus iccuededquido caic.

*Utsibêd chushcananquid*  
(Mat 5.25-26)

<sup>57</sup> Aden chiashic: —Utsibêd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiashun mibi icsaid ênenquio ique? <sup>58</sup> Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. <sup>59</sup> Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanêdash Esus.

## 13

*Utsibo unësmiacpadec unësmemane quequin mibi icsaid ënta caid*

<sup>1</sup> Aden Esusën chuibanubien iccuededquid utsibo, Esus chuimenu, quequin caimpanêdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniãidën intachêd daêdash chididiquiosh, quequin chuipanêdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanêdash Esus chiec.

<sup>2</sup> Adoaquien: —¿Cadidia yacnocquido utsitedi icsaid daêdpacksêc icnuc cuesunemiãido icsaid dadpen icsho aido cuesunemiash, quequinda mimbi tantiape? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. <sup>4</sup> Chuinu. Tantiata. Shubu dadpen icquid Edusaden caid ênêdacno Sidoe yacno tabadquidon ambi abucshun nacnenaid uebudquin abêd icquido 18ted cuesac unësosh, quiosh. ¿Edusaden yacnocquid utsibo icsaid daêdpacksêc icnuc Sidoe yacnocquido icsaid dadpen icquid unësosh, quequinda mimbi tantiape? <sup>5</sup> Mimbi icsamboen tantieque. Utsibo unësapadec unësmene quequin mibitedishun mibi icsaid ënta —capanêdash Esusën abi chuimeboedo chuiquin.

<sup>6</sup> Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

<sup>8</sup> “Adoquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiameeta. Adoac bacuëtsiash. <sup>9</sup> Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiapadec tabadenquiochoedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

*Cashuebudaid bëdamiad*

<sup>10</sup> Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien <sup>11</sup> seta dadpen 18tedi matamequin mayan icsan shuabudaid icpanëdash. <sup>12</sup> Adquid icsho isun Esusën: —Shuabudaid icboedi nëbi cacueoaid mibi iquendac, chido —cashun <sup>13</sup> mishac cacuiash, Nuquin Papan nadatiambocquin naid nec, quequin chiec chido onquepanëdash.

<sup>14</sup> Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

<sup>15</sup> Adoquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte yacno buanenquioda mimbi icpe? <sup>16</sup> ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

<sup>17</sup> Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

*Cuëte ëshëmpi chiaid*

*(Mat 13.31-32; Mad 4.30-32)*

<sup>18</sup> Adashic: —¿Nuquin Papan shubun icquido mitsipadquidquio icpec? <sup>19</sup> Nadquidquio iqueque. Chuinu. Tantia. Icbon cuëte ëshë pïstëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabedec. Adquiecbidi, Nuquin Papan chiaid chuisho tantiatsëcquidën tantiabenash bëdamboquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

*Sicaid nami uaidpadquid*

*(Mat 13.31-33)*

<sup>20</sup> Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? <sup>21</sup> Nadquid iqueque. Tantia. Sicanun

nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

*Pudued-puduedtequid shëcuë pistsëcquio chiaid*

*(Mat 7.13-14, 21-23)*

<sup>22</sup> Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. <sup>23</sup> Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tiantianu. Ëbi chui.

Adoaquien Esusën nadopanëdash: <sup>24</sup> —Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, <sup>25</sup> Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoaquien: ‘Ëbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

<sup>26</sup> “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

<sup>27</sup> “Adoaquien: ‘Icsaquido mibi neque. Nëmbo puduedenda,’ quepec Icho. <sup>28</sup> Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icho yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. <sup>29</sup> Nuquin Papa yacno abi tantiesa puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. <sup>30</sup> Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icaindac —quepanëdash Esus.

*Edusaden isash anocquido Esus unësqiotequid*

*(Mat 23.37-39)*

<sup>31</sup> Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

<sup>32</sup> Adoaquien: —Edodes cuesunemenueschimboec onquequidquid nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. <sup>33</sup> Adobanequi nëbi capuebi. Adobanequi badiadash capuoaiibi. Adobanequi abadiadash capuoaiibi. Adobanequi Edusaden yacno capuoaiibi. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiaido cuesunequido mibi nec.



Adembidi, Nuquin Papan mibi yacno chomiaido cuënoten se-seguido mibi neoaic. Ĕbi tantiaquid icmenu, quequin chuideniombi. Cachinan, Con bacuë chieshënuquid choec, queshun nua shoccotsëcshun aton bacuë cudasquin mabësec aton podon. Adembidi: Mibi chieshënuquid choec, queshun mibi cudasquin chuibanombi. Aden chuisho tantiatipimbo yec mibi tabadpoc. <sup>35</sup> Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshëneccuesunenuquido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquio nec, quequin tantienquiochoedëmbi tantien-dac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

## 14

### *Padiseyobon shubun Esus puduedash tabadaid*

<sup>1</sup> Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe queshun isnuequin padiseyobo utsibo tabadquin caimbededpanëdash.

<sup>2</sup> Aden caimbedednubien podo nidte chedo bidisquiaid uano tsadsho isun Esusën: <sup>3</sup> —¿Chonoadtemaid ushën daicsambocquid bëdamenquiocte ushë nec, quequina mimbi tantiape? —caquien <sup>4</sup> abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: —Nidec nid —cac bëdambo yec nidpanëdash.

<sup>5</sup> Aden aid nidmeshun abi bëdamenushe quequin caimbededquido caic: —¿Chonoadtemaid ushën nua uëdëshcaidën min baca ampaëdacsho isun badedquio bedtanquin indoenuquoda mimbi ictsia? —quepanëdash Esus. <sup>6</sup> Aden chuisho tantiaash adquiobidi otacquo tabadcuededpanëdash.

<sup>7</sup> Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiaashun Esusën nadopanëdash: <sup>8</sup> —Pec cho, cac choshon tsadte bëtinenta. Tsadte mimbi bëtinambien shubu icbon ambi pec cho caid utsi mibi chuiquid tsusio chosho <sup>9</sup> isun: “Chuiquid dapa choeque. Uano tabadad,” icbon cac icsamboen naombi quiash natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. <sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

<sup>12</sup> Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoudi pec cho cainda. Aido pemiac, mibi pec cho caoaic. <sup>13</sup> Pemenu, quequin aton na nibëdquido, daicsaidobëdta bëshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

### *Nuquin Papa yacnoshon pequido*

<sup>15</sup> Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

<sup>16</sup> Adoquien aidi tantiamenuen utsi chiacbimboec Esus nadpanëdash: —Yuednu, quequin nadënquio pec chota, quequin ambi yuedtequid dadpen chuiposh. <sup>17</sup> Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. <sup>18</sup> Adec nidshun chuituidaquien: ‘Nidtiapimbo iquebi,’ queposh abitedi. Abia chuituida idaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

<sup>19</sup> “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbameposh.

<sup>20</sup> “Utsibic: ‘Con chido bedombique. Nidenquio iquebi,’ queposh.

<sup>21</sup> “Aden chuisho tantiash nidshun aidon chiacpaden aton yuan icbo chuioaposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

<sup>22</sup> “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

<sup>23</sup> “Adoquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. <sup>24</sup> Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

### *Esuspadquio ictequidquio*

<sup>25</sup> Adashic, nidsho matses dadpenshun tsibanac abi choacmi bidiaidshun isec Esus nadpanëdash: <sup>26</sup> —Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi, aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. <sup>27</sup> Unësmanc quiaish mëyanac dayactiapimbocquid ëbipadquio ictiapimbo icoaindac —quepanëdash Esus.

<sup>28</sup> Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquiobidi bëshun tocashun shubu uainquioda icpec? <sup>29</sup> Aden tantienquiocquidën abentseabentsen bë-bëtsëcquin baded naintiapimbo iquec. <sup>30</sup> Adsho isun utsibon mamënshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

<sup>31</sup> “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidtedtsëqui quic dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. <sup>32</sup> Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. <sup>33</sup> Adembidi ëbipadquio icnuequidon

bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, queshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

*Sa batapentsëccquiocquid  
(Mat 5.13; Mad 9.50)*

<sup>34</sup> Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëccquiocquid casecac batamboda icpadic? <sup>35</sup> Padenquio. Secatequid adquid nendac. Adecbidi Esuspadquio icnu quiash ëbipadquie yanesa chian anëdënquequid nësiatequid nendac. Adquid ictiapimbo iquebi, quequin, Tantianu, queshun tantiacpadomboen nabanta —quepanëdash Esus.

## 15

*Obeca abentsëc bënudtequid  
(Mat 18.10-14)*

<sup>1</sup> Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantianu, quiash Esus datsidadpanëdash. <sup>2</sup> Adsho isash padiseyobo Esus tantiamenquio yec chushquiabimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

<sup>3</sup> Adoquien, tantiaquidquio iquec Esus: <sup>4</sup>—¿Min obeca dadpen 100ted ichoedi abentsëc bënudacsho isun, Nibënu, quequin min obeca utsi dadpen 99ted nianec nibënec nidenquioda mibi icpe? <sup>5</sup> Aidi nibënquin istuidash, Con obeca istuidbosh bëdambo iquebi, queshun chiadquin buanec icbo nidec. <sup>6</sup> Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

*Aton na bedtequid bënudtequid*

<sup>8</sup> Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted ichoedi abentsëc nibëdsho isun tabote taboshon bescaquin chidon nibënenquioda icpec? <sup>9</sup> Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

*Aton mado cuëshëdquid*

<sup>11</sup> Aden chido chiashic utsi chiacbimboec Esus nadpanëdash: —Aton mado daëd icnubi <sup>12</sup> tsyuec tishaid aton papa caic: ‘Tsusio budquin mimbi chiondacadpen nëbi ëbi aited meneta, papa,’ quepondash. Adoac aton na musucshun aton mado abi daëdi menebampondash.

13 “Aden meniac daèdpectsëc ushash aton mado tsyuecquid aton natedi sandoshon buanec nidaid utsi yacno icsamboen nabanec tabadnuc aton natedi naimëdpondash. 14 Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. 15 Adec bundoquiec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ queshun aton chancho yacno tsusion mado nidmepondash. 16 Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

17 “Adec natiambo bunec tabadquin aton papa ambi nianondaibëdta abi icsaid utsitedi tantiec abibi onquec nadpondash: ‘Con pan nami-aidon pete dadpen icnubi con na nibëdnuc unëspebi. 18 Nëbi con pa yacno nidshun naden con pa chiemi: Nuquin Papan chiacpaden nainquiocquin mibi tantienquio yec nidshun icsamboen nabanombique. 19 Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiemi, 20 abibi quianec aton papa yacno nidoapondash. Adec nidec ancuenquio yacno aton mado nidondaic casenash chosho isash unësqiucnoc aton mado bëquedquin dayumbudshun shubi uatanquin aton papan tanchoccapondash. 21 Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

22 “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaic choaoshe. Dasiuidte bëdaidquio bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. 23 Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. 24 Con mado unësac bimboeçoedi nëbi ëbëdi tabadoaic. Aidi bënudac bimboeçoedi nëbi istuidac bimboec choash iquec,’ cac bacan bacuë cuesuneshun codocacsho pebededpondash.

25 “Adnubien bëyuc tishaid tied nantan icpondash. Auëshquio nidec shubu anoentsëqui choquin tentencate cuëdëmec matses cuëdënsho tantiatuidpondash. 26 Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

27 “Adoquien: ‘Min utsi ënden nidondaic choaposh. Aidi chosho isash unësqiucquin nuquitedi bëdamboec tabadquin pemenuquin aton bacan bacuë nuacquid dapa papan cuesunemiosh,’ cac 28 bëyuc tishaid nëishash shubun puduedenquio icpondash.

“Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobëd bëdambo icnuc cho, mado,’ capondash aton papan. 29 Adoquien: ‘Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. 30 Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

31 “Adoquien: ‘Mado, ëbëd icquid mibi nec. Adquid icnuc con natedi mitsana neyoc. 32 Min utsi unësac bimboeçoedi nëbi choash

tabadoaic. Aidi bēnudacimboeçoedi nēbi istuidaid nec,' quequin aton papan choboedēn buchi chuipondash —quepanēdash Esus.

## 16

### *Icbon na icsamboen isquid*

<sup>1</sup> Adshumbic, abēd icquido Esusēn naden chuipanēdash: —Icbon, Con na dadpen isquid icta, caid icnubi: Mimbi con na ista caidēn mitsana uesbudec, quequin utsibon chuiposh. <sup>2</sup> Adoac, ambi con na ista caid chomiasch icbo nadposh: 'Mimbi con na ista caidēn mitsana uesbudec, quequin chioshi. Adoac, con na isquid mibi ictiapimbo iquec, caimbi. Nēbi ¿Ēmbi tambamboed abitedida iqueque? Con na daēd uata quequin ěmbi meniac mimbi daēd uabanquin dada uaid bec cho. Isnu,' queposh icbo.

<sup>3</sup> "Aden chiac icbon na isquid otacquo onquec: '¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibēdeque. Bec cho, quetiapimbo icoaibi. <sup>4</sup> Naden natsiambi. Con icbon na meniondaid abitedi cuidmenquo yac ěbi yuedtsiash,' queposh.

<sup>5</sup> "Aden tantiashun ambi icbon na meniondaid abentse-abentsen chomiac bēyuc choquid chuiquin: '¿Tedtsi ěmbi con icbon na meniaqui mimbi cuidenquiocpaccoc?' cauien:

<sup>6</sup> " 'Bēchi shocosh nuacquid dapan cushtoaid 15tedi bedshun cuidamboccombi,' queposh.

"Adoaquien: 'Mimbi 15ted bedombi, quequin dada uaid secashun dada uatempi bedshun shocosh dapa bēchi cushtoaid 7ted bedshun cuidembi, quequin dada uata.'

<sup>7</sup> "Aden bēyuc choquid chuishumbic utsi chosho isun: '¿Con icbon na tedtsi bedshun cuidenquo mimbi icpo?' cauien:

" 'Tsitsan dapa dadpen 1000ted tiedēn caniquid ěshē bedombi,' queposh.

"Adoaquien: 'Mimbi aidted bedombi quequin dada uaid secashun dada uatempi utsin tsitsan dapa dadpen 800ted tiedēn caniquid ěshē bedshun cuidembi, quequin dada uata,' quequin icbon na isquidēn chuiposh. Adoac ambi chiacpaden ambi bedaid cuidambocquidēn dada uaposh.

<sup>8-9</sup> "Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquo iquec nadposh: 'Muaquin mimbi dada uamebanquin mibi yuedmetequid con na mimbi aido menioque. Nidec nid,' caposh icbon —quequin Esusēn chuipanēdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidēn tabadquin mitsana meniac mimbi meniaidotsen ěbi tantiaquid yanash unēsash Nuquin Papa yacno nidshun mibi tsyuec chosho isun ěbēdtambi aidon mibi yuedendac —quepanēdash Esus.

<sup>10</sup> Aden chuishumbic adomboembidi chuiquin Esusēn nadopanēdash: —Icbon na daēdpactsēc bēdamboen isbanquin nashunquid icquin adem-bidi icbon na dadpen isbanquin bēdamboen nashunendac. Padnuen, icbon na daēdpactsēc isbanquin icsamboen nashunquid iquin adomboembidi aton na dadpen icsamboen isbanoaindac. <sup>11</sup> Adembidi mimbi nidaidēnshun bedquin mimbi icsamboen nabansho isun, ¿Ēbi tantiaquid

bëdamboen ista, quequina Nuquin Papan mibi chuipeba? Padenquo iquec. <sup>12</sup> Adembidi, çutsin na isquin bëdamboen nashunenquo icsho isun abi yacno chosho isun mibi menependa ictic? Padenquo.

<sup>13</sup> “Adecbidi, chuiquid daëd icnuc aid daëdshun namiaidquo ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquo icquimbi mitsana bedtequid mimbi tantiaidquo ictiapimbo iquec — quepanëdash Esus.

<sup>14</sup> Aden chuibanubi aton na bedtequid ambi tantiaidquo icnuc chieshec padiseyobo tabadcuededpanëdash. <sup>15</sup> Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën isplashuni, quequin tantiaquin nasho Nuquin Papan bëdamboen istiapimbo iquec.

<sup>16</sup> “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquo yec ambibi tantiacpadece puduedte bunec. <sup>17</sup> Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

*Aton chido nianquid*

*(Mat 19.1-12; Mad 10.1-12)*

<sup>18</sup> “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic — quepanëdash Esus.

*Aton na dadpen icquid icnubien aton na nibëdquid*

<sup>19</sup> Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquo dasiuidquidën badiadquidën-badiadquidënquien nua peshun acposh. <sup>20</sup> Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. <sup>21</sup> Bunquieci ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

<sup>22</sup> “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquo tsadumposh. Adoambic, aton na dadpen icquidtsen unësashi <sup>23</sup> chian anëdënquiacnoshon mëyanaid icquin abucquo isquien aton na nibëdquid unësboedi Dasado Abadauanën dayunquo tsadpec. <sup>24</sup> Adec aid daëdi tsadsho isun aton na dadpen icboedën Abadauan chuiquin: ‘Ëbi antauid-eque. Con ana dauebudoaquin ëbi ëcpanun Dasado acte bëme, papa,’ caposh.

<sup>25</sup> “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquieci tsadposh. Nëbi aidi ënabi bëdamboec tabadnubien anchumbo yec mibi tënquebudec. <sup>26</sup> Adboedi, uquëmbo mibi iquec cuëma utsiuc potetemaic icnuc nëuëshquo nidtiapimbo iquec. Adquiobidi mibi

yacnocquido nēmbo chotiapimbo icoaic,’ quequin Abadauanën aton na dadpen icboed chuiposh.

<sup>27</sup> “Adoaquien: ‘Ëbi yacno potetemaïd icnuc con pan shubu yacno Dasado nidme. <sup>28</sup> Con buchi ado mēdante auc abentsēc 5tedi unēsabi yec nidaidēmbi tabadeque. Con buchi ado nēmbo mēyanacno chonoshe queshun Dasado aido chuimetanta, papa,’ queposh aton na dadpen icboed.

<sup>29</sup> “Adoaquien: ‘Nuquin Papan chiaïd, Moisesën dada uampidbēdta dada uaid utsi isec tsusiobo onquepayoc. Aden chiaïd ma min buchi adon tantiaquiopanuna,’ quequin Abadauanën chuiposh.

<sup>30</sup> “Adoaquien: ‘Aïd tantienquioctsiash, papa. Unēsboed nidshun chiac aïdon tantiapatsiash,’ quequin aton na dadpen icboedēn chuiposh.

<sup>31</sup> “Adoaquien: ‘Padicnuna. Nuquin Papa tantiesa icquin uincuemiaïdēn chiaïd min utsibon tantienquio icpatsiash,’ caposh Abadauanën aton na dadpen icboed chuiquin —quepanēdash Esus.

## 17

*Matses icsaid chiaïd, ambi Esus tantiaïd chiaïd, ambi natequid chiaïd (Mat 18.6-7, 21-22; Mad 9.42)*

<sup>1</sup> Aden chuishumbic abēd icquido Esusën nadopanēdash: —Icsa uanquid iquendac. Adquid Nuquin Papan comapenen cuidendac. <sup>2</sup> Adquid ëbi tantiabenicquid icsa uanabicsho cuēnote yuēmboquid tētanetanquin acte shodomboshē yacno nēnepatecnēdan. <sup>3</sup> Aïd tantiec aidpadquid icmane quequin bēdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënēdnuna,’ quesho tantiashe aïdi icsainquio yacnimboec bēpiscudta. <sup>4</sup> Mibi icsamboen nash choec: ‘Icsaobique. Ënēdnuna,’ quenuc mibi icsamboen nacmaïdbimboec yec bēpiscudta. Mibi padpiden icsamboen nash choaic: ‘Icsaobique. Ënēdnuna,’ queoanuc mibi icsamboen nacmaïdbimboec yec bēpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aïdtedecbidi aïdi icsambo yenquio yacnimboec bēpiscudoata —capanēdash Esusën abēd icquido chuiquin.

<sup>5</sup> Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo —capanēdash abēd icquidon Esus chuiquin.

<sup>6</sup> Adoaquien: —Cuētempi ëshē mostasa caïd pistsēcquio iquec. Siac dēyucash nua yanec. Adecbidi Nuquin Papa nadatiambocquin nabanquid iquec quequin mimbi bēdiactsēc tantiapec. Aden bēdiactsēc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nēïd cuētempi caic, Cuēte mananuc tabadboedi adquiecbidi acte nantan tabadoata, quequin mimbi chiacpadece acte nantantsen abi tabadacpadececbidi tabadoaindac —quepanēdash Esus.

<sup>7</sup> Aden chiashic Esus abi onquec: —¿Min yua mimbi neshcata cac nidshun neshcaquin nainash shubuno chosho isun: “Nēmbo tsadquin pec cho,” caquinda mimbi icpe? <sup>8</sup> Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic. <sup>9</sup> Aden mimbi chiac mimbi chuiboedtedictsēqui nabanquim mimbi yuaidēn naimbudec. Aden naimbudsho isash: “¿Bēdamboen mimbi

naoc,” quecta mibi icpe? <sup>10</sup> Padenquo. Ambembi nainquo iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chuiboedtedi nabampombi. Mimbi namiaid icquin ëmbi naboeid ëmbi natequiduidi napombi,” quequin mimbi chuite nendac —quepanëdash Esus.

*Daushumbocquido bëdamiaid*

<sup>11</sup> Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec <sup>12</sup> shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquetuidpanëdash. <sup>13</sup> Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapen cuënquin.

<sup>14</sup> Adsho tantiaashun Esusën: —Isaididbo tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

<sup>15</sup> Adoac bëdamboed abentsëc dëbidiadanec Nuquin Papan naid chiec onquec choaic <sup>16</sup> Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpembonepanëdash.

<sup>17</sup> Adoaquien: —¿Diestedidambi bëdamepo? —quepanëdash Esus dëbidiadanec choboed caic. <sup>18</sup> Aden chiashic iccuededquidtedi caic: —Nëidi isadaidpemboneyequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquo icpec —quepanëdash Esus. <sup>19</sup> Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

*Chuiquid dapabëd bëdamboec tabadte chote ushë*

*(Mat 24.23-28, 36-41)*

<sup>20</sup> Adshumbic: —¿Chuiquid dapa abentsëcbëd bëdamboec tabadte ushë choaid mitsipadënuquo nuqui ispeque? Tiantanu. Ëbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac. <sup>21</sup> Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses imoic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

<sup>22</sup> Aden padiseyobo chuishumbic abëd icquido Esusën nadopanëdash: —Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquo mimbi iquendac.

<sup>23</sup> Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. <sup>24</sup> Nuquin Papa yacno bëdamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. <sup>25</sup> Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

<sup>26</sup> Aden chiec Esus abi onquec: —Ëndenquimboshë Noe tabadnuc matsesën icsamboen tantiadened-tantiadenednëdacadpadomboen ëbi choate ushë icnuc adembidi matsesën tantiadenepec. <sup>27</sup> Nadec tabadpampic: Nuquin Papan chiaid tantiesa cuidte ushë choec, quenquiocquin abi



bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapen puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

<sup>28</sup> Adec Noe tabadnuc icsamboen tantiec matses tabadaid chiashic, Esus nadpanëdash: —Adechbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. <sup>29</sup> Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

<sup>30</sup> Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. <sup>31</sup> Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adechbidi, tied nantan mibi icnuc aid ushë chosho isash shubu yacno mitsana bednuec nidenquio yec badedquio cuenta. <sup>32</sup> Mibi yacnocquidtedi unës uanushe bidiadshun isenquio yec cuenta, cac Dod cuenubien aton na tantiec aton chido aucbidi bidiadsho unës uampidpadquid iquenda. <sup>33</sup> Unësmane queshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. <sup>34</sup> Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

<sup>37</sup> Aden chuisho bëdamboen tantienquiocquin abëd icquidon: —¿Mitsimbo budpec, icho? —capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

## 18

### *Cadonequidquio chido chiaid*

<sup>1</sup> Adashic, Ëbëd icquido chieshenquio yec Nuquin Papa chiec onquianonquianquidquio ma icpanu quec aido tantiamenu quec Esus nadpanëdash: <sup>2</sup> —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. <sup>3</sup> Adnubien uano tabadquid niante chido icposh. Aidi icsambocquid cuidte chuiquid

yacno nidshun: ‘Ëbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuida-chuidedposh.

<sup>4</sup> “Aden chuidoniaqui abi icsambocquin naquid cuidte chienquiocboedëmbi chido ënëdenquio yec <sup>5</sup> choded-chodedquin adomboembidi chuoasho tantiashun: ‘Nuquin Papabëdta matses tantiesa nebi, quequimbi niante ënëdenquio yec chodednesho isun uimabudmane queshun abi icsamboen naquid cuidte chuiquiono,’ queshun cuidte chuiquidën chuiquioposh.

<sup>6</sup> Aden chiashic Esus: —Choded-chodedquin chidon chuoasho tantiash: “Mibi icsamboen naquid cuidte chuïnu,” queposh icsambocquid cuidte chuiquid. <sup>7</sup> ¿Adomboembidi ambi cuënaidon, Ëbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

*Padiseyobo abentsëc icnuc ancanquidën utsin na bedtequid bedmianiaid chiaid*

<sup>9</sup> Adashic, bëdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: <sup>10</sup> —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. <sup>11</sup> Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adechbidi, choboed, ancanquidën utsin na bedtequid bedmianiaid-padquidpenquio nebi, Papa. <sup>12</sup> Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaqin abentsëc mibi menedenembi, Papa, quequin padiseyobon chuiposh.

<sup>13</sup> “Aden padiseyobon uanoshon chuïnubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Ëbi tantiaquin pauc, Papa,’ queposh —quepanëdash Esus.

<sup>14</sup> Aden chiashic: —Chuïnu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yacbimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuoaindac —quepanëdash Esus.

*Bacuëbo Esus yacno bë-bëaid  
(Mat 19.13-14; Mad 10.13-16)*

<sup>15</sup> Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

<sup>16</sup> Aden chuisho tantiash Esus nadpanëdash: —Bacuëbo nidmenquiocquin con dayunquo cho-chome. Chiac, Abimbo caic, quequin tantiaquidquo bacuëbo nec. <sup>17</sup> Adomboembidi, Nuquin Papa yacno tabadte iquec, quequin chiac bacuëbon badedquo tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

*Nëbi caniquid chuiquidën chiaid*

*(Mat 19.16-30; Mad 10.17-31)*

<sup>18</sup> Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquo icquin ëbi chui. Tiantianu —capanëdash Esus chuiquin.

<sup>19</sup> Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

<sup>21</sup> Adoaquien: —Canidotsëcquimbi aden nadeniondambi —quepanëdash nëbi caniquid.

<sup>22</sup> Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

<sup>23</sup> Aden Esusën chuisho tantiash aton na dadpen tantiec unësquo yanshun Esusën chiacpaden natiapimbo icpanëdash. <sup>24</sup> Adsho isun: —Aton na dadpen tantiaquin Nuquin Papa badedquo tantiatiapimbo adquidën iquec. Nuquin Papa tantienquo yec abi yacno puduedtiapimbocquid iquendac. <sup>25</sup> Adquiecbidi shëcuë pistsëcquid puduedte nidaidën capuquid dapan badedquo tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquo tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

<sup>26</sup> Aden chuisho tantiash iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

<sup>27</sup> Adoaquien: —Mates ambibi tantiacpadeq puduedtiapimbocno Nuquin Papambien abi yacno yuedanquid mates tantiamendac —quepanëdash Esus.

<sup>28</sup> Adoaquien Petedo: —Mibëd icnu, quequin ëbëd icquidbëdta con natedi nianondambi, icbo —quepanëdash Esus caic.

<sup>29</sup> Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi

yacno nidacsho bédamboshë icmiaid mibi iquendac —quepanédash Esus Peto chiec.

*Ëbi unës uaindac, quequin Esusën chiaid*

*(Mat 20.17-19; Mad 10.32-34)*

<sup>31</sup> Adashic, abéd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uami-ampicpaden icsambocquin ëbi nabanendac. <sup>32</sup> Anoshon bedshun buan-shun isadaidbon isadaidpemo ëbi menendac. Aden meniac bedshun ëbi mamënsumbededquimbi, icsamboen chuibededquimbi, dacuishtu-abededquimbi, dacuesbededtsëcquien mëyanshun ëbi cuesten dectan-quin unës uaindac. <sup>33</sup> Adoaqui daëdec ushtanec uincuenendabi —quepanédash Esus abéd icquido chiec.

<sup>34</sup> Aden abi unëste Esusën chuisho abéd icquidon bédamboen tantien-quo yec tabadpanédash.

*Bëshuaid bédamiaid*

*(Mat 20.29-34; Mad 10.46-52)*

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanédash. Matses cuensho tantiash: “Mitsana bedtequid bec cho,” quepanédash bëshuaid. <sup>36</sup> Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanédash. <sup>37</sup> Adoaquien choquid abentsëc: —Nasaded yacnoësh choquid Esus cuenec nec —quepanédash.

<sup>38</sup> Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanédash Esus cuënquin.

<sup>39</sup> Adshobien: —Adec cuëdenquo yec tsad —capanédash choquidon. Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanédash bëshuaidën.

<sup>40</sup> Adoac nidtuidshun Esusën: —Aidi bec cho —cac abi yacno bësho isun: <sup>41</sup> —¿Atotsimbi mibi nashumpeba? —capanédash Esusën bëshuaid chuiquin.

Adoaquien: —Bëshuaid nebique. Ëbi bëucshune, Icbo —capanédash.

<sup>42</sup> Adoaquien: —Mimbi tantiacpadomboen padpidemboen is —cac <sup>43</sup> badedquo isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanédash. Aid bédansho isun Esusbéd nidanequidotedishuntsen Nuquin Papan naid chuibededpanédash.

## 19

*Saqueyo, ancanquidën utsin na bedtequid bedmianiaid dapa*

<sup>1</sup> Adec nidequi Edico caid yacno datambidanec Esus nidpanédash.

<sup>2</sup> Edico yacnocquid Saqueyo cuëmëdquid icpanédash. Aidi ancanquidën utsin na bedtequid bedmianiaid dapa iquec aton na dadpen icquid icpanédash. <sup>3</sup> Adoaid icquimbi utsi, Esus cuenec, qesho tantiash, ¿Mitsipadquidquo Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquo icpanédash. <sup>4</sup> Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanédash.

<sup>5</sup> Adec tsadnubien aid podquedënquo choec nidtuidshun Saqueyo bushcuçtsëcquid istuidshun Esusën: —Nëbi mibi yacno nuquibi tabadec nidnu. Baded bud —cac <sup>6</sup> Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

<sup>8</sup> Adnubien, aton shubu nuntanuësh nidtoash Saqueyo: —Chuinu. Tantia, Içbo. Nëbi con na mais uaquin aton na nibëdquid menezun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chieç.

<sup>9</sup> Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. <sup>10</sup> Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

*Aton na bedtequid 10ted icquid meniaid*

<sup>11</sup> Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash.

<sup>12</sup> Aden tantianubi tantiaquidquido icquin utsi chiacimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ <sup>13</sup> qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

<sup>15</sup> “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid çtedtsi daëd uapashba? abibi qeshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

<sup>17</sup> “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

<sup>18</sup> “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

<sup>19</sup> “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

<sup>20</sup> “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. <sup>21</sup> Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin

na utsin nitsinaidbidi bedbanquid mibi icsho isash chushcanushe quish dacuëdec tsadteniobi,' queposh.

<sup>22</sup> “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? <sup>23</sup> ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,' queposh abi chuiquid.

<sup>24</sup> “Aden aton na daëd uaisa chuishumbic iccuededquido chuiquin: ‘Ëbi chieshënnquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,' caposh abi chuiquidën.

<sup>25</sup> “Adoaquien: ‘Aton na dadpen iqueque. Aid menenda, chuiquid,' queposh iccuededquido.

<sup>26</sup> “Adoaquien: ‘Chuinu. Tantia. Ëmbi chiapaden nabanquin daëd uacsho isun ëmbi meneboed daëd uaquin menembi. Ëmbi chiapaden chieshquin daëd uainquiocsho isun ëmbi meneboed bedshunembi. <sup>27</sup> Adembidi ëbi chieshënec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,' caposh abi chuiquidën — quepanëdash Esus.

*Chuiquid dapabimboec yec Edusaden yacno Esus choaid  
(Mat 21.1-11; Mad 11.1-11; Uan 12.12-19)*

<sup>28</sup> Aden chuibanashic Esus Edusaden yacmi nidequi anoentsëqui choash nidtuidpanëdash. <sup>29</sup> Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: <sup>30</sup> — Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta. <sup>31</sup> Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita — quepanëdash Esus.

<sup>32</sup> Adoac nidshun istuidtanquin <sup>33</sup> cabayobitsecquidëmpi tënëshaid tëchicsho isash: —¿Atotsi canuen aid tëchique? — capanëdash icbon.

<sup>34</sup> Adoaquien: —Con Icbo bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

<sup>35</sup> Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash. <sup>36</sup> Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

<sup>37</sup> Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

<sup>38</sup> —Nuquin Papan chomiaid ambi chuiquid dapa icmiaid ambi bëdambo icmiaidquibidi nec. Nuquin Papa yacno abëdi bëdamboec tabadequi icsaisatedi iquendac —quepanëdash iccuededquido comapenec cuëdcuededec.

<sup>39</sup> Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

<sup>40</sup> Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

<sup>41</sup> Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: <sup>42</sup> —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. <sup>43</sup> Yucash choquin uimanëmëñquidon mibi cuentiapimbo noc tsicatebudcuenendac. <sup>44</sup> Aden mibi tsicatebudcuenshun min bacuëbobëdtabi naimbudquin mibi unës uashun nendac. Min shubutedi nibëdquiendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquido icnuc anocquido chiacbimboec adpanëdash.

*Nuquin Papa tabadte shubu uashunaid yacnoshon cuemiaid*

<sup>45</sup> Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash. <sup>46</sup> Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

<sup>47</sup> Adoshombic, badiadquidën-badiadquidënquieic Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. <sup>48</sup> Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunenuen bedtiapimbo icpanëdash.

## 20

*¿Tсандан chuibanta caid mibi ne?*

*(Mat 21.23-27; Mad 11.27-33)*

<sup>1</sup> Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. <sup>2</sup> Cho-choshon: —¿Tсандан chuibanta caid mibi neque? Tantianu. Ëbitedi chui —capanëdash.

<sup>3</sup> Adoaquien: —Ëmbia tantianu. Ëbi chui. <sup>4</sup> ¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi quesho tantiash Esus nadpendac. ¿Atotsieshun Uanën chuisho mibitedishun tantienquio icponda? <sup>6</sup> Matsesën nata caid Uan pado niondash, ëbitedi quesho tantiashun iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

<sup>7</sup> Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

<sup>8</sup> Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

*Neshcashunquidon icsambocquin naid*

*(Mat 21.33-44; Mad 12.1-11)*

<sup>9</sup> Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: <sup>10</sup> ‘Tiedën caniquid ënden bacuëpash. Ëbi neshcashunquidën musucaid con na bedmenu,’ queshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh. <sup>11</sup> Adoshombic, icbon aton tied yacno ambi namiaid utsi nidmeoposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. <sup>12</sup> Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

<sup>13</sup> “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

<sup>14</sup> “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. <sup>15</sup> Aden cuesunian icbo unësan aton natedi nuquin na ictsandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“‘Min mado cuesuniosh,’ quequin utsin chiac ¿atotsi tied icbon napec? <sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquio icpashun —quepanëdash iccuededquido. <sup>17</sup> Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuiampid nad iquec: “Shubu uanuequidën isuidaid buintad utsin ambia nitsinaid icposh.” <sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac —quepanëdash Esus.

<sup>19</sup> Aden Esusën chuisho tantiash: —Nuqui naid chiacbimboen chiech Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

*Sesadën shocoshëmpi neque. Mene, quequin chiaid*

*(Mat 21.45-46; 22.15-22; Mad 12.12-17)*

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi,



quequin ismiac bimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaid pembo ancaquidën Esus bedpashun, quequin tantiaquin nidmepanëdash. <sup>21</sup> Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. <sup>22</sup> Adquid mibi icquin ëbi chui. Tiantianu. ¿Ancanquid Sesad cuëmëdquid isadaid pembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun cho boedën icsamboen tantiaid tantiaquin Esusën nadopanëdash: <sup>24</sup> —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, quesho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquid bimboec onquec, quequin tantiaquin icsamboen chuimeti-pimbo yec tsusiobon chomiaid otacquo tabadcuededpanëdash.

*Uincuen uaid chido bedesa nec, quequin chiaid*  
(*Mat 22.23-33; Mad 12.18-27*)

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aidedtada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. <sup>32</sup> Yuecash chidotsen unësoaposh. <sup>33</sup> Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tiantianu —quepanëdash saduseyobo Esus caic.

<sup>34</sup> Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. <sup>35</sup> Uincuen uate ushë choan Nuquin Papan bëdamboen isaïdo abëdi tabadquin chido bedenquo iquendac. Adembidi, aton champi menenquo aton papan iquendac. <sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. <sup>37</sup> Adembidi chuïnu. Tantia. Cuëtëmpi nëdënquiac bimboecquid isun Moisesën dada uapampid nec. Cuëtë nëdënquiac bimboecsho isun Nuquin Papa chuïquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. <sup>38</sup> Moisesën tsusedpabo ambi cho boedën den unësampidën nami chodquiaidën papa cain Nuquin Papa cuëntiapimbo iquec. Aton nami chodquiash abi tantiaquidquo icquin

tantiec tsadquidën papa cain Nuquin Papa cuë nec —quepanëdash Esus saduseyobo chiec.

<sup>39</sup> Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. <sup>40</sup> Aden Esusën chuisho tantiashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaid  
(Mat 22.41-46; Mad 12.35-37)*

<sup>41</sup> Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec?

<sup>42</sup> Dabidën ambibi Sadmo caid dada uaquin naden chuipampic:

“Icho utsi yec con mado mibi chiembique. Tantia, quequin chiec icho dapa nadpampic:

Ëquë con dayun abiucquio cainec tsadec cho

<sup>43</sup> ma mibi chieshënquidtedi mimbi namiaid ma icpanu,’ ”

quequin Nuquin Papan Esus chiaid Moisesën dada uapampid nec.

<sup>44</sup> Aden Dabid padon dada uaquin ¿mitsipadomboentsibi con icho cashumbi con mado ëbi caoapampic Dabidën? —quepanëdash Esus abi chieshënquido caic.

*Naden nata quequin chiaid tantiamequidpadquid iquenda, quequin chiaid*

*(Mat 23.1-36; Mad 12.38-40; Duc 11.37-54)*

<sup>45</sup> Aden chuishun iccuededquidon tantianubi abëd icquido Esusën nadopanëdash: <sup>46</sup> —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda. <sup>47</sup> Aidon bëdamboen nabanachimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden bëdamboen nabanachimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

## 21

*Nianten piucquid shocoshëmpi meniaid  
(Mad 12.41-44)*

<sup>1</sup> Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaïdo Nuquin Papa tabadte shubu nacnemetec cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi <sup>2</sup> nianten aton na nibëdquidëmbi aton na bedtequid shocosh daëd ictsëcquid sandosho ispanëdash. <sup>3-4</sup> Adosho isash: —Chuïnu. Tantia.

Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite*

*(Mat 24.1-35, 42-44; Mad 13.1-37)*

<sup>5</sup> Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

<sup>6</sup> Adoquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepanëdash Esus.

<sup>7</sup> Adoquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiante icpeque? Tantianu. Chui —quepanëdash utsibo.

<sup>8</sup> Adoquien: —Cho-choshon muaquin chuisho tantienquioceta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda.

<sup>9</sup> Adecbidi: “Cuesnancuededec,” quesho tantiash dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. <sup>11</sup> Adecbidi, nidaid utsi-utsiec yacno canchednuec ishcud-ishcudendac. Adecbidi, utsi-utsiec yacno bunquio iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucuësh natiambo icsho mimbi isbededendac.

<sup>12</sup> “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac <sup>13</sup> aidotsen tantiaquid yantsiash qeshun ëbi chuibanta. <sup>14</sup> Aden buanaqui, ¿atotsimbi ancanquid cape? quequin tantiec tsadenda.

<sup>15</sup> Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. <sup>16</sup> Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. <sup>17</sup> Èbi tantiaquid chieshënquid dadpen iquendac. <sup>18-19</sup> Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimbi tantiendac. <sup>21</sup> Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna. <sup>22</sup> Aid ushë icnuc Nuquin Papan chiapadomboen cuidtequid iquendac. <sup>23</sup> Aid ushë chonoc matses utsibon

Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiacquendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup>Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

<sup>25</sup> “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiantec icsho isash, Uinsadpambo iquec, quec comapenec dacuëdec matsestedi tabadcuëdedendac. Acte natiambo chëuëdsho isash adquiecbidi comapenec dacuëdec matsestedi tabadcuëdedoaindac. <sup>26</sup> Adecbidi, uispa utsi-utsiec paëdted-paëdtednubi utsi-utsiec tidiidquendac. Adsho isash matses dacuëdec padishendac. <sup>27</sup> Adnubini Nuquin Papan chomiaid matsesaid ëbi dasiuidaid bëchomauanquieq ushë chënquiacimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. <sup>28</sup> Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta —quepanëdash Esus.

<sup>29</sup> Aden chuishumbic ambi chuiboad ushë chote tantiamenuen nadopanëdash: <sup>30</sup> —Cuëtempi bacuëacsho isash, Ènden suc seccuduquiac nëbi seta taëec, quequin matsesën tantiec. <sup>31</sup> Adembidi ëmbi chuiboad icsho isun, Nuquin Papabëd tabadte ushë choec, quequin mimbi tantiec. <sup>32</sup> Abimbo chiembique. Tantia. Èmbi chuibamboed naimbudabicnuc con tan matses isadaidbo naimëdbudenquio iquendac. <sup>33</sup> Abubëdta naimbudtequid nidaid nendac. Èmbi chiaid abimbo iquendac.

<sup>34-35</sup> “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiatë ushë choec, quequin tantienquio yec chieshquin badiadquidën-badiadquidënquien paëmbocquid actenepac. Adecbidi aton na bednuc abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. <sup>36</sup> Ènquiocquien aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

<sup>37</sup> Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieq macuësh Odibos caid yacno nidash tabadtenepanëdash. <sup>38</sup> Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

## 22

*Esus bedmenu, quequidquio Udas*  
(Mat 26.1-5, 14-16; Mad 14.1-2, 10-11; Uan 11.45-53)

<sup>1</sup> Adashic, nami uabicquid pete tantiate ushë, Pascuas caid, anoentsëqui yampanëdash. <sup>2</sup> Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. <sup>3</sup> Adnubien Udas cashumbic Iscadiote caid Esusbëd icquid dapudedshun Satanasën tantiamiac <sup>4</sup> Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. <sup>5</sup> Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuquin. <sup>6</sup> Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembali, quequin isted-istedpanëdash Udasën.

*Ënquin nidaidëshun Esusën pebanaid*

*(Mat 26.17-29; Mad 14.12-25; Uan 13.21-30; 1Cod 11.23-26)*

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. <sup>8</sup> Aid ushë chonoc Uambëdta Petedo chuquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoaquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempänëdash.

<sup>14</sup> Adashic, inchëshën choash abëd icquidobëd pete sante cuate dayun uequi Esus: <sup>15</sup> —Ëbi mëyante yanabicnuc bëyuc tishaid cuesunianquidën cuesunenuiocquin matanampid tantiaquin pec mibëdi tabadtiadquio yanobi. <sup>16</sup> Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

<sup>17</sup> Adoshombic dëshote sananec Nuquin Papa chiec onqueshun acantanquin abëd icquido menec: —Në, aniactse-aniactsen acban mibitedishun. <sup>18</sup> Tiedën caniquid ënë nidaidëshun padpiden aquenquio iquen-

dambi. Nuquin Papa yacno choash tabadquidobëdtambi ashunquo aquendambi —quepanëdash Esus.

<sup>19</sup> Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacscho ëbided cuidquin mëyanquin cuesuniad tantiaquin pebeded —capanëdash Esusën.

<sup>20</sup> Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe queshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esused ciudadac, quequin tantiatequidquo nendac. <sup>21</sup> Ëbi chieshënquido ëbi bedmenuequin chuiquid pete sante dayun ëbëdi uec. <sup>22</sup> Nuquin Papan chiampicpaden ëbi matsesacscho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

<sup>23</sup> Aden Esusën chuisho tantiaash abëd icquido: —¿Midacquidien capec? —quecuededpanëdash.

<sup>24</sup> Adashic: —Dosedet nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. <sup>25</sup> Adec chushcanansho tantiaash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquo icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. <sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. <sup>28</sup> Ëbi chieshënquido icnuc ëbi nianesa <sup>29</sup> icsho con Pan ëbi chuiquid icmiacpadquid chuiquid mibitedi icmendambi. <sup>30</sup> Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid  
(Mat 26.31-35; Mad 14.27-31; Uan 13.36-38)*

<sup>31</sup> Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantankin ëbëd icboedi mibi cuëshëdmetiadquio iquec. <sup>32</sup> Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquo iqueque. Yuadnushe queshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtsimbosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

<sup>33</sup> Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icho —quepanëdash Petedo Esus caic.

<sup>34</sup> Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

*Buanenda, queboedëmbi, Buanta, quequin chiaid*

<sup>35</sup> Aden Petedo chuishumbic abëd icquidtedi chuiquin: —Mitsana bedtequid buanenuio yec shictoachte buanenuio yec dashcute utsi buanenuio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

<sup>36</sup> Adoaquien: —Ënden adquid buanenda, queboedi, Èbi nibëdnuc mit-sana bedtequid shictoachtebëdtabi buanta. Chështe bednu, qeshun mit-sana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

<sup>38</sup> Adoaquien Esusën chuiboed tantienquio yec abëd icquido: —Në, chështe daëd iqueque. Is, Icho —quepanëdash.

Aden abëd icquidon tantienquiocsho isash: —Ai, padi —quepanëdash Esus.

*Macuësh Odibos caid yacnoshon Esusën Nuquin Papa chiaid*

*(Mat 26.36-46; Mad 14.32-42)*

<sup>39</sup> Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. <sup>40</sup> Adec nidequi abi tabadteniacno choshon Esusën: —Chieshëmënkuidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. <sup>41</sup> Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: <sup>42</sup> —Mëyanquin mibi unës uanu, ëbi chieshënquidon casho tantiash bunenuio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. <sup>43</sup> Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. <sup>44</sup> Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

<sup>45</sup> Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: <sup>46</sup> —¿Atotsi quiash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

*Esus bedaid*

*(Mat 26.47-56; Mad 14.43-50; Uan 18.2-11)*

<sup>47</sup> Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi

tanchoccanuesho isash: <sup>48</sup>—¿Ëbi matsesaid icsho bedmenuen tanchoc-caquinda ëbi chieshënquido isme, Udas? —quepanëdash Esus.

<sup>49</sup> Aden Udasën nac Esus bednuesho isash Esusbëd icquido: —¿Chochoquido nuquida cuesten cuespe? —quec <sup>50</sup>onquetanquin abentsëcshun isadaidbo tsusio dapan yuan pabiate opioc pateshunepanëdash.

<sup>51</sup> Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bëdamepanëdash.

<sup>52</sup> Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, queshunda utsin-utsinquien chështe sananubi utsin-utsinquien cueste sananec cho-chopec? <sup>53</sup> Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

*Ëmbi isacmaid nec, Petedo quiaid*

(*Mat 26.57-58, 69-75; Mad 14.53-54, 66-72; Uan 18.12-18, 25-27*)

<sup>54</sup> Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. <sup>55</sup> Adec choec umanuc cuëte dëtsiadaoaid cuëec utsibo tabadacno Petedo cuëte cuëec tsadpanëdash. <sup>56</sup> Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

<sup>57</sup> Adoaquien: —Bëboed ëmbi isacmaidquio nec —quepanëdash Petedo.

<sup>58</sup> Adashic, yuecpectsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

<sup>59</sup> Adashic yuec-yuecpectsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

<sup>60</sup> Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdampanëdash. <sup>61</sup> Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash <sup>62</sup> unësquio yec umanuc nidash Petedo shubiquiopanëdash.

*Esus sondadon mamënsnunaid*

(*Mat 26.67-68; Mad 14.65*)

<sup>63</sup> Adshumbic Esus cuenushe queshun abi isquidon, sondadon, Esus mamënsnunbededquin cuesbededpanëdash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin ¿midaquidën mibi nëbi cuesequë. Tantianu. Chui —capanëdash Esus chuiquin. <sup>65</sup> Aden cuesbededquin Esus icsamboen chuipanëdash.

*Isadaidbo tsusiobo yacno Esus buanaid*

(*Mat 26.59-66; Mad 14.55-64; Uan 18.19-24*)

<sup>66</sup> Adshumbic badiadnubi isadaidbo tsusiobo iccuededacno Esus buanshun <sup>67</sup>nënantanquio nidtomesho isash: —Nuquin Papan chomi-aid, Quidistu caid, nebi, quëcta ique? Tantianu. Chui —quepanëdash isadaidbo tsusiobo Esus caic.



Adoaquien: —Ëmbi abimbo chuisho mibitedishun tantienquo iquendac. <sup>68</sup> Adembidi, ¿Mitsipadquidquo Nuquin Papan chomiaid neque? Tantienu. Ëbi chui, cac ëcbedenquo mimbi iquendac. <sup>69</sup> Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquo Nuquin Papan dayunquo tsadendabi —quepanëdash Esus isadaidbo tsusiobo tantiaequin chiec.

<sup>70</sup> Adoaquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

<sup>71</sup> Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Ünës uatiad, quequin tantiashun, Esus icsaosh, quequin chuitiadquiocquin chuita, cainquo iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

## 23

### *Pidato yacno Esus buanaid*

(*Mat 27.1-2, 11-14; Mad 15.1-5; Uan 18.28-38*)

<sup>1</sup> Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobedi nidtoshon Esus bedshun Pidato yacno buampanëdash. <sup>2</sup> Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

<sup>3</sup> Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquo abimbo iquec —quepanëdash Esus.

<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoaquien: —Ambi tantiamiaidënquo Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiaméaposh —quepanëdash isadaidbo tsusiobo Pidato caic.

### *Edodes yacno Esus buanaid*

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnü, quequin ambibi tantiec <sup>9</sup> Esus chuimenu quec Edodes onquepanëdash. Adoaqui Esusën ëcbedenquo icpanëdash. <sup>10</sup> Adnubien isadaidbo tsusiobo: —Esus icsamboquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin mamënshumbededshumbi chuiquid

dapan dashcutebimboecquid abichobicquid Esus dasiunshun Pidato yacno buameoapanēdash. <sup>12</sup> Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanēdash. Adoac Edodesbēd Pidato bēdambo yampanēdash.

*Esus cuesten dectameta quiaid*

(*Mat 27.15-26; Mad 15.6-15; Uan 18.39-19.16*)

<sup>13</sup> Adashic, isadaidbo tsusiobobēdta isadaidbo utsibo chomeshun <sup>14</sup> Esus ismetanquin Pidaton nadopanēdash: —Nēid dada bēash: “Cuēshēdmianquid nec,” quequin mimbi ēbi chioc. Adoac aibdēdi onquiash, ¿Cuēshēmianquidta nedic? quendabi. <sup>15</sup> Aden ēmbi tantiacpadomboen tantiaquin Edodesën ēbi yacno chomeoaposh. Esus unēs uainquioctiadquidi nec. <sup>16</sup> Aden tantiaquin mēyanshun aidi nidmenuna —quepanēdash isadaidbo tsusiobo caic.

<sup>17</sup> Aden chiac naden isadaidbon tantiapanēdash. Setan-setanquien icsambocquid con matses quēnēn nauedaaid abentsēc ambi nidmiacpaden nēbi adquid utsi Pidaton nidmetsiash, quequin tantiec isadaidbo nadec cuēdcuededquin: <sup>18</sup> —Nēid Esus caid unēs uatiadquidi nec. Mimbi quēnēn nauednēdaaid Badabas cuēmēdquid puduemeta —capanēdash comapenec cuēdcuededquin isadaidbon. <sup>19</sup> Ancanquid bunenquiocquin utsibo cuēdcuededmiondaaid utsi cuesuniondaaidbidi Badabas icsho quēnēn nauedmepanēdash.

<sup>20</sup> Adec isadaidbo cuēdcuededsho tantiash Esus nidmetiadquio iquec: — Esus cuidenquioctiadquidi nec —quepanēdash Pidato isadaidbo caic.

<sup>21</sup> Adnubien: —Cuesten dectame —capanēdash isadaidbon yuec comapenec cuēdcuededquin.

<sup>22</sup> Adec cuēdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantuanu. Ma unēs uainquioctiadquidi neyoc. Aden tantiaquin mēyameshun Esus nidmēmbi —quepanēdash Pidato.

<sup>23</sup> Adoaquien: —Cuesten dectame —quepanēdash cuēdcuededoaid isadaidbo Pidato, Ai, camenuc.

<sup>24</sup> Adoac iccuededquidon chiacpaden namenuc <sup>25</sup> Pidaton: —Utsi cuesuniondaaid Badabas puduemeshun Esus cuesten dectameta —capanēdash Pidaton cuesten dectamēnquido chuiquin.

*Esus mēyanaid*

(*Mat 27.32-44; Mad 15.21-32; Uan 19.17-27*)

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bēquedtuiddanquin Esus dectante cueste Simon buamiac Esus tsibambēpanēdash. <sup>27</sup> Adec Esus nidsho isun matses dadpenshun shubiquin tsibanampanēdash. Adembidi abi tsibanquid chidobo icpanēdash. <sup>28</sup> Adec chidobo abi tsibanec shubisho tantiash bidiadshun isec Esus: —Ēbi tantiec shubienda, Edusaden yacnocquidon chidobo. Mibibi tantiadec min bacuēbobēdta tantiec shubicuededta. <sup>29</sup> Yuecash mēyantequid ushē choendac. Aid ushē chonoc bacuē tishiapimbocquid caic utsibo nadendac: “Bacuēbo nibēdquid icquin min bacuēbo natiasho isenquio mimbi iquec. Adquid yec bēdamboshē mibitedi iquec.” <sup>30</sup> Mēyantequid ushē chonoc matses utsibon natiambocquin mēyanaquin naden mimbi Nuquin Papa chiendac:

“Natiastianque. Acte quiusudquid macuësh dapa catashmetabi, Papa, mibi queudac.

Adecbidi, Acte quiusudquid macuësh masiametabi, Papa, utsi queoaindac.”

<sup>31</sup> Èbi buansho isec shubiequi, Èbi mëyantequid ushë choec, quequin tantiesia mibi icpec. Nèdënquenquioctiadquidi achuëshquiocquid nèdëncasho isash: “¿Tanunquiocquid badedquio nèdënquenquio icpec,” quecta mibi icti? Adembidi: “Cuidenquioctiadquidi nec,” queboedëmbi èbi icsaisa unës uasho isash: “¿Èbitedi icsambocquid comapenen cuidenquio icpec,” queoapecta mibi ique? Ai, quequin tantiatiad —quepanëdash Esus.

<sup>32</sup> Adnubien Esusbëdta icsambocquid dada daëd nidmequimbi <sup>33</sup> macuësh mapi canite caid yacno choshombi èquë daëd dectambudcuentanquin nënantanquio Esus dectampanëdash. <sup>34</sup> Dectanac diadequi Esus Nuquin Papa caic: —Èbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampañdash.

<sup>35</sup> Adnubien matses dadpeshun isnubi Isadaidbo tsusiobo isec tabadquin mamëshshumbededec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamëshshumbedequin paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac èbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onquesho tantiasch aidbëdta dectamboed utsi: —¿Aidi unës uatequid yacpadquid mibi yec, Nuquin Papan èbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid èbi daëdi nec. Aidi bédambocquin nabanquid icsho cuidenquioctiadquidi nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin èbi bédamboen tantiaquin nata —quepanëdash Esusbëdta dectamboed utsi.

<sup>43</sup> Adoquien: —Abimbo chuinu. Tantia. Nëid ushëmbi abuc èbi bédamboec tabadacno èbëdi mibi iquendac —quepanëdash Esus abëdta dectamboed abentsëc chiec.

*Esus unësaid*

*(Mat 27.45-56; Mad 15.33-41; Uan 19.28-30)*

<sup>44</sup> Adec onquenubi ushë cuembo yanuc bëtinacimboec inchëshquio yashic ushë budtsan chënquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quënën dashcute

bitsipambocquid tsincabudquin dectanëdaid tembi daëdquio yec canchedbudcuempanëdash. <sup>46</sup> Adnubien unësbudec comapenec cuëdec: — Mibi yacno ëbi yuedta, Papa —quiash Esus unësbudpanëdash.

<sup>47</sup> Adec Esus unëso isequi ambi isoedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niösh. Aidi unësenquiocriadquidi unës uaposh — quepanëdash. <sup>48</sup> Ambo tabadquin isquid utsibo Esus unëso isash unësquio yec aton shubuno nidanepanëdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

### *Esus nauedaid*

(*Mat 27.57-61; Mad 15.42, 47; Uan 19.38-42*)

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. <sup>51</sup> Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. <sup>52</sup> Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash. <sup>53</sup> Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

<sup>55</sup> Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. <sup>56</sup> Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempnanëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiacpadec tabadpanëdash.

## 24

### *Esus uincuenta*

(*Mat 28.1-10; Mad 16.1-8; Uan 20.1-10*)

<sup>1</sup> Adashic, sabado inchëshbudtsëqui seis yanuc chonoadtemaid ushë naimëdun badiadnuc danoshcanun ambi nacnemboed buanec Esus nauedhocno isec chidobo nidpanëdash. <sup>2</sup> Ambo choshon Esus nauedshun bëtashaid cuënote shëcniacsho isashi <sup>3</sup> shëcuën puduedash aton Icbo Esusën dada nibëdsho isec tabadpanëdash. <sup>4</sup> Adec tabadnubien dada daëd dashcute dasiuidachimboec dasiuidash chënquec chopanëdash. <sup>5</sup> Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaid nibëne? <sup>6</sup> Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? <sup>7</sup> Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanec daëdec ushtanec uincuenoaiibi,” quequin Esusën chiondash —quepanëdash dada daëd

chidobo caic. <sup>8</sup> Aden chiac chidobon Esusën chiaid abi bëpiscudaid padpiden tantiapanëdash.

<sup>9</sup> Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash. <sup>10</sup> Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuibeneta caido chuiapanëdash. <sup>11</sup> Aden chuisho tantiash: —Mimbi chiaid tantiatiapimbo iquebi —quecuededpanëdash iccuededquido. <sup>12</sup> Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquio yec.

*Emaus yacmi nidte*

(*Mad 16.12-13*)

<sup>13</sup> Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chinunash aidobëd nidpanëdash. <sup>16</sup> Aden abi chinuntuidsho isac utsi-bimboec Esus isadpanëdash.

<sup>17</sup> Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdtan matses dadpenshun bëdamboen isaid icposh. <sup>20</sup> Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. <sup>21</sup> Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuibededposh: “Esusën dada nauedbocno badiadnuc nidshun isac <sup>23</sup> nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. <sup>24</sup> Aden chidobon chuisho tantienquio yec ëbëd icquido Esusën dada nauedbocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

<sup>25</sup> Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc. <sup>26</sup> ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. <sup>27</sup> Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

28 Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun: 29 —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

30 Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshshun Esusën menebampanëdash. 31 Aden nasho isun badedi, Esus nec, quequin tantianubi Esus nibëdquio yampanëdash. 32 Adsho isash: —¿Podquedën choquin Nuquin Papan chiaid dada uampid chuisho tantias, Bëdambo yanobi, quenquiodabi ëbi daëdi ictio? —quepanëdash Esus yuedquido.

33 Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: 34 —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. 35 Aden iccuededquidon chuisho tantiasshun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

*Abëd icboedo yacno Esus chote*

*(Mat 28.16-20; Mad 16.14-18; Uan 20.19-23)*

36 Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

37 Adec aid chosho isash: Podo bitsi nec, quec dacuëdequi abëd icquido tabadpanëdash. 38 Adsho isashien Esus: —¿Atotsi quiash, ¿Esusida nepec? mibitedi quepe? 39 Con mëdantebëdta con taë is. Èbibi nebique. ¿Mëtoccaïd taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

40 Aden chuitanquin abi bëchun shuin mëtoccaïd chiuë aton mëdantebëdta aton taë Esusën ismepanëdash. 41 Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien 42 nuëcquid shëaid cuëshë menepanëdash. 43 Aden meniac bedshun Esusën pepanëdash abëd icquidon isnubi.

44 Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuëcshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuëc. 45 Aden chuishumbic abëd icquido tantiamequioquin: 46 —Nuquin Papan dada uamiampid nad iquec: “Nuquin Papan chomiaïd, Quidistu caid, mat-sesën mëyanquin unës uaqüi daëdec ushash uincuenendac. 47 Aid tantiasshun mibi icsaïd mimbi ënsho isash, Icsaquid nec, quenquio yec mibi icsaïd Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaïd utsi-utsiec yacno nidshun adomboembidi chuibanoindac. 48 Mëyanquin unës uaqüi ëbi uincuenacsho mibitedishun ispec. 49 Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aïdi Nuquin

Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

*Esus abuc indote*

*(Mad 16.19-20)*

<sup>50</sup> Adashic, bëyucanec nidequi Betania yacno anoentsëqui choash nid-tuidshun aton mëdante abuc sananquin ismec: —Nëidtedi bëdamboen ista, Papa —quepanëdash Esus. <sup>51</sup> Aden chiacsho abëd capucuenequido niamequin Esus aton Papan abuc indopanëdash. <sup>52</sup> Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nited-nitedquin Nuquin Papan naid chuidenepanëdash.

Padi. Aidedtada uambi, Teyopido.

## UANËN DADA UAID

### *Nuquin Papa tantiamianquid chiaid*

<sup>1</sup> Ēndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamianquidquio nec. <sup>2</sup> Aidëmbi Nuquin Papabëd icquin <sup>3</sup> abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. <sup>4</sup> Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiacbimboecnuc tantiamianquidbidi Esus nec. <sup>5</sup> Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niac-niaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

<sup>6</sup> Aden Esusën chuibenabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. <sup>7</sup> —“Nuquin Papa yacnuësh abi tantiamequidquio choendac,” quequin Uanën chuibansho tantiashun ma dadpeshun ambi chuibod tantianu —quequin Nuquin Papan con shënisio abi chuibanquid icmepanëdash. <sup>8</sup> Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. <sup>9</sup> Aden ambi chuiboedquio Nuquin Papa tantiamenuc matsespanëdash Esus.

<sup>10</sup> Adash matsesbëd tabadsho ambi matses uaidombi tantienquio icquin chieshëmpondash. <sup>11</sup> Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash. <sup>12</sup> Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. <sup>13</sup> —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

<sup>14</sup> Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Ēbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. <sup>15</sup> Aid con shënision chuipondash. —Ēmbi chuiboedquio nec. “Ēbi icsaquid icnuc bëdamboshë icquidquio choec,” ëmbi caboedquio nec. “Ēmbia Nuquin Papan chiaid chuibambon aidëntsen tsyuec choshon chuibanendac. Ēbi bëyuc tishaidi tishabi icnubi aid ënden icpampic,” ëmbi caboedquio Esus nec —quepondash con shënisio.

<sup>16</sup> Con shënision chiacpadquidquio icquin abi tantiaquido Nuquin Papan bëdamboen isaido icmeshun adenuidi Nuquin Papa nuqui bëdamboen ismec. <sup>17</sup> Ēndenquimboshë Nuquin Papan chiaid dada uaquin Moisesën



Nuquin Papan matses icsaido cuidte tantiamepampic. Padnuen Esuquidistun Nuquin Papan bédamboen iste tantiamequin: —Nadquio Nuquin Papa iquec —quequin matses bédamboen tantiamepondash. <sup>18</sup> Ambi isacmaidquio icsho matsesën Nuquin Papa bédamboen tantiatiapimbo iquec. Padnuen aton Mado abentsëcshunquio aton dayun tsadquidënquiobi matsesun Nuquin Papa bédamboen tantiamepondash. Aidquio chuinu. Tantia.

*Tsusiobon chuimiác Uan acten mentoanquidën chiaid*  
(*Mat 3.11-12; Mad 1.7-8; Duc 3.15-17*)

<sup>19</sup> Con shënisio Nuquin Papa tantiabenuid acten mentobenuid niondash. Aden acten mentobenesho isash Moisesën chiampid namequido aid chuimenuec cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shënisio chuituidpondash. <sup>20</sup> —¿Tsuntsin chiac nai? ¿Mimbembida nai? “Bédamboshë icquidquio Nuquin Papan chomendac,” quequin nuquin tsusedpan ¿dada uapampidta ne? —catuidpondash. Adoquien: —Padenquio. Aidpenquio nebi —quepondash. <sup>21</sup> Adshobien: —¿Tsumintsi ne? ¿“Naden naindami,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

<sup>22</sup> Adshobien padpidemboen: —¿Tsumintsimbo ne? ¿Mimbenquiobi-enda nao? Èbi: “Chuimetan,” caboed chiec nidnu. Baded ëbi chui —caquien: <sup>23</sup> —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuquec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque. Podqued andëdbanshunta,’

quiachimboen chuiquin: ‘Nuquin Icho choeque. Icsaid ënash bédamboec tabadta,’

quequin chiendac bëyuc choshon,”

quequin chuipampid nebi —quepondash con shënisio.

<sup>24</sup> Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. <sup>25</sup> —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: <sup>26</sup> —Nuquin Papan chiacpadomboen abi tantiabenuid acten mentobenec nebi. Èmbi aden bédamboen nanuc utsimbien bédamboenshë naindac. Aidi mibëdi tabadshobi ma mimbi tantienquio icboc. <sup>27</sup> Èmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bédamboshë icquid icnuc ëbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shënisio padiseyobo chiec. <sup>28</sup> Acte Odan caid uquë cuëmatsiucüesh shubu dadpen icquid Betania caid yacnuësh adpondash.

*Abided ciudadtequid nendac, Esus caid*

<sup>29</sup> Badiadshun padpiden con shënision matses acten mentobanoapon-dash. Aden mentobanubien Esus chopondash. Chosho isashien: — Is. Nuquin Papan namiaidquoio obeca bacuëbimboecquid choeque. Aidi isadaidbon obeca bacuëded cuidquin unës uacbimboec matses icsaid bedshunec abided cuidadec unësendac. <sup>30</sup> Ëmbi chianeboedquoio nec. “Ëbi bëyuc tishaidi tishabi icnubi aidi ënden icpampic,” quiash: “Ëbi bëdapabi icnuc bëdamboshë icquidquoio choendac,” quepobi. <sup>31</sup> Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidëmbi ëmbibi badedquoio tantienquoio iccombî. “Nuquin Papan chomiaid nec,” quequin tantienquoio iccombî —quepondash con shënisio.

*Esus mentoaid*

(*Mat 3.16-17; Mad 1.9-11; Duc 3.21-22*)

<sup>32</sup> Adashic abi onquec: —Nuquin Papan naden ismiac tantiabenombi. Aton Mayan aton dada nibëdquieç dëbimbimboec budec: “Matsadtoendac,” quebocpadequi Esus matsadtosho ispombi. <sup>33</sup> Adsho isash: “Adquidshenda caposh Nuquin Papan: ‘Acten mentoanguid icta,’ ëbi caboedën. ‘Con Mayan dëbimbimboec budec matsadtobedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Ëmbembi tantienquoio ictsenombi. <sup>34</sup> Aden ismiac: “Nuquin Papan Madombo Esus nec,” quequin tantiombi. Aden tantiaishun: “Nuqui caimboed Nuquin Papan chomiaidquoio Esus nec,” quequin mibi chieç nebi —quepondash con shënisio.

*Nëid dada uaquid Uan Esusbëdyanaid*

<sup>35</sup> Adashic badiadash ambi acten mentobambocno con shënisio nidoapondash. Aid tsibanequi nidoapondabi. <sup>36</sup> Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquoio obeca bacuëbimboecquid nec,” ëmbi caboed cueneque —quepondash.

<sup>37</sup> Adsho tantiatanequini con shënisiobëd iccondaïd utsibëd Esus chinunec nidpondac. <sup>38</sup> Nidquin chinunac bidiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquoio nec —quequin con onquetembi Dabi caondambi. <sup>39</sup> Adoac: —En isec cho —cac abi ushacno isec nidondabi. Ushë abucquoio icnuc puduedash yueç tabadec onquetaniash inchështsëcnubi chondabi.

<sup>40</sup> Èbëdtan Esus chinunondaïd Andedes niondash. Shubu dadpen icquid Betsaida caïd yacnuësh caniquid niondash. Aton buchi Petedo niondash. Petedobidi Simon capondash. <sup>41</sup> Adnubien Andedes aton buchi chieç nidpondash. Adec nidquin Petedo istuidash: —Nuquin tsusedpabon chuipampid Nuquin Papa yacnuësh choquid Mesias caïd istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

<sup>42</sup> Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaïd moco utsi uatiapimbo yachimboec mibi chieshtoenquoio icquid yanendac,” quequin mibi nidaïd moco cuënendambi —quepondash Esus Petedo caic. Con onqueten nidaïd moco cain Sepas capondash Esusën. Quidieco matsesën onqueten Petedo capondash.

*Esusën Uedipebëdta Natanaid istuidaïd*

<sup>43</sup> Badiadash: —Con nidaïd Cadidia caïd yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. <sup>44</sup> Betsaïda yacnuësh caniquïdbïdï nepondash aid. <sup>45</sup> Esusbëd icquïd yanashic dada utsitsen Natanaid caïd chïec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsïbon: “Bëdamboshë icquïd choendac,” quequin dada uapampicpadequi choshe. En isec cho. Shubu dadpen icquïd Nasaded caïd yacnuësh caniquïd neque. Osen mado nec —quepac caondash. <sup>46</sup> Adsho tantiash: —¿Nasaded yacnuështa dada bëdambo icquïd chopatsïash? Auëshquïo dada bëdambo icquïd chotiapimbo iquendac —quepac caondash Natanaid. Adsho tantiash: —En isquïec cho —quepac caondash Uedipe.

<sup>47</sup> Adoac choshobien Esusën: —Is. Isadaïdbombo neque. Muesambo nec —caquien <sup>48</sup> Natanaidën: —¿Mitsipaden ëbi tantïe? Mabi mimbi isacmaidquïo nepayoc —capondash. Adoacquien: —Uedïpen bedtanabi icnubi mïbi cuëte icueda caïd tayun tsadsho tantiombï —capondash Esusën. <sup>49</sup> Adsho tantiashumbien: —Nuquin Papan Madombobien mïbi nec. Comapenen tantïaquïd yec nuquin matses isadaïdbo chuiquïd dapambo mïbi nendac —capondash Natanaidën: —Istïapimbo yacno chïosh —quequin tantiashun. <sup>50</sup> Adoacquien Esusën: —“Cuëte icueda caïd tayun tsadsho mïbi tantiombï,” ëbi qesho ¿tantiashïa: “Nuquin Papan Madombobien nec,” badedquïo que? Padpïden comapenen tantïaquïn nabansho isun mimbi ëbi tantïaquïotsïandac. <sup>51</sup> Tanti. Mïbi chuïnu. Isadaïdbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aïdbëd tabadte Nuquin Papan ëbi tantïametïadquïo iquëc,” quequin tantïapampicpadomboen mïbi ëbi tantïendac. “Matsesun Nuquin Papan Madon matses abëd tabadte tantïamec,” quequin mïbi ëbi tantïendac —quepondash Esus abëd icquïdo chïec.

**2***Esusën ambembi actequïd uaid*

<sup>1</sup> Aden Natanaid chiash aton nidaïd Cadidia caïd yacnobi Esus tabadpondash. Ambo tabadec daëdec ushtsambi shubu dadpen icquïd Cana caïd yacnocquïdën isadaïdbon aton chïdo bedquin ismequin pemenuen aton shubuno matses dadpen cho-chomepondash. Adoac chochomiaïdobëd Esusën tita puduedpondash. <sup>2</sup> Esustsen puduedpondash. <sup>3</sup> Adec puduedash tabadquin uba chinaïd actequïd uesquin acbededpondash. Adsho isumbien anin Esus chuïpondash. —Actequïd naimëdoshe. Comapenen tantïaquïd icquin mïmbï tantïacpadomboen nata, mado —capondash. <sup>4</sup> Adoacquien: —¿Atotsï quequin mïmbï ëbi chuïpe, tita? Chïata. Con Pan tantïacpadënquïo naimbïque —quepondash Esus. <sup>5</sup> Adsho tantïatanquin anin yuabo actequïd cushtobanquïdo chuïpondash. —Con madon chïacpadomboen nata —capondash.

<sup>6</sup> Ambobi tëchu dapa 6tedï tabëcaïd icpondash. Mëpamëdtembo acte nua 120 dïtedos cactembi anïdboedi acte naimëdaïd icpondash. <sup>7</sup> Adnubien Esusën: —Në tabadquïdën acte cushtoban —cac cubu-cubuctsëcquïo

icnuc acte cushtobampondash yuabon. <sup>8</sup> Cushtobanacsho isun Esusèn: —Ueshun buanshun mibi ancaquid acmetan —cac acmetampondash.

<sup>9</sup> Adoac icquin tanaquien actequid bédamboshè icquid icpac caondash acte icboedi. —Nibèda damboedquio ¿mitsimbo bedpash? —quepac caondash yuabo ancaquid. Adsho tantiashun yuabon: —Esusènquobien naccosh —quequin tantiapac caondash. Adnubien yuabo ancaquidèn chido bednuequid chuipondash: —Aidèn actequid bēpash —queshun. <sup>10</sup> —Nuquin matsesèn actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsēcquidtsen acmenu,” quequid yendac. Aden mimbi nambo. Bédambo icquidquio ma mimbi nèbi acmianeyoc —quepondash yuabo ancaquid chido bednuequid chiec. Adnubien yuabon actequid bédamboshè icquid abitedi acmebampondash.

<sup>11</sup> Aden comapenen tantiaquid icquin ambembi actequid uaquin Esusèn tauamboen ismebempondash. —Nuquin Papa yacnuèsh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesèn chiampid Nuquin Papan chomiaidien nec —quequin tantiabenondambi.

*Esusèn chushcaquin cuemiaid*

(*Mat 21.12-13; Mad 11.15-18; Duc 19.45-46*)

<sup>12</sup> Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abèd icquido yec èbi yec quec Esusbèd nidaniondabi. Ambo daèdpactsec ushec tabadondash. <sup>13</sup> Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unès uainquio icquin Nuquin Papan matamiampid inchèsh tantiaquin obeca bacuè pec nèbi tabadeque. Isec nidnu. Nid —quianec nidanepondash. <sup>14</sup> Nidashic Nuquin Papa tabadte shubu uashunaid dapa daquènè uaidèn puduedondash nuntanquio puduedabi. Puduedshun isquien matses dadpen nèish yua chedobèd tabadpec. Baca bènè yec obeca yec dēbimbimboecquid quēnēmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabècaid dayun tabadpondash. Aido nidaid utsi yacnuèsh choquido aton piucquid dadpen bedshun ampeshunquin daèdpactsec menequido niondash. <sup>15</sup> Adec tabadsho istanquimbien Esusèn cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabècaidtsen bidiacbanquin piucquid siabudshumbampondash. <sup>16</sup> Adotanquimbic dēbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash.

<sup>17</sup> Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusèn nate chuiquin dada uapampic —quequin tantiondambi.

<sup>18</sup> Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin èbi isme —caquien <sup>19</sup> ismenquio icquin ompoacbimboen Esusèn chuipondash. Abibi cadequi: —Mimbi nèid shubu

icsa uabocsho padpiden nacnenoaindambi bēdambo icnuc. Daēdec ushquin nacnenquin nainendambi —quepondash Esus. <sup>20</sup> Adsho tantiahu Nuquin Papa tabadte shubu uashunaid dapa ca danec: —¿Badedquioda nacnempatsia? Nēid nacnenquin seta dadpenquioshē 46tedquiodi matamiac cadenec —quepondash con matses chuiquido.

<sup>21-22</sup> Yuecquio ictaneshun Esusēn aden chiaid tantiondambi. Unēs uacsho chococac daēdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daēdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

### *Dadpeshun Esus tantiauidaid*

<sup>23</sup> Nuquin Papa tabadte shubu uashunaid daquēnē uacnoshon cuemeshumbic Edusaden yacnoshontsen comapenen tantiaquin nabanquin Esusēn ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bēdiactsēc tantiatsēccondash. <sup>24</sup> Aden tantiatsēcsho ambembi tantiahu: —Ai, ēbi tantiaquidquio nec —quenquio icquin: —Ēbi bēdiactsēc tantiatsec —quequin tantiapandash. <sup>25</sup> Utsin chiambobi ambembi tantianēdash. Aden matses abitedishun otacquo tantiaid ambembi tantiaquidquio Esus niondash.

## 3

### *Esusēn Nicodemo caid chiaid*

<sup>1</sup> Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobēdtan aton matses namequid niondash. <sup>2</sup> Inchēshēn Esusbēd onquenuec chopondash. Choshombic aidēmbi: —“Nuquin Papan icmiacpadquid chuiquidquio mibi nec,” quequin tantiembi. Mimbī comapenen tantiaquin nabansho isun: “Nuquin Papan namiaidēnuidtsēquien adotsiash,” mibi caombi —quepondash.

<sup>3</sup> Adsho tantiahu: —Ai, adquid nebi —quenquio icquin Esusēn ompoacbimboen chuipondash naden. —Tantia. Mibi bēdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquio ictsiac <sup>4</sup>—quesho tantiahu: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. <sup>5</sup> Adsho tantiahu Esusēn: —Nuquin Papan Mayanēn tantiamiac: “Nuquin Papa tantiaquin ēbi icsaid ēntiadquio iquebi,” quiash bēdamboec tabadquid Nuquin Papabēd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadiapimbo iquendac. <sup>6</sup> Chidon tishaiduidtsēqui yec Nuquin Papabēd tabadiapimbo iquendac. Nuquin Papan Mayanēn chuca uaid Nuquin Papabēd tabadendac. <sup>7</sup> “Chuca uaiduidtsēqui Nuquin Papabēd tabadendac,” ēbi quesho tantiahu: “¿Midapaden chie?” quepequien mibi iquec. <sup>8</sup> Tantia. Mibi chuinu. Cunquequid isadenquio icquid nec. Isadenquio icquimbi cuncac cuēte ishcadsho isash: “Abi cunquec,” mibi quepec. Adquibidi isadenquio Nuquin Papan Mayanēn iquec. Isadenquio icquimbi aidēn chuca uaid bēdamboec tabadsho isun: “Nuquin Papan Mayanēn nac,” quequin mimbī tantiatsiac. “Nēid utsitsen natsiash,”

quequin mimbi tantienquoio icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

<sup>9</sup> Adsho tantiash: —¿Midapadec? —quepondash Nicodemo.  
<sup>10</sup> Adoquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. <sup>11</sup> Ēnden ushë utsin mibi chedo chiombi. Ēmbi isondaaidquoio chuiquinc ěmbi tantiondaaidquoio chuiquinc caombi. Adsho tantiash: “Tantiadenquoio iquec,” ma mibi queboc. <sup>12</sup> ¿Ēmbi chuiboed tantiadenquoio icnubi padpiden chuiquin ěmbi Nuquin Papan abi yacnoshon naid chuishomenda tantiatsia? <sup>13</sup> Nuquin Papa yacno matses nidtanambo iquec. “Istanombi. Nadquoio iquec,” quequin chuitiapimbo matses iquec. Ēmbien Nuquin Papa yacnuësh chondaaiděnquoio: “Nadquoio iquec,” quequin Nuquin Papa tantiamendac. <sup>14</sup> ¿Atotsi canuen nuquin tsusedpa Moisesën nisibimboecnuc shocosh nacnenaid dectampampic? “Nuquin Papan chiacpadec ma aid isec nisin piaid bědanu,” quequin cuesten dectampampic. Adomboembidi matses cuidmenquoio icnuec cuesten dectamědendabi ěbided ciudadec uněsec. <sup>15</sup> Ēbi tantiaquido uněsacsho cuidenquoio icquin Nuquin Papa yacno ěběd tabadmenuec adendabi —quepondash Esus Nicodemo chiec.

### *Nuquin Papan matses abitedi tantiaquin naid*

<sup>16</sup> Aden Esusěn abided ciudadec uněste chuipondash. Nuquin Papan: —Ma adec abided ciudadec uněsnu —quequin Esus chomepanědash. —Uněsquoio iquec —quequin matses abitedi tantiaquidquoio icquin Nuquin Papan cudasenquoio icquin matsesmeshun aton Mado abentsěcquiobi abided cuidpanědash. —Ēmbi adoaid con Mado tantiaquid uněsacsho icsaido cuidacno nidmenquoio icquin ěbědi tabadmendambi —quequin aton Madoded cuidpanědash. <sup>17</sup> ¿Matses cuidnuenda Nuquin Papan Esus matsesmepanědash? Padenquoio. Matses cuidenquoio icnuen napanědash.

<sup>18</sup> Aden aton Mado Esus tantiaquido cuidenquoio icquin Esus tantiesabo cuidendac: —Con Mado chieshěmpec —qeshun. <sup>19</sup> Nuquin Papan matsesmiaiděn Esusěn abi icsaid chuisho matses icsambo icquidon tantiatiapimbo iquec. Ambi icsamboen naid ěntiapimbo icquin Esus tantiatiapimbo iquec. <sup>20</sup> Adquidon: —Ēbi icsaid Esusěn utsibo tantiamenushe. “Icsambo iquec,” ěbi canushe —qeshun Esus chieshěmpec. <sup>21</sup> Nuquin Papan chiacpadec tabadquidombien Esus chieshěnenquoio iquec. —Nuquin Papan namiacpadec tabadquid nebique. Ma Esusěn ěmbi bědamboen naid chuibampanuna —quiash Esus tantiate bumpec.

### *Uan acten mentoanquiděn Esus chuioaid*

<sup>22</sup> Adec Nicodemoběd onqueboshien Esus nidpondash. Edusaden yacnuësh nidec aid nidaiděmbi Udeya caiděn capucueniondash. Aběd nidshobini Nuquin Papan chiaid Esusěn chuibampondash. Adec nidshun Nuquin Papa tantiabenquido acten mentobeniondambi. <sup>23</sup> Adnubien adomboembidi con shěnisiontsen acten mentobeniac caondash. Enon caid yacnoshon Sadin caid anoentsěqui chunquen diadacnoshon matses dadpen acten mentoac caondash con shěnision. <sup>24</sup> Chieshěměnquidon quěněn nauedabi adoac caondash.

<sup>25</sup> Adnubien con shënisiobèd icquido con matses utsibèd: —Mimbi icsamboen chiec —quec chushcananac caondash. Con shënisiobèd icquido: —Uanèn Nuquin Papa tantiabenquido bédamboen acten mentobamposh —quesho tantiash: —Padenquio. Esusèmbien bédamboen acten mentobaniosh —quepac caondash. <sup>26</sup> Adshumbien con shënisiobèd icquidon: —Nuqui chuiquid chiec nidnu. Nid —quianec nidquin con shënisio chuituidpac caondash. —Acte Odan caid uquë cuëmatsiucshun çmitsicquid: “Nuquin Papan chomiaid nec,” mimbi cadio? Aidèn mimbi naid dëniacquin matses dadpenquio acten mentobeniac caosh. ¿Ada bèda icpec? —caquien: <sup>27</sup> —“Nuquin Papan chiacpadomboen Esusèn nash. Adomboembimbi naic,” queshun Esus chieshëntiapimbo iquendabi. <sup>28</sup> “Nuquin Papan chomiaidpenquieni nec,” quequin mibi chiondambi. “‘Nuquin Papan chomiac bédamboshë icquid choendac,’ quequin bëyuc choshon aid chiec nebi,” quiondabi mibi chiec. <sup>29</sup> “Èmbi chui-boed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidèn: “Min bënëbèd nidenda,” caquinda ictiosh? Padenquio. Bënëbèd nidmiash bédambo yacbimboec Esusbèd nidanesho isash bédambo iquebi. <sup>30</sup> Èmbibi Nuquin Papan chiacpadomboen Esus tantiaequin ènquin chuibanuc èmbi acten mentoaido daèdpactsëc yanendac. Èmbi chui-boedquio Esus tantiaquidoen dadpenquio yanendac. Aidquio bédamboshë iquec —quepac caondash con shënisio abèd icquido chiec.

#### *Nuquin Papa yacnuësh choquid chiaid*

<sup>31</sup> Adshumbic con shënision naden chui-pac caondash. —Esusquio bédamboshë iquec. Nuquin Papa yacnuësh choquid abipadquid utsi nibèdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusèmbien <sup>32</sup> ambi isondaidbèdta ambi tantiondaidquio chuipec. Aden chiaqui matses dadpen: “Abimbo caic,” quenquio icpec. <sup>33</sup> Esus tantiaquidon: “Nuquin Papa muesambo nec. Ambi: ‘Bédamboshë icquid choendac,’ quequin dada uamepampidquio Esus nec,” capec. <sup>34</sup> Nuquin Papan chomiaidquio icquin Nuquin Papan chiaidquio Esusèn chuibanec. Nuquin Papan aton Mayan abèd tabadmiad icquin comapenen tantiaquin ismebanquin chuibanec. <sup>35</sup> Ambi tantiaidquio icsho aton Papan abitedishun Icbombo icmiac. <sup>36</sup> Adnuc: “Abitedishun Icbombo Esus nec,” quequin aton Mado tantiaquido unèsacsho Nuquin Papan abèdi tabadmendac padpidec unèsenquio icnuc. Esus chieshènquidoen Nuquin Papa yacno isenquio yec icsaido cuidquiacno nidendac —quequin con shënision chui-pac caondash.

## 4

#### *Acte uequid chido Esusèn chiaid*

<sup>1</sup> Esusbèd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidèn naid dëniacquin Esusèn matses dadpenquio acten mentobanosh,” quiosh —queshun Esus chieshëmpac caondash. <sup>2</sup> Esusèn nainquio icnuc èmbimbo nasho isun chiaqui aden Esus chieshënac caondash. <sup>3</sup> —Mibi adosh —cac: —Con nidaidèn nidnu —quianec nidondash

Esus. Aid nidaid Udeya caid yacnuësh nidec aton nidaid Cadidia caid yacno nidondash.

<sup>4</sup> Aid podquedèn nidequi nidaid utsi yacno Samadia caid yacno nidpondash. <sup>5-6</sup> Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidèn uëdëshcampid acte uete icpondash. Aid dayunquiobi: —Tiboquenu —quec Esus tsadtuidpondash. <sup>7-8</sup> Adec tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: <sup>9</sup> —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbèd onquesambo isadaidbo nec —quequin tantiec adac caondash.

<sup>10</sup> Adshobien Esusën badedquio cuembo chienquio icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimi ëbi catsiac. Adsho acte bëdambo icmianquid mibi acmetsiambi —quepac caondash Esus. <sup>11</sup> Adoaquien acte uequid chidon actembo ca danquin: —¿Mitsipaden acte ueshun ëbi menetsia? Ma min tēchu nibëdpayoc. ¿Midapaden mimi uetiapimboen acte uquëducquio iquec? ¿Mitsimbo acte bëdambo icmianquid ueshun ëbi acmetsia? <sup>12</sup> Nëid acte nuquin tsusedpa Acobon uëdëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquio icquin nai? ¿Bëdamboshë icquid icquinda mimi acte bëdamboshë icquid ëbi acmepatsia? —capondash acte uequid chidon. <sup>13</sup> Adoaquien: —Nëid acash mibi bundoaic. <sup>14</sup> Ëmbi acmiac mibi bundoenquio ictsiac. Acte bëdambo icmianquid acmiac ënëdenquio yec tabadquid mibi yantsiac —quepac caondash Esus badedi cuembo chienquio yec. —Ëbi tantiaquidobëd con Mayan tabadmiaac bëdambo yanec unësascho ëbëdi tabadmendambi —quequin tantiec adac caondash.

<sup>15</sup> Adsho tantiashun padpiden acte ca danquin: —Adquidquio ëbi acme. Bundoenquio yec nëmbo acte uec choenquio ictsiabique —caquien: <sup>16</sup> —Min bënë bedtan —capac caondash Esusën. —Nuquin Papan chomiaidquio yec comapenen tantiaquid mibi nec —camenuen adoac caondash. <sup>17</sup> —Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimi caic. Min bënë nibëdec. <sup>18</sup> Dada mēdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquio nec. Abimbo mimi caic —quepac caondash Esus.

<sup>19</sup> Adsho tantiash: —Isambobi comapenen tantiaquidien mibi nechitec. Mibipadquidquio chiec: “Nuquin Papan chomiaidquio nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiape? <sup>20</sup> Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. <sup>21</sup> Adsho tantiashun Esusën: —Tantia. Mibi bëdamboen



chuiu. Nĕbi nĕid macuĕsh dapanshunuidtsĕqui Nuquin Papa tantienuo icquin Edusaden yacnoshonuidtsĕqui tantienuo icquin nidaid utsi-utsiec yacnoshon ademidi Nuquin Papa tantiabedendac. <sup>22</sup> Min matsesĕn Nuquin Papan chiaid daĕdpactsĕc tantiatsĕcshun Nuquin Papa bĕdiactsĕc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bĕdambo icmianquid nuquin matsesĕn tishendac,” quequin bĕdamboen tantiec. <sup>23</sup> Nĕbien utsin-utsinquien muainquio icquin: “Con Icho nec,” quequin Nuquin Papa tantiendac. Ambi chiacpadec bĕdamboec tabadsho isash: “Adquid ĕbi tantiaquidquio nec,” quetsiash Nuquin Papa. <sup>24</sup> “Nuquin Papa tantiaquid ictiadquio iquebi,” quequidĕn Nuquin Papan Mayanĕn tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

<sup>25</sup> Adsho tantiash chido: —“Nuquin Papan matses bĕdambo icmequid chuiquid dapa chomendac,” quequin chuisho tantiondami. Aid mesias caidi utsibon quidistu caposh. Aidĕmbi nuqui tantienuo yaidtedi tantiametsiash. Aidbimboecquidien mibi nechitec —caquien: <sup>26</sup> —Mimbi chiaidquibini nec —quepac caondash Esus chido chiec.

*Esus Samadia yacnocquido chiec tabadaid*

<sup>27</sup> Adnubini pete bedtanec chopondac. Adshun isquien chidobĕd onquepec. Adsho isash: —ĵAtotsi chiec chidobĕd onquepec? —quepondabi utsibĕd otacquio onquec. —ĵAtotsi chiec chidobĕd onquio? —cainquio iccondambi Esus. <sup>28</sup> Adec ĕbi chonobi tĕchu nianec acte uec choquid chido nidpondash aton matses chiec shubuno nidec. <sup>29</sup> —Isec cho. Ĕmbi isacmaid dadan ĕmbi naid abitedi chioshi. ĵNuquin Papa yacnuĕsh choquid Quidistu caidta nioshe? En isec cho —catuidac: <sup>30</sup> —En isnu. Nid. Aidien nechitashe. Isnu —quianec matses dadpen cho-chopondash.

<sup>31</sup> Aido choabi icnubi: —Nĕ pete, Icho —ĕmbi caquien: <sup>32</sup> —Padi. Mimbi tantienuo yaid con na utsi iquec —quepondash Esus petepenquio chiequi. <sup>33</sup> Adsho tantiashini pete ca danec: —ĵUtsibonda pete bĕshumpash? —quecuededpondac ĕbitedi. <sup>34</sup> Adsho tantiash Esus: —Ĕbi cuishoncamete utsi iquec. Ĕbi chomiondaid Nuquin Papan chiacpadomboen naic bĕdambo iquebi pete piacbimboec. Ambi chiaidtedi nainuec dayacquio iquebi —quepondash. <sup>35</sup> Adashic padpidec: —“Ushĕ daĕddaĕdquiecnuc nidmeshun nadquid adosbiecquid ĕshĕacsho bedembi,” quepec nuquin matses. Adosbiecquid ĕshĕacpaden ĵyuecshunda nĕmbo icquidon ĕbi tantiabempec? Padenquio. “Nĕidon Esus tantiendac,” mimbi cacmaidobi cho-choeque. Is. <sup>36</sup> Acte uequid chido ĕmbi chuiboedĕn chiac matses dadpen cho-choeque. Chuibanuna. Ĕbi tantiash Nuquin Papabĕd tabadtequid yanendac. Adsho isash nuqui cuishonquendac piucquid bedashbimboec. <sup>37</sup> Tied icbon: “Con na peta,” cac ambi nidtsinacmaid matsesĕn bedec. <sup>38</sup> Aden ambi nitsinacmaid bedacbimboen mimbi naic. Utsibomba Nuquin Papan chiaid chuibanĕdaido nĕmbo icquido mimbitsen chuibanec. Adoac nĕmbo icquidon Nuquin Papabĕda ĕbi tantiabene. Cho-choeque. Is. En chuiban —capondash Esusĕn abĕd icquido chuiquin.

<sup>39</sup> Adnubien Esusbĕd onqueboed chidon chuitanaido cho-chopondash. —“Comapenen tantiaquin ĕmbi naid abitedi chioshi,” quioshe. Nuquin Papa yacnuĕsh choquidien nechitashe. Isnu.

Nid —quianec cho-chopac caondash. <sup>40</sup> Cho-choquimbi badedi: —  
 Èbi yacno ushquin chiec cho —quequin beduanac Samadia yacno  
 tabadquin chuibampondash Esusèn. Aid matses chiec ambo daèdec  
 ushpondash. <sup>41</sup> Aden Esusèn chuisho tantiashien: —Nuquin Papa  
 yacnuèsh choquid Esus nec —quiampondash anocquido dadpen.  
<sup>42</sup> Adashic acte uequid chido chiec: —Mimbi chuishouidi tantiaboedèmbi  
 nèmbi aidènquo chuisho bédamboen tantiaquioc. “Nuquin Papa  
 matses bédamboen ismequid nec,” quequin tantiembi —quiampondash  
 Samadia yacnocquido dadpen.

*Chuiquid dapan mado Esusèn bédamiaid*

<sup>43</sup> Daèdec ushanec Samadia yacnuèsh Esus nidondash. Abi canion-  
 dacno nidaid Cadidia caid yacno nidpondash. <sup>44</sup> —Èmbi chiacpaden  
 abi caniondacnoshon Nuquin Papan chiaid chuibanquidèn chuisho aton  
 matsèsèn tantienquo iquec. Con nidaidèn nidsho con matsèsèn abi  
 chuiquid dapa icmetiapimbo icpebi —quianec aton nidaidèn chopon-  
 dash. <sup>45</sup> Adsho isun: —Tantiesia nendac —Esusèn caboedombi abi  
 bēdiactsēc tantiatsēccondash. —¿Choecta icco? Nuquin Papan nuquin  
 tsusedpabo unès uainquo icquin matamiampid inchèsh tantianuec Èdu-  
 saden yacno nidshun mimbi nadatiambo icquin nabansho isondambi—  
 quepondash abi bēdiactsēc tantiatsēcquido Esus chiec.

<sup>46</sup> Adec aton nidaidèn nidequi ambi actequid uaondacno Cana yacno  
 nidpondash Esus. Adnubien shubu dadpen icquid utsi Capednaun caid  
 yacno con matses chuiquid dapa icpac caondash. Aidèn mado unēs-  
 tiadtsēcquo yampac caondash. <sup>47</sup> Adashic: —Esus Udeya yacnuèsh choac  
 caoshe. Istanu —quianec chopac caondash unēstiadtsēcquo icquidèn  
 papa. Adec Esus yacno choshombien: —Con mado unēstiadtsēcquo ic-  
 coshe. Bédamec cho —caqui <sup>48</sup> nidenquo yec abi datsidadquido chiec: —  
 Èbimbo mimbi tantienquo iquec. Èmbi bédameteuidtsēqui mimbi tantiec.  
 Èmbi comapenen tantiaquin nabansho isunuidtsēqui: “Nuquin Papan  
 chomiaidien nechitec,” quequin mimbi tantiec —quepondash Esus.

<sup>49</sup> Adec onqueshobien abi niachidanquin padpiden: —Baded cho. Con  
 mado unēstiadtsēcquo iccoshe —capondash. <sup>50</sup> Adoquien Esus: —Padi.  
 Min mado unēsenquo ye. Nidec nid —quesho tantiash: —Abimbo caic —  
 quianec nidpondash. <sup>51</sup> Adec nidquimbi abi chuinec cho-chosho aton  
 yuabo bèquedac caondash. Aden bèquedacqui yuan: —Min mado bēdanosh  
 —quesho tantiashun: <sup>52</sup> —¿Mitsimbo ushè icnuc con mado bēdanosh?  
 —cac: —Ènden ushè yaquēduidtsēcnubi da una yantsēcnubi bēdanosh —  
 quepac caondash aton yuabo. <sup>53</sup> Adsho tantiash: —Adènquioshendabi:  
 “Min mado unēsenquo ye. Nidec nid,” caposh Esusèn —quepac caondash  
 unēstsemboedèn papa. Adshun: —Nuquin Papan chomiaidquo yec  
 comapenen tantiaquin nabanquidquo Esus nec —quequin aton shubun  
 icquidobēdtambi Esus tantiapac caondash. <sup>54</sup> Adec Udeya yacnuèsh  
 choash Cadidia yacnobidi ambi uba chinaid actequid uaqun ismequin  
 tauaondacnobidi tabadquin bédamequintsen Esusèn ismepondash.

## 5

*Esusèn dada icsatsaid bédamiaid*

<sup>1</sup> Yuecquo ictanec Esus: —Edusaden yacno cuèdēnuec nuquin matses  
 cho-choeque. Nuquitsen nidnu. Nid —quianec nidanepondash. <sup>2</sup> Shubu

dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. <sup>3</sup> Acte nënantanquio icnuc dacuenadquiec shubumpi tabadquidën matses dadpen tabadpondash daicsaidouidquio. Bëshuaido yec capuenquio icquido yec canite tsasiaido yec quec tabadpondash. <sup>4</sup> —“Nuquin Papan abi yacnoshon uaid mayan bëdan tëccuascaid acten abia mentoadquid bëdanquid,” quedeneque. Tëccuascaic ma chobono —quiash cainec tabadpondash.

<sup>5</sup> Adnubien Esusën ënden caniaidquio ambobi uesho istuidpondash. Ëndenquimboshë aton dada icsabudash seta dadpen 38tedquiobi matamec capuenquio yec icsabudtsaidquio nepondash. <sup>6</sup> Adsho istuidshun: —Ëdenquico daicsabudaic nec —quequin tantiaishun: —¿Bëdanteda bune? —catuidpondash Esusën. <sup>7</sup> Adoaquien: —Ai ¿mitsipadequini bëdampe? Ëbi bëdiactsëcquio nidnuc utsiba badedquio mentoadteniosh. Ëbi buanquin mentoquid nibëdec —quepondash daicsatsaid. <sup>8</sup> Adshobien Esusën: —Min ushte nacentanquin buanec nid —cac <sup>9</sup> badedquio aton dada bëdantanquin aton ushte buanec nidpondash. Aid ushë chonoadenquio icte ushë niondash.

<sup>10</sup> Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. <sup>11</sup> Adoaquien: —Ëbi bëdameboedën: “Buanec nid,” cac mambi naiyoc —quepac caondash Esusën bëdameboed. <sup>12</sup> Adsho tantiaishun: —¿Tsuntsin naosh? —caquien: <sup>13</sup> —Tsaudi. Ëmbi isacmaid ëmbi isquiambobi badedquio nidaccosh matses dadpen icnuc —quepac caondash bëdameboed.

<sup>14</sup> Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsacboed Esusën istuidpondash. Istuidshumbien: —Tantia. Mibi chuinu. Ëmbi bëdameboedquio mibi neque. Mimbi icsamboen naid ënash bëdambo icta. “Nuquin Papan cuidquiac bëdananquio yec daicsabudquiochitomane,” quiash adta —capondash Esusën.

<sup>15</sup> Adoaquien bëdameboed abi: “¿Tsuntsin naosh?” caboedo chiec nidpac caondash. Nidshumbic: —Ëbi bëdameboed Esus niosh —quequin chuituidpac caondash. <sup>16</sup> Aden chuisho tantiatanequien: —Chonoadenquio icte ushënuidi bëdamepac caosh. Icsambo iquec —quequin con matses chuiquidon Esus chieshëmpac caondash. <sup>17</sup> Adnubien: —Mibi adosh —quesho tantiaishun abi chieshënuido istuidshun Esusën naden chuipondash. —Mimbi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. <sup>18</sup> Adsho tantiatanequien: —“Chonoadenquio icte ushën naquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

*Nuquin Papan Mado nebi, quiaid*

19 Adec abi chieshènquido abi cuesunete bunshobien padpiden istuidshun chuipondash Esusèn. —¿Èmbimbo naidtambi nadio? Padenquio. Con Pan nasho isun aidèn nacpadomboen mambi naboc. Adomboembidi Con Pan nacpadomboen naimbi. Èmbentsèqui natiapimbo iquebi. 20 Èbi tantiaquin Con Pan ambi naidtedimbo èbi tantiamec. Ambentsèqui nainquio iquec. Aidèn tantiamiacpadomboen bédiactsec naquin nèid capuenguio icquid bédamiombi. Adembidi ambi tantiamiacpadomboen naquin dacuèdampamboecnuc naindambi ma isquionoeshun. 21 Con Papadquidquio yec unèsaid uincuemequidquio nebi. Matses èmbi tantiaidotedi èbèdi tabadmenuen uincuemendambi. 22 ¿Èbi tantiesabo cuidnuen ambiuidtsèqui chuiquidta con Pa nedic? Padenquio. Èmbien ambi chiacpadomboen naden chiendac. “Nèid nuqui tantiaquid neque. Nuquibèdi tabadmenuna. Nèid èbi tantiesa icsambo icsho cuidnuna,” caindambi con Pa. 23 Aidèmbi: “Èbi tantiacpaden ma con Madotsen bédamboen tantianu,” qeshun aden matses cuidte chuiquid icmiondashi. Èbi adquid icmiondaid icsho èbi tantiatiapimbo icquidon èbi chomiondaid Nuquin Papatsen tantienquio iquec. 24 ¿Muectabi nedi? Abimbo chuinu. Tantia. Èbi chomiondaid con Pabèdtan èbi tantiaquid unèsacsho cuidenquio icquin èbèdi tabadmendambi. Cuidtequid icboedi èbi tantiaash èbèdi tabadtequid yanendac —quepondash Esus.

25 Adashic padpidec onquec: —Tantia. Mibi padpiden chuinu. Unèsaidèn tantienquio yacbimboen èbi tantienquio icboedombi èbi tantiabensho bédamboen tantiamequin bédamboec tabadquid icmendambi. Adshun aido unèsacsho uincuemeshun èbèdi tabadmendambi. 26 Con Pan icmiacpadequi unèsaid uincuemequid nebi. Abibi unèstiapimbo icquid icquin unèsaid uincuemequidquio con Pa nec. Ambi icmiacpadquiequi abi yacpadquidquio iquebi. 27 Adec unèstiapimbo iccondaidi matsesash icsaisambo icsho Con Pan matses icsaido cuidquid icmiondashi. 28 Èbi adsho tantiaashun: “¿Abimbobida capeba? Muequien nechitec,” èbi cainda. ¿Muectabi nedi? Padenquio. Con Pan tantiacpadènquio èmbi cuènac unèsaidotedi uincuenendac. 29 Adec uincuenacsho èbi tantiaquido èbèdi tabadmequin èbi tantiesabo icsaido cuidacno nidmendambi. 30 Èmbentsèqui nainquio iquemi. Con Pan chiacpadomboen naquin matses cuidte chiendambi. Matsesèn naidtedi tantiaquid icquin adoendambi. Èmbi naid nainquio icquin Con Pa bédambo icmenuen aidèn chiacpadomboen naimbi —quepondash Esus abi chieshènquido chiech.

*Utsintsen èbi chiech, quequin Esusèn chiaid*

31 Adshumbic Esusèn abi chieshènquido chuioapondash. —Nuquin matsesèn naden chiech. “Abentsècshun chiaid icsambo iquec. Daèdshun chiaid abimbo iquec,” quequin chiech. Aden chiaid tantiec èbiuidtsèqui: “Nuquin Papan Mado nebi,” qesho tantiaashun: “Abimbo mimbi caic,” mimbi èbi catiapimbo iquec. 32 Èbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. 33 Aden èbi chuiquid utsi acten mentoanquid Uan pado icpadenec. Aidèmbi èbi abimbo capadenec. “¿Nuquin Papa yacnuèsh choquidta ne?” quequin mimbi chuitanac: “Padenquio. Esusuidi Nuquin Papa yacnuèsh choquid nec,” quepadenec Uan pado. 34-35 Aden chieshtoenquio icquin bédamboen chuipadenec. Chuisho tantiatasash mibi

bëdambo icuidtsëccondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiamëquin chui padenec. ¿Adquid matsesënuidtsëquidabi abimbo chuipec? <sup>36</sup> Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec. <sup>37</sup> Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. <sup>38</sup> Adembidi ambi dada uamequin chiampidquio ma mimbi bëdamboen tantienquio yoc. Aid bëdamboen tantiashumbien Nuquin Papan chomiondaid ëbitsen mimbi tantiatsiac. <sup>39</sup> Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabëd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. <sup>40</sup> Aden dada uamepampid isbanquidombi mimbi ëbi tantienquio iquec. Ëbi tantiashoembi mibi Nuquin Papa yacno ëbëd tabadmetsiandac. <sup>41</sup> “Ëbi adsho tantiashun ma matsesën ëbi: ‘Bëdambo mibi iquec,’ canu,” ¿quectabi ique? Padenquio. Con Pan chiacpadomboen nanuëmbimbi aden chioc. <sup>42</sup> Ëbi tantienquio icsho isun: “Nuquin Papa tantiesabo nec,” quequin mibi tantiembi. <sup>43</sup> Ëmbien Nuquin Papan chiacpadomboen naic. Aden nasho mimbi ëbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. <sup>44</sup> Mibibi tantiadec: “Mibi bëdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bëdambo iquec,” cametiapimbo iquec —quepondash Esus abi chieshënquido chiech.

<sup>45</sup> Adashic padpidec: —¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidënquio Moisesëntsen: “Nëido icsambo iquec,” mibi caindac. <sup>46</sup> Aidën chiampid bëdamboen tantiaquimbien mimbi ëbi tantiatsiac. Aidën chiampidi mabi neyoc. <sup>47</sup> Aden Moisesën chiampid tantienquio icquin ëmbi chuiboedtsen mimbi tantiatiapimbo iquec —quequin Esusën abi chieshënquido chuipondash: —Moisesën chiampid tantiaquidquio nebi —quequido chuiquin.

## 6

*Esusën pete uatanquin 5000tedi pemiaid*  
(*Mat 14.13-21; Mad 6.30-44; Duc 9.10-17*)

<sup>1</sup> Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash. <sup>2-3</sup> Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bëdamesho isboedo Esus isnuec cho-chopondash. <sup>4</sup> Nuquin Papan isadaidbo unës uainquio icquin matamiampid inchësh tantianuec pec tabadte ushë nëbi yanuc niondash.

<sup>5</sup> Aido cho-chosho istanequien Esus: —Uedipe, piucquid buanshun ¿mitsimbo pete bedtane nëido pemenun? —quepondash Uedipe chiec.  
<sup>6</sup> —¿Atoda queque? Tantuanu —quiash adpondash Esus. —Pete bedabi icnuc ëmbibi pete uanu —quequin otacquo tantiequi adondash.  
<sup>7</sup> Adoaquien Uedipe: —Ma aidedtquio pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidedtquio pemiadenquo ictsiash —quepondash Uedipe.

<sup>8</sup> Adnubien Andedesën Petedon utsin: <sup>9</sup> —Ma në madompin panëmpi 5tedtsëc icpayoc, Icho. Nuëcquidëmpi daëdquiobi ictsec. Matses dadpenquo iquec. Aidedtsëcquid pemetiapimbo iquec —caquien <sup>10</sup> Esusën: —Padi. Aidi bëdambo iquec. Abitedi: “Nëmbo tabad,” caban —cac: —Nëmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

<sup>11</sup> Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bëdamboshë iquec. Mimb uaid nëid pete bëdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanguimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. <sup>12</sup> Aden ambi piactembi pebededacshobien Esusën: —Napi uaid secainda. Sandoshon dayun ua —cac <sup>13</sup> tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

<sup>14</sup> Aden pemiaquien pemiaido: —Comapenen tantiaquin Esusën pete dadpenquo icmiac. Moisesën chuipampidshenda nepec. “Nuquin Papan bëdamboshë icquid chomendac,” capampidshenda nepec. Aidiën nuqui chuiquid dapa icmetiad —quepac caondash Esus tantiamenquo yec. <sup>15</sup> Adsho ambembi tantiasien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

*Esus acte bëntse choaid*  
*(Mat 14.22-27; Mad 6.45-52)*

<sup>16</sup> Esus cuembon inchëshbudtsëqui chian budondabi ëbitedi. <sup>17</sup> —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. <sup>18</sup> Adnubien cunquequid dapa cunquetuidpondash. Acte comapenec tēccuasquenuc <sup>19</sup> uncadenquo yampondash. Ënapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. <sup>20</sup> Adshobini: —Ëbi neque. Dacuëndenda —capondash. <sup>21</sup> Adoac: —Esus nec —quetanquin badedi antsadtomiondambi. Aid antsadtometanquin badedquio potepondambi. Nandoash ambobi ushondabi Capednaun yacno.

*Pemiaidon Esus istuidoaid*

<sup>22</sup> Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aibëd nidenquo icpaboc. ¿Mitsimbo nidpash? —quepac caondash pemiaido. <sup>23</sup> Adnubien

shubu dadpen icquid Tibedias caid yacnocquidon cano dadpen bë-bèpac caondash. Pete pemebocno anoentsèqui nando-nandosho isash: <sup>24</sup> — Potequimbien Esusèn yashe. Nèid canobi antabèdtoshon potenuna — queatanec antabèdtoshon potiac-potiacpac caondash.

Potiac-potiacash Capednaun yacno pudundoshon <sup>25</sup> Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquo yec: <sup>26</sup> —Tantia. Mibitedi chuinu. ¿Èbimbo tantianuecta chodio? Padenquo. Èmbi pete uasho isash: “Nuquin Papan namiaidèn naoshe. Istanu,” ¿quecta ictio? Peteuidtsèqui tantiaquin ma mimbi èbi nibèneyoc. <sup>27</sup> Peteuidtsèqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bédamboen nata. Aden nash èmbi icmiacpadquiec Nuquin Papabèd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. <sup>28</sup> Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? —caquien: <sup>29</sup> —Nuquin Papan chiacpadomboen natiadquo icquin ambi chomiondaidquo tantiata — quepondash Esus ambi pemiaido chiec.

<sup>30</sup> Adoaquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimbi èbi ismepatsia? <sup>31</sup> “Èndenquimboshè pete nibèdacnoshon Moisesèn con tsusedpabo nibèdbèdi sequiaid pete pemianepampic,” quequin dada uapampid isombique. Adquid nacenquin èbi isme —quepondash pemiaido peteuidtsèqui tantiec. <sup>32</sup> Adoaquien Esus: —Nuquin tsusedpa Moisesèn nainquien icpampic. Con Pambien aden pemepampic. Nèbi ambi chomiondaid petebimboecquid utsien Nuquin Papan mibi tantiametidquo iquec. <sup>33</sup> Aid petebimboecquidèn matses bédambo icmetsiash pete piacbimboecnuc —quepondash Esus abibi cadequi.

<sup>34</sup> Adsho tantiash petembo ca danec: —Ènenquo icquin adquid èbi pemeta —quepondash pemiaido ambi peboeuidtsèqui tantiec. <sup>35</sup> Adshobien Esusèn: —“Èbiuidtsèqui petebimboecquid icquin matses bédambo icmequid nebi,” caimbi. Èbi tantiaquid ènenquo icquin bédambo icmendambi petebèdi acte bundoenquo yacbimboecnuc. <sup>36</sup> Èmbi chuibocpadomboen ma mimbi èbi tantienquo ichoc. Èmbi comapenen tantiaquin nabansho isumbi ma mimbi èbi tantienquo ichoc. <sup>37</sup> Útsibombien èbi tantiendac. Nuquin Papan tantiamiaidtedishun èbi tantiasho bédamboen isquin cacumenquo iquendambi. <sup>38</sup> ¿Èmbi tantiacpadomboen naquidtabi nedi? Padenquo. Nuquin Papan chiacpadomboen nanuec mabi abi yacnuèsh chondac. <sup>39</sup> Aden aidèn chiacpadomboen nanuen èbi tantiaquido unèsacsho uincuemeshun cuidenquo icquin èbèdi tabadmendambi. Unèsaid abitedi uincuemete ushèn adoendambi. <sup>40</sup> Nuquin Papa bunacpaden èbi tantiaquido uincuemeshun Nuquin Papa yacno èbi tabadacnombo tabadmendambi —quepondash Esus ambi pemboedo chiec.

<sup>41</sup> Aqesh: —Nuquin Papa yacnuèsh chonaid yec petebimboecquid nebi —quesho tantiashien con matses chuiquido: <sup>42</sup> —¿Adquidida nepec? Ma icsamboen chuipayoc. ¿Nuquin Papa yacnuèsh choaidta nedic? ¿Nuqui

isacmaidta nedic? Ma Esus cuëmédquid neyoc. Ma Osen mado neyoc. Anitsen tantiembi. Matsesèn tishaid Nuquin Papa yacnuësh choquid ictiapimbo iquec —quecuededpondash.

<sup>43</sup> Adshobien Esusèn: —Shoshquetsëcquin ëbi icsamboen chienda. Abimboembi caoc. <sup>44</sup> Ëbi chomiondaidèn Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho unësaid uincuemete ushën uincuemendambi. <sup>45</sup> Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuipampic. Aden Nuquin Papan tantiamiaido ëbi tantiaquido yantsiash. <sup>46</sup> “Ambi tantiamiaidèn matsesèn Nuquin Papa isplash,” quenquido iquebi. Ëmbiuidtsëqui abéd icquin Nuquin Papa isondambi. Aden abéd icquin abi isondaiddi matsesondabi —quepondash Esus: —Matsesi nec —abi caquido chiec.

<sup>47</sup> Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. <sup>48</sup> Petebimboecquid icquin aden tabadmendambi. Adecbidi bédamboec tabadmianquid nebi. <sup>49</sup> Nuquin tsusedpabon pete utsi nibédacnoshon mana caid pepampic. Aid pequidi tsusiobudash unëspampic unëstiapimbo icquid yanabi. <sup>50</sup> Petebimboecquid utsien Nuquin Papa yacnuësh chondaid nëmbobi iquec. Aid piash ëmbi chiacpadquiec padpidec unësenquio yec Nuquin Papabéd tabadtequid yanendac. <sup>51</sup> Adquidquido nebi. Con nami piash matses unëstiapimbo icquid yanendac. Adquidquido matses icmenuec ëbided cuidadquin con nami menendambi —quepondash Esus ompoacbimboen chiec. —Ëbi tantiaquido nëbi bédamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquio icnuec ëbided cuidadec unësendabi —quequin tantiec: —Con nami menendambi —quepondash Esus.

<sup>52</sup> Adec: —Con nami piash matses unëstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —¿Mitsipaden Esusèn aton nami nuqui pemepatsiash? Aidquido tantiatiapimbo iquebi —quecuedednubi utsi-utsiec: —¿Atotsi chuitiadquido yec niosh? Chuisho tantianu —quecuededpondash. <sup>53-54</sup> Adsho tantiashun Esusèn ambi chiacpadomboembidi chuiopondash. —Tantia. Mibi chuinu. Matses tantiaquidquido nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bédamboec tabadquid yanash Nuquin Papabéd tabadtequid mibi yanendac. Adquid icsho unësaido uincuemete ushënquio uincuemendambi ëbëdi tabadmenuen. Ëmbi chiacpadomboen nainquio yash Nuquin Papabéd tabadtiapimbo mibi iquendac. <sup>55</sup> Ai, con nami petebimboecquid nec. Con intac actebimboecquid nec. ¿Petebëdi acte naimédanda mibi bédambo icpatsia? Adecbidi con intac chididiquec con nami icsabudec ëbided cuidadec unësaid tantienquio yec mibi bédamboec tabadtiapimbo iquendac. <sup>56</sup> Aden ëmbi namibëdta intac chuisho bédamboen tantiashun ëmbi chiacpadomboen matsesèn natiadquido yanendac. Adsho



isun aibdëd tëshnanenquo icquin bëdamboec tabadquid icmendambi.  
<sup>57</sup> Nuquin Papa unëstiapimbo icquid yec matses uincuemquidquo nec. Aidën chomiac ambi namiacpadomboenuidi naquin ëbi tantiec tabadquid unësaçsho uincuemequin unëstiapimbo icquid icmendambi.  
<sup>58</sup> Aden ëmbi naid tantiamenuec: “Nuquin Papa yacnuësh chondayd petebimboecquid utsi iquec,” quiobi. Èbi adquid icsho isash ëbi tantiaquid Nuquin Papabëd tabadtequid yantsiash. Nuquin tsused-pabon pepampidpadquidpenquo nebi. Adquid pequidi tsusiobudash unëspampic. Èbi tantiaquidien padpidec unëstiapimbo icquid yanendac  
<sup>59</sup> —quepondash Esus Nuquin Papan chiaid chuibante shubunuësh Capednaun yacnuësh.

*Abi tantiauidquidon Esus nianondaid*

<sup>60</sup> Adec: —Con nami pequinc con intac acquinc cash mibi bëdambo ictsiac —Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquo yec. <sup>61</sup> Adec onqesho ambembi tantiash Esus onqueoapondash. —¿Èmbi chuiboed tantiash chieshtotiadquioda ique?  
<sup>62</sup> Nuquin Papan matsesmiaid yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaydini nec. <sup>63</sup> Namimbo intacquiobëdta ca danequien mibi nec. ¿Namimbo pequinc intacquo acquinc cashta mibi bëdambo icpatsia? Padenquo. Nuquin Papan Mayanën ëmbi chuiboedbëdta ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec.  
<sup>64</sup> Adashic padpidec: —Èmbi aden bëdamboen chiaqui utsin-utsinquien mimbi ëbi tantienquo yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquo yanendac. Nëid utsin ëbi chieshënquido ëbi bedmendac —quequin ambembi Esusën tantianpëdash.

<sup>65</sup> Adashic padpidec: —Èbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiaidënquien ëbi tantiatsiash,” quequin chiombi —quepondash Esus. <sup>66</sup> Adsho tantiashun dadpenshun Esus nianondash. <sup>67</sup> Aden nianaquien Esusën abëd icquido 12ted icquid chuipondash. —¿Mimbitsendabi niampe? —caquien <sup>68</sup> Petedo: —Padenquo. ¿Tsudabëd icnuendambi mibi nianuc? Mibipadquid utsi nibëdec. Mimbiuidtsëquien: “Èbi tantiaquid bëdamboen isquin unësaçsho uincuemeshun ëbëdi tabadmendambi,” quequin chuipoc. <sup>69</sup> “Abimboen caosh,” quequin mibi tantiembi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. <sup>70</sup> Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Èmbi adondayd abentsëc Satanasën namiaidquo yec icsamboshë iquendac —quepondash Esus. <sup>71</sup> —Simon Iscadioten mado Udasën ëbi chieshënquido ëbi bedmendac —quequin ambembi tantiash adondash Esus.

**7**

*Aton utsibon Esus tantienquo yaid*

<sup>1</sup> Abi tantiauidquidon nianac Cadidia yacnouidi yuec Esus capu-cuenepondash. —Nidaid Udeya caid yacnocquido con matses chuiquidon ëbi cuesunetiadquie iquec —quiash Udeya yacno nidenquio icpondash. <sup>2</sup> Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuec matses dadpen nidacno Edusaden yacno nidanepondash. Cuëdënuec Esus nidenquio icpondash. <sup>3</sup> Adec nidenquio icsho isumbien aton utsibon: —Edusaden yacno nidec nid. Mibëd ictiadquio icquid ano icnushe. Comapenen tantiaquin nabanquin aido ismec nid. <sup>4</sup> “Ma matses dadpenishun ëbi tantianu,” quequina matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. <sup>5</sup> —Nuquin Papan chomenëdaidquio nec —quequin tantienquio icquimbi adopondash aton utsibon.

<sup>6</sup> Adoquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique. <sup>7</sup> Mibien anocquidon chieshëntiapimbo ye. Mibia nidta. “Nuquin Papan chiaid niacniaquec mibi icsaic,” ëmbi cac chieshënondashibique. <sup>8</sup> “Cuesunenushu,” quiash nëbi nidtiapimbo iquebique. Mibia nidta. Nuquin Papan tantiacpadece nidendabi <sup>9</sup> —quiash anobi Cadidia yacno Esus tabadpondash.

*Esustsen Edusaden yacnuësh cuëdënuec nidaid*

<sup>10</sup> Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënece nidec. Abitedi ismenquio yec tsyuec Esus nidpondash. <sup>11</sup> Adnubien con matses cuëdëncuededacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. <sup>12-13</sup> Adsho tantiash con matses Esus chieshënquido dacuëdënece utsibo tantiamenquio yec sho-shoshquetsëcquie onquepac caondash. Utsi-utsie: —Esus bëdamboshë icquid nec —quenubien utsi-utsie: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

<sup>14</sup> Adnubien con matses cuëdënece taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. <sup>15</sup> Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. <sup>16</sup> Adsho tantiash Esus: —Ëmbembi chienquio icquin ëbi chomiondaidën chiaidquio chieci nebi. <sup>17</sup> Nuquin Papan chiacpadomboen natiadquio icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chieci nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. <sup>18</sup> Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquio ma matsesën tantianu,” quequin ambi chiaidquio chieci. <sup>19</sup> Mimbien adoenuo iquec. Mimbiantiaid nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mibi niacniaqueyoc —quepondash Esus abi chieshënquido chieci.

<sup>20</sup> —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuedash mibi tantiadenquio yec onquepec. ¿Tsuntsin mibi cuesunepatsiash? —capondash. <sup>21</sup> Adoquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenen tantiaquin dada bédamepondambi. Aden bédamiacsho isash: “Adopeshenda naic. Chonoadenquio icte ushën daicsatsaid bédamequin Nuquin Papan chiaid niac-niacposh,” ma mibi quepondac. <sup>22</sup> ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquio ictaneshun adembidi Moisesëntsen adopampic. Nëbi adembidi naic chonoadenquio icte ushëmbi chonoadquimbi ma mimbi shui dëbid dëteshuneyoc. <sup>23</sup> Aden Moisesën chiampid niaquenquio icquin shui nacnenquin mimbi bédamboen naic. Èmbitsen daicsatsaid dada abichobi bédamequin mambi bédamboen naondac. ¿Atotsi quequin ëbi chushcai? <sup>24</sup> Chonoadenquio icte ushën dada bédamequid icsho: “Icsambo mibi iquec,” mimbi ëbi capec. Aden ëbi bédamboen tantienquio icquin mimbi icsamboen chiec. Èbi bédamboen tantiaquioshon ëmbi naboed bédamboen chui —quepondash Esus abi chieshënquido chiec.

*Esus bedshun cuesunetiad, cauidaid*

<sup>25</sup> Adec Esus: —Chonoadenquio icte ushën naondambi —qesho tantiashien anocquido Edusaden yacnocquido nadec onquecuedepac caondash. —Nuqui chuiquidon: “Cuesunetiad,” caboedien nëid nechitec. <sup>26</sup> En is. Abi chieshënquidobëdi tabadquin chieque. Chuisho ma chuiquidon chushcainquio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien <sup>27</sup> aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquio ictsiash —quepondash ano tabadquido.

<sup>28</sup> Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Èmbi isonaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbi padenquio yoc. Èbembì chonaidpenquio nebi. Èbi chomionaid abi iquec. Ma mimbi aidquiobi tantienquio yoc. <sup>29</sup> Èmbien aidquio tantiendac. Aidbéd tabadondaidquio nebi. Adsho aidën: “Nid,” cac chonaid nebi —caquien <sup>30</sup> —“Con pa Nuquin Papambo nec,” quechitequien nec —qeshun abi chieshënquidon: —Cuesunemenuembien bedtiad —quetanquin: —Bednu —caqui bedadenquio icpondash. —Nëbi ma Esus unës uainquio icnu —Nuquin Papa quenuc bedmenquio icquin Esusën mëtampañédash. <sup>31</sup> Esus cuesunetiadquio icnubien utsibon dadpeshun Esus tantiabempondash. —Nëidpadquid utsi nibédtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpeshun Esus tantiabempondash.

*Ëbi istuidenquio iquendac, quequin chiaid*

<sup>32</sup> Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuipac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abèd icquido sondado chuiquin: —Baded bedtan —capac caondash. <sup>33</sup> Adoac nidanequin tantiatuidaquien naded Esus onquepondash. —Yuec-yuecpactsec mibèd icashic ëbi chomiondaidbëdtsen tabadoaic nidendabi. <sup>34</sup> Ëbi nibënquin ëbi istuidenquio mimbi iquendac. Ëbi nidacno mibi nidtiapimbo iquec —quepondash Esus.

<sup>35</sup> Adsho tantiash abi chieshënquido: —Nuqui istuidmenquio icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash? <sup>36</sup> Tantiadenquio yec onquepec. ¿Atotsi quepec? “Ëbi nibënquin mimbi ëbi istuidenquio iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

*Aton Mayan abi tantiaquidbëd tabadmete chiaid*

<sup>37</sup> Adnubien cuëdë nec ënëdte ushënquiobi con matses abitedimbo cuëdë nuec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacimboec Nuquin Papa tantiate bunquin ëbi bëdamboen tantiate. <sup>38</sup> Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibèd tabadquin mibi bëdamboen tabadmequin utsibotsen Nuquin Papa tantiate bumetsiash —quepondash Esus. <sup>39</sup> —Nuquin Papabëdta ëbi tantiamequidquio Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

*¿Nuquin Papan chomiaidta nepeba? Esus caid*

<sup>40</sup> —Nuquin Papa tantiate bunquin ëbi tantiate —Esus qesho tantiashien Esus chiec ano tabadquido onquecuedepac caondash. Utsi-utsiec: —“Nuquin Papan chiaid chuiquidquio choendac,” quequin nuquin tsusedpa Moisesën chiampidien Esus nechitec —quenubien <sup>41</sup> utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? <sup>42</sup> Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec —quepac caondash. <sup>43</sup> Adec dadpen: —Bëdambo icquid nec —quenubi aitedbidi: —Icsambo iquec —quepac caondash. <sup>44</sup> Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

*Isadaidbo chuiquid dapabon Esus chieshënaid*

<sup>45</sup> Adnubien: —Esus bedtan —caboedo sondado bedabi Esus chieshênquido chiec chopac caondash. Chosho: —¿Atotsi quiash bedabi cho? —caquien: <sup>46</sup> —Ma bédamboenshê chuiboc. “Adomboen chuibanquid utsi nibêdec,” qeshun bedtiapimbo iccobi —quesho <sup>47</sup> tantiashien: —Aid muasho tantiashun: “Abimbo caic,” ¿cainda icco? <sup>48</sup> ¿Adambi Esus muasho tantiadio? ¿Ada tsusiobon tantiadiosh? Padenquio iccosh. <sup>49</sup> Utsibombien tantiash. Adquidon êmbi bédamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshê nec.

<sup>50</sup> Adnubien inchêshên puduedash Esusbêd onquiondaid Nicodemo caid abitsen chuiquid yec nadpac caondash. <sup>51</sup> —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuïsho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash —quepac caondash Nicodemo abêdtan chuiquid utsibo chiec. <sup>52</sup> Adoaquien chuiquido: —Esus yacpadec Cadidia yacnuêsh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuêsh Nuquin Papan chiaid chuibanquidquio choenquio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. <sup>53</sup> —¿Chuimiabida cuidpec? —quetsêcsho aden Nicodemo chushcanec abitedi nidaniac caondash aton shubuno ushec nidec.

## 8

### *Bênêpenquio chudmequid cuênóten seshunetsenaid*

<sup>1</sup> Nicodemo chushcabon Esus macuêsh dapa Odibos caid yacno ushec nidondash. <sup>2</sup> Adtanec choashic Nuquin Papa tabadte shubu uashunaid daquênê uaidên puduedpondash. Puduedsho isash matses dadpen chochoec abi datsidadsho Esusên chuipondash.

<sup>3</sup> Aden chuinubien con matses tsusiobon aton bênêpenquio chudmesho istuidshun chido bêpondash. Moisesên dada uampid chuibanquidobêdtan tsusedpabon chiampid namequido padiseyobon Esus yacno bêshun chido nênantanquio nitsimpondash. <sup>4</sup> Adshumbien Esus chuipondash. —Aton bênêpenquio chudmesho istuidshun nêid bêombi. <sup>5</sup> Nuquin Papan chiaid Moisesên naden dada uapampic. “Aton bênêpenquio chudmesho istuidshun cuênóten seshunequin unês uaquid,” quepampic. ¿Adembidida mimbi tantie? —quepondash chido bêquido. <sup>6</sup> —¿Atotsi Esus quepatsiash? Nuquin Papan chiampidquio chienquio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusên êcbedenquio icquin shuebudshun mêdanten nidaid dada uapondash. <sup>7</sup> Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuênóten se —quetanec <sup>8</sup> padpidec shuebudshun mêdanten nidaid dada uapondash.

<sup>9</sup> Adnubien: —Nuquin Papan chiaid niaquesambo icquin en mimbria cuênóten se —cac: —Nuquin Papan chiaid niaquesamboen nibêdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouditsêqui Esusbêd icnuc. <sup>10</sup> Adec nidanian Esusên nidtoquin isquien nibêdec. Nidaniac. Abi

bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: <sup>11</sup> —Ai, nibëdosh —quesho tantiashien: —Ëmbimbo mibi cuënoten senquio iquembi. Mibi icsaid ënash bëdamboec tabadec nid, champi —capondash Esusën. Adoac chido nidondash.

*Pabiate cuembo icnuc tantiamequid*

<sup>12</sup> Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuioapondash. —Pabiate cuembo icnuc con Pan bëdamboen iste matses tantiamequidquio nebi. Ëmbi tantiamiac ëbi tantiaquido icsateuidi bunenquio yanec bëdamboec tabadte buncuenendac. Adec ëbëd tabadtequid yanendac —quepondash Esus.

<sup>13</sup> Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. <sup>14</sup> Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquio icboc. <sup>15</sup> Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquio icnuna,” quequin nëbi chienquio iquembi. <sup>16</sup> Aden chuiquin abimbo chuitsiambi. Ëmbentsëqui chienquio icquin ëbi chomiondaid Nuquin Papabëdtambi chuiquin abimboshë chuitsiambi. <sup>17</sup> Nuquin Papan chiaidquio Moisesën naden dada uapampic. “ ‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquio Moisesën dada uapampic. <sup>18</sup> Aden Moisesën dada uapid tantiashun ëmbentsëqui chienquio iquembi. Ëbi chomiondaid con Pabëdtantsëqui chiemi —quepondash Esus.

<sup>19</sup> Adsho tantiashun abi chieshënquidon: —¿Mitsimbo papa icpec? —capondash. Adoaquien: —Con Pa ëbëdta ma mimbi tantienquio icboc. Ëbi tantiaquimbien mimbi con Patsen tantiatsiac —quepondash Esus abi chieshënquido chiec. <sup>20</sup> Abi chieshënquido onquecuededec quënë tabadnubi aid quënë cachotsëqui Nuquin Papa tantiaquin piucquid menequin nauedte tabëcacoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

*Utsibon Esus tantiauidaid*

<sup>21</sup> Adnubien Esusën abi chieshënquido padpiden chuioapondash. —Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. <sup>22</sup> Adsho tantiash Esus chieshënquido: —¿Abibida Esus cuesuniadpec? Abibi cuesuniadsh Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta:

“Ëbi nidacno mibi nidtiapimbo iquec,” quepec? —quepondash abi chieshënquido. <sup>23</sup> Adsho tantiash Esus: —Mibi matses nec. Ëbien con Pa yacnuësh chondaidquio nec. <sup>24</sup> “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bédamboen isabi mibi unësendac,” mibi caombi —quepondash Esus.

<sup>25</sup> Adsho tantiash abi chieshënquido: —¿Mitsipadquid icquin ëbi aden chie? —quepondash Esus caic. Adoaquien: —Ëmbi chianeboedquiobi mabi neyoc —queoapondash Esus. <sup>26</sup> Adashic padpidec: —Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muesanquio chiaidquio chiendambi. Aidën chiaiduidi matses abitedi chiendambi —quenubien <sup>27</sup> Esus chieshënquidon: —Abi chomiondaid Nuquin Papambo nec —quequin tantienquio icpondash. <sup>28</sup> Aden tantienquio icsho isun Esusën padpiden chuoapondash. —Matsesmiadquio icshobi ëbi cuesten dectanshumbic mimbi ëbi tantiabenendac. “Ambi chiapadquidshenda nepadenec. Ambembi chiaid chienquio icquin aton Papan chiaidquio chuiquin aidën chiacpadomboenshenda napadenec,” quequin ëbimbo mimbi tantiendac —quepondash Esus. <sup>29</sup> Adashic padpidec: —Nëbi ëbi chomiondaid ëbéd iquec. Aid bédambo icmenuen ambi chiapadomboen nasho isun ëbi nianenquio iquec —quepondash Esus.

<sup>30</sup> Adsho tantiashun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëcondash dadpeshun.

*Satanasën yuabo nec, quequin Esusën chiaid*

<sup>31</sup> Adsho isumbien Esusën abi bëdiactsëc tantiauidtsëcboedo chuipondash. —Ëbi tantiaquidën ëmbi chiapadomboen natiadquio iquendac. <sup>32</sup> Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chieci. <sup>33</sup> Adec Esus: —Yua —qesho tantiashien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chieci. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

<sup>34</sup> Adoaquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bédambo ictiapimbo iquec. <sup>35</sup> ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bédamboen isquid. <sup>36</sup> Aden con Pan aton Madombo icsho ëbi bédamboen isquin ëbi tantiaquidotsen bédamboen isendac. Aden ëbi tantiaquido bédamboen isquin bédamboec tabadte bumequin abi yacno ëbéd tabadtequido icmendac —quepondash Esus.

*Satanasën madobimboecquido chiaid*

<sup>37</sup> Adshumbic Esusën abi chieshënquido chuoapondash. —“Con tsusedpa Abadauan icpampic,” quequin mimbi abimbo chioic. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. <sup>38</sup> “Con Pabéd tabadquin isondambi,” quequin ëmbi bédamboen chuisho tantienquio icquin min papabimboecquidën chiapadomboen mimbi naindac —quepondash Esus abi chieshënquido chieci. <sup>39</sup> —Min

papabimboecquidèn chiacpadomboen mimbi naindac —queshobien: —Con tsusedpa Abadauanèn nacpadomboen mambi napaboc —capondash Esus chieshènquidon. Adoaquien Esus: —Ma mimbi adoenquo yoc. Abadauanèn nacpadomboen naquin mimbi bédamboen natsiac. <sup>40</sup> Bédamboen natiapimbo icquin mimbi ëbi cuesunetiadquo iquec. Nuquin Papan chiaidquo abimbo chuisho mimbi adotiadquo iquec. Nuquin Papan chiaid tantiec ma Abadauan cuesuniantiapimbo icpampiyoc. <sup>41</sup> Min papabimboecquidèn namiacpadomboen naquidien mibi nec —capondash Esusèn abi chieshènquido chuiquin. Adoaquien: —Mambi Nuquin Papauidtsèqui tantieyoc. Utsi tantiatiapimbo icquin Nuquin Papauidtsèqui con pa caimbi —quepondash Esus chieshènquido.

<sup>42</sup> Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Èbemi choenquo iccondabi. Nuquin Papan: “Matsesbèd tabadec nid,” caquini chondac. Adoaid icsho Nuquin Papa tantiaquidèn ëbitsen tantiatsiash. <sup>43</sup> ¿Mitsipadquid yec ëmbi chiaid tantiash: “Tantiadenquien icpec,” quepe mibi? Èmbi abimbo chuisho tantiate bunenquo yec pamumèdabimboec mibi iquec. <sup>44</sup> Min papabimboecquid Satanas nec. Aid bunacpadenuidi mimbi natiadquo iquec. Èndenquimboshè Nuquin Papan tauamboen matses uanubi min papabimboecquid cuesunianquidquo nepampic. Aton padibi nec. Nuquin Papan chiacpadomboen namenquo yec chieshènec muaquidquo nec. Aton padibi icquid yec matses muamequidquo nec. Aidèn madobimboecquin mimbi ëbi tantiatiapimbo icpec. <sup>45</sup> Èmbi Nuquin Papan chiaidquo abimbo chuisho mimbi tantiatiapimbo iquec. Icsambo icquidèn ambembi chuisho mimbi tantienquo yaquien bédambo ictsiash. Mabi icsambo icquidpenquo neyoc. <sup>46</sup> ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquo mimbi icpe? <sup>47</sup> Nuquin Papa tantianuequidèn Nuquin Papan chiaidquo chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshènquido chushcaic.

*Esus chieshènquido cuënoten siantiadpambo yanaid*

<sup>48</sup> —Nuquin Papa tantiesabombo ma mibi neyoc —Esus qesho tantiashien abi chieshènquido: —Ma mibi podobitsi icsa dapuduedash neyoc. Tantiadenquo yec mibi onquec. Samadia yacnocquidobimboec icsamboshè ma mibi iqueyoc —caquien <sup>49</sup> Esus: —Mabi podobitsi icsa dapuduedambo yoc. “Ma matsesèn con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi ëbi: “Muec nec,” capec. <sup>50</sup> “Mabi: ‘Bédambo iquec,’ canu,” quenquo iccobi. Con Pambien: “Ma matsesèn con Mado: ‘Bédambo iquec,’ canu,” ëbi caindac. “Bédambo iquec,” canesabotedi aidëmbi cuidendac. <sup>51</sup> Tanti. Mibi bédamboen chuinu. Èmbi chiacpadomboen naquidquo unësenquo ictsiash —quepondash Esus ompoacimboben chiec. —Èbi tantiaquido unësacsho uincuemeshun Nuquin Papa yacno ëbèdi tabadmendambi padpidec unëstiapimbo icnuc —quequin tantiec adondash.

<sup>52</sup> —Unësenquo ictsiash —quesho tantiash Esus chieshènquido: —Ma mimbi tantiadenquo icnuc chuipayoc. Adsho: “Mayan



icsa dapuduedashien nec,” mibi caombi. “Ëmbi chiacpadomboen naquidquo unësenquo ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bédamboen isaidombo abitedi unëspampic. <sup>53</sup> ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

<sup>54</sup> Adoaquien Esus: —Ëmbembi: “Mabi: ‘Bédambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bédambo iquec,” quequin ëbi comapenen tantiaquin namec. <sup>55</sup> “Tantiembi,” mimbi caboed Nuquin Papa ma mimbi tantienquo yoc. Ëmbien Nuquin Papa tantiaquiec. “Aid tantienquo iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. <sup>56</sup> Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bédambo icmianquidquo matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. <sup>57</sup> Adsho tantiashun Esus chieshënkuidon: —Ma mîmbi min seta 50tedi matamiamo yoc. Adash ma mibi tsusiobudabi iqueyoc. Abadauanën mibi tantiatipimbo icpampic —caquien <sup>58</sup> Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquo nebi —quepondash Esus. <sup>59</sup> Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquo yec ompodanec cuempondash Esus.

## 9

### *Esusën bëshuaid bédamiaid*

<sup>1</sup> Yuecquo ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash. <sup>2-3</sup> Aid istuidshumbimbi: —En chui, Icho. Tantanu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquien: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. <sup>4</sup> Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiondash Esus. <sup>5</sup> Adashic: —Matsesbëd icquin Nuquin Papa bédamboen tantiamenquidquo nebique. Nëidtsen tantiamenu <sup>6</sup> —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

<sup>7</sup> Adotanguimbic: —Acte tiquidimbo icquid Sidoe caidèn bēpamēdec nid —cac nidash bēpamēdtanec bēdamboen isec aton shubuno nidpac caondash. Aid acte con onqueten Sidoe quequin buanaid caic. <sup>8</sup> Aton shubuno nidshobi aton shubu anoentsēcquidon bēshuacboed istuidpac caondash. Adembidi utsibon: —Bēshuaid nebique. Piucquid beccho —quedonetsec tsadtsēcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. <sup>9</sup> Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —quesho tantiash: —Aidi nebi —quepac caondash bēshuacboed. <sup>10</sup> Adsho tantiashun: —¿Mitsipadec bēdano? —caquien: <sup>11</sup> —Esus caidèn bēdamioshi. Nidaidèn uicchun cuishtucashun nidaidbēdta uicchun cabiunshun bēbitaccashun: “Acte tiquidimbo icquid Sidoe caidèn bēpamēdec nid,” cac nidash bēpamēdec bēdanobi. Nēbi bēdamboen isembi —quepac caondash bēshuacboed. <sup>12</sup> Adsho tantiashun: —Mibi bēdamequid ¿mitsimbo iquéc? —cac: —Tsaudi —quepac caondash bēshuacboed.

*Bēshuaid bēdameboed chuimaid*

<sup>13</sup> —Bēdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bēshuacboed buampac caondash. <sup>14</sup> Buanacshobien padiseyobon: —Chonoadenquo icte ushèn nac caosh —quequin tantiaquin: <sup>15</sup> —¿Mitsipadec bēdano? —caquien: —Esusèn nidaidbēdta uicchun cabiunshun bēbitaccac bēpamēdec bēdandshun nēbi bēdamboen isembi —quepac caondash bēshuacboed.

<sup>16</sup> —Bēpamēdec bēdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushèn nēid bēdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bēdamepatsiash? Ma comapenen tantiaquin nactempaboc —quepac caondash. Adshumbic abitedishun: —Esus icsambo iquéc —cainquo icquin <sup>17</sup> bēshuacboed chuipac caondash. —Mibi bēdamequid ¿tsutsi mimi cape? —caquien: —Nuquin Papan: “Yuecshun naden naindami,” quequin chiaidquo chuiquidien nec,” caimbi —quetanec bēshuacboed nidpac caondash.

<sup>18</sup> Aid nidnubien Esus chieshēnquido: —Bēshupenquien niash. Muequien niashe. Anibēdta amē chuimenun chomenuna —quetanquin <sup>19-20</sup> chomeshun bēshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bēshuacshobida tishonda? —capac caondash. Adoquien: —Ai, bēshuacshobi tishondaid nec —ani queshobien: —Bēshuaid ¿mitsipadec bēdanosh? —capac caondash. <sup>21</sup> Adoquien: —Tsaudi. Bēdandsho isambo iccombi. ¿Tсандambien bēdamechitash? Dada ènden caniaid neque. Aidi chuime —quepac caondash bēshuacboedèn tita amēbēdi. <sup>22</sup> —“Nuquin Papa yacnuēsh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuēdec: <sup>23</sup> —Dada ènden caniaid neque. Aidi chuime —quepac caondash.

<sup>24</sup> Adoac padpiden bēshuacboed chomeoapac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquéc,” ¿choctia icco? Ma Esus Nuquin Papan chiaid niac-niacquid neyoc. Ma icsamboshē icquid neyoc —quepac caondash. <sup>25</sup> Adsho tantiash

bëshuacboed: —Icsamboshë icquidien Esus nechitec. Aden tantienquo iquembi. Mabi bédameboc. Isenquo icboedëmbi mambi nëbi bédamboen iseyoc. Adenuidsëqui tantiemi —quepac caondash. <sup>26</sup> Adsho tantiashun: —¿Mitsipaden mibi bédamiosh? —caquien: <sup>27</sup> —Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedën.

<sup>28</sup> Adsho tantiash nëishtanquin chushcapac caondash. —Mibi Esus tantiaquidquo nec. Mibi icsambo iquec. Èbien nuquin tsusedpa Moises tantiaquidquo nec. <sup>29</sup> “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquo neyoc —quepac caondash chuquido. <sup>30</sup> Adoaquien bëshuacboed: —¿Abida cai? “Dadpenquo tantiemi,” ma mibi quepaboc. Adboedi: “Èmbi tantiacmaidquo nec,” ¿quecta ique? Mimbi tantiacmaidëmbini bédamiosh. Ma bédambo yoc. <sup>31</sup> Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. <sup>32</sup> Anin bëshuacshobi tishaid bédamenquo ictenec. Adquid bédamequid nibëdpadenec. <sup>33</sup> Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. <sup>34</sup> Adsho tantiash nëishquioshon: —Bëshuacsho tishaid yec mibi icsamboshë iquec. Icsactëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquo icpac caondash.

### *Ambi bédameboed istuidoashun Esusën chiaid*

<sup>35</sup> Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiadquo caic: “Nuquin Papa yacnuësh choquid nec,” ¿quequinda mimbi tantiape? —capondash Esusën ambi bëshuaid bédameboed chuquin. <sup>36</sup> Adoaquien: —¿Tsutsi neque? Isnu —cac: <sup>37</sup> —Èbi nec. Mibi bédameboedi nebi —caquien: <sup>38</sup> —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuc danëshën tinquebudpondash.

<sup>39</sup> Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbëd tabadec Nuquin Papa yacnuësh chondabi. Èmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Ut-sibo: “Nuquin Papa tantiaquiembi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. <sup>40</sup> Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. <sup>41</sup> Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiembi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshënquido chiec.

## 10

*Obecabimboecquido chiaid*

<sup>1-2</sup> Adshumbic abi chieshènquido Esusèn padpiden chuioapondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesèn aton yua obeca dadpen dayun uaquin napec? Obeca daquënë uaidèn puduedte shècuènquio obeca icbo puduedquid. Daquënë uaid mayadec puduedquidien ampequid nendac. <sup>3</sup> Obeca icbon: “Puduednu. Shècne,” cac ambi: “Con yua ista,” caidèn shècnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. <sup>4</sup> Adshobic icbon daquënë uaidèn tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomben cuënec. Con icbo nec,” quequin icbo tsibanquid obecan. <sup>5</sup> Utsibon cuënaquien tsibanenquio yec dacuëdec cuenquid obeca. Icbouidtsëqui tsibanquid obeca nec —Esus qesho tantiashien: <sup>6</sup> —Tantiadenquio yec mibi onquec —quepondash Esus chieshènquido.

<sup>7</sup> Adsho tantiashun Esusèn chuipondash. —Tantia. Mibi bëdamboen chuinu. Obeca daquënë uaid puduedte shècuëbimboecquid nebi. <sup>8-10</sup> Shècuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Èbi tantiesain Nuquin Papa yacno puduedtiapimbo iquendac. Èbi tantiaquido cain obeca caombi. Aido bëdamboen dayun uaquin bëdamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bëdambo icnuc ampebimboecquid abi iquec. Èbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienuio iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienuio icquimbi ëmbi chiaiduidtsëqui tantiendac —quepondash Esus abi chieshènquido chiec.

*Èbi tantiaquido dayun uaimbi, quequin chiaid*

<sup>11</sup> Adashic Esus padpidec onqueoapondash. —Obeca icbobimboecquid nebi. Icbo cudasacimboec ëbi tantiaquido cudasnuec ëbided cuidadec unësendabi. <sup>12-13</sup> Utsiboen adenquio ictsiash. Piucquid bednuen obeca isquidbimboec iquec. ¿Mitsipadopaid obeca isquidèn? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidèn icbonpenquio nianacimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshènquido chiec.

<sup>14-15</sup> Adashic abi onquec: —Èmbien matses bëdamboen tantiamequin ëbi tantiaquido dayun uaindac. Nuquin Papabëd ëbi tantiananacpadquiec ëbi tantiaquidobëdtsen tantiananquiebi. Aden ëbi tantiaquido tantiec Nuquin Papa cuidmenquio icnuec ëbided cuidadec unësendabi. <sup>16</sup> ¿Nëid matses isadaidbouidtsëqui tantiectabi adec unëspadi? Padenquio. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bëdamboen dayun uaindambi. <sup>17</sup> Con Pan tantiamiacpadec ëbided cuidadec unësendabi. Aden

ambi chiacpadomboen ëmbi nasho con Pan ëbi tantiaquiec. Unësash ëbembu uincuenendabi. <sup>18</sup> Matsesën ambembu ëbi unës uatiapimbo ictsiash. Ëmbi tantiacpadquiequi matsesën unës uadendabi. Adecbidi uincuentiadquio yec ëbembu uincuenendabi. Aden con Pan namiacpadomboen naindambi —quepondash Esus.

<sup>19</sup> Adsho tantiamsh con matses chuiquido naded onquecuededpac caondash. <sup>20</sup> Esus chieshënquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi —quenubien <sup>21</sup> utsibo: —Podobitsi icsa dapuduedashta ¿adec onquepatsiash? Bëdamboequien onquiosh. ¿Podobitsi icsa dapuduedaidënda aden bëshuaid bëdamepatsiash? Bëdambo icquidëmbien adotsiash —quepac caondash.

*¿Quidistu caidta ne? quequin chiaid*

<sup>22</sup> Yuec ictanec con matses cuëdënuec Edusaden yacno chochopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. <sup>23</sup> Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacnenaid nec,” caondash. <sup>24</sup> Ambo Esus capusho isashien con matses chuiquido Esus natia datsidadshun: —En sebadënquio chui. Tantienuquio yec tsadtiapimbo iquebique. Mimbü cuembo chuisho tantiatiadquio iquebi. ¿Nuquin Papan chomiaid Quidistu caidta ne? —capondash con matses chuiquidon. <sup>25</sup> Adoaquien Esus: —Mambi mibi chuipaboc. Ma mimbimbobi ëbi tantienquio icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. <sup>26</sup> Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbü ëbi tantienquio iccoc. Nuquin Papan tantiamiabi yaido icquin mimbü ëbi tantiatiapimbo iquec. <sup>27</sup> Con Pan tantiamiaidien ëbi tantiaquid yanendac. Adshun obecan aton icbo tsibanacimboen ëmbi chiacpadomboen natiadquio yanendac. <sup>28</sup> Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindambi. Ëmbi adoacsho bedshunacimboen icsambo icquidën yuaquin Nuquin Papan cuidtequido icmeoatiapimbo iquendac. <sup>29</sup> Con Panshen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchictiapimbo iquendac. <sup>30</sup> Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

*Cuënoten seshunetiadpambo yanoaid*

<sup>31</sup> —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquio icoapondash. <sup>32</sup> Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. <sup>33</sup> Adoaquien: —¿Bëdamboen nabanshodambi: “Mibi seshunenu,” cadü? Padenquio. “Con Papadquidquio nebi,” quequin Nuquin

Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec —quepondash abi chieshênquido.

<sup>34</sup> Adshobien Esusèn: —Nuquin Papan chiaidquio nuquin tsusedpan naden dada uapampic. “Nuquin Papa naded onquec: ‘Min matsesèn ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. <sup>35</sup> Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” queshun mimbi chushcambo iquec. Nuquin Papa adoambobi çëbida chushcai? <sup>36</sup> Nuquin Papan namiacpadec abi yacnuësh chondaïd nebi. Adquid yec: “Nuquin Papan Madombo nebi,” quiobi. Ëbi adsho tantiashun çatotsi quequin ëbi chushcai? çNuquin Papadambi muauadio? Mambi abimbo caboc. <sup>37</sup> Ëmbi chiaidquio tantiatiapimbo icquimbi ëmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac. <sup>38</sup> Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaïduïdtsëqui tantiatiapimbo icquin adota. Adshun: “Ai, Nuquin Papapadquidquiobidien Esus nec,” quequin mimbi tantiabentsiac —quepondash Esus.

<sup>39</sup> Adsho tantiash padpidec nëishtanquin abi chieshênquidon: —Bedchitono —caqui bedadenquio icpondash. <sup>40</sup> Adashic acte Odan caïd potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. <sup>41</sup> Adshumbic Esusèn comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëïd nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusèn adobansho isun: “Nëïd chuiquinshenda Uan padon abimbo capadenec,” caimbi —cabededpondash anocquidon. <sup>42</sup> Adshumbic: —Nuquin Papa yacnuësh choquïdien Esus nec —quequin Esus tantiabempondash.

## 11

### *Dasado caïd unësaid*

<sup>1</sup> Udeya yacnuësh Esus cuembon Dasado Esusèn utsibimboecquid unëstiadtsëcquio yanac caondash. Shubu dadpen icquid Betania caïd yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. <sup>2</sup> Madian aton manëdaïdën ucbanquin Esus tanoshcabi icnuc adec aton utsi unëstiadtsëcquio yanac caondash. <sup>3</sup> Adnubien aton chuchun: —Esus çuïtan —cac aton matsesèn Esus chuituidpondash. —Mimbi con utsi caïdquio unëstiadtsëcquio yanoshe. En isec cho —catuidpondash. <sup>4</sup> Adoaquien Esus: —Chiata. çUnësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaïd aton Madombotsen bëdambo iquec,’ quenu,” queshun naindambi —quepondash. <sup>5</sup> Adbosh Dasado aton chuchubëda tantiaquidquio yequi <sup>6</sup>badedquio nidenquio yec anobi daëdec ushpondash Esus.

<sup>7</sup> Daëdec ushumbic Esusèn: —Nuqui icbocno Udeya caïdën padpidec nidnu. Nid —capondashi. <sup>8</sup> Adoaquimbi: —Icho, ma mibi

anoshon cuènoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. <sup>9-10</sup> Adoaquien cuembo chienquo icquimbi: —Badiadèn capuec tocoshquetanec uebudesa. Inchëshèmbien tocoshquetanec uebudquid —quequin Esusèn chuipondashi. —Nèbi èbi unès uatiapimbo iquec. Badiadèn nidachimboen con Pan tantiaidtedi nainabi icsho èbi unès uatiapimbo iquec. Inchëshèn uebudacimboen ambi tantiaidtedi nainshobini ambi tantiacpadènquiobi matsesèn èbi unès uaindac —quequin tantiec adondash Esus.

<sup>11</sup> Adshumbic Esusèn padpiden ompoacbimboen chuioapondash. —Èmbi con utsi caid Dasado ushtoaccoshe. Isucumec nidnu. Nid —quesho <sup>12</sup> tantiashini: —Ma ushnu. Ushash isucunquid —quepondac. <sup>13</sup> Esusèn Dasado unèsaid chuinubi Dasado ushe dantsèccondambi. <sup>14</sup> Adnubien Esusèn sebadènquo chuipondash. —Dasado unèsaccosh. <sup>15</sup> “Bèdamec nidtiadquidi niobi” ¿quepectabi ique? Padenquo. Mibi caic: “Ma nèidon èbi bèdamboen tantianu,” queshun Dasado unèso istanambo iccombique. Nèbi mibi ismec nidnu. Nid <sup>16</sup> —caquien: —Ai, abèdquiobi unèsec nidnu. Nid —quiampondash Tomas anin abi ushèmbi daèdpambo tishaid. Adanec abitedi nidondash.

*Unèsaid uincuemequidquo nebi, quiaid*

<sup>17</sup> Adashic unèsacno anoentsèqui Esus chopondash. Choshon: —Unèsacsho chococash daèd-daèdquiec ushobi —quetsècquiec onquecuededsho tantiatuidpondash. <sup>18-19</sup> Esus choabi icnuc con matses chuiquido Dasado unèsacnuèsh sedenquenuec Edusaden yacnuèsh cho-chopac caondash. Unèsaid nèbi ictsècnuc tedes quidometedos tiontsècquidèn badedquo cho-chopac caondash. Cho-choash unèsaidèn chuchubèd sedenquec tabadpac caondash. <sup>20</sup> Adnubien: —Esus choec —quesho tantiash Madta bèquedec chopondash aton chibi Madia shubuno sedenquec tsadnubi. <sup>21</sup> Choequien Esus bèquedec: —Mibi icnuc con utsi unèsenquo ictsenosh, Icho. Con utsi unèsosh. <sup>22</sup> Mimbi chiacpadomboen Nuquin Papan nèbi natsiash —quepondash Madta: —¿Ada con utsi uincuemetsia? —quequin chuitiadquo yequi. <sup>23</sup> Adoaquien Esusèn: —Min utsi uincuenendac —capondash. <sup>24</sup> Adsho tantiash: —“Ai, yuecash unèsaido abitedimbo uincuemete ushèn con utsi uincuenendac,” quequin tantiembi —quepondash Madta. <sup>25</sup> Adsho tantiashun Esusèn: —Èbibì matses unèsaid uincuemequidquo nebi. Èmbi tantiacpadènquo uincuenendac. Aden èbi tantiaquido unèsacsho uincuemendambi. <sup>26</sup> Èmbi adoac Nuquin Papa yacno èbèdi tabadendac padpidec unèstiapimbo yec. Èmbi aden chuisho tantiash: “Ai, abimbo mimbi caindac,” ¿quequinda tantie? —capondash Esusèn. <sup>27</sup> Adoaquien Madta: —Ai, adembi tantiembi. “Nuquin Papa yacnuèsh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec <sup>28</sup> nidpondash aton chibi chiec. Nidshun: —Nèmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien <sup>29</sup> Esus bèquednuec badedi choquin istuidpondash. <sup>30</sup> Shubu dadpen yacnombo choabi icsho Madtan bèquedacnobi Esus tabadsho Madiantsen istuidpondash. <sup>31</sup> Adec Madia nidsho isun chococacnobi sedencaic nide danquin abèd sedenquenuequidon tsibanampac caondash. <sup>32</sup> Adnubien Madia Esus istuidtanec dayumbudec sedenquiampondash aton utsi tantiec. Adec

shubitanec ènèdash: —Mibi unèsquio iccoc, Icbo. Bèdambo icquid mibi nec. Mibi icnuc con utsi unèsenquio ictsenosh —quepondash Madia Esus caic.

<sup>33</sup> Adnubien Madia tsibanec cho-choec con matses chuiquido sedenquetuidpondash. Madiabèd sedenquecuededsho istanec: —Ai, unèsquio icnuc nec —quias Esus abitsen shubiantiadtsècquio icpondash. <sup>34</sup> Adec shubiantiadtsècquio tsadacnuèshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien <sup>35</sup> shubinidequi nidpondash Esus. <sup>36</sup> Adec shubinidsho isumbien: —Ma Dasado unèsquio icnuc shubieyoc —cabampondash con matses chuiquidon. <sup>37</sup> Adnubien utsibo: —¿Atotsieshun bèshuaid bèdamiondaidèmbi Dasado unèso bèdamenquio icposh? —quepondash.

*Esusèn Dasado uincuemiaid*

<sup>38</sup> Nidquimbi chocacno istuidequi Esus shubiantiadtsècquio yanoapondash. Nidaid cuènoteuidpambo icquid macuèsh tsimpiduc shècuè uaidèn unèsaid nauedshun cuènote dapan bètinacnuèsh shubiantiadtsècquio iccondash. <sup>39</sup> Adashien Esus: —Cuènote bidiacquin shècuè shècne —quepondash. Adsho tantias unèsaidèn chuchu Madta: —Padi. Ènden pisenashe. Chococash mabi daèd-daèdquiec ushboc —quepondash. <sup>40</sup> Adoquien Esus: —Dacuèdenda. Mambi mibi chuiboc. Mimbi: “Nuquin Papan Madombobien mibi nec,” èbi casho: “Èmbi comapenen tantiaquin nabansho mimbi isendac,” mambi mibi capaboc. En na. Baded bècune —cac <sup>41</sup> cuènote shècuè bètinaid shècnequin bècunepondash.

Adsho istanquimbien Esusèn abuc isquin Nuquin Papa chuipondash comapenec onquequin. —Papa, èmbi nèbi chuisho mimbi tantiec. Èmbi chuibocpadomboen mimbi naindac. Mibi bèdambo iquec, Papa. <sup>42</sup> Èmbi otacquo chianiaid mimbi tantioc. Èbi datsidadaido tantiamenuen nèbi comapenec onquequin mibi chiemi. “Mibi chuitanquin èmbi comapenen tantiaquin nabansho isun: ‘Nuquin Papan chomiaidien nec,’ quequin ma nèidon èbi tantianu,” queshun comapenec onquequin mibi chiemi, Papa. Padi, aitedtsèqui mibi chiemi, Papa —quepondash Esus. <sup>43</sup> Adtanquimbien comapenen cuènquin: —Dasado, puduenec cho —capondash. <sup>44</sup> Adoquien Dasado badedquio puduenanec chopondash abi dashcute dataniacchobi. Unèsacsho uesquin dashcuten datanetanquin dashcuten abi bèpucacchobi chopondash. Adec chosho istanquin: —Baded dashcute dachic. Ma nidnu —capondash Esusèn.

*Nèbien Esus unès uametiad, quiaid*

*(Mat 26.1-5; Mad 14.1-2; Duc 22.1-2)*

<sup>45</sup> Aden Esusèn ènden unèsaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. <sup>46</sup> Adnubien utsin Edusaden yacno nidshun Esus chieshènquido padiseyobo chuituidpac caondash. —Esusèn unèsaid uincuemiosh —quepondash. <sup>47</sup> Adsho tantiatanquimbien chuiquid dapan abèdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomias tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. <sup>48</sup> Aden Esusèn nabansho isun nuqui èmiabi icsho nuquin matsesèn abitedishun abi chuiquid dapa



Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? — quepac caondash chieshëmënquido.

<sup>49</sup> Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chien-dac? Tantiadentsëcquio icnuc ma mimbi chuipaboc. <sup>50</sup> Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna —quepac caondash chuiquid dapambo abëdtan chuiquido chiec. <sup>51</sup> Aden chuiquin ambembi chiambo Nuquin Papan oncamiac Nuquin Papan chiaidquio aden chuipac caondash. —Nëid setan abëdtan chuiquido chuiquid dapambo nec —queshun Nuquin Papan aden on-camiaqui Caipas onquepanëdash. —Matses cuidmenquio icnuc con Madoded cuidadec unësendac —queshun Nuquin Papan Caipas aden oncamepanëdash. <sup>52</sup> Aden Caipasën chuinëdaid tantiaquin ëmbitsen chuinu. Tantia. ¿Isadaidbouditsëqui cuidmenquio icnucta Esus abided cuidadec unëstiondash? Padenquio. —Matses utsitsen abi tantiaquid yansho isun abëdi tabadmenuc Esused cuidadec unëspondash — quequin tantiembi. Nëbi Caipasën chuisho tantiashun tsusiobon chiaid chuinu. <sup>53</sup> Aden Caipasën Esus unës uamete chuisho tantiashien Esus chieshënquido: —Nëbimbobien Esus unës uametiad —quecuedepac caondash.

<sup>54</sup>—Tsusiobon mibi adosh —quesho tantiatanequien chieshëmënquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. <sup>55</sup> Epadain caid yacno tabadnubien Nuquin Papan con tsusedpabo unës uainquio icquin matamiampid inchësh tantiec cuëdënuec Edusaden yacno con matses nidanepac caondash. Cuëdë nec taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque —quianec nidanepac caondash. <sup>56-57</sup> Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: — Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiashien: —¿Ada Esus chopeba? “Unës uamenushe,” quiash choenquien icchitec — quecuedepac caondash.

## 12

### *Madia Dasadon chuchun Esus tanoshcaid* (*Mat 26.6-13; Mad 14.3-9*)

<sup>1</sup> Aden mishtemaid mishquidon ambi nibë nubien Edusaden anoentsëqui ambi Dasado uincuemiondacno Betania yacno Esus chopondash. Seistedec ushah Nuquin Papan matamiampid inchësh tantiec cuëdë nec taënuishi niondash. <sup>2</sup> Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi.

Nëidic Esus. Nëidic Dasado. Nëidic shubu icho. Nëidic Esusbèd icquid èbi chedobi. Nëidic Dasadon chuchu daèd. Aidededi icpondash. Adec penuec tabadsho Madtan pete menebampondash. <sup>3</sup> Adnubien Madian: —Esus bédamboshë iquec. Ismenu —quetanquin bédamboshë nuadquidèn Esus tanoshcapondash. Tanoshcatanquin aton manëdaidèn taucpondash. Aden tanoshcaid shubu anuestsëcquiec comapenec nuadpondash. Pucquid dadpenquo menequin bedaid niondash. Sedunten cushtoid bédambo nuadquid nado caid niondash. <sup>4</sup> Adsho isun Esus bedmequidèn Udasèn Madia chushcapondash. <sup>5</sup> —Padi. Mimbi uesquieque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibèdquido aid piucquid menetiad —capondash Udasèn. <sup>6</sup> Adomboen chuisho tantiaishun Udas bédambo icquidquo danondambi. Esusbèd icquido èbitedishun piucquid bedshun sauedten sauedshun dayun uaquidquiemi danondac. Pucquid bédamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: —Pucquid nibèdquidoen menetiad —quequin muaquin Madia chushcapondash. <sup>7</sup> Adshobien Esusèn: —Padi. Chushcainda. Ma nanu. Ma nuquin matsesèn unësaid bédambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen èbi unëso chococate tantiaquin Madian èbi tanoshcaquin naic. <sup>8</sup> Pucquid nibèdquido dadpen iquec. Nibèdenquo iquendac. Èbien mibèd ichoedi nëbi nibèdquo yanendac. Èbi tantiec Madia bédambo iquec —quepondash Esus Udas chiec aidi: —Abi chieshënquido Esus bedmenu —quepanuda.

*Dasadotsen cuesunetiadquo yaid*

<sup>9</sup> Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusèn uincuemiondaid icsho aidtsen isnuec cho-chopondash. <sup>10-11</sup> Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquibidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabensh,” quioshe. Dasadotsembien unës uatiad —quianac caondash chieshëmënquiec.

*Chuiquid dapa ismiacimboen Esus ismiaid*

(*Mat 21.1-11; Mad 11.1-11; Duc 19.28-40*)

<sup>12</sup> Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuèdënuëc cho-choboedon: —Esus choec —quesho tantiatanquin <sup>13</sup> niste podobiequid bedbëtse nec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uicaiqui:

“Mibi bédamboshë iqueque. Èbi bédamboen ista.

Nuquin Papan chomiaid yec mibi bédamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. <sup>14</sup> Ambi podquedèn choquin bedbëtsemboed cabayobitsecquidëmpi catsadtoanec Esus chosho

isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuiampic. <sup>15</sup> “Edusaden yacnocquido chiec:

‘Dacuëndenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. <sup>16</sup> Adec Esus catsadtoanec chosho isun aden chuiampid tantienquo iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podu uic-uiccaquin: “Bëdambo iquec,” quequin nuquin matsesën Esus ismebeddedpondash —quequin tantiabenondambi.

<sup>17</sup> Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash. <sup>18</sup> Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podu uic-uiccaquin ismepondash. <sup>19</sup> —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

*Matses utsibo: Esus isnu, quiaid*

<sup>20</sup> Edusaden yacno cuëdë nec cho-choboedo matses utsibo isadaidpembotsen icpondash. <sup>21</sup> Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun <sup>22</sup> Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien <sup>23</sup> aid matses utsibo isadaidpembo tantiamenuc Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Ëmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi. <sup>24</sup> Adshumbien ompoacbimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac caniaash bacuëec bëdambo icpaïd yoc. Chococabi bëdambo ictiapimbo iquec. Adoacbimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus. <sup>25</sup> Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquid icquin ëmbi chiacpadomboen naquido ëbëdi tabadtequido yanendac. <sup>26</sup> Adquid ëmbi chiacpadomboen natiadquio yec ëbi yacpadec chieshtoenquo ictsiash. Adquidquio unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac —quepondash Esus.

*Esusën abi unës uate chiaid*

<sup>27</sup> Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec

nebi —quepondash Esus. <sup>28</sup> Adtanequien Nuquin Papa chiec: —Nuqui tantiacpadomboen nèbi nainembi, Papa. Ëmbi aden nainacsho: “Nuquin Papa bédambo iquec,” matses cameta, Papa —quenubien abucueëshquio Nuquin Papa comapenec onquepondash. —Ai, ëmbi namiaid mibi icsho: “Nuquin Papan namiaid nec. Nuquin Papa bédambo iquec,” matses camepombi. Nèbi padpiden adomeoaindambi —quepondash Nuquin Papa.

<sup>29</sup> Abucueësh onquesho bédamboen tantiabi yec utsibo: —Abu cuédtoec nec —quenubien utsibo: —Nuquin Papan abi yacnoshon uaid mayan bédan Esus chuipash —quecuededpondash. <sup>30</sup> Adsho tantiash Esus: —¿Ëbi tantiamenuecta onquediosh? Padenquio. Mibi tantiamenuequien niosh. Aden tantiashun ëmbi bédamboen chuisho tantiata. <sup>31</sup> Nuquin Papa chieshènquid Satanasèn yuaido matses dadpenquioshë iquec. Nèbi Nuquin Papan tantiacpadomboen aido utsi-utsien Satanas bedshunendambi: “Chèn. Con na neque,” quequin. <sup>32</sup> Ëbi abuc dectanac aden matses ëbi tantiaquid icmendambi —quepondash Esus. <sup>33</sup> —Ëbi cuesten dectanquin unès uaindac —quequin tantiec: —Ëbi abuc dectanendac —quepondash Esus.

<sup>34</sup> Adsho tantiash abi datsidadquido: —“Ëbi dectanendac,” quiosh. “Unësebi,” quepequien iccosh —quiashien Esus chiec: —“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesèn chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? —quepondash Esus datsidadquido. <sup>35</sup> Adoaquien Esusèn: —Nadquid nebi —quenquio icquin ompoachimboen naden chuipondash. —Mibi bédamboen tantiamequid nèbi isadenquio iquendac. Aid nibèdnuc bédamboen mimbi tantienquio iquendac. Nidabi aidèn chuisho bédamboen tantiata. <sup>36</sup> Nuquin Papan bédamboen iste tantiamequid tantiata. Adsho bédambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

### *Isadaidbon Esus tantienquio yaid*

<sup>37</sup> Ëmbi dadpen chuiquin dada uabanacpadomboembi Esusèn comapenen tantiaquin dadpen nabansho isun con matses isadaidbon Esus tantiatadquidi Esus tantienquio icpondash. <sup>38</sup> Aden Esus tantienquio icte con tsusedpa Isayasèn Nuquin Papan tantiamiacpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquio chuibansho tantiashun: Muequien mibi nec, ëbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenquio iquendac, Papa,’ quependac,” quequin Esusèn chuite Isayasèn dada uapampic.

<sup>39</sup> Nuquin Papan pamumèdacobimboecnuc icmiac con matsesèn Esus tantienquio icpondash. Aden chuiquin Isayasèn padpiden dada uapampic.

<sup>40</sup> “Isadaidbon ëbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shëcuë nibëdabimboec icchitono.

Ëbi tantiasho abi icsaid bëpiscudquin bëdamboen ismane,”  
quequin Nuquin Papan ambi con matses caido nëishënsun chushcaid  
Isayasën dada uapampic. <sup>41</sup> Nuquin Papambo Esusbëd uinsadpambo  
yec tabadsho isondaïd icquin Isayasën aden Esus tantienquo icte  
chuiampic.

<sup>42</sup> Con matses dadpeshun Esus tantienquo icnubi con matses chuiquid  
on abentsëcshun abentsëcshunquien Esus tantiauidpac caondash.  
Adoboedi: —“Nuquin Papan chiaïd chuibante shubun puduedenda,”  
canushe —quiash dacuëdquin: —Esus tantiaquid nebi —quequin chuiti-  
adquidi utsibo chienquo icpac caondash. <sup>43</sup> —Ma con matsesëmbi  
ëbi bëdamboen isnu —quequinuidtsëqui tantiaquin aton matses chuiti-  
apimbo icpac caondash. —Ma Nuquin Papan ëbi bëdamboen isnu. Aton  
Mado tantiaquid nebi que —quetiadquidi adenquo yac caondash.

### *Cuidenquo icte chiec nebi, quiaïd*

<sup>44</sup> Abi tantiauidboedo Nuquin Papan chiaïd isbanquido cho-choash  
abi datsidadacsho chuineuc Esus padpidec comapenec onquepondash.  
—¿Ëbi tantianuequidën ëbiuidtsëquida tantiapadic? Padenquo. Ëbi  
tantiaquidën ëbi chomiondaïtsen tantiatsiash. <sup>45</sup> Adembi con Pa-  
padquibidi ëbi icsho isun: “Ai, adquibidien Nuquin Papa iquec,”  
quequin tantiatsiash. <sup>46</sup> Nuquin Papan matses bëdamboen iste tanti-  
amenuec matseshëd tabadec chondabi. Adec matsesash: “Ëbi tanti-  
aquido ma Nuquin Papan bëdamboen isquin bëdamboen tabadmenu,”  
quiash nebi. <sup>47</sup> “Ëmbi aden chuisho tantiatipimbo icquido nëbi cuidnu,”  
¿quectabi icti? Padenquo. Nëbi Nuquin Papan bëdamboen isquin cuiden-  
quo icte chuinuequini nec. <sup>48</sup> Nuquin Papan cuidte ushëmbien ëbi  
tantiesabon: “Nuquin Papan chiaïdshenda chuipadeneç. Aid tantien-  
quo yec icsabudquipopbi,” quequin ambibi tantiendac. Adsho Nuquin  
Papan cuidendac. <sup>49</sup> ¿Ëmbembi chuiquindambi nadi? Padenquo. Ëbi  
chomiondaïd con Pan chiaïdquo chiequini nec. <sup>50</sup> “Ëbi tantiaquid  
ëbëdi tabadendac padpidec unësenquo yec,” queshun Nuquin Papan  
chiaïduidtsëqui chiequini nec —quepondash Esus.

## 13

### *Esusën abëd icquido tapanaid*

<sup>1-2</sup> Esusën comapenen tantiaquin nabanaid chuiquin aidtedi chiombi.  
Nëbi abi tantiaquido tantiaquieç abided cuidadec unësaid chuiquin  
unësash abi uincuenaidtsen chuinu. Tantia. Nuquin Papan con  
tsusedpabo unës uainquo icquin matamiampid inchësh tantiaquin pec  
tabadte ushë nëbi yanuc inchëshën Esusbëd pec bëdamboec tabadondabi.  
Padnuen Udas Simon Iscadioten mado Satanasën tantiamiacpadom-  
boen Esus bedmete tantieç tsadpanëdash. Adnubien Esus: —Nëbi con  
Pa yacno nidebi nëido nianec. <sup>3</sup> Con Pabëd tabadec ambi tantiapadec  
abëdi abitedishun Icbombo iccondaïdi nëbi anobidi nidoash adquio-  
bidi icoaindabi. Adquid icquin nëido bëdamboec tantianante ismenu

—quequin tantiaquin <sup>4</sup> yuan nacbimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. <sup>5</sup> Tsibidiquetanquin pada-padaid dapan acte cush-totanquin abèd icquido tapambampondash. Daucudten tauchbanquin tapambanondash.

<sup>6</sup> Aden tapambanquimbi: —Mibitsen tapanu —cac Petedon: —¿Icbonda yua tapampaid? Èbi tapanenda, Icbo. Padi —capondash. <sup>7</sup> Adoquien Esusèn: —Èmbi nasho nèbi mimbi tantienquo iquec. Yuecshun mimbi tantiendac. En tapanu —caquien: <sup>8</sup>—Padi. Mibi bédamboshë icquid nec. Èbien icsaquid nec. Yua namiacbimboen mibi tapame-tiapimbo iquebique. Padi —caoapondash Petedon. Adoquien: —Èmbi tapanabi yac con yuambo mibi ictiapimbo ictsiac —capondash Esusèn. <sup>9</sup> Adsho tantiashun Petedon: —En na, Icbo. Tapantanquimbi mapinobèdtabi èbi mëpanta —caquien: <sup>10</sup>—Padi. Nesboed mibi nec. Taënouidtsëqui bëchishacsho tapanembi. Èmbi bëchish ucac mibi bédambo iquec. Abentsëc icsambo iquec —quepondash Esus. —Bëchish ucachimboen èmbi nasho Nuquin Papan mibi bédamboen isendac icsaid ucud-acbimboecnuc —quequin tantiec: —Èmbi bëchish ucac mibi bédambo iquec —quepondash Esus. <sup>11</sup>—Udasën èbi unës uamenuen bedmendac —quequin tantiec: —Abentsëc icsambo iquec —quepondash Esus.

<sup>12</sup> Aden tapambanash dasiuidash samèdquin pebededquin abèd icquido Esusèn chuipondash. —Èmbi naboed ¿ada tantie? Tantia. Mibi chuinu. <sup>13</sup> “Èbi chuiquidquo mibi nec,” mimbi èbi capec. Adembidi: “Con Icbo mibi nec,” mimbi èbi capec. Bédamboen mimbi chiec. Adquid nebique. <sup>14</sup> Èmbi nabocpadomboen mimbitsen nata. “Èbèd icquid tantiaquiquin tapanquin nashunu,” queshun naombique. Adecbidi nashunanta. Naden tantiashun nata. “Èsus tantiaquido tantiaquiembi. Con buchibimboecnuc nashunu,” quiash nashunanta. <sup>15</sup> Èmbi nabocpadomboen namenuen adombique. Mimbitsen nata. <sup>16</sup> En chuinu. Tantia. ¿Icbon chiacta chieshpadic? ¿“Nid,” cacta nidenquo icpadic? Icbon chiacpadomboen yuan naquid yendac. Adomboen tantiaquin èmbi chiacpadomboen nata. <sup>17</sup> Èmbi aden chuisho tantiashun èmbi chiacpadomboen naic mibi bédambo iquendac —quepondash Esus.

<sup>18</sup> Adashic padpidec: —Mibitedi caic: “Bédambo iquec,” quetiapiambo iquendabi. Tauamboen: “Nuquibi icnu. Cho,” èmbi caondaido con yuabotedi tantiembi. Abentsëc icsambo iquec. “Aid con yuapenquo nec,” quequin èmbi tantiaidi nec. Nuquin Papan tantiamiac aйдèn icsamboen nate chuiquin nuquin tsusedpan dada uapampic naden. “Èbèdtan pianeboedèmbi èbi unës uamenuen bedmendac,” quequin dada uapampic. <sup>19</sup> “‘Abi unës uametebi chioshi. Nuquin Papapadquidquibi icquimbien naosh,’ quequin ma tantianu,” queshun mibi chiombi. <sup>20</sup> Mibipadquidèn nate mibi chuinu. Tantia. Mibipadquidèn èbi chuibansho tantiash: “Ai, abimbo caic,” queshun utsibon èbi tantiatsiash. Adem-bidi èbi tantiashun èbi chomiondaid Nuquin Papatsen tantiatsiash —quepondash Esus.

*Abi bedmequid Esusèn chiaid*  
(Mat 26.20-25; Mad 14.17-21; Duc 22.21-23)

<sup>21</sup> Adshumbien abi bedmequid Udas tantiac unësquio icnuc Esusën chuipondash. —Tantia. Mibitedi chuinu. Ëbéd icquidëmbi ëbi chieshënquido ëbi bedmendac —quesho <sup>22</sup> tantiash abéd icquidobéd bëisnane: —¿Tsutsi capec? Nëidien cachitec —quecuededpondabi otacquo tantiec.

<sup>23</sup> Ëbi tantiaquidquio yec con cachoctsëqui Esus uepondash. <sup>24</sup> Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquio icquin. <sup>25</sup> Adoaquimbi cachoc isquin: —¿Tsutsi cai, Icbo? —capondac. <sup>26</sup> Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. <sup>27</sup> Adoac penubi Satanasquio Udas dapuedequiopanëdash ambi tantiaidquio namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

<sup>28</sup> Adsho tantiashini ëbitedi: —Tantiadenquio yec onquepec. ¿Atotsi quiash: “Baded naic nid,” quepec? —quepondac. <sup>29</sup> Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash. <sup>30</sup> Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

#### *Tantiananquiota, quequin chiaid*

<sup>31</sup> Abi bedmenuen chiec Udas nidbombien Esus: —Nuquin Papan matsesmiadquio icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. <sup>32</sup> Ëbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unëshash uincuenash Nuquin Papa yacno nidte chiec adpondash. <sup>33</sup> Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacadomboen mibi chuioanu. Tantia, mado. Ëbi nidacsho mimbi ëbi istuidenquio iquendac. Ëbi nidacno mibi nidtiapimbo iquendac. <sup>34</sup> Aden tantiaquin Nuquin Papan chiaid utsi mibi chuinu. Ëbi nidan ëmbi chiacadomboen nata. Ëmbi mibi tantiaquiacpadquiec tantiananquiota. <sup>35</sup> Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

#### *Petedo: Ëmbi isacmaid nec, quete chiaid*

(*Mat 26.31-35; Mad 14.27-31; Duc 22.31-34*)

<sup>36</sup> Adec —Nidebi —quesho tantiashun Petedon: —¿Mitsimbo nide, Icbo? —capondash. Adoaquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. <sup>37</sup> Adsho tantiash Petedo: —¿Atotsi quectadquio yec: “Nëbi ëbëdi nidtiapimbo mibi iquc,” quepo mibi? Mibëd nidec dacuëdenquio ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi —quepondash Petedo.

<sup>38</sup> Adsho tantiashien Esus: —“Ëbien natiad,” ¿quecta icpatsia? Padenquio mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi.

Adashic padpidec adecbidi. Cachina bënë cuëdanabi icnuc mibi aden-dac —quepondash Esus. Adsho tantiashini Esusbëd icquido ëbitedi dacuëdcuededpondac.

## 14

### *Nuquin Papabëd tabadmendambi, quiaid*

<sup>1</sup> Ëbitedi dacuëdcuededsho isashien Esus: —Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. <sup>2</sup> Mimbi tantiacpadquo Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquo icsho mibi aden chienquo ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. <sup>3</sup> “Adquid iquec,” quiaish ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. <sup>4</sup> Ëbi nidan ëbi nidacno nidte mimbi tantiec —quepondash Esus.

<sup>5</sup> Adsho tantiashun Tomasëntsen: —¿Mitsimbo nide, Icbo? Tantiambo iccombi. Podqued tantienquo iquembique. Ëbi chui —caquien <sup>6</sup> Esus: —Nuquin Papa yacno nidte tantiamequidquo nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. <sup>7</sup> Ëbi caic: “Nuquin Papan Mado nec,” quequin mimbi Nuquin Papatsen tantien-dac. Nëbi abipadquid ëbi icsho isun Nuquin Papambo isacbimboen mimbi tantiendac —quepondash Esus.

<sup>8</sup> Adshobien Uedipentsen: —Nuquin Papa ëbi isme, Icbo. Nuquin Papa iste bunebique. Aid isash bëdambo ictsiabi —caquien <sup>9</sup> aidtsen Esusën: —¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ëbi adquid icsho isun: “ ‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? <sup>10</sup> “Nuquin Papapadquidquo nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquo iccombi. Con Pan chiaidquo chiequini nec. Adembidi ëmbembi nabanenquo iccombi. Ëbëd tëshnanenquo icquin con Pan namiaquimbi naoc. Ëmbembi nainquo iccombi. <sup>11</sup> “Con Papadquidquo nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquo tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantia-ta. <sup>12</sup> Tanti. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi tantiabenen-dac. <sup>13</sup> Ëmbi chiacpadomboen naquidën: “Ëbi nashunta, Icbo,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen <sup>14</sup> ëbi tantiaquidën chiacpadomboen nashunendambi —quepondash Esus abëd icquido chiec.



*Nuquin Papan Mayan tabadte chiaid*

<sup>15</sup> Adashic abèd icquido padpiden chiec Esus: —Èbi abimbo tanti-aquidèn èmbi chiapadomboen natiadquio iquendac. <sup>16</sup> Adotiadquio icsho isun con Pabèd icquin con Pa chiendambi naden. “Nuqui tantiaquido bédamboen tantiamenuen nuquin Mayan aidobèd tabadmenuna, Papa,” èmbi cac Nuquin Papan con Mayan mibèdi tabadmendac. <sup>17</sup> Adoac mibi nianenquio yec mibèdi tēshnanenquio iquendac. Mibèd icquin èbi chuiquin mibi abimbo tantiamendac. Aid isadenquio icsho èbi tantiesabon aid tantiatiapimbo iquec. Mimbien aid tantiec. Con Pan èbèd icmiaidquio nec. Ambi namiaid èbi icsho aid tantiashumbimboen mimbi tantiec. Èbi nidan choash mibèdi tēshnanenquio yec tabadendac con Mayan. <sup>18</sup> ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibèd aid icnuc èbèd yachimboequi con Mayan tantiadendac. <sup>19</sup> Nèbi èbi nidacsho èbi tantiesabon èbi isenquio icnuc mimbi èbi isendac uincuenacsho. Adec uincuenaid icquin con Mayan mibèd tabadmequin mibi unēsacsho uincuemeshun èbèdi tabadmendambi. <sup>20</sup> Èbi uincuenaid ushèmbi mimbi naden tantiendac. “Esusèn Nuquin Papa tantiaquiec aibbèd tēshnanenquio icquin aidèn chiapadomboenuidi naindac. Adecbidi Esusbèd tantiananquiec aibbèd tēshnanenquio icquin aidèn chiapadomboen natiadquio yec tabadebi,” quequin mimbi tantiendac. <sup>21</sup> Èmbi chiapadomboen naquid èbi tantiaquidquio nec. Èbi tantiaquidquio mibi icsho con Pabèdtan mibi tantiaquioquin: “Adquio aton Papabèd Esus iquec,” camequin mibi bédamboen tantiamendambi — quepondash Esus.

<sup>22</sup> Adsho tantiashun Udas utsin abi bedmequidēnpenquio: —“Nuquin Papa yacnuèsh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuèsh choquid icquin ¿atotsieshun èbiuidtsèqui tantieme, Icho? —caquien <sup>23</sup> Esus padpidec: —Èbi tantiaquiduidtsèqui naden tantiamendambi. Èbi tantiaquid èmbi chiapadomboen naquid nec. Aden nasho con Pabèdtan tantiaquioquin aibbèdi con Mayan tabadmendambi. Adoac con Mayanèn tantiamiac èbèd iquec con Pabèd iquec quiachimboec tantiadendac. <sup>24</sup> Èbi tantienquio icquidoen èmbi chiaid niac-niacquido nendac. ¿Èmbiuidtsèqui chiaidta adquidèn niac-niacpadic? Mambi Nuquin Papan chiaidquio chuiboc. Aidèn chiaidquio adquidèn niac-niaquec —quepondash Esus abèd icquido chiec.

<sup>25</sup> Adashic padpidec Esus onquiondash. —Mibi bēdiactsēc tantiamequin mibèd icquin con Pan chiaid chuibanombi. <sup>26</sup> Con Pa yacno nidshun èmbi: “Nuquin Mayan aidobèdi tabadmenuna, Papa,” cac con Pan con Mayan matsesbèd tabadmendac. Adoac èmbi naidbèdta èmbi chiondaidtedimbo mibi bédamboen tantiamendac. <sup>27</sup> Con Pa yacno nidshun con Mayan mibèdi tabadmequin dacuèdenquio icquid mibi icmendambi. Adoac dacuèdenquio yec bédamboec tabadta. Èbi tantiesabo dacuèdacbimboec dacuèdenda. Comapenec dacuèdtanec uinte paèdtanec aido tabadnubi mibi dacuèdenquio yec bédamboec tabadta. <sup>28</sup> “Nèbimbobini con Pa yacno nidendac. Adtanequic choaindabi,” quepobi mibi chiec. Èbi adsho tantiash èbi tantiaquidombo cuishonquetsi-

ash. “Esus abi namequid aton Papabëd tabadec nidec,” quiaſh ëbi tantiec cuishonquetsiaſh. <sup>29</sup> Nidnumbi mibi chiec nebi. “Unëſaſh uincuenendabi. Adaſhac con Pa yacno nidendabi,” quioſi. “Ëmbi chiacpadec ëbi adſho iſun ma nëidon: ‘Eſuſën abimboshenda capondash. Ambi chiondacadpadquid Nuquin Papan Madombo nec,’ quequin tantianu,” quiaſh adobi. <sup>30</sup> Nëbi ënquimbi chuinu. Ëbi tantiesabon icbo Satanaſ ëbi unëſ uamenuec choec. Ambembi aidën ëbi unëſ uametiapimbo iquec. <sup>31</sup> Con Pan tantiacpadequini unëſendac. Ëbi adec unëſo iſaſh: “‘Nuquin Papa tantiaquin ambi chiacpadomboen naic abided cuidadec Eſuſ unëſac,’ quequin ma matſeſ abitediſhun tantianu,” quiaſh adebi. Nëbimbobimbi naique. Nidec nidnu. Nid —quepondash Eſuſ.

## 15

### *Shancuinbiecquid uba caid chiaid*

<sup>1</sup> —Nidec nidnu. Nid —quetanquimbi padpiden chuipondaſhi om-poac bimboen chuiquin. —¿Mitsipadquo ſhancuinbiecquid uba caid icpec? Mapiçtſëc icſequi cuidi-cuidipambo yanquid. Adquidic ſhancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. <sup>2</sup> Uba aton icbon cuidi utſiuc bacuëſa icſho patēſhunepaid yoc. Adoac bimboen ëbi tantiauidtſëcboedon ambi icſamboen naid ëntiapimbo icſho con Pan ambi icſaido cuidacno nënendac. Uba icbombidi bëdamboen bacuëmenuen dadpen cuidi icquid cuidi dadpen patēſhun ſiaquid. Adomboembidi ëbi tantiaquido bëdamboſhë icmenuen Nuquin Papan aidon icſamboen naid ëmetſiaſh. <sup>3</sup> Ëmbi chiacpadomboen naic mibi bëdambo iquec. Aden ëbi tantiaſho Nuquin Papan mibi bëdamboen iſec. <sup>4</sup> Ëbi adembidi tantiaquin ëmbi chiacpadomboen nata. Adſho iſaſh mibi bëdamboen tabadmec mibëd iquendabi. Uba cuidi padquëdaid bacuëtiapimbo iquendac. <sup>5</sup> Adecbidi ëbëdi tēſhnanash matſeſ bëdambo ictiapimbo iqueque. Ëbëd tēſhnanenquo yec bëdamboec tabadta. Bëdamboec tabadquin mimbi utſibo ëbi tantiametſiac. <sup>6</sup> Uba icbon cuidi utſiuc bacuëſa icſho patēſhun tſindoshon nëdëncapaid yoc. Adoac bimboen ëbi tantiesabo unëſaſho Nuquin Papan ambi icſaido cuidacno nëſecaindac —quepondash Eſuſ.

<sup>7</sup> Adſhumbic Eſuſën padpiden chuipondaſh. —Ëbi tantiaquin ëmbi chiacpadomboen naquidën: “Ëbi naſhunta, Papa,” cac ambi chiacpadomboen Nuquin Papan naſhunſiaſh. <sup>8</sup> Nuquin Papan adoſhonac: “Nuquin Papa bëdambo iquec,” mimbi catſiac. Adembidi utſibotſen: “Nuquin Papa bëdambo iquec,” camenuen bëdamboec tabadquin ëbi tantiameta. Mimbi adoſho: “Ai, ëbi tantiaquidquo nec,” caindambi. <sup>9</sup> Con Pan ëbi tantiaquiacpadomboembi mibi tantiaquiembi. Adoaid icquin ëbitſen tantiaquioquin ëmbi chiacpadomboen nata. <sup>10</sup> Abi tantiaquioquin ambi chiacpadomboen naſhobini con Pan tantiaquiec. Adembidi ëbi tantiaquidën ëmbi chiacpadomboen naſho ëmbitſen aid tantiaquiendambi. <sup>11</sup> “Ëbi cuishonquiacpadquiecbidi ma ëbi tantiaquiec cuishonquequiono,” queſhun aden mibi chiembi —quepondash Eſuſ abëd icquido chiec.

### *Tantiananta, quequin Eſuſën chiaid*

<sup>12</sup> Adashic abèd icquido padpiden chiec Esus: —Èmbi mibi tanti-aquiapadquiec tantiananta. <sup>13</sup> Nadquiec caimbi. “Min utsi cuesnu,” cashunac: “Èbien natiad,” quiachimboec tantiananta. Aden mibi tantiec èbided cuidadec unësendabi. <sup>14</sup> Èmbi chiacpadomboen nasho mibi con utsi caimbi. <sup>15</sup> Èmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bèda icpec?” quequin aton yua chienquo icquin aton ut sien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. <sup>16</sup> “Esusbèd iquec nidnu,” ¿quequinda mimbembi tantiadionda? Èmbien mibi: “Nuquibi icnu. Cho,” caondac. “Utsibo tantiamequin ma nèidon èbi chuibenenu. Adoac utsibotsen èbèd tabadtequid yanendac,” qeshun mibi cho caondambi. Aden èmbi chiacpadomboen naquidën Nuquin Papa chuquin: “Min Mado Esus tantiaquid èbi icsho èmbi chiacpadomboen èbi nashunta, Papa,” mimbi cac mimbi chiacpadomboen Nuquin Papan mibi nashuntsiash. <sup>17</sup> Èbi adsho tantiash èmbi chiacpadquiec tantiananta —quepondash Esus.

*Esus tantiaquido chieshënte chiaid*

<sup>18</sup> Adashic padpidec Esus onquepondash. —Èbi tantienquo icquidon chieshënac: “Aden Esusba chieshë nondash,” quequin tantiata. <sup>19</sup> Èbi tantiesabo icsho èbi chieshë nquidon mibi bèdamboen istsiandac. Adquid iccondaidi èmbi: “Cho,” cac èbi tantiaquid mibi yanondac. Adec èbi tantiaquid icsho mibitsen chieshënoaindac. <sup>20</sup> “Yuan icbon chiacpadomboen napaid yoc,” quequin èmbi ¿chuiboedta tantie? Aden èmbi chiacpadomboen nasho èbi chieshë nquidon mibitsen chieshënoaindac. Adembidi èmbi chiaid tantiapimbo icquidën mimbi chiaidtsen tantiatiapimbo icoaindac. Padnuen èmbi chiaid tantiaquidën mimbi chiaidtsen tantiendac. <sup>21</sup> Èbi chieshë nquidombi èbi chomiondaidquo tantiaquin èbi chieshënenquo ictsiash. Ma èbi chomiondaid Nuquin Papa tantienquo icquin aidon èbi chieshëmpayoc. Adomboembidi èbi tantiaquidotsen chieshënoaindac. <sup>22-23</sup> ¿Èbi chieshë nquidon èbiuidtsëquida chieshëmpadic? Ma èbi chieshë nquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid èmbi chiabi icnuc èbi chieshë nquido èbi chieshë nec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan èbi chieshë nquido: “Mibi icsamboshë iquec,” caindac. <sup>24</sup> Adembidi Nuquin Papa yacnuësh choshon èmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash èbi chieshë nquido: “Icsapenquo iquebi,” quetiapimbo iquendac. Èmbi nabansho isun èbi chieshë nquin con Patsen chieshë nec. <sup>25</sup> “Aden matsesën ambembi èbi chieshëmpac,” caimbi. Èmbi aden chuite chuquin Nuquin Papan nuquin tusedpa dada uamepampid èbi chieshë nquidon isbanaidi nec —quepondash Esus.

<sup>26</sup> Adashic padpidec: —Èmbi con Pa yacno nidshun: “Nuquin Mayan èbi tantiaquidobèd tabadmenuna, Papa,” cac: “Ai,” qeshun Nuquin Papan chomiac mibèdi tabadquin abimbo chuquin èbi tantiamequiendac. <sup>27</sup> Adoac mimbitsen èbi chuibanendac. “Yuec aibèd tabadondashun

Esus tantiambi,” queshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëndenda.

## 16

<sup>1</sup> “Chieshtonoshe,” queshun mibi aden chiombi. Mibitsen chieshënac dacuëndenda. Mibëd con Mayan tabadmembique. <sup>2</sup> Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yac-nuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac. <sup>3</sup> Aden Nuquin Papa ëbëdta tantienquio icquidon ëbi tantiaquidotsen chieshënendac. <sup>4</sup> Mibi chieshënac: “Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” queshun nëbi mibi chiemi. “Ëbi icnuc ëbi tantiaquido cuesun secadenquio iquec. Ëbi nidambien aido cuesun secabenendac,” quequin tantiaquin ënden aden mibi chienquio iccondambi. “Nëbi nidebi,” queshun nëbi mibi chiemi —quepondash Esus.

### *Nuquin Papan Mayan chote chiaid*

<sup>5</sup> Adashic: —Nëbi ëbi chomiondaibëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique? <sup>6</sup> Ai, ëmbi chuiboed tantiac unësquio icnuen mimbi ëbi chienquio icchitec. <sup>7</sup> Ëbi nibëdnuc mibi bëdambo iquendac. Ëbi nidenquio icnuc con Mayan mibi bëdamboen tantiamenuc choenquio ictsiash. Nidshumbimbi mibëdi tabadmenuen chomendac. <sup>8</sup> Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. <sup>9</sup> Aden Nuquin Papan Mayanën tantiamiac: “Esus tantienquio yec icsambo icchitebi,” quendac matses. <sup>10</sup> Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquio yec con Pa yacno nidan con Mayanën tantiamiac matses adendac. <sup>11</sup> Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquio icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

<sup>12</sup> Adashic abëd icquido chiec Esus: —Mibi dadpenquio chuitiadquio icquimbi nëbi dadpen chienquio iquembi. Nëbi ëmbi chuisho mimbi tantiatiapimbo iquec. <sup>13</sup> Nuquin Papan Mayan choshombien mibi abimbo chuiquin ëbi tantiamendac. Ambembi chienquio icquin Nuquin Papan chiaiduidi chiendac. “Nadquio iquendac. Adecbidi nadquid choendac,” quequin mibi dadpen tantiamendac. <sup>14</sup> Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. <sup>15</sup> ¿Ëbiuidtsëqui tantiamenuenda con Mayanën adopec? Padenquio. Ëmbembi chiaid mambi chiambo yoc. Nuquin Papan chiac-padomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

*Abi nidte Esusën chiaid*

<sup>16</sup> Adashic padpidec: —Nëbi isadenquoio yanebi. Adashic yuecpactsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. <sup>17</sup> Adsho tantiashini ëbitedi: —¿Atotsi quepec? Tantiadenquoio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquoio yec: “Nëbi isadenquoio ictanec yuecpactsëc yash isadcuenendabi,” queposh? <sup>18</sup> ¿Atotsi quepec nec? —quepondabi Esusbëd icquidobëd onquec. Esus tantiamenquoio yec sho-shoshquetsëcquiec onquepondabi. <sup>19</sup> Adsho ambembi tantiash: —Ëbëd icquidon ëbi chuitiadquoio iquec —queshun Esusën: —“¿Atotsi chuitiadquoio yec nio?” quequin ëbi chuite mibi buneque. <sup>20</sup> Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquianendac. <sup>21</sup> ¿Mitsipadquoio bacuë tishac chido icpec? Bacuë cuididiquenuc natiamboshë icboedi bacuë tishash cuishonquepaid yoc. <sup>22</sup> Adecbidi nëbimbobi ëbi unëso isash mibi natiaquiendac. Adboedi yuecpactsëcshun ëbi padpiden isash mibi cuishonquendac ënëdenquoio yec. <sup>23</sup> Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. <sup>24</sup> Aden mimbi Nuquin Papa chianenquoio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac —quepondash Esus abëd icquido chiec.

*Esusën abëd icquido ënquimbi chiaid*

<sup>25</sup> Adashic abëd icquido padpiden chiec: —Ompoacbimboen dadpen chuibanionbi. Yuecpactsëcshun: “Con Pa nadquoio iquec,” quequin mibi sebadënquoio chiendambi —quepondash Esus. —Uincuenshun aden chiendambi —quequin tantiec adondash Esus. <sup>26</sup> Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquoio. <sup>27</sup> Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquioquin mibi nashunendac. <sup>28</sup> Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

<sup>29</sup> Adsho tantiashini ëbitedi: —Adquidshenda mibi nepec. Ma nëbi mimbi sebadënquoio chieyoc. <sup>30</sup> Mibi: “Nëbi isadenquoio yanebi,” quioc. Adashic: “Yuecpactsëc yash isadcuenendabi,” mibi quesho tantiash mibi tantiamenquoio yec sho-shoshquetsëcquiec: “¿Atotsi quepec?” quecuededpobi. Mibi chuimetiadquoio iccobi. Ëmbi chiambobi ma mimbibi tantiapaboc. Comapenen tantiaquidquoio icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. <sup>31</sup> Adsho tantiash Esus: —Ai, nëbi mimbi ëbi tantiaquiec. <sup>32</sup> Aden ëbi tantiaquidquobi ëbi chieshënquin

bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. <sup>33</sup> “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

## 17

### *Esusën Nuquin Papa chiaid*

<sup>1</sup> —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. <sup>2</sup> Ëndenquimboshë mimbi ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbi ëbi chiondac. Mimbi adondaïd icquin mimbi tantiactedi matses nuquibëd tabadtequido icmendambi, Papa. <sup>3</sup> Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaïdquio Esus nec,” quequin tantiasho nuquibëd tabadtequido icmendambi, Papa. <sup>4</sup> Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaïd tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa. <sup>5</sup> Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

### *Esusën abëd icquido Nuquin Papa chiaid*

<sup>6</sup> Adshumbic Esusën abëd icquido ëbitedi chuiquin aton Papa chuioapondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaïdquio chiac: “Ai, adotiadquio iquebi,” quiosh, Papa. <sup>7</sup> Adembidi aidon: “Nuquin Papan namiaïdquio nec. Ambembi nainquio iquec,” quequin ëbi tantiaposh. <sup>8</sup> Mimbi chiaïd ëmbi chuïsho tantiashun mimbi comapenen tantiaquin nabamiaïd nasho isun: “Ma Nuquin Papan chomiaïdquio nepayoc,” caposhi ëbëd icquidon, Papa. <sup>9</sup> Ëbi tantienquio icquido mibi chienquio iquembi, Papa. Ëbi tantiaquidouditseqüi mibi chiec nebi. Mibi tantiaquido icsho mimbi tantiamiac ëbitsen tantiec aidon. <sup>10</sup> Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icho mibi canu. Mimbi chiacpadec bëdamboec tabadtiadquio iquebi,” quequin bëdambo icmioshi, Papa. <sup>11</sup> Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bëdamboen dayun uata, Papa. <sup>12</sup> Aidobëd icquin mimbi chiaïdquio bëdamboen chuïbanquin chieshtomiambo iccombi. Aden bëdamboen dayun uaquin ëbi tantiaquido cudasënquin Satanas yuamiambo iccombi.

Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

<sup>13</sup> Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” qeshun mibi otacquo chienquio iquembi. “Ëmbi abi dayun uate chuisho tantiaash ëbi yacpadece ma cuishonquenu,” quequin mibi otacquo chienquio iquembi, Papa. <sup>14</sup> Mimbi chiaidquido nëido chuibanombi. Adoac ëbi tantiaquido yansho ëbi chieshënquidon nëidotsen chieshëmpec. Ëbi yacpadece mimbi chiaid niac-niacte bunenquio icshobidi nëido chieshënquie, Papa. <sup>15</sup> Aden tantiaash: “Ëbi tantienquio icquidobëdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqin chieshtomenda, Papa. <sup>16</sup> Ëbi tantiesabo tabadacpadece tabadenquio icquin ëmbi nabocpadomboen natiadquio iqueque. <sup>17</sup> Mimbi chiaidquido pausunquioquin bëdamboen tabadme, Papa. <sup>18</sup> Mimbi ëbi: “Matses chiech nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa. <sup>19</sup> Nëido tantiaquiech nëbimbobini mimbi chiacpadece ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaash ëbi tantiaquido min yuabombo icmenuec adebi, Papa —quepondash Esus aton Papa chiech.

*Esusën abi tantiaquid utsibo Nuquin Papa chiaid*

<sup>20</sup> Adashic padpiden Nuquin Papa chiech Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adece ëbi tantiaquido dadpenquio yanendac. Ëbi tantiaquidotedi tantiaquin mibi chiech nebi, Papa. <sup>21</sup> Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadece ëbi tantiaquidotedi shubu abentsëquën tabadachimboecnuc tantianameta, Papa. Adsho isash nuqui tantienquio icquido nadtsiash. “Esus tantiech bëdambo iquech. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitech,” quetsiash. <sup>22</sup> “Mibëd ëbi tantiananquiacpadquiech ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. <sup>23</sup> Nuqui tëshnanenquio yacpadece aidobëd tëshnanenquio iquendabi. “Chieshënanenquio yec tantiananquiech ma bëdamboec tabadnu,” quech aidobëd tëshnanenquio iquendabi, Papa. Adece ëbi tantiaquido bëdamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiacpadomboen Nuquin Papan aid tantiaquido tantiaquiech,” quequin matsesën tantiatsiash, Papa. <sup>24</sup> Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquido mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. <sup>25</sup> Icsaisambo mibi icsho icsambo icquidon mibi tantiatiapimbo icnubimbi mibi tantiaquiech. Mibi yacnuësh choquid icshobini ëbëd icquidon: “Ai, Nuquin Papa yacnuësh

choquidien nec,” quequin tantiaposh, Papa. <sup>26</sup> Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiacpadomboen ma nuqui daëdi tantiaquish ma tantiananquiono,” qeshun con Mayan aidobëd tabadmendambi. Adoac ëbëd icachimboec con Mayan tantiadendac, Papa —quepondash Esus Nuquin Papa chiec.

## 18

### *Esus bedmiaid*

(*Mat 26.47-56; Mad 14.43-50; Duc 22.47-53*)

<sup>1</sup> Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiaash tiedno cuëte odibos caid nitsinacno ëbitedi chiec tabadtenebocnombo chopondash. <sup>2</sup> Ambo tabadnubien Udas: —Ëbi abëd tabadtenebocno tiednoen nidchitash —quianec Esus bedmenuec <sup>3</sup> chopondash. Aden chieshëmëncquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidtedi Udasën bëpondash. Tabotëbëdta cueste sanambédëtsëcquiec cho-chopondash. Utsibombic chështe.

<sup>4</sup> Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac <sup>5</sup> —Nasaded yacnuësh caniquid Esus bednuec nebi —quepondash sondado chuiquid. Adshun isac aïdbëd Esus bedmequid Udas icpondash.

<sup>6</sup> Adshobien Esusën: —Në iquebi —capondash. Nuquin Papapadquidquobi icquin adoac dacuëdec: —Auchbidi cuenu —quec uebudcuededpondash bednuequidotedi. <sup>7</sup> Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiashun: <sup>8</sup> —“Në iquebi,” caombi. Ëbiuidtsëqui bedta. Ëbëd icquido bedenda —capondash Esusën. <sup>9</sup> —“Mimbi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometiapimbo iquebi —quequin tantiec: —Nëid bedenda —quepondash Esus.

<sup>10</sup> Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. <sup>11</sup> Adosho isashien Esus: —Padi. Chën. Min chështe naued. Nuquin Papan chiapadec paëmbo icnuc unësendabi —quepondash Esus.

### *Anasën shubuno Esus buanaid*

(*Mat 26.57-58; Mad 14.53-54; Duc 22.54*)

<sup>12</sup> Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. <sup>13-14</sup> Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshënec: —Nuquin matsestedi unës uamenquio icnuen Esused unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.



*Petodon: Ĕmbi isacmaid Esus nec, quequin chiaid*

(*Mat 26.69-70; Mad 14.66-68; Duc 22.55-57*)

<sup>15</sup> Esus buansho isun Petedobĕdtan chinunondambi. Chinuntuidash nidequi Caipasĕn shubuno choash daquĕnĕ uaidĕn puduednuesho tantiashun shĕcuĕ isquid chidon puduedmiondashi. Ambi isondaic icsho aden puduedmiondashi. <sup>16</sup> Ĕbi puduedmequin Petedo ambi isacmaid icsho puduedmenquio icpondash. Adsho istanquin: —Ĕbĕd icquid neque. Shĕcneshun. Ma puduednu —capondambi. <sup>17</sup> Adoac puduedmeshun shĕcuĕ isquid chidon: —ĴNĕ bedboed Esusbĕd icquidta mibi ne? —capondash Petedo chuiquin. Adoaquien Petedo dacuĕdec: —Padenquio —quepondash muequi. <sup>18</sup> Adnubien iquendoshon daquĕnĕ uacnoshon cuĕte dĕtsiadoshon sondado chedobĕd anocquido yuabo cuĕte cuĕec tabadpondash. Adsho isashien Petedotsen cuĕte cuĕnuec nidpondash ĕbi shubunquio puduednuc.

*Caipasĕn Esus chuimiaid*

(*Mat 26.59-66; Mad 14.55-64; Duc 22.66-71*)

<sup>19</sup> Adec ĕbi puduednubien Caipasĕn Esus chuimepondash. —Mibĕd icquid Ĵtedtsi iquec? ĴĔbĕd icquido dĕniaquecta icpec? Mibĕd icquido Ĵmitsipaden chuibano? —capondash. <sup>20</sup> Adoaquien Esusĕn chuipondash. —ĴOmpoquindambi chuibandio? Nuquin Papa tabadte shubu uashunaic daquĕnĕ uaidĕn puduedshun mambi chuibandeneboc. Nuquin Papan chiaid chuibante shubun-shubunquiec puduedcuenequin mambi chuibeneboc. Ompoquin chiambo iccombi. <sup>21</sup> Mimbi: “Icsamboen naosh,” caid ĕbiuidtsĕqui chuimenda. Ĕbĕd icboedotsen chuime. Ĕmbi chiaid abitĕdi tantiashun aidombi mibi chuitsiashe. Aidotsen chuime —quepondash Esus.

<sup>22</sup> Adsho tantiashun: —ĴChuiquid dapada adopaid? —quetanquin sondado chuiquidĕn mĕdanten bĕcuespondash Esus. <sup>23</sup> Adoaquien: —ĴIcsamboendambi chuidio? ĴAtotsimbi icsa uaque? En chui. Mambi abimbo chuiboc. ĴAbimbo chuiquidta cuespaid? —quepondash Esus. <sup>24</sup> Adondash Esus Anasĕn abi cataniacchobi Caipasĕn shubuno bĕac.

*Petodon: Ĕmbi isacmaid Esus nec, quequin chuioaid*

(*Mat 26.71-75; Mad 14.69-72; Duc 22.58-62*)

<sup>25</sup> Adnubien Petedo abi cuĕte cuĕec tsadsho abĕdtan cuĕte cuĕec tabadquidon: —Esusbĕd icquidien mibi nechitec —capondash. Adoaquien Petedo: —Padenquio. Mabi aidbĕd icambo yoc —quepac caondash. <sup>26</sup> Adshobien chuiquid dapan yua utsin Petedon pateshuneboedĕn matsĕsĕn: —Esus bedacnobimbi mibi ischitoc —caquien <sup>27</sup> padpidec: —Padenquio. Mabi ano nidambo yoc. Ĕmbi isacmaidquio ma Esus neyoc —quenubien Esusĕn chuiboedquio cachina bĕnĕ cuĕdampac caondash.

*Pidato caidĕn shubuno Esus buanaid*

(*Mat 27.1-2; Mad 15.1-5; Duc 23.1-5*)

<sup>28</sup> Adnubien Caipas aton chuiquid utsibobĕd: —Nuquin matsĕs yuaquido ancaquid Pidato caid ismenuembien Esus buantiad. Aid Esus unĕs uamenuembien natiad —quecuededpondash. Badiadnubi Pidon shubun Esus buampondash. Buanashic: —Matsĕs utsin shubun puduedshun mishtemaid mishash Nuquin Papan matamiampid inchĕsh tantiec con matsĕsbĕd pec tabadtiapimbo icchitomane —quiash

Pidaton shubun puduedenquo icpondash. <sup>29</sup> Adnubien Pidaton aton shubunuësh puduentanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien <sup>30</sup> —¿Bëdambo icquidtamibi ismenuen bëdio? Con matses chuiquid dapa ictiadquo icquin icsamboen naoshe. Cuidquiota —quepondash chieshëmënquido. <sup>31</sup> Adoaquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidtsëqui unës uaquin cuidaquien bëdambo ictsiash,” queshun ëbitedi chieshënushe —quepondash Esus chieshënquido Pidatombi Esus unës uametiadquo yec. <sup>32</sup> Ënden abi chieshënquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuc adpondash.

<sup>33</sup> Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien <sup>34</sup> Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. <sup>35</sup> Adoaquien Pidaton: —¿Isadaidbodabi nedî? Padenquo. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien <sup>36</sup> Esusën Pidaton bëyuc chuiboed tantiaquin: —Mibipadquid chuiquid dapapenquo nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquo ictsenosh. Mibipadquidpenquo nebi. Abucshun chuiquid dapambo nebi —quepondash Esus.

<sup>37</sup> Adsho tantiashun Pidaton: —Chuiquid dapambo nebi ¿quectaque? —caquien: —Ai, adquid nebi. Chuiquid dapambo icnuc mat-sespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiat-siandac —quepondash Esus.

<sup>38</sup> Adsho tantiashun Pidato: —¿Tsuntsin matses uaquid quequin abimbo chuiPATSIASH? —quetanec puduenshun Esus chieshënquido chuiuoapondash. —¿Icsambo icquidta Esus nedic? Ma icsapenquo icquid neyoc. <sup>39</sup> Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedendonambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: <sup>40</sup> —Padenquo. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquo icnuc adcuededpondash Esus chieshënquido Esus unës uamete bunquic.

## 19

*Esus cueshcaid*  
(*Mat 27.27-31; Mad 15.16-20*)

<sup>1</sup> —Badabasquo cuemeta —quesho tantiatanquin Pidaton: —Në Esus cueshcanuen buan —capondash. Adoaquien buanshun sondadon canite cuëshë dëdectanquin nacnenaid cueshcanten Esus comapenen cueshcapac caondash. <sup>2</sup> Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic

chuiquid dapan dashcutebimboecquid umucquid dasiuintanquin: <sup>3</sup> — Adec dasiuidquid chuiquid dapambo nec —quequin sondadon Esus mamënshumpac caondash. Aden mamënshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

*Esus unës ua, quiaid*

(*Mat 27.15-26; Mad 15.6-15; Duc 23.13-25*)

<sup>4</sup> Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badëdi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien <sup>5</sup> Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac <sup>6</sup> chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoaquien Pidaton: —Mimbi cuesten dectanquin unës uatan. Ëmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

<sup>7</sup> Adoaquien Esus chieshënquidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. <sup>8</sup> —“Nuquin Papan Madombo nebi,” quiosh —quesho tantiashien Pidato dacuëdquieq yampac caondash. <sup>9</sup> Adash aton shubun Esusbëdi puduedoashun Pidaton Esus chuiuoapondash. —¿Tsutsimbo ne? ¿Mitsiuëshquio chonda? —caqui Esusën ëcbedenquio icpondash.

<sup>10</sup> Aden ëcbedenquio yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unës ua,” cac mibi adotsiashe. En chui —caquien Esus: <sup>11</sup> —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ëbi cuesten dectanquin unës uame tiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

<sup>12</sup> Adsho tantiashien Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaguec Esus chuiquid dapa icte bunquieq. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. <sup>13</sup> Adsho tantiashun Esus puduemeoatanec cuënote nacnenaïd abuc tsadunaïdën cuidte chuinuc tsadten tsadtopondash Pidato. Aid cuënote nacnenaïd con onqueten Cabata capondash. <sup>14</sup> Nuquin Papan matamiampid inchësh tantiate ushë badiadash icnuc niøndash. Aid tsadten tsadtoshun Pidaton: —Në mibi chuiquid dapa iquec —capondash iccuededquido chuiquin. <sup>15</sup> Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash

Esus chieshènquido. Adoaquien: —¿Mibi chuiquid dapadambi cuesten dectanquin unès uape? —Pidaton caquien Esus chieshènquido: —Mibi chuiquid dapambo Sesad caid aiduidtsèqui chuiquid dapa caimbique. Esus cuesten dectanquin unès ua —quecuededpondash Esus chieshènquido. —Nuquin Papa yacnuèsh choshon nuqui yuaquido cuemepashun —queboedobi adondash abi yuaquidi chiequi.

<sup>16</sup> Adoaquien Esus chieshènquidon chiacpadomboen: —Esus cuesten dectanquin unès uatan —capondash Pidaton aton sondado chuiquin.

*Cuesten dectanquin Esus unès uaid*

(*Mat 27.32-56; Mad 15.21-41; Duc 23.26-49*)

<sup>17</sup> Adoac buanquin: —Nèidèn dectanu —qeshun sondadon cueste daèd napotiaid Esus chiadtomebidampondash. Abi dectantebi Esus chiadtomebidanec nidquimbi macuèsh mapi canite caid yacno buampondash. Aid macuèsh mapi canite cain con onqueten Cocata capondash. <sup>18</sup> Ambo nidshun aton dashcute dachictanquin bèchun shuin mètoccaquinc tatoccaquinc catanquin cueste daèd napotiaid ambi bèboedèmbi Esus dectampondash. Icsambo icquid daèdpambo cuesten dectanaid uquè diadbudcuenec diadnuc Esusquio nènantanquio dectampondash.

<sup>19-20</sup> Adnubien Pidaton: —Nasaded yacnuèsh caniquid yec Esus isadaidbo chuiquid dapa nec —quequin cueste pada uaidèn dada uapac caondash. Aton matses Doma yacnocquidon onqueten dada uaquin con onqueten dada uaquin matses utsi Quidieco matsèsèn onqueten dada uaquinc catanquin Esus dectanaid cuesten dectampac caondash. —Èmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshènquido nèishquiopac caondash. —Shubu dadpen icquid Edusaden caid anoentsèqui Esus dectanaid icnuc matses utsin onqueten-onquetenquien dada uaid matses dadpen-shun isnushe —quiash <sup>21</sup> Pidato chiec nidpac caondash. —Icsamboen chuiquin ma mimbi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebì,’ quequid Esus nec,” quequin cueste cuèshè utsin dada uata —caquien <sup>22</sup>—Padi. Mambi èmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

<sup>23</sup> Adnubien Esus dectanquido sondado daèd-daèdquiec icpondash. Esusèn dashcute 5ted icsho sondadon bedbanquin abentse-abentsen bedbededpondash abentsèc abi icnuc. Aid abucshun bedanquin abichobi daèdcaid tuscabi icquid niondash. <sup>24</sup> Adquid icsho isun: —Canchenquio icquin ¿tsundanquio bedequè? Isnuna —qeshun abi cuèmèdquidtedi dada uabanshun tèchun sandoshon cadotanequin dada uaidèmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidèmpi abia puduemiaid isnuen naosh,’ quependac,” quequin dada uapampic.

<sup>25</sup> Adnubien Esus dectanaid cueste tayun nèidtedi icpondash. Nèidic Esusèn tita. Nèidic Esusèn tita utsi. Nèidic Madia Codopasèn chido. Nèidic Madia utsi Mactada yacnuèsh choquid. Aidtedi chido icpondash. <sup>26</sup> Nè chido tabadnuc ambobi uquètsèc tabadondabi. Adec ambi tantiaidquio

ëbi icsho isun Esusën aniba chuipondash. —Nëid con mado cata, tita. Ma mibi bédamboen dayun uanu —capondash Esusën, <sup>27</sup> Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

<sup>28</sup> Adboshien unësquionoshi Esus: —Con Pan chiacpadomboen nainembi. Matses tantiec ëbided ciudadec unësebi —quequin tantiec con tsusedpan dada uaqin chuipampicpadec: —Acte bundobi —quepondash Esus. <sup>29</sup> Adsho tantiashun matsun acte mucambo icquid anidquid shapu-shapupactsëcquidën punshun cuate dëdectanshun abuc sananguin ëccuëscadonetsëcquin chishmepondash. <sup>30</sup> Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tédquëdbudpondash Esus unësequi.

### *Esus uinte masiaid*

<sup>31</sup> Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac <sup>32</sup> Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënsymbic utsiuc diadquidtsen. <sup>33</sup> Adotanquin isquien Esus ënden unësac. Adshobien nidte podquënenquio icpondash.

<sup>34</sup> Adotanquimbic: —Unësabi icnushe —qeshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. <sup>35</sup> —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin. <sup>36</sup> Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. <sup>37</sup> Adembidi podo ansete dada uapampic. “Ambi podo anseboed isec tabadendac,” quequin dada uapampic.

### *Esus unësacsho chococaid*

(*Mat 27.57-61; Mad 15.42-47; Duc 23.50-56*)

<sup>38</sup> Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. <sup>39</sup> Aidbëdi Nicodemo inchëshën Esusbëd onquionaid nidpac caondash. Bédambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash. <sup>40</sup> Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaqin. Adshumbic padpiden dataneoquin. Adshumbic padpiden dabiunoaqin. Adshumbic dataneoquin. Chococanun con matsesën adoquid. <sup>41-42</sup> Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

## 20

*Esus uincuenaid**(Mat 28.1-10; Mad 16.1-8; Duc 24.1-12)*

<sup>1</sup> Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococac-nuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. <sup>2</sup> Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

<sup>3</sup> Adoaguini: —Istanu —quianec <sup>4</sup> titinquianec chococacno Petedobëdi nidpondac. Petedo nianec ëbia nidpondabi. <sup>5</sup> Adshumbimbi pudueden-quo icquin shëcuë anshuebudshun anispondac. Adshun isquien dashcute dataniaiduidtsëqui uec. <sup>6</sup> Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. <sup>7</sup> Në dataniaid uenubi uidctëséc dashcutempi bëpucaid bëdamboen shëbunaid uiondash. <sup>8</sup> Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. <sup>9</sup> —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi. <sup>10</sup> Aden istanec ëbi ushbocnobidi chiec choapondabi.

*Esusën Madia Mactada yacnocquid ismiaid**(Mad 16.9-11)*

<sup>11</sup> Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien <sup>12</sup> Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. <sup>13</sup> Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquo iquebi. ¿Mitsimbo buampashba? Unësquo iquec —quetanec <sup>14</sup> auchbidi nidnuec bidiadshun isquien Esusquo icpec. Utsi dansho <sup>15</sup> Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Ëbi isme. Shëcuë utsin chococanun buanu —capac caondash Madian Esusquibochi quimbi.

<sup>16</sup> Abi adoshobien Esusën: —Ëbi nebi, Madia —cac bëisquotanequien: —Esus nec. Ëbi chuiquidquo nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquo icsho. <sup>17</sup> Aden abi dayumbudshobien Esusën: —Ëbi dayunenda. Padpidec nidenquo icte danquin ëbi dayunenda. Ëmbi chuibocpadec con Pa yacno nidabi yuec-yuecpactsec tabadtanec nidebique. Ëbëd icboedo ëmbi con utsibo caboedo ëmbi chuibodquo chuitan. “‘Nuquin Papa yacno nidendabi,’ quiosh,” catan —quepac caondash Esus. <sup>18</sup> Adoaguien ëbi chiec Madia chopondash. —Nuquin Icbo Esus isombi. Uincuenaccosh. Ambi chuibod chuinu. Tantia —quequin Esusën abi chiaidquo chuituidpondashi Madian Mactada yacnocquidën.

*Uincuenshun Esusën abéd icquido ismiaid*  
(*Mat 28.16-20; Mad 16.14-18; Duc 24.36-49*)

<sup>19</sup> Madian aden chuituidboed inchëshbudtsëqui shubun tabadpondabi Esusbéd icboedobédi. Esus chieshênquido dacuédênquin umanucuësh utsi puduedtiapimbo icnuc bédamboen bêtashash tabadnubien shëcuënuësh puduedenquio icboedi nuntanquiobi Esus isadcuempondash. Adtanequien: —Dacuédenda —quepondash. <sup>20</sup> Adtanquin abi bëchun shuin mëtoccaid abi podo ansiaidbêdta ismiaquini cuishonquiampondac: —Nuquin Icho uincuenac —quiash. <sup>21</sup> Adec cuishonquesho isashien ambi chuibocpadebidi: —Dacuédenda —quetanec: —Tantia. Mibi chuinu. Con Pan: “Matses chiec nid,” ëbi caondacpadomboembidi: “Ëbi chuibeneta,” mibi caimbi —quepondash Esus. <sup>22</sup> Adtanquin ëbi chedo dabushcabampondash. Dabushcabanashic: —Nuquin Papan Mayan mibéd tabadendac. <sup>23</sup> Mibéd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nêid bédamboen isec,” quequin mimbi chiacpadomboen Nuquin Papan bédamboen istsiash. Utsien: “Nuquin Papan chiaid niaquec icsauidequi icsho nêid Nuquin Papan bédamboen istiapimbo iquec,” quequin mimbi chiacpadomboembidi Nuquin Papan bédamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

*Esusën Tomas ismiaid*

<sup>24</sup> Adec Esus isadenquio yanoanubien Esusbéd icboed utsi Tomas abi ushëmbi anin daéd tishaid chopondash. <sup>25</sup> Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë médanten bëmishquinc podo ansiaid bëmishquinc caquioshombimbi: “Ai, nuquin Icho uincuenac,” quequin tantiatasiac. Padambobi: “Con Icbobien niash,” quetiapimbo iquebi —quepondash Tomas. <sup>26</sup> Tomas adbon 7tedec ushash shubu nuntambidi tabadoapondabi. Tomas chedobédi tabadondabi. Puduedtiapimbo icnuc padpiden bêtashoash tabadnubien shëcuë shëcniabi Esus isadcuenoapondash. Adashic: —Dacuédenda —queoapondash. <sup>27</sup> Adtanequien: —Is con médante, Tomas. Shëcuë bëmishhec cho. Nê podo ansiaid iqueque. Aidtsen bëmishhec cho. Adshun: “Uincuenabien icchitash,” queboedëmbi: “Uincuenaccosh,” quequin tantiatia —caquien <sup>28</sup> mishenquio yec badedi: —Tso. Con Icombombo ma mibi neyoc. Nuquin Papapadquidquiobidi ma mibi neyoc —quepondash Tomas. <sup>29</sup> Adsho tantiasien Esus: —Ëbi isun: “Nuquin Papapadquidquiobidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquiobidien nec,” quequin ëbi tantiasho Nuquin Papan bédambo icmendac —quepondash Esus Tomas chiec. Adtanec isadenquio yanoapondash.

<sup>30</sup> Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. <sup>31</sup> Padi, aitedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantias ma Nuquin Papa yacno abéd tabadtequido icpanu —quequin aitedi dada uaombi.

## 21

### *Chian cuëmanuësh Esus isadoaid*

<sup>1</sup> Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. <sup>2</sup> Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aidtedi icpondabi. <sup>3</sup> Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

<sup>4</sup> Badiadquionobi acte cuëman masi dapan Esus nidsho istuidpondambi. Utsiemi dampondac. <sup>5</sup> Adshobini Esusën cuëmpondash. —Con utsibo ¿tedtsi bedo? —cac: —Padambo. Nibëdosh —capondambi. <sup>6</sup> Adsho tantiashun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

<sup>7</sup> Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. <sup>8</sup> Èbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiointsëc nidondabi. <sup>9</sup> Tsyuec choash pudundoshon isquien pambëdi nuëcquid cuëten shëadtsec. <sup>10</sup> Adnubien Esusën: —Mimbi bedboed daëdpactsëc beccho. Penu —cac <sup>11</sup> Petedo: —Ai, bedtanu —quianec nidash cano anidtoshon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquio icnuc indondambi.

<sup>12-13</sup> Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —¿Tsutsi ne? —quenquio icquin: —Esus nec. Comapenen tantiaguin nuëcquid nuqui bedmiosh —quequin tantiondambi ëbitedishun. <sup>14</sup> Adec uincuenash shubu nuntan tabadnuc daëdec isadondashic chian cuëmanuështsen isadopondash Esus.

### *Esusën Petedo chiaid*

<sup>15</sup> Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc ¿ada ëbi tantiaquie? —caquien: —Ai, mibi tantiemi. Aden ëmbi tantiaid mimbi tantiec —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbinboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. <sup>16</sup> Adshumbic padpiden: —¿Ada ëbi tantiaquie, Petedo? —cac: —Ai, mambi mibi



tanteyoc —quesho tantiashien padpidec: —Èbi tantiaquin con obecabimboecquido èbi dayun uashunta —queoapondash Esus. <sup>17</sup> Aden daèden chuishumbic padpiden Esusèn: —¿Ada èbi tantiaquie, Petedo? —cac shubiantiadtsècquio yanondash Petedo. —Unès uabi icnuc: “Èmbi isacmaid Esus nec,” quequin èmbi chuiboctembidi Esusèn chiebi —quiash shubiantiadtsècquio yanondash. Adashic: —Mibi con Icho nec. Ma mimbi abitedimbo tanteyoc. “Petedon èbi tantiaquie,” quequin ma mimbi tanteyoc —quepondash Petedo. Adsho tantiash Esus padpidec: —Èbi tantiaquin con obecabimboecquido èbi dayun uashunta —queoapondash Esus.

<sup>18</sup> Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon èquè mèdimbudcuentsècshun mibi nidte bunacmanombo mibi buanendac —quepondash Esus. <sup>19</sup> —Aden mimbitsen Nuquin Papan chiacpadomboenuidi nabansho èbi chieshènquidon mibi unès uaindac —quequin tantiec adpondash Esus. Adashic: —Ènenquio icquin èbi tantiata —quetanquimbic: —Cho. Nidnu —cac èbitedi puduanec nidondabi.

<sup>20</sup> Tsyuec nidshobini Petedon bidiaidquin ispondash. Adshumbic: —Nèid Esusèn tantiaidquio nec. Esus bedmiaid inchèshèn Esus aton cachochtsèqui uesho aidèn: “¿Tsutsi cao, Icho?” capondash. <sup>21</sup> ¿Mitsipadec aid unèspsatsiash? —qeshun: —Ma nèid. ¿Mitsipadec unèspec? —capondash Petedon èbi unèste Esus chuimequin. <sup>22</sup> Adoaquien Esus: —Èbi bunacpadequi aidi unèsendac. “Èbi Nuquin Papa yacnuèsh choabi yacpadec ma unèsenquio icnu,” èbi quiacpadec unèsenquio ictsiash. Adecbidi: “Èbi choabi icnuc ma unèsanu,” èbi quiacpadec unèstsiash. “Nadec unèsendac,” quequin mibi chienquio iquembique. Ènenquio icquin èbi tantiata —quepondash Esus. <sup>23</sup> Adec: —Unèsenquio ictsiash —Esus quesho tantiash èbi caic: —Esusèn tantiaidquio yec Uan unèsenquio iquendac —quecuededpondash Esus tantiaquido. ¿Adenda Esusèn chuidiondash? Ma padenquio iccondac. —Èbi bunacpadequi aidi unèsendac. “Èbi Nuquin Papa yacnuèsh choabi yacpadec ma unèsenquio icnu,” èbi quiacpadequien unèsenquio ictsiash. “Adecbidi èbi choabi icnuc ma unèsnu,” èbi quiacpadec unèstsiash —quequien iccondash.

<sup>24</sup> Aden Esusèn nabanondaid ènquin chiombi. Èmbi isondaidquio chuiquin abimbo chuiquin aidtedi dada uaombi. <sup>25</sup> Esusèn naidtedimbo chuiquin dada uambo iccombi. Èmbi tantiaidtedi naombi. Ambi naidtedimbo ambi chuibanaidtedimbo chuiquin dada uaquin dada uate dadpenquioshè naimbudnetsiambi. Padi. Aidtedi dada uaombi.

## ESUS CHUIBENEQUIDON NAID

### *Esus aton Papan abuc indote*

<sup>1-2</sup> Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauiqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac — quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantaranu. Chui —capanëdash Esus chuiquin. <sup>7</sup> Adoaquien: —Nuquin matses chuiquid icmete ushë choaid tantiesha mibi nec. Nuquin Papanuidtsëqui tantiacpadën adquid iquendac — quepanëdash Esus abëd icquido chiec. <sup>8</sup> Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquo mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac — quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

<sup>10</sup> Adec Esusbëd chobedo isec tabadnubien dashcute ushumbocquid dasiuidquid daëd choash tabadec: <sup>11</sup> —Nidaid Cadidia caid yacnoësh choquido, ¿atotsi quiaish abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden — quepanëdash ushumbocquid dasiuidquid abuc isbededquido chiec.

### *Matias Esus chuibeneta quequin iccuededquidon chiaid*

<sup>12</sup> Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtiontsëqui capunëdash. Aido Edusaden yacno choash abuc quënë yacno abi tabadbocono dectatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon

cuëmédquid, utsibic Acobo utsin mado Udas cuëmédquid. Aidedi Esusën ëbi chuibeneta caido aid quënë nuntan tabadnubi <sup>14</sup> utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

<sup>15</sup> Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: <sup>16-17</sup>—Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquish paëdec aton pucu tishidpac caondash. <sup>19</sup> Pucu tishidec intac chiuidaid tied icsho tantiaquin Edusaden yacnocquidtedishun Aqedama cain aton onqueten cuëmbededpondash. <sup>20</sup> Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aidbidi aton matses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoampic:

“Aidën icsain nacpaden tanenquiocquin ma utsin bëdamboen napanuna,”

quequin Dabid padon dada uapampic —quepanëdash Petedo. <sup>21</sup> Aden chiashic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia. <sup>22</sup> Esus Uan padon acten mentosho isash ni-amëdenquio yec Esusbëd capucueneshun Esus indosho isquidquido icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

<sup>23</sup> Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmédquid icpanëdash. Nëid daëd Petedon chuibocpadquid nec, qesho tantiaquid: —Nënantanquio tabadec cho —cac abi daëdi choash tabadsho isash <sup>24</sup> Nuquin Papa chiec nadec iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantieme, Papa. <sup>25</sup> Udas pado tauidtiadpambo chian anëdënquiacno nidboedën nauidaid namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. <sup>26</sup> Aden chuitanquimbic aid daëd abi cuëmédquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaid istanquin, Matias cuëmédquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

## 2

*Aton Mayan Esus tantiaquidtedi menebanaid*

<sup>1</sup> Adashic isadaidbon ambi aton tiedën caniquid abia ëshëaid bedaid tantiaid ushë chotsëcnubi Esus tantiaquidtedi shubunuëshi iccuededoapanëdash. <sup>2</sup> Ambo iccuededquimbi badedquio shubu nuntan cunquequid dapa choec natiambo cunquiabimboecsho abitedishun isbededpanëdash. <sup>3</sup> Aden aid isbedednubi cuëte dëtsisidacimboecquid budec maismaisec Nuquin Papan Mayan matsadtocuededpanëdash abi isquidtedi. <sup>4</sup> Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanëdash ambi matsadtomiaidotedi.

<sup>5</sup> Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabadpanëdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoësh Edusaden yacno cho-chopanëdash. <sup>6</sup> Ambo cho-choash tabadnubi Nuquin Papan aton Mayan meniaid-meniaidquiec nëmbobi choquidon onqueten-onquetenquiec onquesho tantiaash nëbi cho-choboedo utsi-utsiec: <sup>7</sup> —¡Padtec! Dacuëdanquiopaic. Èbipadquiecsienda onquepec. ¿Onquequidotedi nidaid Cadidia yacnocquidoda nepec? <sup>8</sup> ¿Mitsipaden con onquete bedash onquecuededpec nec? <sup>9</sup> Èbitedi nidaid utsi-utsiec yacnoësh cho-choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; <sup>10-11</sup> utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nënantan nidaid nactnëdquid Quideta caid yacnoësh choquido; utsibic, Adabia caid yacnoësh choquido. Isadaidbobëd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ëbitedi nebi. Èbibimboec onquequidtedishun Nuquin Papan naid chuibanasho tantiambi. <sup>12</sup> ¿Mitsipaden tantiaquin oncamiaquien adec onquepec? —quepanëdash Edusaden yacno cho-choquid.

<sup>13</sup> Adnubien: —¿Bëdamboec onquepequida onquec? Paëmbocquid cubudquin acshun tantienquiocquido nepanui —queoapanëdash utsibo.

*Iccuededquido Petedon chuibanaid*

<sup>14</sup> Adec onquesho tantiaashun Esusën ëbi chuibeneta caido chochoquin Petedon nidtochon tantiamenu quequin naden cho-choboedo comapenec onquequin chuipanëdash: —Mimbi icsamboen tantiaid chiembique. Tantiata. <sup>15</sup> Ushë abuctotsëcnubi ëbitedishun paëmbocquid acamboccombi. <sup>16</sup> Utsin-utsinquec onqueten onquesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi Nuquin Papan ma matsesbëd tabadnueshun aton Mayan mennen chiaid naden aidën dada uampic:

<sup>17</sup> Nèid nidaid naimbudnubi

Con Mayan matses utsi-utsien menendambi.

Aidon madobobëdtan aidon champibontsen ëmbi yuecquio icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

<sup>18</sup> Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan

ëmbi yuecquio icshun nanun chiaidquiobidi chuibanoindac.

<sup>19</sup> Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucüesh uinsadpamboctequid icnubi

nidaidënsnun ismete intacimboectequidbëdtabi nëdënquetequid cuëte pushudquidbimboectequid abembi pushudquidbëdta adquidtedi mibi ismendambi.

<sup>20</sup> Adquid icnuc badiadën ushë chënquenquiocnoc

inchëshacimboectequid inchëshën ushë piu-piupambo yec intacimboecsho mimbi isbededendac.

Ëmbi ismiaidtedi icambi matses cuidte ushë choendac.

<sup>21</sup> Ismequimbi con Icbombo nec ëbi caquidquio mënchiquendambi,'

quequin Nuquin Papan chuimiapaden Oedën dada uapampic.

<sup>22</sup> "Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebancho mimbi isondac. <sup>23</sup> Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten decantanquin Esus unës uapanëdash. <sup>24</sup> Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemepanëdash.

<sup>25</sup> Adembidi ëndenquimboshë tsusedpa Dabid padon Esus chuibanquin naden dada uapampic:

'Con Icho abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquio iquendambi.

<sup>26-27</sup> Aid unësash uincuenta tantiec ëbitsen uincuenendabi, Papa, quec cuëdë nec bëdambo iquebi.

<sup>28</sup> Nuquin Papa yacno tabadacpadec nidaidën tabadquin ismiac

mibi yacno nidash mibëdi tabadec bëdamboshë iquebi mimbi camiaid iquendabi,'

quequin Esus tantiaquin Dabid padon dada uapampic.

<sup>29</sup> "Adomboen tantiaquin dada uash Dabid unësacsho chococapampid nëbi shëcuë iquec. <sup>30</sup> Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. <sup>31</sup> Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unësacsho chococaqui aton nami chodquenquio yec uincuenendac, quequin chuipampic Dabid padon. <sup>32</sup> Ai, Dabid padon chiampicpadembi Nuquin Papan Esus uincuemepanëdash. Aid uincuemiacsho isondaic icquin mibitedi chuibanec nebi. <sup>33</sup> Aid uincuenash Nuquin Papan dayunquio tabadendac nëbi. Ambo choacsho matses tantiaquin Nuquin

Mayan ma aibëd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinqueic onquesho nëbi mibitedishun tantiec. <sup>34</sup> Dabid padon nami chodquiash abuc nidambocpampic. Aden aton namibi abuc indote chienquiocquin

Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icbo Dapa icquin abipadquid icbo cain: Nēbi ēbēdi tsadec cho.

<sup>35</sup> Mibi chieshēnquido dēniacquidquio mibi icmenun nabono. Chiata, quequin Nuquin Papan nanun chiaid Dabid padon dada uapampic.

<sup>36</sup> “Aden tantiaquin Dabid padon chuipampid Esus mimbi cuesten decanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ēmbi chiaid abimbo iqueque. Esus tantiaquidquio icta, isadaidbo —quepanēdash Petedo.

<sup>37</sup> Aden Petedon chuisho tantiash iccuededquido abi icsaid tantiec unēsquio yec: —Esus tantianuequin ¿atotsi nuqui nape? —quepanēdash utsi-utsiec Petedobēdta Esusēn ēbi chuibeneta caid utsibo chiec.

<sup>38</sup> Adoaquien Petedo: —Mibi icsaid ēnshun, Esus con Icbombo nec, quequin abimbo tantiaquin acten mentometa ma ēbi icsaid Nuquin Papa bēpiscudnu qeshun. Adoacsho aton Mayan mibi menendac. <sup>39</sup> Adembidi tantiasho isun min tsyuecquidtsen menendac. Adembidi nidaidtedi yacnocquidēn tantiasho isun aton Mayan meneoaindac ambi chiampic-paden —quepanēdash Petedo Esus isquidquio.

<sup>40</sup> Aden chuibanequi: —Mimbi icsamboen tantiaid ēnta. Aden ēnash Esus tantiaquidquio icta —quequin chuibudquin Petedon ēmpanēdash.

<sup>41</sup> Aden chuisho tantiash, Tantiapiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

### *Esus tantiaquido iccuededaid*

<sup>42</sup> Adashic, Esus tantiembi, queboedo tantiabenabi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepanēdash. <sup>43</sup> Adec tabadcuededsho isash: —

¡Padtembo! Dacuēdampambo iquec —quec utsibo tabadpanēdash. Adnubien Esusēn ēbi chuibeneta caidon nadatiambocquin nabampanēdash.

<sup>44</sup> Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanēdash. <sup>45</sup> Aton na menequin piucquid bedshun utsin na nibēdsho isun menepanēdash.

<sup>46</sup> Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utsiec yacno nidash iccuededquin Esus unēsaid tantiaquin panēmpi

cuēsh-cuēshun peded-pededpanēdash. Adembidi bundoshon pebededoapanēdash. Adobanequi ēbi icsaid bedshunash Esus cuidadaid tantiec bēdamo iquebi, quec <sup>47</sup> Nuquin Papan naid chiec cuēdēncuededpanēdash.

Adec tabadsho isash, Bēdamocquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

## 3

### *Caputiapimbo icquid bēdamiaid*

<sup>1</sup> Adnubien abi nidteniacpadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash. <sup>2</sup> Ambo nidnubien caputiapimbocquid aid shubu shēcuē Bēdaidquio caid yacno utsibun buampanēdash. Anin tishacchobi yec caputiapimbocquid icpanēdash. Aidī badiadquidēn-badiadquidēnquien

buandenequin aid shëcuë cuëmano nanded-nandedac uequimbi chochoso isun: —¿Adabi piucquid menetsia? —cabampanëdash. <sup>3</sup> Ambo Petedobëd Uan choso isquin: —¿Adabi piucquid menetsia? —capanëdash caputiapimbocquidën uequin.

<sup>4</sup> Adoquien Uambëd nidtuidash nidquin Petedon: —Ëbi daëdi is —capanëdash caputiapimbocquid bëisquin. <sup>5</sup> Adoquien, Ëbi menepashun, quequin abi daëdi isobien, <sup>6</sup> Petedon: —Piucquid con na nibëdec. Ëmbi tantiaidën ëbi tantiamebocpaden naimbique. Nasaded yacno iccondaidën Esusën bëdamiacpadec bëdanash nidtoash nidec nid —capanëdash. <sup>7</sup> Aden chuiquin caputiapimbocquidën mëdante abiucquio bedtanquin Petedon nidtomiac badedquio nidtopanëdash caputiapimboedi. <sup>8</sup> Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepanëdash. <sup>9</sup> Adec capusho isquidon nadobededpanëdash: <sup>10</sup> —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanëdash.

<sup>11</sup> Adec capuequi Petedobëdta Uan mëdinec Sadomonën tacpan quënë uabicquid yacno puduednubien iccuededquid tsibanash anotsen tantiadempambo yec tabadoapanëdash. <sup>12</sup> Adec tabadsho isun Petedon naden chuibanpanëdash: —¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bëdamboctequid icquindambi nadio? Padenquio. Nuquin tsusedpabon Papa caidën bëdamiaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidëmbi ambi nidaidën chomiaid Esus nëbi aton Papabëd tabadoaic. Aton Papa yacno nidoabicsho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsamboctequid nec. Unës uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentequid mibi chuiquid dapa mimbi unës uacshobien Nuquin Papan aidi uincuempondash. Aid uincuenacsho ëbitedishun isondambi. <sup>16</sup> Esusën ëbi bëdamepec, quequin tantiaish nëid taë icsacboedën Esus tantiaish capusho mibitedishun isec.

<sup>17</sup> “Utsibo, Nuquin Papan chomiaid nec, quequin tantienquiocquin mibi chuiquidobëdta mimbi Esus unës uamiondac. <sup>18</sup> Ëmbi matses chuiquid dapa icmenu caid matsesën mëyanaid iquendac, quequin ambi chuimiaidtedi Nuquin Papan dada uamiampicpaden mimbi naondac. <sup>19</sup> Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmenuen chomepanuna. <sup>21</sup> Nuquin Papan abitedi icsaisa icmete ushë choabicnuc ambi chiampicpadequi nëbi Esus abuc aton Papabëd tabadec. <sup>22</sup> Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan

chomendac. Isadaidbobidi aid iquendac. Aid choshon chuiban-  
sho tantiashun bēdamboen nabanta.

<sup>23</sup> Ambi chiaid tantiesa Nuquin Papan nēsecaindac, quequin Moisesēn  
dada uampic.

<sup>24</sup> “Adomboembidi Samuedēn chuibampampic. Adomboembidi  
Nuquin Papan chuimiaid utsibon chuibanoampic. <sup>25</sup> Nuquin Papan  
chuimiaidon tsyuecquido mibitedi nec. Tsusedpa Abadauanēn  
tsyuecquidobidi mibitedi neoaic. Aidon tsyuecquido icscho Nuquin  
Papan Abadauan chiampicpaden chuoaid mibitedi nec. Naden  
Abadauan Nuquin Papan chuipampic:

‘Mibi ēdenquimbo unēsampin aton matsesbēdta matses utsi-utsien min  
tsyuecquidēn bēdambo icmendac.’ <sup>26</sup> Nuquin Papan Abadauan  
chiampicpadec aton tsyuecquid choacsho mimbi unēs uapondac.  
Aidi Nuquin Papan uincuemiāc ma isadaidbomba abi icsaid ēnsho  
ma ambi bēdambo icmiaid icpanuna —quepanēdash Petedobēd  
Uan.

## 4

### *Ambi naid Petedobēdta Uan isadaidbo tsusiobon chuibamiaid*

<sup>1</sup> Aden Petedobēdta Uanēn chuibanubien isadaidbo tsusiobo cho-  
chopanēdash. Utsi-utsiec Nuquin Papa tabadte shubu uashunaid yacno  
cho-choquid bēdamboen tabadmequidquio icnubi utsi-utsiec saduseyobo  
icpanēdash. <sup>2</sup> Esus unēs uacsho Nuquin Papan uincuemiācpademi  
matsesten unēsacsho uincuemeoaindac, quequin Esus chuibenequidon  
chuibanubi chopanēdash aidō. <sup>3</sup> Choshon Petedo Uambēdta bedash: —  
Inchēsheque. Badiadshun nēidēn chiaid tantianush nidnu. Nid —quianec  
puduanquimbi Petedobēdta Uan quēnēn nauedmepanēdash isadaidbo  
tsusiobon. <sup>4</sup> Aid daēdi bedabicnuc Petedobēdta Uanēn chuibansho  
tantiaquido Esus tantiaquid dada dadpen sinco midted yampanēdash.

<sup>5</sup> Adashic, badiadash isadaidbo chuiquido yec tsusio utsibo yec abi  
ancaquido yec quec Edusaden yacnoēsh iccuededpanēdash. <sup>6</sup> Nēidtedi  
icpanēdash: ancanquid dapa daēd Anasbēdi Caipas icpanēdash. Nēidic  
aton shubun icquido abipadquido: nēidic Uan, utsibic Adecandedo,  
aidtedi cho-choash iccuededpanēdash. <sup>7</sup> Iccuededshumbic Petedobēdta  
Uan bēmeshun nēnantanquio nidtomeshun: —¿Tsutsi chuiquin caputi-  
apimbocquid bēdamio? —capanēdash tsusiobon.

<sup>8</sup> Adoquien Petedo Nuquin Papan Mayanēn comapenen tantiamiac  
nadpanēdash: <sup>9</sup> —Caputiapimbocquid tantiaquin bēdamiaid isec ¿mitsi-  
paden nao, quecta mibitedi tabadpe? Ancanquidbēdtabi chuiquid utsibo  
isadaidbo utsibo mibitedi chiembique. Tantiata. <sup>10</sup> Caputiapimbocquid  
Esuquidistu Nasaded yacno iccondaidēn bēdamiaid niosh. Mimbi unēs  
uacsho Nuquin Papan uincuemiāidēn nac nēid caputiapimbocboedi nēbi  
nidtoash capusho mimbi isec. <sup>11</sup> Aid bēdamequid mimbi tantienquio yaid  
Nuquin Papa yacno yuedanquidquio nec. <sup>12</sup> Nuquin Papa yacno yuedan-  
quid utsi nibēdec. Nuquin Papa yacno tabadte bunec aid tantiaquid icta  
—quepanēdash Petedobēd Uan.

<sup>13</sup> Adec Petedobēd Uan dacuēdenquio yec comapenec onquesho tanti-  
ash tsusiobo: —Aid daēdi tsusiopenquio iquequi adecbidi Nuquin Papan  
chiampid tantiabenabicquid iquequi Esusbēd icquid aid daēd icquin



¿mitsipadomboen caputiapimbocquid bēdamēpashba? —quec tantiadem-pambo yec tsusiobo tabadpanēdash. <sup>14</sup> Aden ambi bēdameboed aibdēdi icsho isash, Icsamboen mimbi naoc, quetiapimbo tsusiobo tabadpanēdash. <sup>15</sup> Adshun Petedo Uambēdta nidmiash, Tiantianu, quec onqueuededec tsusiobo: <sup>16</sup> —¿Mitsipadomboen aid daēd nuqui napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi. <sup>17</sup> Dadpenshun tantianushe queshun, Esus padpiden chuibanoainda, quequin aid daēdi chuinuna —quecuededpanēdash tsusiobo. <sup>18</sup> Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

<sup>19</sup> Adoaquien: —¿Mitsicquidēn chiaid ěmbi natequid icpec? ¿Nuquin Papan chiaid niacquindambi mimbi chiacpaden nadi? <sup>20</sup> Nuqui isboed nuqui tantiaboedbidi chuitequidquo iquendac —quepanēdash Petedo.

<sup>21-22</sup> Adoaquien: —Ěmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamēpanēdash. Aid Nuquin Papan bēdamicasho isash utsibo cuēdēncuededpanēdash. Adsho tantiash Petedobēdta Uan mēyantiadquiocboedi adotiapimbo yec tabadpanēdash tsusiobo.

*Isadaidbo tsusiobon chiaid Esus tantiaquidon chuioaid Nuquin Papa chiaid*

<sup>23</sup> Tsusiobon nidmiac nidash iccuededbocnombo choash puduedshun tsusiobon chuiboed Petedobēdtan Uanēn chuioapanēdash. <sup>24</sup> Adoac abentsēc onquiacbimboen naden Nuquin Papa chuipanēdash: —Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic. <sup>25</sup> Adembidi ěndenquimboshē mimbi tantiacpaden min Mayanēn tantiamiac mimbi chuimiaid, Dabid padon naden dada uapampic:

“¿Atotsieshumbini ěbi dēniactiapimbo icquidombi isadaidpembo comapenec nēishash ěbi dēniacte buncuededpec? Adquiecbidi ¿Atotsi quiash ěmbi chomiaid icsamboen nanushbimboec isadaidbo onqueuidoapec?

<sup>26</sup> Ancanquidobēd chuiquid utsibo ěmbi chomiaid aton Icbobi mēyanuec iccuededec.”

<sup>27</sup> Ai, mimbi Dabid pado dada uamiampicpadembi ěnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. <sup>28</sup> Mimbi tantiampicpadembi unēs uapondash, Papa. <sup>29</sup> Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ěbi chuibame, Papa. <sup>30</sup> Icsaisan Esusēn bēdamicapaden nadatiambocquin naban, Icho —quepanēdash Esus tantiaquido Nuquin Papa caic.

<sup>31</sup> Adoac abi iccuededacno ishcutpanēdash. Adec ishcutnuc ambocquid Nuquin Papan Mayanēn comapenen pausunac dacuēdenquiocquin Nuquin Papan chiaid chuibanpanēdash.

*Abentsēc yacbimboec tabadaid*

<sup>32</sup> Aden chuibanequi abentsēc onquiacbimboec tabadec Esus tantiaquido, Con na nec, quenquio yec, Nuquin Papan na nec, quec tabadcueneapanēdash. <sup>33</sup> Adequi tabadcuenequimbi dacuēdenquiocquin,

Esuquidistu uincuenacsho isombi, quequin chuibenepanēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantiapanēdash. <sup>34-35</sup> Adembidi nidaid icbo utsin-utsinquien aton nidaid menequin piucquid bedshun Esus chuibenequido menepanēdash. Adembidi, shubu icbo utsin-utsinquien aton shubu menequin piucquid bedshun meneoapanēdash. Aden meniac aton na nibēdquid icsho isun Esus chuibenequidon menebanac bunenquoio tabadpanēdash. <sup>36</sup> Adecbidi ambo acte nēnantanquoio nidaid nacnēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpañēdash. <sup>37</sup> Aidēmbi aton nidaid menequin piucquid ambi bedaidtedimbo Esus chuibenequido meneoapanēdash.

## 5

### *Ananiasbēd aton chido Sapida muaid*

<sup>1</sup> Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniaccimboen menepanēdash Ananiasēn. <sup>3</sup> Adnubien, Piucquid abitedi meniaccimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ¿mitsipaden tantiaquin Nuquin Papan Mayanēn isnubi mua uaqin ēbi menio? <sup>4</sup> ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidtedi mitsana niosh. ¿Mitsipaden tantiaquin piucquid abitedi meniaccimboen meniano? Aden bēquin abimbo chienquiocquin Nuquin Papambobi mimbi mua uaboc <sup>5</sup> —Petedo qesho tantianec Ananias unēsequi uebudpanēdash. Adsho isash Esus tantiaquidtedi dacuēdpanēdash. <sup>6</sup> Unēsacsho isun dashcute cuēshēn dataneshun buanshun caniabon chococatampanēdash.

<sup>7</sup> Bēnē chococambic ushē abuctoan unēsboedēn chido aton bēnē unēsaid tantienquoio yec choapanēdash. <sup>8</sup> Choasho isumbien: —¿Ada min nidaid menequin nēidtedi piucquid bedo? —Petedo qesho tantiashien: —Ai, aidtedi bedombi —quepanēdash Sapida.

<sup>9</sup> Adoquien Petedo: —¿Nuquin Papan Mayanēn ēbi muasho tantiapec, quequin tantienquiocquina min bēnēbēdtambi min piucquid abitedi meniaccimboen meniano? Nēbi min bēnē chococaboedon mibitsen buanendac —Petedo quenubic <sup>10</sup> Petedon tayumbi uebudec Sapida unēsapanēdash. Aidtsen unēsacsho buanshun aton bēnēbēdtabi chococatampanēdash. <sup>11</sup> Adoac aid daēdi unēsaid tantiash Esus tantiesatedi Esus tantiaquidobēd comapenec dacuēdcuededpanēdash.

### *Bē-bēaidtedi bēdanaid*

<sup>12</sup> Adashic Sadomonēn tacpan caid yacnoēsh Esus tantiaquido iccuedednubi Esus chuibenequidon nadatiambocquin nabampanēdash. <sup>13</sup> Adomboen nabansho isash Esus tantiesabo dacuēdec tacpan yacno chotiapimbo yequi: —Esus tantiaquido bēdamboshē iquec —quecuededpanēdash. <sup>14</sup> Adec tabadequi utsi-utsiec dadpen dadabēdi chido Esus tantiaquido yampanēdash. <sup>15</sup> Adec Esus tantiaquid yanshun,

Daicsaido Petedon bēdamepec, quequin tantiaquin daicsaido bē-bēshun Petedo capuacno nambededpanēdash. <sup>16</sup> Adembidi dēuequidon Edusaden yacno daicsaid bē-bēnubi mayan icsan mēyanaido bē-bēoapanēdash. Aden bē-bēaidtedi bēdampanēdash.

*Esus chuibenequido tsusiobon quēnēn nauedmiaid*

<sup>17</sup> Adnubien isadaidbo ancaquidbēd tsusio dapa utsibo saduseyobo caid isec otacquo tabadboedī matses dadpen Esus chuibenequido yacno cho-chosho isash nēishcuededpanēdash. <sup>18</sup> Adec nēishcuededshun Esus chuibenequido bedmeshun quēnēn nauedmepanēdash. <sup>19</sup> Aid inchēshēmbi Nuquin Papan uaid mayan bēda choshon quēnē shēcuē bētashaid bēcadoquin abitedi puduemec: <sup>20</sup> —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata — quepanēdash Nuquin Papan uaid mayan bēda.

<sup>21</sup> Badiadnuc Nuquin Papa tabadte shubu uashunaidēn puduedshun Esus tantiaquid abi uincuentequid chuibanoaic tabadoapanēdash aidtedi. Chuibanubien isadaidbo tsusio dapan abēd icquidobēdtambi tsusio utsibotedi cho-chomeshun: —Esus chuibanquido bedtan — cac <sup>22</sup> quēnēn nauedaid puduenushe quequin isquido chuiquid nidshun isquien Esus chuibenequido nibēdec. <sup>23</sup> Adsho isash choaquin: —Quēnē shēcuē bēdamboen bētashquin quēnēn nauedaid puduenushe quequin isquido shēcuē cuēmāno capusho isombi. Shēcuē bēcadoash puduedshun isaquin ēnden puduen-puduenac —quepanēdash quēnēn nauedaid puduenushe quequin isquido chuiquid. <sup>24</sup> Aden chuisho tantish isadaidbo tsusiobo: —¿Atodain nechitec? —quepanēdash Nuquin Papa tabadte shubu uashunaid isquido chuiquid chiec. <sup>25</sup> Adnubien dada utsi choshon: —Mimbi quēnēn nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanēdash. <sup>26</sup> Adoquien quēnēn nauedaid puduenushe quequin isquido chuiquid capitān caidēn ambi namiaidobēdtan tantiec nidshun bedtanquin bēoapanēdash. Matsēsēn cuēnoten ēbi se-senushe queshun mēyanenquiocquin Esus chuibenequido bēoapanēdash.

<sup>27</sup> Aden bēquin Nuquin Papa tabadte shubu uashunaid nuntan tsusiobo iccuededacno yuedpanēdash. Bēsho isash tsusio dapambo: <sup>28</sup> —Esus chuibenenda, quequin chiambocquidēmbimboen Esus chuibanquin Edusaden yacnocquidtedi mimbi tantiamēbanoc. Adoquimbic, Esus unēs uaid tsusiobon naid nec, quequin mimbi chuibanoc —quepanēdash tsusiobo. <sup>29</sup> Adsho Esus chuibenequido utsibon tantianubi Petedonuidi: —¿Matsēsēn nata caidodabi nedi? Nuquin Papan nata caid icquin nabanembi. <sup>30</sup> Mimbi cuesten dectanquin unēs uaondaid Esuquidistu Nuquin Papan padpiden uincuemepanēdash. Nuquin Papa caid tsusedpabon Papa caidquio nec. <sup>31</sup> Esus uincuemeshun aton dayunquio tsadmequin matses bēyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bēpiscudpanuna. <sup>32</sup> Esuquidistun nabansho isbempondambi. Adembidi abi unēsash uincuenacsho ispondambi. Nuquin Papan Mayan icsaisan Esuquidistu tantiaquidobēd icquidēmbi adomboen ēbitedi tantiamēoaic —quepanēdash Petedo.

<sup>33</sup> Aden Petedon chuisho tantish tsusiobo: —Icsambo iquēc —quish Esus chuibenequido cuesunete bumpanēdash. <sup>34</sup> Adnubien isadaidbo

utsi padiseyobo, Nuquin Papan Moises dada uamiampid chuibanquin tantiamequid utsibon bēdamboen isaid, Camadied cuēmēdquidēn: — Chiata. Bēboedtedi buantan —cac<sup>35</sup> buanambic: —Icsamboen nanushe qeshun bēdamboen tantiaquiota. Aido cuesunete mibi buneque. Cuesunenushe chiata. <sup>36</sup> Ēndenquio utsi Teyudas cuēmēdquid icpondash. Aidi tsusio dapa icnuequin chuisho tantiash dada dadpen 400ted abēdi capupanēdash. Teyudas cuesuniacsho isash abēd icboedtedi udi nidaniacsho padpiden isenquio icpanēdash. <sup>37</sup> Adashien matses tambanta caid ushēmbi utsi Udas cuēmēdquid Cadidia yacno icnēdaidbēd matses dadpen capupanēdash. Udatsen cuesuniac abēd icnēdaidtedi padpidec choenquio yec adecbidi udimbo nidanepanēdash. <sup>38</sup> Adec umanuc buamboedo chuiquid nibēdanaque. Aidbēd icboedo mishenda. Cuesunemenda. Aidēn chuibanaidbēdtabi ambi naid matsesēn naiduidtsēqui icnu badedquio ēnēdendac. <sup>39</sup> Aido Nuquin Papan namiac chuisho mimbi ėmetiapimbo iguendac. Nuquin Papa chieshēnushe qeshun aido nidmeta.

<sup>40</sup> Aden Camadiedēn chiac: —Adonona —qeshun: —Buamboedo bēoata —cac bēacsho cueshcanten cuesmepanēdash. Aden cuestanquin: —Esus chuibanoinquio yec nidan —qeshun puduemepanēdash. <sup>41</sup> Puduemiac Esus mēyanaid tantiec nidequi abi chuibancho mēyanaid yec bēdambo iquebi, quec tabadpanēdash. <sup>42</sup> Adshumbic badiadquidēn-badiadquidēnquien Nuquin Papa tabadte shubu uashunaid yacnoshon matses bēyucanquin chuiquid, Nuquin Papan bēdamboen isaidquio Esus nec, quequin chuibanpanēdash aidon. Shubu utsi-utsiec yacno nidshun adomboembidi chuibenepanēdash.

## 6

### *Niante chidobo pete menebanquid icta caid*

<sup>1</sup> Adashic badiadquidēn-badiadquidēnquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanēdash. <sup>2</sup> Adoquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ėntiapimbo iquebique. <sup>3</sup> Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bēdamboec tabadsho mimbi bēdamboen isaidquio istuidta. Adquid 7ted istuidshun, Niante chidobo pete menebanquid icta, cata. <sup>4</sup> Aidedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

<sup>5</sup> Adoquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēdic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquio Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. <sup>6</sup> Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi

dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

### *Esteban bedaid*

<sup>8</sup> Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismebampanēdash. <sup>9</sup> Aden nadatiambocquin ismenuc bēdamboen tantienquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aitedi Edusaden yacno cho-choash tabadec Estebambēd comapenec onquepanēdash. <sup>10</sup> Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onquetiapimbo icpanēdash. <sup>11</sup> Onquequin dēniactiapimbo icquin utsibo naden aidon chuipanēdash: —Tsušobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. <sup>12</sup> Aden chiac tsusiobobēd Moisesēn dada uampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. <sup>13</sup> Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. <sup>14</sup> Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomi-aidon. <sup>15</sup> Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiate ushēbimboec ushumbo yec chēnquesho isbededpanēdash.

## 7

### *Estebanēn chuibanaid*

<sup>1</sup> Adec Estebanēn bētantiate ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh? <sup>2</sup> —caquien yuecquo onquequin Estebanēn naden chuipanēdash: —Chiembi que. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uēshēmbo yec dasiuidteniaid matsesēn istemaid bēchomaoanquiec icquid Abadauan ismepampic. <sup>3</sup> Aden ismec nadec onquepampic: “Min utsitedi nianec nidaid utsi yacno mibi ēmbi ismenu caid yacno nidta.” <sup>4</sup> Adsho tantiash Candeyabon nidaid yacnoēsh nidashic nidaid Adan caid yacno choash Abadauan tabadpampic. Ambo tabadashien aton papa unēsan Adan yacno nēbi nuqui tabadbocono Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden

Abadauan chuipampic: “Nëid nidaidën mibi capuacno mitsanapenquo nec. Yuecshun mibi menenun nanuna. Mimbi tishmiambocboedi min chidon tishaid abentsëc min madombo nëid nidaid menendambi. <sup>6</sup> Nëid nidaid bedabi yec mimbi tishmiaidën tishmiaid caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. <sup>7</sup> Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mëyanacnoësh nidashic nëid macuësh yacno choshon ëmbi chiacpadomboen nabanendac.” <sup>8</sup> Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuëbëdta dada caniaidtedi shui dëbid dëtemeta. Adobansho isun, Ëmbi chiaid bëdamboen naquidquo aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeoapampic. Adoshombic yuecquo icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembidi Isaquën aton mado tishacsho Acoho cuënquin aidtedecbidi ushun Isaquënsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

<sup>9</sup> Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic. <sup>10</sup> Adoac, Yuanu, qeshun natiamiaid Ose icsho isun Nuquin Papan aid dayun uaqun dacuëdenquo icmequin comapenen tantiaquidquo bëdamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

<sup>11</sup> “Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic. <sup>12</sup> Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidaneppampic. <sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiochoedëmbi Padaonën tantiabempampic. <sup>14</sup> Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. <sup>15</sup> Adashic, Equipito yacno yuec tabadashi tsusio budashi

Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësacsho Equipito yacno chococapampic. <sup>16</sup> Adashic, yuecquio yash Equipito yacnoësh nidquin unësaidon tishmi-aid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, pi-ucquid menequin tsusedpa Abadauanën tied bedshunëdacno chococa-pampic.

<sup>17</sup> Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuiampid ushë chote anoentsëc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquo icpampic. <sup>19</sup> Aidëmbi mua uaquin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. <sup>20</sup> Adnubien dada bacuë Moises tishacsho Nuquin Papan, Aid bëdaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. <sup>22</sup> Bedsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantibenquiopampic.

<sup>23</sup> “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaindo con matses isnu, quianec aton matses chonoadacno nidquin Moisesën istuidpampic. <sup>24</sup> Istuidnubi Equipito yacnocquid dada abentsëcshun isadaidbo dada abentsëc mëyanquin cuesnesho isun Equipito yacnocquid cuidnuequin Moisesën cuesuneoapampic. <sup>25</sup> Embi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquo icpampic. <sup>26</sup> Badiadash aton matses yacno padpidec nidquin aton matses daëd cuesnansho istuidshun, Èmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. <sup>27</sup> Adoquien Moises cuëscatanec: ‘¿Èmbi nasho cuidquin ëbi chuiquid tsuntsin mibi icmioshe? Chui. Tantiyanu,’ quetanequi: <sup>28</sup> ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

<sup>30</sup> “Adashic, seta dadpen 40tedbidi matamec nidaid Madian caidën tabadec cuëtempuidquo yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacimboecquid nënantanquo Nuquin Icbon Chomiaid tabadsho Moisesën ispampic. <sup>31</sup> Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuiampic: <sup>32</sup> ‘Min tsusedpa Abadauanën Papa cain

cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,' quesho tantiash dacuëdec uëdëquec istiapimbo yec Moises nidtuidpampic. <sup>33</sup> Nidtuidsho isec Nuquin Icho Moises chiec nadpampic: 'Nëmo ëbi icsapenquio icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ëbi cudasaïdo Equipito yacnocquidon mëyanac uëshquec shubiquiosho tantiashun aïdo Equipito yacnoshon buanta mibi canuec chobi. Nëbi Equipito yacno mibi nidmeoaimbi,' quepampic Nuquin Icho Moises chiec.

<sup>35</sup> "Aden cuëtëmpi nëdënquiacbimboecquid nënantanquio ichoedën Nuquin Papan Chomiaidën isadaïdbo bëyucanquin buanquid icta cac: '¿Ëmbi naid icsho cuidquin ëbi chuiquid tsuntsin mibi icmioshe? Chui. Tantuanu,' abi caondaïdo bëyucanquin buanquid Moises icpampic. <sup>36</sup> Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaïdbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniactacnoshontsen nadatiambocquin nabanquin isadaïdbo Moisesën ismeoapampic. <sup>37</sup> Aidëmbi naden chuipampic: 'Yuecquio icshun ëbipadquid mimbi tishmiaidën tishmiaïdon caïdaïd Nuquin Papan chuïquidquio icmendac,' quequin Moisesën chuipampic. <sup>38</sup> Isadaïdbo bëyucanquin chuïquid Moises matses nibëdacno isadaïdbobëd macuësh dapa Sinai caïd yacno choash Nuquin Papan chomiaïdobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. <sup>39</sup> Aden aid dada uaid bedshun bëyucanquin chuïsho tantiesha yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuïbededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquïocnoc nacentä. Nacnenash bëyucanquin chuïquid aid iquendac,' tsusedpabon cac <sup>41</sup> bacan bacuëbimboecnuc Adonën nacnempampic. Ambi nacnenaid tantiaquin isadaïdbon nidaidën capuquid yua cuesuneshun cuëdënëmbodedpampic. <sup>42</sup> Adquid cuëdënënsho tantiash isadaïdbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuipampic: 'Adomboen mimbi nacnenaid tantiec tabad.' Adembidi Nuquin Papan yuecquio icshun nanun chiaïd isadaïdbo chuïquin naden dada uamepampic:

'¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid taudenio? Padenquio.

<sup>43</sup> Ëmbi uaid badiadën ushë, ëbitedishun bëyucamembi, quesshun aidpadquid nacnensshun Modoc cuënquin aton shubumpi nuntan namposh.

Aïdbëdtabi uispa dapatsen ëbitedishun bëyucamembi, quesshun aidpadquidbidi nacnensshun Dempan cuë nec danëshën sebudec



shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquio icquidobi Nuquin Papan chuipampic —quepanëdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. <sup>45</sup> Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. <sup>47</sup> Aid shubu uabi Dabid unësbambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. <sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic:

<sup>49</sup> “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic?

¿Nidaidënuidi tsadpectabi tiboquendac?

<sup>50</sup> ¿Tauaquiouimbi abitedi uambodambi ictionda?”

quequin Nuquin Papan chuimiaidën dada uapampic —quequin chiashic Esteban abi onquec: <sup>51</sup> —Pacuënëdacimboen Nuquin Papan chiaid tantiaish icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic.

<sup>52</sup> ¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. <sup>53</sup> Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec —quepanëdash Esteban isadaidbo chuiquin ënec.

### *Esteban se-siaid*

<sup>54</sup> Adec Esteban onquesho tantiaishun nëishënshun Esteban iccuededquidon chushcapanëdash. <sup>55</sup> Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nidtuidsho ispanëdash. <sup>56</sup> Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabëd tancandaëdquiec tsadsho isembi —quepanëdash Esteban.

<sup>57</sup> Adsho tantiaish tsusiobo compenec sidquianec pamumëdanec tinquinquen Esteban bedshun <sup>58</sup> cuënoten se-senuen shubu nibëdacno

udi buampanēdash. Aden Esteban buanshun aton dashcute Saudo cuēmēdquidēn taēno sampanēdash Esteban se-senuequidon. <sup>59</sup> Sanshun se-siaquic Estebanēn Esuquidistu cuēnquin naden chuipanēdash: —Ēbi yued, Icho —quiashic, <sup>60</sup> danēshēn sebudash comapenec naded onquec: —Ēbi se-sequido icsaid cuidenquo yec bēpiscudta, Icho —quepanēdash. Adec onquetanec Esteban unēspanēdash.

## 8

### *Saudon Esus tantiaquido mēyanaid*

<sup>1</sup> Esteban se-senu caquien, Ai, adota, quiash isec uano Saudo tsadpanēdash. Esteban se-siaid ushēmbi Edusaden yacnoshon Saudon Esus tantiaquid utsi-utsien comapenen mēyanquin taudopanēdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanēdash. <sup>2</sup> Adnubien Nuquin Papan chiacpadomboen naquin Esteban chococaic comapenec sedenquec shubipanēdash. <sup>3</sup> Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabēdtabi chido chedo bedmeshun quēnēn nauedmepanēdash.

### *Samadia yacnoshon Esus chuibanaid*

<sup>4</sup> Adashic Edusaden yacnoēsh nidanec shubu dadpen icquid utsi-utsiec yacno choshon abi tantiaquidon Esus chuibenapanēdash. <sup>5</sup> Adembidi nianta chidobo aton na nibēdsho menequid, Uedipe cuēmēdquid nidaid Samadia caid yacno choshon adembidi Esus chuibanoapanēdash. <sup>6</sup> Aidēn nadatiambocquin nabanquin Esus chuibansho ambocquido iccuededquin bēdamboen tantiapanēdash. <sup>7</sup> Aidēmbi nadatiambocquin nabanac mayan icsa dapuedaid ichoedi mayan icsa sidquianec cuempanēdash. Adecbidi canite icsaidbēdta caputiapimbocquid dadpen bēdampanēdash. <sup>8</sup> Adsho isash Samadia yacnocquido, Bēdambo iquebi, quec tabadpanēdash.

<sup>9</sup> Adnubien Samadia yacno ēnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. <sup>10</sup> Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapenen tantiapanēdash. <sup>11</sup> Aden yuen Simonēn ismiac, Isnuequid dadpen badiadquidēn-badiadquidēnquiec abi yacno choash iccuededpanēdash. <sup>12</sup> Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanēdash dadabēdi chido chedo. Adsho aidtedi acten mentomepanēdash. <sup>13</sup> Simontsen: —Esus tantiaquid nebi —quesho acten mentoalui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

<sup>14</sup> Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambēdta Petedo Edusaden caid yacnoēsh nidaid Samadia caid yacnoshon nidmepanēdash. <sup>15-16</sup> Adec aid daēd nidaneshun: —Esus tantiaquid acten mentoaidouidi nēidtedi nec —anocquido quesho tantiashun: —Nēidtedi

min Mayan mene, Papa —quec onquequin <sup>17</sup> Petedobëdtan Uanën mëdanten Esus tantiaquido mamishbampanëdash. Aden mamishbanubi aidtedi Nuquin Papan aton Mayan menepanëdash.

<sup>18</sup> Aden Petedon nasho isash Simon: —Ma adquiec mëquiadnueshun mibi piucquid menenu. <sup>19</sup> Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

<sup>20</sup> Adoaquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. <sup>21</sup> Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. <sup>22</sup> Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac. <sup>23</sup> Mayan icsan yua icquin tactau tishidaid mishaid mucambo yacpade icsamboen mimbi muaquin chuibanaido icsaindac.

<sup>24</sup> Adoaquien: —Ëbi tauiantiadpambo chian anëdënquequid nënenushe quiash mibi Uambëd Nuquin Papa chiec bëdamboec onquebudneta —quepanëdash Simon.

<sup>25</sup> Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanëdash aidëmbidi.

*Uedipe Etiopia caid yacnocquidbëd icaid*

<sup>26</sup> Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash niduntanec chotan.

<sup>27</sup> Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuidpanëdash. Ancanquid chido Candase cuëmëdquid aton na dayun uashunquid aid dada nepanëdash. Aidi Edusaden yacno nidash tabadquin Nuquin Papa chianec <sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. <sup>29</sup> Adnubien Nuquin Papan Mayanën: —Nidaid cano chinunta —cac <sup>30</sup> Uedipen titinguequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequinda tantiaquie? —quepanëdash Uedipe.

<sup>31</sup> Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopanëdash.

<sup>32</sup> Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpade abi unës uanuequid icnuc cuëdenquio icoaposh Nuquin Papan Chomiaid.

<sup>33</sup> Aidi Icsaisa icsho mëyansho isec, Icsambocquidta neque. Isnu, quenquicposh aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

<sup>34</sup> Aidedtedsëqui abi isec onqueboed Uedipe ismeshun Etiopia yacnoësh choquidën: —Ëbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibanegue? Ëbi chui. Tiantianu —capanëdash Etiopia yacnoësh choquidën Uedipe chuiquin.

<sup>35</sup> Adoaquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibampanëdash Uedipen.

<sup>36</sup> Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

<sup>37</sup> Adoaquien Uedipe: —Esus tantiaquidquio nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoësh choquidën: <sup>38</sup> —Niduid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash. <sup>39</sup> Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

<sup>40</sup> Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëc onquec choequi shubu dadpen icquid Sesadeya caid yacnotsen choapanëdash.

## 9

### *Saudon tantiate paucaid*

<sup>1</sup> Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash <sup>2</sup> shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

<sup>3</sup> Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. <sup>4</sup> Aden dëcatiac Saudo paëdash uesho isun nadec abucuësh onquec: —Saudo, ¿atotsieshun ëbi tantiaquido mimbi mëyampeba? Ëbitsen mëyantiadpambocquin mimbi aido mëyanec —quepanëdash.

<sup>5</sup> Adoaquien: —Icbo, ¿Tsutsi mibi ne?

<sup>6</sup> Adoaquien: —Mimbi mëyanaid Esus nebi. Ëmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

<sup>7</sup> Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash. <sup>8</sup> Onquec

ënëdan nidtoash Saudo istiadquo iquequi bëshupanëdash. Adsho isun mëdinanquin Damasco yacno buampanëdash. <sup>9</sup> Adequi Damasco yacno choash 3tedec ushec isenquo yec buna mëmunquiee Saudo tsadpanëdash.

<sup>10</sup> Adashic, Saudo puduedash tabadacno ëdibictsec tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia —caquien:

—¿Atoda? Nëbi uebi, Icbo —quepanëdash Ananias.

<sup>11</sup> Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquéc tsadsho mimbi istuidendac. <sup>12</sup> Adec aid ushac bimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

<sup>13</sup> Adoaquien: —Con matses dadpeshun Saudon naid icsa chuiban-sho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. <sup>14</sup> Aidbidi Edusaden yacnocquido chuiquid dapanquo dada uaid sananquin nëmbotsen mibi tantiaquido bedmeshun tanemenuec aidi chopac caosh —quepanëdash Ananias Esus chiec.

<sup>15</sup> Adoaquien: —Aidi ëbi chuibeneta caidquo icmeshun ëmbi bëdamboen isaid neque. Aid dacuëdënenquo yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac. <sup>16</sup> Ëbi chuibenesho mibi mëyantequid iquendac, quequin Saudo tantiamembi —quepanëdash Esus.

<sup>17</sup> Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Ichonquo, Esusën mibi padpiden ismenuen Nuquin Papan Mayan mibi menuenembidi chomiaid nebi —quepanëdash Ananias Saudo chiec.

<sup>18</sup> Aden Ananiasën chuinubi nuëcquid bitsibimboecquid ëshënuësh paëdnubi bëshuachboedëmbi, Saudon, bëdamboen ispanëdash. Aden isec capusho isun acten mentopanëdash. <sup>19</sup> Adechidi Saudo penquo yec padishachboedi piash padpidec uidëncuenoapanëdash.

### *Damasco yacnoshon Saudon Esus chiaid*

<sup>20</sup> Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanëdash Saudon. <sup>21</sup> Aden chuisho tantiashtantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adechbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido.

<sup>22</sup> Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquo Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanëdash.

### *Isadaidbo Esus tantiesa abi cuesunete bunsho isash Saudo cuenaid*

<sup>23</sup> Adembidi yuec ushquin Saudon ënenquiocquin chuiban-sho tantiashtantiash, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiapanëdash. <sup>24</sup> Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënuquidon caimpanëdash Saudo puduensho

bednu quequin. <sup>25</sup> Aden cainsho isun Saudo cuesunenushe qeshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

<sup>26</sup> Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaquin ëbi bednushe quiash dacuëdcuededpanëdash aid. <sup>27</sup> Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: — Saudon Damasco yacno nidquin Nuquin Icbo ispac caosh. Nuquin Icbo Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibanpanëdash. <sup>28</sup> Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash. <sup>29</sup> Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanëdash. <sup>30</sup> Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui nidmepanëdash.

<sup>31</sup> Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquio yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquio yampanëdash.

*Petedon Ananias Dodcastsen bëdamiaid*

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanëdash. <sup>33</sup> Ambo choshon dada, Eneyas cuëmëdqid, seta dadpen 8ted matamec canite tsasiaid Petedon istuidshun: <sup>34</sup> —Esusën mibi bëdamiaque. Nidtoson min uete buanun nacentia, Eneyas —Petedon cac Eneyas badedquio nidtoash capupanëdash. <sup>35</sup> Eneyas capusho isash Dida yacnocquidobëdi nidaid Sadon caid yacnocquido Esus tantiaquid yampanëdash.

<sup>36</sup> Adnubien Dida uditsëc shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanëdash. Aidi bëdambocquid icquin badiadquidën-badiadquidënenquien pete nibëdqido menedenepanëdash. Adembidi aton na nibëdqido Dodcasën menedenepanëdash. <sup>37</sup> Aidi Petedo Dida yacno icnubi icsabudec unëso isun abëd icquidon dapanshun shubu abuc quënë icquidën nampanëdash. <sup>38</sup> Aden nanshun, Petedo Dida yacno tabadec, qesho tantiashun aid chomenuequin dada daëd Petedo tabadacno nidmiac aid daëdi Petedo tabadacno choshon Dodcas unësboed chuishun: —Nidtuidentquio yec badedquio ëbëdi cho —cac <sup>39</sup> abëdi badedquio Ope yacno Petedo nidpanëdash. Adec nidec Ope yacno chosho isun abuc quënë icquidën puduedmepanëdash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanëdash.

<sup>40</sup> Adosho isun abitedi pduemiash danëshën sebudash Nuquin Papa chiec onquetanec nidtoson unësboed isquin: —Nidto, Dodcas — Petedon cac uincuenequi Petedo isec Dodcas badedi uëtsëdtopanëdash.

41 Uëtsëdtosho isun mëdinquin nidtomesahun niantebobëdta Esus tantiaquid utsibo cuënquin cho-chomeshun uincuemboed ismepanëdash.  
 42 Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanëdash.  
 43 Adnubien Petedo Ope yacnocquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

## 10

### *Petedo Codnedion chomiaid*

<sup>1</sup> Adnubien shubu dadpen icquid Sesadeya caid yacno Codnedio cuëmëdquid isadaidpembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. <sup>2</sup> Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. <sup>3</sup> Adquid yec ushë budtsambi tedes yanuc Nuquin Papa chiec onquequimbi ushacimbocquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

<sup>4</sup> Adsho tantiash dacuëdquin comapenen isec: —¿Atotsibi name, Icho? —quepanëdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. <sup>5</sup> Nëbi Simon cuënshumbic Petedo cuënoaid ma bednu mimbi namiaido Ope yacno nidmetan. <sup>6</sup> Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

<sup>7</sup> Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun <sup>8</sup> Nuquin Papan uaid mayan bëdan chuibocpaden Petedo bedmuenen ambi namiaido Codnedion nidmepanëdash.

### *Petodon ushacimboec tsadquin isaid*

<sup>9</sup> Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuc shubu macano padapambocquid yacno dectatopanëdash. <sup>10</sup> Adec dectatoash shubu ichon codocanubi Petedo bundoec ushacimboec tsadquimbic <sup>11</sup> abu posonianec abi yacmi dabidiete dapabiecquid bucun dënëshbudcuenaid budsho Petodon ispanëdash. <sup>12</sup> Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. <sup>13</sup> Adnubien: —Nidtoshon cuesuneshun pe, Petedo —capanëdash abucuësh onquequin.

<sup>14</sup> Adoaquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icho —quepanëdash Petedo.

<sup>15</sup> Adoaquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. <sup>16</sup> Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquid buanshun puduedmeoapanëdash.

17 Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. 18 Choec nidtuidash: —¿Nëmboda Simon Petedo tabadec? —quetuidpanëdash.

19 Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. 20 Ëmbi chomiaido neque. Budash cacuidenquoio yec aidobëdi nidtan —capanëdash.

21 Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

22 Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquoio nec. Adquid icquin Nuquin Papan chiacpaden nabansho isun isadaidbon bëdamboen isaidquoio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

23 Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnoquid utsin-utsinquien tsibanampänëdash. 24 Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiaishun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmeapanëdash. 25 Aden iccuededmiac tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismec danëshën sebudec shuebudash Petedo bëisenquoio yec Codnedio uepanëdash.

26 Adec uesho isash Petedo: —Mibipadquid nebique. Nid tota —quepanëdash Codnedio caic.

27 Adtanec Codnediobëd onquetanec quënë utsin puduedshun isadaidpëmbo dadpen Petedon istuidpanëdash. 28 Aden aido isec: —Isadaidbo nebi. Adquid yec isadaidpëmbobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses ut-sibo ëmbi bëdamboen isaid icsambo iquec cainda, quequin ismequin ëbi tantiamiac 29 mimbi ëbi bedmiaido choacsho isash, Mibëd capuesa nebi, quenquoio yec chobi. Adecbidi nëmbo choash isadaidpëmbon shubu nec. Nëmbo puduedtiapimbo iquebi, quenquoio yec puduedobi. Nëbi Tantanu. Chui. ¿Atotsieshun ëbi chomio? —quepanëdash Petedo Codnedio chiec.

30 Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bedbedquiachimboec dasiuidquid ëbi yacmi Nuquin Papan budmiac onquec: 31 “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquoio icquin tantiec. 32 Nuquin Papa bëdamboen tantianuen Simon cashumbic Petedo caid Ope yacnoquidbëd tabadquid ma chono qeshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda



onqueposh. <sup>33</sup>Aden chiac: “Petedo bedtan,” quequin ëmbi namiaido nid-miombi. Adoac bédambocquid yec cacuidanengquo yec badedquo mibi choc. Adec mibi choacsho isash bédambo iquebi. Nuquin Papan nuqui isnubi ambi mibi tantiamiapaden chuibansho tantiec tabadnuna — quepanédash Codnedio Petedo chiec.

*Codnedion shubu nuntanshun Petedon chuibanaid*

<sup>34</sup> Aden Codnedion chuiban cac Petedon naden chuipanédash: — Matses utsi nec, quenquiocquin Nuquin Papan yuedaid matses utsi-utsiec nec, quequin nëbi abimbo tantiëmbi. <sup>35</sup> Nuquin Papan chiaid tantiashun matses utsin-utsinquien chieshënenquiocquin bédamboen nabansho isun, Aidedi Nuquin Papan abi yacno yuedendac, quequin tantiëmbi. <sup>36</sup> Èndenquimboshë Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsëqui matsestedi chuiquid icnubi utsibëd bédamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. <sup>38</sup> Ma abëd tabadneshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bédamboen nabanquin abi chieshënnquidën Satanas caidën mëyanaido Esuquidistun bédamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqui <sup>40</sup> uincuenash, Uincuenobi, quequin Esuquidistun ismebempoundashi. <sup>41</sup> Aidi uincuen-shun matsestedi ismenquiocquin aibëdtan peshun acquidotedictsëqui Esuquidistun ismepondashi. <sup>42</sup> Abëdi icshobi, Èbi chuibanquin matses icsaid cuidte chuibante ushë choec quequin chui, cac nebi. <sup>43</sup> Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic — quepanédash Petedo Codnedion shubun iccuededquido tantiamequin chiec.

*Isadaidpembo Nuquin Papan aton Mayan meniaid*

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abëd tabadneshun aton Mayan menepanédash. <sup>45-46</sup> Aden meniac isadaidpembo nëbi Esuquidistu tantiaquido yanshun abi onquiacmaidënquo utsin onqueten onquequin Nuquin Papa chiec cuëdëmpanédash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac — quepanédash isadaidbo Petedobëd cho-choboedo.

<sup>47</sup> Adoquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic?  
<sup>48</sup> Aid, acten mentoameta —capanédash Petedon.

Aden acten mentoaqui: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanédash.

## 11

*Isadaidbo Petedon ambi naid chiaid*

<sup>1</sup> Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bédamboen tantiash Esuquidistu tantiaquido yanosh, quequin chuipanëdash. Anoshon chuibëtsenec Edusaden yacnotsen choshon adomboembidi chuioapanëdash. <sup>2</sup> Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpanëdash. Aden cainubic Petedo choacsho isash <sup>3</sup> comapenec onquecuededec: —Isadaidpembo shui dëbid dëtemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu — quepanëdash Edusaden yacno tabadquido.

<sup>4</sup> Adoquien Petedon nadopanëdash: —Aidobëd ëbi tabadboed chuibanu. Tantiata. <sup>5</sup> Ope yacnoësh Nuquin Papa chiec onquequin ushacimboen naden ispombi. Abuc posonianec ëbi yacmi dabidiete dapabiequid dënëshbudcuenaïd budposh. <sup>6</sup> Aidënquio nidaidën capuquid tachidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaïd icposh. <sup>7</sup> Adquid icsho isnubi: ‘Nidtochon cuesuneshun pe,’ caposhi. <sup>8</sup> Adsho tantiashun: ‘Aidtedi ëmbi petemaïd tauiquin mibi shëdmetemaïdquio nec. Adquid pesambo nebi, Icbo,’ capombi. <sup>9</sup> Adoquien abucuësh padpidec onquequin: ‘Nuquin Papan bédambo icmiaïd icsambo iquec cainda,’ caposhi. <sup>10</sup> Adomboembidi abentsëc chotsëcnuc tabëcaïdo abuc buanshun padpiden budmeshun adembidi chuishun buanshun abitedi abuc puduedmeoaposh. <sup>11</sup> Abuc buanoabombic dada abentsëc chotsec Sesadeya caid yacnoësh choquido shubu shëcuë cuëmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobëdi cacuidenquio yec nidtan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. <sup>13</sup> Puduedacsho isash Codnedio: ‘Nuquin Papan chomiaïdën ambi uaid mayan bédan naden chuiposhi: Simon cuënsymbic Petedo caid Ope yacno tabadeque. Aid bedmenuen mimbi namiaïdo nidmeta. <sup>14</sup> Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bédan chuiposhi,’ quequin Codnedion chuioaposhi.

<sup>15</sup> “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. <sup>16</sup> Aden meniacsho isun Nuquin Icbo Esuquidistun chiondaïd ëmbembi tantiatsëcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaïd mibi iquendac, quequin chuipondash Nuquin Icbo Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chiec.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaïd ënsho isun

Nuquin Papan aidotsen abëd icquid icmeoapac —quepanëdash Nuquin Papan naid chiec.

*Antioquiya yacnoshomba Esus tantiaquido iccuededaid*

<sup>19</sup> Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushë quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidbouidi Esuquidistu chuibanpanëdash. <sup>20</sup> Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibanpanëdash. <sup>21</sup> Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

<sup>22</sup> Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. <sup>23</sup> Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantia —quepanëdash Bednabe. <sup>24</sup> Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanëdash.

<sup>25</sup> Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aidbëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpañdash.

<sup>27</sup> Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanëdash. <sup>28</sup> Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash. <sup>29</sup> Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. <sup>30</sup> Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenushun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

## 12

*Acobo cuesunaidbēdta Petedo quēnēn nauedaid Nuquin Papan puduemaiad*

<sup>1</sup> Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash. <sup>2</sup> Aido quēnēn nauedmeshun Esuquidistun ēbi chuibeneta caid abēd capucueboed Acobo cuēmēdquid chēshten cuesunemepanēdash. Acobon utsimbo Esuquidistun ēbi chuibeneta caid abēd capucueboed utsi Uan nepanēdash. <sup>3</sup> Adoac, Acobo cuesuniosh, quesho tantiasish isadaidbo utsibo, Esuquidistu tantiesabo: —Bēdamboen Edodesēn naosh —quepanēdash aido. Adec onquesho tantiasish Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. <sup>4</sup> Aden quēnēn nauedmeshun Petedo cuenushe qeshun sondado 4ted quēnēn nuntan tabadmashun pan nami uambocquid petequid tantiaid ushētedi naimēdambi ambi naid icsa Petedo chuimenuequin Edodesēn caimpanēdash. Adnubien quēnēn nuntanshun Petedobēdta mētaniaid sondado daēd uenubi utsi daēdshun shēcūē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcūnubi badiadnuc isboedo choapanēdash. Adecbidi isboed utsibo inchēshtëmbi padpiden isec choapanēdash. <sup>5</sup> Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

<sup>6</sup> Adshumbic, Badiadshun Petedo bēmembali, quequin Edodesēn tantianubi aid inchēshtëmbi Petedo bucun mētaniacchobi ushnubi <sup>7</sup> Nuquin Icbon chomiaid, ambi uaid mayan bēda, nibēdquiocboedi Petedon dayun choan quēnēn nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccud-quec shocosh bucu mētaniaid mēchiquidpanēdash. <sup>8</sup> Adtanquimbien Nuquin Papan uaid mayan bēdan: —Chinēshtëtanec tapucudta —cac Petedo chinēshtëtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho <sup>9</sup> Nuquin Papan uaid mayan bēda nidsho isac bimboecquin abimbo tantienquocquin Petedon tsibanampanēdash. <sup>10</sup> Adec nidquimbi sondado abēdta mētaniaidēn tantienquio icnubi datanshun shēcūē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcūē abembali shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampānēdash. <sup>11</sup> Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. <sup>12</sup> Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu

tantiaquid dadpen iccuededec Nuquin Papa chiec onquepanēdash. <sup>13</sup> Adnubien choshon Petedon shēcuē tosh-toshcasha tantiash chido yua Doda cuēmēdquid isnuec nidtopanēdash. <sup>14</sup> Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec aubidi titinguec: —Petedo shēcuē yacno choash nidec —quequin iccuededquido chuituidpanēdash.

<sup>15</sup> Adsho Nuquin Papa chiec iccuededquidon abimbo tantienquiocquin: —Muequi mihi nec. Aidida ispash neba —quepanēdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesā.

<sup>16</sup> Adnubi padpiden Petedon tosh-toshcasha shēcnequin isash: —¡Tso! Abimbo caic —quecuededpanēdash.

<sup>17</sup> Adnubien mēdante uic-uiccaic Petedo: —Onquenquio yec tabadquin tantiata. Ēbi nashunquin Nuquin Icbon naboed chuibanu —quepanēdash Petedo abi quēnēn nauedacnoshon Nuquin Papan puduemaiid chuibanec. Aden chiash: —Ēbi puduemaiid Esuquidistun utsi, Acobobēdta Esus tantiaquid utsibo chuitanta —quianec puduenanec utsi yacno Petedo nidpanēdash.

<sup>18</sup> Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēdta mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac <sup>19</sup> Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

### *Edodes unēsaid*

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash. <sup>20</sup> Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquido Edodesbēd chushcananquido icboedi padenquio yanec tabadpanēdash. Adec chushcananquio yec tabadquin, Sesadeya yacno Edodes choash tabadosh, qesho tantiash Edodesēn yua Bēdasto cuēmēdquidbēd onquenuec cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquio iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuiopanēdash. <sup>21</sup> Aden adomboembidi Bēdaston chuiasho tantiashun Edodesēn: —Ēmbi chiacpadēn cho-choata, quiosh Edodes, quequin chuita —cac cho-choquido Bēdaston chuiopanēdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuec tsadten abuc tsadtoash onquec taēpanēdash. <sup>22</sup> Aid onquesho tantiash: —Nidaidēnshun tishaid onquaiidpenquio nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash. <sup>23</sup> Aden chuisho tantiash, Mimbimbo Nuquin Papa caidpenquio nebique. Aidi abia yampid abentsēcquiobi iqueque. Aiduidi tantiata, quequin

chuitiadquidëmbi chienquoio icsho tantiashun Nuquin Papan chomi-aidën ambi uaid mayan bëdan daicsa uac chichan dadpen yanec Edodes badedi unëspanëdash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanëdash.

<sup>25</sup> Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebëdta Saudo meni- ac buanec Edusaden yacno choshon anocquido Esuquidistu tantiaquido menetanashic auëshquoio puduanec Antioquiya yacno nidoapanëdash. Aidobëdi Uan cashumbic Madcos caid nidpanëdash.

## 13

### *Saudobëdtabi Bednabe nidmiaid*

<sup>1</sup> Adashic, Esuquidistu tantiaquid utsi-utsiec Nuquin Papan yuec-quoio icshun nanun chiaid chuiquido Antioquiya caid yacno tabad-nubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsu-sio ðapa, Edodesën shubun icquid icboedi, Manain cuëmëdquid; ut-sibic, Saudo cuëmëdquid. <sup>2</sup> Aidedishun Esuquidistuidi tantianuen buna mëmunsho Nuquin Papan Mayanën: —Saudobëdta Bednaben aid daëdshun ëmbi chuibocpaden ma napanuna —capanëdash. <sup>3</sup> Adoquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

### *Chipide yacnoshon Esuquidistu chuibanaid*

<sup>4-5</sup> Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquoio nidaid nacrëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuedëdacno choash puduedshun Nuquin Papan chiaid dada uamiampid Saudon Bednabebëdta chuibanpanëdash. <sup>6</sup> Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacbimboec, Nuquin Papan yuecquoio icshun nanun chiaid chuiquidquoio nebi, quequin muaquin chuipanëdash Badesusën. <sup>7</sup> Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquoio Paudu cuëmëdquid icpanëdash. Aidi tantiaquiono, quec tabadquin, Isedquido chosh, qesho tantiash, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. <sup>8</sup> Yuedac Pabodon Esuquidistu chuibanpanëdash. Saudo quequin isadaidbon cuëmbi Pabado quequin isadaidpembon cuëmpañdash. Aden Pabodon Esuquidistu chuibansho tantiec tsusio tsadsho isun

Badesusën tantiamenquiocnuen utsi uain chuiopanëdash. Ambi ompoaid ismianesa Badesus icsho Edimus cuëmpanëdash. <sup>9</sup> Aden utsi uain chuisho tantiasun Nuquin Papan Mayanën tantiamiac Edimus bëisequi Pabado: <sup>10</sup>—Satanasën bacuë yec bëdamboen naidbëda bëdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanegue. Tantia. <sup>11</sup> Nëbi con Icbon mibi mëyanquin bëshu uaindac. Ushë chënquesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudac bimboec yanash: —¿Tsuntsimbini mëdinshun buampeba? —quequin nibëdacno mishquin uëmbampanëdash. <sup>12</sup> Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudu cuëmëdquid Esuquidistu tantiaquid yampanëdash.

*Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid*

<sup>13</sup> Adashic, Chipide yacnoësh puduanec nidaid Pampidia caid yacno Pabadobëd icquido canon potepanëdash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid <sup>14</sup> isbidanec nidaid Pisidia caid yacno shubu dadpen icquid Antioquiya yacno chopanëdash. <sup>15</sup> Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

<sup>16</sup> Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmi-aidën tishmiaid caidaido Equipito yacnoshon buanubi <sup>18</sup> tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. <sup>19</sup> Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. <sup>21</sup> Aidi isadaidbo chuiquid icnubic,

Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. <sup>22</sup> Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiec.

<sup>23</sup> Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. <sup>24</sup> Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. <sup>25</sup> Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanëdash Uan acten mentoanquid —quepanëdash Pabado.

<sup>26</sup> Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash. <sup>27</sup> Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. <sup>28</sup> Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. <sup>29</sup> Adoaquin Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin ambi shëcuë uain nacnenaid chucanquio Osen Esus nauedpanëdash. <sup>30</sup> Adoacsho Nuquin Papan Esuquidistu uincuemiatic <sup>31</sup> capusho Cadidia yacnoësh Edusaden yacno abëd capucuenoedon aidi isbempanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

<sup>32</sup> Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi <sup>33</sup> Nuquin Papan uincuemiaticsho nuqui isonaidaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nëbi ëmbi uincuemiaqui ëmbi chiactedi mimbi naimbudoc.

Adosho isun ëbipadquiocnoc chuiquid dapa mibi icmembi.’

Aden ëndenquimboshë aton mado tantiaquin Nuquin Papan chiampic. <sup>34</sup> Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.



‘Dabid chiampicpadembi mibi icsaisa icsho ěmbi bĕdamboen isaid mibi nec, mado,’  
quequin Nuquin Papan dada uamepampic. <sup>35</sup> Ambi dada uamiampid utsi nad iquec:

‘Icsaisa icsho aton nami chodquesa icmenuna,’  
quequin Nuquin Papan chiampic.

<sup>36</sup> “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unĕsacsho isun aton mĕdimbon nami chodquiacno Dabid chococac aidĕn namitsen chodquepampic. <sup>37</sup> Nuquin Papan uincuemetequidĕn namien chodquesa icpanĕdash. <sup>38</sup> Aidi icsainquiocquid yec ĕbitedi icsaid bedshunash abided cuidadpanĕdash. <sup>39</sup> Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesĕn natiapimbo iquec. Aden ambi chiacpaden natiapimbo yec, Nuquin Papan bĕdamboen isaid nebi, quetiapimbo icboedĕmbi, Matses icsaquid icsho cuidnushe quiaash abided cuidadec Esus unĕspanĕdash, quequin tantiaasho, Esuspadquid icsaisa Nuquin Papan nuqui isec. <sup>40</sup> Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

<sup>41</sup> ‘Ĕmbi ĕndenquimboshĕ dada uamiampicpadembi adquid chomembi. Ĕmbi chomiaid isquidon chiac mimbi tantienquio icpec. Adquid yec, Tantiadempambo iquec, quec mamĕnshumĕnquid ĕbĕdi tabadtiapimbo iquendac.

Adquid icmane queshun tantiaquiota’  
—quepanĕdash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoĕsh abĕd choboedobĕd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanĕdash iccuededquid utsibo Pabado chiec. <sup>43</sup> Aden chianec Pabadobĕd Bednabe nidsho isun isadaidbo utsin-utsinquiembĕdtan isadaidpembo isadaidbopadquid icnuequid utsin-utsinquien tsibanampanĕdash. Aden abi tsibanansho isash: —Nuquin Papan bĕdamboen isaid yec bĕdamboec tabadta —quepanĕdash Pabado Bednabebĕd.

<sup>44</sup> Adashic, chonoadtemaid ushĕ icnuc Nuquin Papan chiaid tantianuec Antioquiya yacnocquid dadpen iccuededoapanĕdash. <sup>45</sup> Dadpen iccuededsho isash isadaidbo tsusiobo: Ĕmbi chuibanansho tantianuec aidtedi choenquio iccosh, quequin tantiec nĕishpanĕdash. Adec nĕishash: —Mimbi Nuquin Papan chiaid icsamboen chuibanec —quepanĕdash Pabado caic.

<sup>46</sup> Adoaquien, dacuĕdenquio yec Pabadobĕd Bednabe: —Mibitedi con matses icsho, Nuquin Papan dada uamiampid chuibanu, queboedĕmbi tantiesa icsho isun mibi chuibanenquio iquembi. Mibi tantiesa yec Nuquin Papabĕd tabadte bunesabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tantiamioshibique. Tantia. Chuinu.

“Isadaidpembo ĕmbi chiaid chuibanquid mibi icmembi ma nidaidtedi yacno ĕbi tantiaquido ĕbi yacno puduedquid ma icpanuna,”  
quequin chioshi —quepanĕdash Pabado abi chieshĕnquido isadaidbo Nuquin Papan dada uamiampicpaden chiec.

<sup>48</sup> Adsho tantiash isadaidpembo: —jPadtec! Nuquin Papan chiaid bédamboshë iquec —quecuededpanédash. Adoaquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanédash.

<sup>49</sup> Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanédash. <sup>50</sup> Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantankuin ashunquio nidmepanédash. <sup>51</sup> Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanédash. <sup>52</sup> Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanédash. Adembidi aidtedi aton Mayan Nuquin Papan menepanédash.

## 14

### *Iconio yacno*

<sup>1</sup> Adashic, Pabadobëd icquido Iconio yacno choash tabadpanédash. Ambo tabadec Nuquin Papan chiaid chuibante shubu yacno nidash puduedpanédash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanédash. <sup>2</sup> Aido Esuquidistu tantiaquid yanubi isadaidbo utsibo Pabadon chuibanaid tantiatipimbo icquin Esuquidistu tantiaquido muaquin chuiquin isadaidpembo utsibo nëishmepanédash. <sup>3</sup> Aido nëishmiambi Iconio yacno yuec tabadquin Pabadon Bednabebëdta dacuëdenquiocquin Esuquidistu chuibampanédash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanédash. <sup>4</sup> Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanédash. <sup>5</sup> Aden chuishumbic, Pabadobëdta Bednabe cuestankuin cuënoten sesenuequin Esus tantiesabo isadaidpembon aton tsusio dapabobëdta cainubi adembidi isadaidbon aton tsusio dapabobëdta cainoapanédash. <sup>6-7</sup> Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanédash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboebidi Esuquidistu chuibampanédash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanédash.

### *Disteda yacno*

<sup>8</sup> Disteda yacno tabadnubien anocquid taicsaidi anin tishaid caputiapimbo icpanédash. <sup>9</sup> Aidi Pabadon Esuquidistu chuibansho tantiec,

Esuquidistu ëbi bédamepatsiash, quec otacquo tsadpanédash. Aden captiapimbocquidën tantiacpadomboen Nuquin Papan Pabadotsen tantiamiac <sup>10</sup> captiapimbocquid comapenen bëisquin: —Nidto —Pabodon cac badedi nidtoash taicsaid bédanash capupanédash.

<sup>11</sup> Aden taicsaid bédamiac capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanédash.

<sup>12</sup> Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuëmpañédash Disteda yacnocquidon. <sup>13</sup> Aden cuënsho tantiaishun baca hënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacenaid Upited caid dayun uaquido baca cuesunenu, quepanédash.

<sup>14</sup> Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanquio nidash Pabado béd Bednabe comapenec nadpanédash: <sup>15</sup> —Ëbi daëdi mibipadquid matsesquio nebi. Mimbi tantiacmaid nebique. Baca cuesunenda. Chiaid bëda mibitedi naden chuineuc chobi. Nuquin Papa caid abentsëcquiobi iquec. Aidëmbi abubëdta nidaid uashumbic aidënquiocquidtedi uabanampidquio neque. Aiduidtsëqui tantiaquin ambi uaidbimboecnuc matsesën nacenaid tantiesa icta. <sup>16</sup> Ëndenquimbo Nuquin Papan, Adoenda, cainquiocnoc matsesën ambi tantiacpaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bédambocquid nebi, quequin ismequin ue secamedenequinc, cuëte bacuëmequinc, nuqui penun tiedën nitsimbeniaid canimequinc caquin Nuquin Papan nac bédamboen nuquitedi pebededec. Aden nabanquin Nuquin Papan, Bédambo iquebi. Cuishon, camiaido nuquitedi nec —quepanédash Pabado béd Bednabe Disteda yacnocquido chiec. <sup>18</sup> Aden chuido-chuidoiqui baca cuesunenquio icpanédash Disteda yacnocquidon.

<sup>19</sup> Adnubien Antioquiya caid yacnocquidobéd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nëishcuededpanédash. Adec nëishcuededshun Pabado cuënoten se-siash, Unësosh, queshun nimbanquin buanshun shubu nibëdacno Pabado netampanédash. <sup>20</sup> Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobéd Disteda yacno choec shubun puduedpanédash. Badiadash puduanec shubu dadpen icquid Dedbe caid yacno Pabado béd Bednabe nidoapanédash.

*Nidaid Sidia caid shubu dadpen icquid Antioquiya yacno choaid*

<sup>21</sup> Adec Dedbe yacno choash tabadquimbi Pabado bédtan Bednaben chuibanac Esuquidistu tantiaquid dadpen yampanédash. Auëshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanédash. <sup>22-24</sup> Aden chuibanshumbic: —Natiastianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nëbi dayacquo yec tabad —capanédash Pabodon. Adotanquin ambia Esus tantiaquid utsi-utsien Pabado bédtan Bednaben: —Bédamboec tabadquin ismequin Esuquidistu tantiaquid utsibo

chuihan —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmunquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanoapanēdash. Adecbidi Antioquiya yacno choashun adomboembidi chuibanoapanēdash. Antioquiya yacnoēsh puduanec nidec nidaid Pisidia caid datambēsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. <sup>26</sup> Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. <sup>27</sup> Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibampanēdash. Isadaidpembro dadpen Esuquidistu tantiaquid yamposh, quequin chuiapanēdash. <sup>28</sup> Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

## 15

### *Edusaden yacnocquido iccuededec tantianu quiaid*

<sup>1</sup> Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuiapanēdash. <sup>2</sup> Adnubic Pabadobēd Bednabe Antioquiya yacno choash tabadquin aidon chiaid tantias: —Nuquin Papan aden chiambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiasun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo chuioaquin aido nidmepanēdash. <sup>3</sup> Adoac Antioquiya yacnoēsh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuiapanēdash. Adsho tantias: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. <sup>4</sup> Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanoapanēdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanēdash.

<sup>6</sup> Adoaquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quias onquecuededpanēdash.

<sup>7</sup> Adec yuec onquecuededash nidtoash Petedo nadec onquepanēdash: — Chuinu. Tantiata. Ĕnden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ěmbi chuiasho mibitedishun tantiondac. <sup>8</sup> Ĕmbi isadaidpembo Esuquidistu chiac abi tantiaquid aido yampondash. Matsesĕn tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniactpadembi isadaidpembo meneoapondash. <sup>9</sup> Utsibo nec, quenquiocquin aidotsen tantiamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? <sup>11</sup> Padenquio icnuna. Matsesedi icsaquid icsho cuidnushe quiash abided cuidadac, quequin tantiaquiec unĕsash abĕdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

<sup>12</sup> Aden Petedon chuiquin ěnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanēdash. Adembidi Bednaben chuiopanēdash. <sup>13</sup> Aid daĕdshun chuibanquin nainan Esusĕn utsi Acobo, Esus tantiaquido tsusio dapa, nadpanēdash: —Ĕbitsen chuinu. Tantiata. <sup>14</sup> Isadaidpembo tantiaquin aido Esus chuibanta, quequin Nuquin Papan chiactpaden Simon Petedon chiac isadaidpembo Esus tantiaquid yansho Nuquin Papan aitedi nuquibĕdta aton matses icmiac. <sup>15</sup> Adomboembidi Nuquin Papan chuimiaidĕn dada uampid nad iqueque. Tantia. Chuinu:

<sup>16</sup> “Isadaidbobĕd yuec tabadenquiochoedi padpidec choash aidobĕd icoaindabi.

Dabid padon tsyuecquido isadenquiochoedi isadcuenendac

<sup>17</sup> ma aton Icho matsesedishun istuidpanuna;

ma adembidi isadaidpembon ěmbi cuĕnaidon aidbidi istuidpanuna,

<sup>18</sup> quec Nuquin Icho ambi ĕnden tantiampicpadomboen chiaid nec”

—quiashic abi Acobo onquec: <sup>19</sup> —Nuquin Papan chiampid tantiaquin nuquin tsusedpabon naden nata quequin chiactpaden nata isadaidpembo cainquio ictiad. <sup>20</sup> Nĕiduidtsĕqui dada uaqin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsĕqui chudta; adembidi, min bĕnĕuidtsĕqui chudmeta; adembidi, Nĕish tĕtaniaid intachobi codocaid penda, quequin isadaidpembo chuibanuna. <sup>21</sup> Adec Moisesĕn dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

<sup>22</sup> Adashic Esuquidistu tantiaquido iccuededec onquec ĕnĕdshun ěmbi dada uaid Antioquiya yacno buanuec Edusaden yacnocquid daĕd nidta, quequin Pabadobĕdta Bednabe nidmepanēdash. Abentsĕc Udas cashumbic Badsabas cuĕnaid; utsibic, Sidas cuĕmĕdquid. Aid daĕdi Nuquin Papan chiaid comapenen tantiaquidquio icpanēdash. <sup>23</sup> Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ĕbi chuibeneta caidobĕdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobĕdta

nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. <sup>24</sup> Ēbēd icquido nēuēshquio nīdash mibi yacno choash puduedshun, Isadaid-bon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. <sup>25</sup> Aden chuisho tantiashun nēmbocquidobēd iccuededec onquequin abentsēcshun tantiachimboen dada uaombi. Aidi nēmbocquid daēdi Pabado Bednabebēdta buantan, quequin chiemi. <sup>26</sup> Unēsmane, quenquio yec capucuenequin Esuquidistu chuibanquido Pabadobēd Bednabe nec. <sup>27</sup> Adquid aid daēd icsho isun aid chedobēdta Udas Sidas chedo mibi yacno nidmembali. Adoac ēmbi dada uacpaden ma mibitedi chuiopanuna abimbo iquec camenuen. <sup>28</sup> Nuquin Papan Mayanēn ēbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nēidtedtsēqui ēbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidoudtsēqui chudta; adembidi, min bēnēuidtsēqui chudmeta; adembidi, mimi nēish cuesuniaid intacchobi codocashun penda. Adoac ēmbi chiacpaden nabanec mibi bēdambo icpec. Padi aitedtsēqui chiemi.”

<sup>30</sup> Aden dada uaqin nainshun ambi nidan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash. <sup>31</sup> Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

<sup>32</sup> Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamapanēdash. Adomboembidi chuibanquin Sidasēn tantiamapanēdash. <sup>33</sup> Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidan, mibi caimbi —quepanēdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabadon Bednabe chedobēdta Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanapanēdash.

*Pabadobēd Bednabe cuēshēdaid*

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquiibi nidnu. Nid —quepanēdash.

<sup>37</sup> Adoaquien: —Ma Madcosbidi nidoanu. Chuita —quepanēdash Bednabe.

<sup>38</sup> Adoaquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

<sup>39</sup> Adoaquien Bednabe aden tantienquio yec Pabadobēd comapenec onquiash Madcosbēd cano antabēdtoanec Chipide yacno nidoapanēdash. <sup>40</sup> Adnubien Pabado Sidas abēd Edusaden yacnoēsh choeboed caic: —Nuquiibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabadobēd Sidas nidpanēdash. <sup>41</sup> Adanec nidaid

Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibampanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquiec iccuededacnomboec puduedcuenequin Pabadon chuibanoapanēdash.

## 16

### *Pabadobēd Timoteyo nidaid*

<sup>1</sup> Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. <sup>2</sup> Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuioapanēdash. <sup>3</sup> Aden dadpeshun chuisho tantias Timoteyo buante bumpanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash. <sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuioapanēdash. <sup>5</sup> Adembidi Nuquin Papan chiaid chiac ēnden Esuquidistu tantiaquidon tantiabenquiocnobi utsi dadpen Esus tantiaquid yanoapanēdash.

### *Ushquin Masedonia yacnocquid Pabadon isaid*

<sup>6</sup> Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadaisia caidbidi datambidanec <sup>7</sup> nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. <sup>8</sup> Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. <sup>9</sup> Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. <sup>10</sup> Aden tantias: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

### *Didia cuēmēdquid Esuquidistu tantiaquid yanaid*

<sup>11</sup> Adanec Todoas yacnoēsh puduanec cano antabēdtoanec cuebi nidequi acte nēnantanquio nidaid nacnēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec <sup>12</sup> nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash. <sup>14</sup> Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibi-padquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

*Pabadobëdta Sidas quënën nauedaid*

<sup>16</sup> Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash. <sup>17</sup> Pabadobëd icquido bëquedtuidshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec —quec <sup>18</sup> badiadquidën-badiadquidënquiecomapenec cuëdpondash.

Adec cuëdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidënquio dapudenta —cac badedquio mayan icsa dapuduempondash. <sup>19</sup> Aden dapuduemiatic chido bëdanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiasn nëishun Pabadobëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsho isun chido yuaquidon Pabadobëdta Sidas ambo buampondash. <sup>20-21</sup> Aden abi chuiquid tsadacno bëash: —Nëid dada daëdi isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid ëbitedishun natemaid icnuc matsestedi chushquecuededosh —quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bëquidon chiacpadombon aidontsen chuioac abi chuiquido: —Bëboedon dashcute chicshun cueshcaten cuesta —cac sondadon cuespondash. <sup>23</sup> Aden comapenen cuesmeshun buameshun quënën nauedmeshun ambi quënën nauedaid ista caid chuiquin Pidipos yacnocquido chuiquidon: —Puduenanec cuenushe queshun nëid daëdi bëdamboen isquiota —capondash. <sup>24</sup> Adsho tantiasnun ambi ista caidën Pabadobëdta Sidas nënantanquio quënën nauedquin tsadunshun cuate shëcuë uaidën tausunash puduentanquin quënë bëdamboen bëtashpanëdash.

<sup>25</sup> Aden bëtashash aton shubu dayunquiocquidën puduedambic inchëshpotsembo Pabadobëd Sidas Nuquin Papa chiec onqueapanëdash. Adecbidi Nuquin Papan naid chiec cuëdëmpanëdash. Adec cuëdësho utsibon tantianubi <sup>26</sup> comapenec nidaid ishcutnubi mëtaniaidtedi



mëchiquidpanëdash. <sup>27</sup> Adnubien ista caid isec tsadboedi ushtanec isucunquin isac shëcuë bêtashaid ënden shëcniac. Adsho isash ista caid: —Quënën nauedaido puduen-puduempacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaïd chicsho <sup>28</sup> istanquin Pabadon: —Quënën nauedaidtedi nëmbo iquebique. Seshuniadenda —quequin comapenen cuëmpañdash.

<sup>29</sup> Adoquien, seshuniadtsemboedën: —Tabote bec cho —cac ambi namiaidën tabote bedtanquin meniäc tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpanëdash. Mibi daëdi bëdambocquid icnubi adquidpenquio nebi, quequin tantiaquin ismepañdash. <sup>30</sup> Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icho yacno puduednush mitsipadequibi ëbi icsaid cuidadpeque? Chui. Tiantianu —quepañdash seshuniadtsemboed.

<sup>31</sup> Adoquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unësash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icho nec, quequin abimbo tantia <sup>32</sup> —qeshumbic seshuniadtsemboedbëd icquido Èsus tantiamenuen Nuquin Ichon chiaïd Pabadon chuipañdash.

<sup>33</sup> Adoqui Pabadobëdta Sidas cuesaid chiuë acten bëpañshunquin nainacsho aton shubun icquido Esuquidistu tantiaquido yansho isun aïtedi Pabadobëdta Sidasën acten mentobampañdash. <sup>34</sup> Aden mentobanaqui aton shubun yuedshun pemepañdash. Adashic, Nuquin Papan chiaïd abimbo tantiaquid yec ambi bëdambo icmiaïdo seshuniadtsemboedbëd icquido icpañdash.

<sup>35</sup> Adashic, badiadash Pidipos yacnoquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiopanëdash. <sup>36</sup> Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiäidën chioshibique. Dacuëdenquio yec nid —capanëdash Pabadobëdta Sidas chuiquin.

<sup>37</sup> Adoquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caimbi. Ëbi daëdi puduemenuec ma chuiquid dapabo abibi chopanuna —quepañdash.

<sup>38</sup> Aden chiac puduenanec nidequi abi chuiquido yacno choshon, Mimi quënën nauedmeboed daëd domanobo nec, quequin chuisho tantiaquid chuiquid dapabo comapenec dacuëdcuededpañdash. <sup>39</sup> Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh nïdtañ —capanëdash Pabadobëdta Sidas chuiquin. <sup>40</sup> Adoquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuenquin Pabadon chuibampañdash. Aïdo chuïbidanec Pabadobëd icquido nidoapanëdash.

## 17

*Tesadonica caid yacnocquido isadaidbo nëishcuededaid*

<sup>1</sup> Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobëd icquido tabadpanëdash. <sup>2-3</sup> Ambo tabadec isadaidbo iccuededte badiadën abi nidteniacpadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibampanëdash. Nuqui icsaid bedshunash abided cuidadec Esuquidistu unësaid ambi uin-cuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabadon. Sabado 3ted matamequin adomboen chuibampanëdash. <sup>4</sup> Aden chuibanaqui Esus tantiaquid utsi-utiec yampanëdash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

<sup>5</sup> Aden Pabadon chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushquecuededpanëdash. Adec chushquec nidequi Pabadobëdta Sidas bednuec Ason cuëmëdquidën shubuno puduedec nidpanëdash. <sup>6</sup> Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chüitemaid chuibanquido nëmbo <sup>7</sup> choacsho Asonën aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec —quepanëdash Pabado chieshënquido abi chuiquido chiec.

<sup>8</sup> Aden, Ancanquid utsi iquec, quequin Pabadobëdta Sidasën chiec, qesho tantiash chuiquid dapabo iccuededquidobëd comapenec chushquecuededpanëdash. <sup>9</sup> Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoquien piucquid meniac bedshun: —Min shubuno nidtan —cac nidanepanëdash Asombëd icquido.

*Bedeya yacnotsen tabadaid*

<sup>10</sup> Adshumbic bednushe qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash. <sup>11</sup> Anoshontsen, Esus Nuquin Papan Chomiaid

Quidistu nec, quequin tantiamenuen Nuquin Papan ënden dada uami-ampid Pabado chuibanoasho tantiashun bëdambocquid icquin, Abimbobida chuibanoshe. Isbono, quequin Nuquin Papan chiampid isbanisbampanëdash Bedeya yacnocquidon. <sup>12</sup> Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adechidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

<sup>13</sup> Adnubien, Bedeya yacnoshontsen Pabado chuibanec, qesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuededpanëdash. <sup>14</sup> Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidashëd Timoteyo nidenquio yec Bedeya yacno tabadnubien <sup>15</sup> Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoabi —qesho tantiashun Pabado:

—Mibi yacno choash, Badedquio Atenas yacno chota, quiosh Pabado, quequin Sidashëdta Timoteyo chuita —capanëdash. Aden Pabado chiquien Bedeya yacnocquido abi yacno nidoapanëdash.

*Atenas yacnotsen Pabado tabadaid*

<sup>16</sup> Abia bëyucanquido Bedeya yacno nidambi Atenas yacno Pabado tabadquin, Sidashëd Timoteyo choec, qeshun cainec capuquimbi Atenas yacnocquidon nacenaid isbampanëdash. Aidon Nuquin Papan uaidbimboecnuc nacenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquio yampanëdash. <sup>17</sup> Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabado chuibampanëdash. Adembidi anocquidon piucquid bednuen aton na sambanshun ismiacno nidshun adomboembidi Pabado chuibanoapanëdash. Isadaidbobëd onquequin Esuquidistu Pabado chuipanëdash. Adembidi isadaidpembobëd onquequin Esuquidistu chuioapanëdash. <sup>18</sup> Anoshon chuibansho tantiash epicudeyo cuëmëdquidën chuinëdacaden tantiaquido Pabado bëd onquepanëdash. Adembidi tantiash estoico cuëmëdquidën chuinëdacaden tantiaquido Pabado bëd onquepanëdash. Aido Pabado bëd onquequin Pabado Esus chuisho tantienquio yec: —¿Atodain comapenec onquequin nëid dadan chuipash? —quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabado Esuquidistu unësash uincuenaid chuisho tantiash adpanëdash. <sup>19-20</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquio mimbi chuibaneque? Tantianu. Chuiban —quepanëdash abi bëquido caic. <sup>21</sup> Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën badiadquidënquiec utsin-utsinquien ambi tantiacpaden chuibansho tantianuec iccuededpanëdash.

22 Aden mimbi tantiacpaden chuibanta caquien nënantanquio nidtoshon naden Pabadon chuibampanēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiambi. 23 Capucenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

24 “Ēmbi Nuquin Papa cain cuēnaid nidaidbēdtabi abu uashumbic aidēnquocquidtedi uaquidquio nec. Abitedi uaquidquio yec abitedishun icombo aidi nec. Aidi tabadmenuequin matsesēn shubu uashunaidēn tabadesa nec. 25 Aidi abitedishun Icho icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadecec ēbitedi nēmbobi tabadebi. Aidēn tantiacpadecec ēbitedi tiboquebi. Aidēn tantiacpaden ēbitedishun bedbanoaimbi. 26 Aidēmbi bēyuc dada uampidēn tsyuecquido ēbitedi nec. Aid bēyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac. Adecbidi, inchēshtanec badiadoaic. Adecbidi, ushē nidash choaic. 27 Aidēmbi naden tantiec: Matses tantiaquin abitedi uaqin nashundenmbi. Aden ambi matses abi tantiaquin nabanaid isash matses, ¿Tsuntsin nabanaid nepec? queshun ēbi tantiaquin Icho ēbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. 28 Aidēn nac tiboquequid ēbitedi nebi. Aidēn nac capuquidbidi ēbitedi nebi. Adembidi min matsesēn dada uampid adomboen chiaid nad iqueque. Tantia. Chuinu: Nuquin Papan bacuēbo ēbitedi nebi, quequin min mēdimbon chuipanēdash.

29 “Nuquin Papan bacuēbo ēbitedi iquec tiboquequid icquin matsesēn nacnenaid tiboquesa papa cain cuēnenquioctiadquidi matses nec. 30 Ēnden matsesēn ambi nacnenaid aden cuēnsho tantiash Nuquin Papa, Chēn. Adoenda, quenquiochoedi nēbi, Mimbi icsamboen tantiaid ēnta, quequin chiec. 31 Matsesēn naid chuibante ushē chonoc matses icsaidbēdta ambi bēdamboen naid chuibanquin Nuquin Papan chomeshun matses icmi-aidēn cuidbanendac. Ambi abipadquid matses icmiaid, Nuquin Papan matsesēn naid chuibanquid icmenu caid unēsacsho isun ambi chiampicpaden nanuequin Nuquin Papan uincuemepondash —quepanēdash Pabado Adeyopaco yacno iccuededquido Esus tantiamenuec.

32 Adec aidi unēsacsho Nuquin Papan uincuemepondash, quequin Pabadon chuisho tantiash utsi-utsiec mamēnshumēnubi utsi-utsiec: —Aidēn chuiboed padpiden tantianuna —quepanēdash. 33 Adoquien, Pabado Adeyopaco caid yacnoēsh nidpanēdash. 34 Adec nidshun yuec ushquin chuisho tantianu quec Pabadobēd iccuededquin utsin-utsinquin padpiden-padpidemboen tantiabededpanēdash. Aden Pabadon chuibanac utsi-utsiec Esuquidistu tantiaquid yampanēdash: Nēidic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

## 18

### *Codinto yacno Pabado tabadaid*

<sup>1</sup> Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. <sup>2</sup> Ambo isadaidbo Aquida cuëmëdquid nidaid Ponto caid yacnoshon tishaid Pabado istuidpanëdash. Isadaidbotedi nidaid Itadia yacnoësh nidan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. <sup>3</sup> Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabado shubumpi nacnempanëdash. <sup>4</sup> Codinto yacno tabadec aton matses isadaidbo iccuedede badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabado chuibanpanëdash.

<sup>5</sup> Ambo tabadnubi Sidasbëd Timoteyo nidaid Masedonia yacnoësh choambic shubumpi nacnenenquiocquin isadaidbo Esuquidistu tantiamenuen Pabado chuibanpanëdash. <sup>6</sup> Adsho, Aid tantiatia, quequin isadaidbon Esuquidistu icsamboen chuisho tantias abidaëd dasiuidaid bëntsecquid chicshun ishacunec Pabado: —Esuquidistu mibitedi chiombi. Aid tantiesa yec unësash Nuquin Papa yacno puduedenquio mibitedi iquendac. Adquid Nuquin Papan cuidquin nësecatequid nendac. Nëbi padpiden mibi chienquio iquemi. Isadaidpembon tantiatias, quequin aido chuibanembi—quepanëdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoësh puduenanec aid dayuntsëqui shubu icquidën Pabado puduedpanëdash. Aid shubu icho Usto cuëmëdquid Nuquin Papa tantiaquid icpanëdash. <sup>8</sup> Uston shubunoshon Esuquidistu Pabado chuibanac Quidispo cuëmëdquid Esuquidistu tantiaquid yampanëdash. Aidi Nuquin Papan chiaid chuibante shubun iccuededquido chuiquid dapa icpanëdash. Aidbëd aton shubun icquidtedi Esuquidistu tantiaquid yampanëdash. Adecbidi Codinto yacnocquid dadpen Esuquidistu tantiaquid yampanëdash. Adsho adquidtedi acten mentobampanëdash.

<sup>9-10</sup> Adashic, yuecash inchëshën Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uaquidquio nebi. Aden dayun uasho ëbi tantiesabon mibi natiametiapimbo iquendac—quepanëdash Pabado caic. <sup>11</sup> Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabado chuidonepanëdash.

<sup>12</sup> Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. <sup>13</sup> Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh—quepanëdash Pabado chieshënkuido Cadion caic.

<sup>14</sup> Adoquien Pabado onquetsenubi Cadiomba onquedopanëdash: —Tantiatia, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatiasibi. <sup>15</sup> Aden chienquio yec, Nëidi mibi onquiaidbëda min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquio

nëid dada nec, mibi queoapec. Aden mimbi chuisho tantiashun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. <sup>16</sup> Aden chuishumbic Cadionën: — Aidededi umanuc puduemeta —cac isadaidbo Pabado bëboedo Cadionën namiaidon puduemepanëdash. <sup>17</sup> Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquo yec otacquo tsadpanëdash.

<sup>18</sup> Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabadon matasmepanëdash. <sup>19</sup> Ambo ushë abentsëc nidmec tabadash cano antabëdtoanec acte dapa potias Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabadon. <sup>20</sup> Aden chuibansho tantiashun: —Adomboembidi chuibanuec ¿ada ëbëd yuec tabadtsia? —iccuededquidon caquien: — Nëbi padenquo iquebi. <sup>21</sup> Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquo puduanec nidequi cano antabëdtopanëdash Pabado.

<sup>22</sup> Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. <sup>23</sup> Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquo nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanopanëdash Pabadon.

<sup>24</sup> Adnubien isadaidbo Apodos cuëmëdquid shubu dadpen icquid Ade candedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. <sup>25</sup> Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. <sup>26</sup> Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanëdash. Aden chuisho tantiash, Èbi yacno isec cho, queshun Aquidan aton shubu yacno huanshun Esuquidistu choaid ambi natiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

<sup>27</sup> Aden Esuquidistu bëdamboen tantiash Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiashun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Èmbi isaid neque. Yuedta, quequin dada uashun, Apodos Epeso yacnocquidon menepanëdash ma

nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bédamboen tantiamenuen chuibanpanédash. <sup>28</sup> Aden chuibanquimbic isadaidbo Esuquidistu tantiesabo icsho isun abéd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibanpanédash.

## 19

### *Epeso yacno Pabado abéd icquido tabadaid*

<sup>1</sup> Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanédash. Ambo choshon Esuquidistu tantiaquido istuidshun: <sup>2</sup> —¿Esuquidistu tantiaquido icshoda Nuquin Papan aton Mayan mibitedi menepanédash? —capanédash Pabaton.

Adoaquien: —Nuquin Papan Mayan iquec, quequin tantiamboccombi —quepanédash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanédash? —quepanédash.

Adoaquien: —Uan padon chiaid tantiaquid icsho acten mentondashi —quepanédash Epeso yacnocquido Pabado chiec.

<sup>4</sup> Adoaquien: —Mibi icsaid ënta, qeshun abimbo tantiaquidtedi acten mentobanquin, Èbi tsibanec choquid Esus tantiaquid icta, quequin Uan padon chuipanédash —quepanédash Pabado Epeso yacnocquido chiec. <sup>5</sup> Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanédash. <sup>6-7</sup> Aden aitedi acten mentoacsho mēdanten Pabaton mamishbanac aid doseted Nuquin Papan aton Mayan menepanédash. Aden meniac abi onquiacmaidēnquin onquec Nuquin Papa chiec cuēdēmpañédash Epeso yacnocquido.

<sup>8</sup> Adashic Nuquin Papan chiaid chuibante shubun puduedshun Pabaton Nuquin Papabéd tabadaid chuibanpanédash. Cuembo tantiamenuquin ushë choaid 3ted nidmequin badiadquidēn-badiadquidēnquien dacuēdenquioquin Nuquin Papan chiaid Pabaton chuibanpanédash. <sup>9</sup> Aden chuisho tantiash pamumēdacbimboec tabadquin, Tantiatiapibi, quequin utsin-utsinquien chieshēmēnquioquin Esuquidistu icsamboen chuipanédash. Aden chiac Esuquidistu tantiaquidobéd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuēmēdquidēn chuibante shubu yacno choshon adomboembidi tantiamenuen matseshéd onquequin Nuquin Papan chiaid chuibanpanédash. <sup>10</sup> Seta daéd matamequin adomboembi chuibanpanédash Pabaton. Aden chuibansho tantiash nidaneshun chiac nidaid Asia caid yacnocquidon tantiapanédash. Adoac isadaidbobéd isadaidpembo Esus tantiaquido yampanédash. <sup>11</sup> Epeso yacno Pabado tabadsho Nuquin Papan nadatiambocquid icmiacsho

<sup>12</sup> Pabaton dada cuēscashun dashcute cuëshë buanshun daicsaid mishbanac bēdampanédash. Adembidi Pabaton dada cuēscabanaidēn nēnquid mishac bēdampanédash. Adembidi pashuaidtsen pamishac bēdanoapanédash. Adembidi mishac mayan icsa dapuduempanédash.

<sup>13</sup> Adnubien mayan icsa dapuduemenuen Pabaton chiacpaden tanquin isadaidbo utsibon: —Esus Pabaton chuiboedēnquido dapuduen

—capanēdash. <sup>14</sup> Pabado tanuequido isadaidbo chuiquid Esqueba cuēmēdquidēn mado 7ted icpanēdash. <sup>15</sup> Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tiantianu. Chui <sup>16</sup> —qeshun nebudquin dashcute ched-chedcapamboen mayan icsan cuesactaniaqui shubu nuntanuēsh puduenanec cuempanēdash Esqueban mado. <sup>17</sup> Adec cuensho isquidon chiac Epeso yacnocquid isadaidbobēd isadaidpembo dacuēdcuededpanēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabeddedpanēdash. <sup>18</sup> Esuquidistu tantiesa icboedi Esuquidistu tantiaquid yanec dacuēdenquio yec Esuquidistu tantiaquido iccuededacno nidshun abi icsaid chuibanpanēdash. <sup>19</sup> Adquid dadpeshun icsamenuen ambi ompoquin naid ismenquiochoedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi taipanēdash. Aden tauiboed menequin piucquid dadpen bedtsiandac, quepanēdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

<sup>21</sup> Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanēdash Pabado. <sup>22</sup> Aden chias Asia caid yacno abi tabadquin Masedonia caid yacno abia Timoteyobēdta Edasto nidmepanēdash Pabadon.

<sup>23</sup> Aid daēdi nidan Epeso yacno tabadquin Esuquidistu Pabadon chuibanaquien tantiesabo nēishpanēdash. <sup>24</sup> Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemiaid menequin piucquid dadpen bedbampānēdash. <sup>25</sup> Aden Esuquidistu tantianu quesa icquin ambi Dianabimboecnuc nacnenta caidobēdta abipadquid Diana nacnemequid utsibo iccuededmeshun Demetedion nadopanēdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. <sup>26</sup> Aden nanubi nidaid utsi yacnoēsh Pabado cuēmēdquid nēmo choshon utsi comapenen chuibanac Epeso yacnocquid dadpembēdta nidaid Asia caid yacnocquid dadpeshun tantiec. Dianabimboecnuc nacnenaaid tiboquesa iquec. Adquid matsesēn tantiaid abimbo ictiapimbo iquec, quequin Pabadon chiec. <sup>27</sup> Aden chiac matses dadpeshun tantias Dianabimboecnuc nacnenquido icsambo iquec, quetsias ěbitedi caic. Adecbidi, Dianabimboecnuc nacnenaaidbēd abi tabadte shubu uashunaid icsambo iquec, queopec. Adecbidi Dianabimboecnuc nacnenaaid tiboquesa icsho matsesēn tantienquio ictiadquidi nec, queopec Pabado. Aden chiac nidaid Asia yacnocquidon dadpeshun Diana tantiaboedombi padenquio yampec. Aidēmbi tantienquio yanshun aaidbimboecnuc nuqui nacnenaaid bedenquio iquendac —quepanēdash Demetedio.

<sup>28</sup> Aden chiac ambi chomeboedtedi, Piucquid ěbi menequin ěmbi nacnenaaid matsesēn padpiden bedenquio ictsiash, quec nēishash: —Epeso yacnocquidon tantiaid Diana bēdambo iquec —quec comapenec cuēdcuededpanēdash. <sup>29</sup> Adec comapenec cuēdcuededsho tantias Epeso yacnocquid utsibo aaidobēd cuēdcuededpanēdash. Adec cuēdcuededquin



nidaid Masedonia caid yacnoësh Pabadobêd choboed Cayobêdta Adistadico bedshun iccuededte shubu yacno cuëdcuededquidon buampanêdash. <sup>30</sup> Aden aid daëd bedshun buansho isquidên chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanêdash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuiopanêdash.

<sup>32</sup> Adnubien cuëdcuededquidon Cayobêdta Adistadico bedshun buansho isash matses dadpen, ¿Atotsieshun aid daëdi bèo? quequin tantienquio yec tabadpanêdash. <sup>33</sup> Adnubien, Nuqui tantiacpadomboen chuitan, quequin isadaidbon Adecandedo cuëmêdquid nênantanquio tsi-cunepanêdash. Aden tsi-cuneguïen nidtoash: —Tantia. Chuïnu —quequin <sup>34</sup> daëdpactsêc chiec onquesho tantiash onqueboedi ênêdash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaidbimboecnuc nacenaid bêdambo iquec —quec baded-badedquïec cuëdcuededpanêdash.

<sup>35</sup> Adec cuëdcuededshobien Epeso yacnocquidon naden nata quequin chiaid dada uaquidên ênêdmenuequin nadopanêdash: —Epeso yacnocquidon tantia. Chuïnu. Diana caidbimboecquid abucuësh paëdaidbimboecnuc nacenaid nuqui comapenen tantiaidbêdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda. <sup>37</sup> Dada daëd mimbi nêmbo bêboed Diana caidên shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. <sup>38</sup> Adenquio icnuc Demetediobêd icquido abi chushquiaid chuïnuec Epeso yacnocquidon naden nata quequin chiaid tantiaquid yacno nidshun <sup>39</sup> mimbi tantiacpaden chuïta cuëdcuededenquiocquin. <sup>40</sup> Comapenec cuëdcuededec quesho tantiash ancanquid dapan Epeso yacnocquido bêdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquio iqueque. Cuëdcuededquido chome, nuqui catsiash. Aden chomiac ¿atotsi nuqui chuïpe? <sup>41</sup> Aidên nuqui chomenushe quiash min shubuno nidaneta —capanêdash Epeso yacnocquidon naden nata quequin chiaid dada uaquidên. Aden chiac Demetediobêd iccuededquido nidanepanêdash.

## 20

*Masedonia yacnocquido isbidanec nidequi Quedesia yacnocquido isbidanec nidaid*

<sup>1</sup> Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bêdamboec tabadta —quianec Epeso yacnoësh puduanuc abêdi nidondabi. <sup>2</sup> Auëshquio puduanec nidquin nidaid Asia caid yacnocquid utsi-utsien chuïbidanec nidaid Quedesia caid yacno choapondash Pabado. <sup>3</sup> Ambo choash ushê abentsêc chotsêcnuc nidmec tabadash: —Nidaid Sidia caid yacno nidnu —quepondash. Adsho tantiashun: —Ambo nidacsho mibi cunesunenuquin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abêd capuquido bÿyucanec nidaid Asia caid yacno nidpondash. Abêd capuquido nêidted icpondash. Nêidic, shubu dadpen icquid Bedeya yacnoësh choquid Sopated cuëmêdquid; utsibo shubu

dadpen icquid Tesadonica yacnoësh choquido Adistadico cuëmédquidbéd Secundo cuëmédquid; utsibic, shubu dadpen icquid Dedbe caid yacnoësh choquid, Cayo cuëmédquid; utsibobi, nidaid Asia yacnoësh choquido: nêidic, Timoteyo cuëmédquid, utsibic Tiquico cuëmédquid, utsibic Tedopimo cuëmédquid. Aidededi icpondash. <sup>5</sup> Aidededi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidededi nidan pan nami uainquioctequid pete ushëtedi tantiec tabadanec Pabadobéd cano antabédtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobéd icquido tabadoapondash.

*Eyutico unësacsho uincuemiaid*

<sup>7</sup> Todoas caid yacno tabadequi dominco ushën Esuquidistu tantiaquidobéd iccuededquin Pabadobéd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquiec. <sup>8</sup> Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nêbi caniaid, Eyutico cuëmédquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësacsho isbededianbien <sup>10</sup> Pabadotsen budquin dayumbudec: —Unësboedi abi tiboquianeque. Shubicuededenda —quepondash. <sup>11</sup> Aden chiasb abuc quënë yacno padpidec dectatoashun abitedishun pebededpondash. Aden piash tabadec Pabado utsibéd onquecuededpondash badiadbudtsëcquiec. Adec badiadbudbon Pabadobéd icquido shubu nuntanuësh puduem-puduenubien <sup>12</sup> paëdboed aton shubuno utsibobéd nidpondash bédambo yec.

*Todoas yacnoësh puduanec Mideto yacno chote*

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abéd capuquid utsibobéd puduanec nidequi cano antabédtoanec Ason yacno nidoapondabi. <sup>14</sup> Adec nidequi Ason yacno choshon istuidac Pabado ëbëdi cano antabédtoanquin potiash shubu dadpen icquid Mitidene caid yacno choapondash. <sup>15</sup> Auëshquio puduanec nidec badiadash acte nënantan nidaid nacrédquid Quio caid datambidanec nidash badiadash acte nënantan nidaid nacrédquid utsi Samos caid datambidanec shubu dadpen icquid Mideto caid yacno choapondash. <sup>16</sup> Ambo choash: —Edusaden yacno badedquo nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

*Epeso yacnocquido tsusiobo Pabadon chuibanaid*

<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. <sup>18</sup> Aden chomeshun naden aido chuipondash: —Chiembique. Tantiata. Èbi ënden nidaid Asia caid yacno choash mibéd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa

icquin cuesunete bunquin mëyampondashi. Aden mëyanaqui Nuquin Icbon ëbi chuibeneta capaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. <sup>20</sup> Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquiec puduedcuenequin chuibanondambi. <sup>21</sup> Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanën: Edusaden yacno nidta, quequin chuioaposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. <sup>24</sup> Aden Nuquin Papan Mayanën chuisho tantiashi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta capaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

<sup>25</sup> “Nëshunquio Nuquin Papan chiaid ëmbi chuibansho mibitedishun tantiabonndaidon nëuëshquio ëbi nidacsho mimbi isoainquio iquendac. <sup>26</sup> Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. <sup>27</sup> Tantienuioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuc Esuquidistu unëspanëdash. <sup>29</sup> Ëbi nidan abimbo chiachimboen chuiquid Esuquidistu tantiaquido chuiquid icnuec choendac. <sup>30</sup> Adembidi mibëdi iccuededquin utsin-utsinquien Nuquin Papan chiaid abimbo chiachimboen muaquin chiendac. Esuquidistu tantiaquid chuiquidquio icnuequin adoendac. <sup>31</sup> Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chiec shubiondabi.

<sup>32</sup> “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. <sup>33</sup> Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. <sup>34</sup> Ëmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ëbëd capuquido menebanondambi. <sup>35</sup> Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icho Esuquidistu nidaidën tabadec nadpanëdash: ‘Utsin natiapimbocsho menequid Nuquin Papan bëdambo iquebi camiaid nendac. Nabanenquio yec bedshumënuquidquio icsho Nuquin Papan bëdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash

Pabadon.

<sup>36</sup> Aden chiashic Pabado Nuquin Papa chuinec utsibobëd danëshën sebudcuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. <sup>38</sup> Èbi padpiden mimbi isoainquio iquendac, Pabado qesho tantiaash shubicuededpondash. Adec shubiquin dayumbudash unësquio yec Epeso yacnocquido tsusiobo Pabadobëd cano yacno nidanepondash.

## 21

### *Edusaden yacno Pabado nidoaid*

<sup>1</sup> Epeso yacnocquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiaash acte nënantan nidaid nacrëdquid Cos caid yacno choapondash. Badiadnuc auëshquio puduanec nidec acte nënantan nidaid nacrëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. <sup>2</sup> Ambo choashic nidaid Penisia caid yacno cano dapa utsin nidnuequid istuidash antabëdtoanec Pabadobëd capuquido nidoapondash. <sup>3</sup> Adec nidquimbi acte nënantan nidaid nacrëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. <sup>4</sup> Aden buan-buanubi Esuquidistu tantiaquido yacno nidane puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cunesunuequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. <sup>5</sup> Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. <sup>6</sup> Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano chobedo aton shubuno nidaneopondash.

<sup>7</sup> Adec cano antabëdtoanec auëshquio nidec shubu dadpen icquid Tode-maida yacno choash Pabadobëd capuquido tabadtuidpondash. <sup>8</sup> Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niente meneta caid utsi 6tedibëd Uedipe icpondash. <sup>9</sup> Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash.

<sup>11</sup> Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Èmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buan-shun, Unës uata, quequin isadaidpembo menendac —quepondash Accabo Pabado chiec.

<sup>12</sup> Aden Accabon chuisho tantiaash shubiquin Pabadobëd chobedo Uedipen shubun icquidobëdtan, Edusaden yacno nidenda, quequin

Pabado chuioapondash. <sup>13</sup> Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icho Esuquidistu chuibancho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado. <sup>14</sup> Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icho bunacpadec nidpanuna —capondash.

<sup>15</sup> Aden chiashic Sesadeya yacnoësh puduanec Edusaden yacno Pabadobëd capuquido nidoapondash. <sup>16</sup> Adec nidsho isash Sesadeya yacnocquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icho Chipide yacnoësh choash Edusaden yacno tabadquid Esuquidistu tantiabenchidbidi nepondash.

### *Pabadon Acobo isaid*

<sup>17</sup> Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. <sup>18</sup> Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. <sup>19</sup> Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moisés dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. <sup>22</sup> Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquo icmenuenquin ¿Atotsi nuqui napeba? <sup>23</sup> Naden nac bëdambo ictsiash. Tantia. Chuinu, Pabado. Nëmbo ëbëd icquido Nuquin Papanuidi tantiec tabadnuequid daëd-daëdquieq iquec. <sup>24</sup> Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacenuequid piucquid menembi,” quepondac. Nëbimbobi Edusaden yacno mibi choaoc. Nëid dadatedibëd Nuquin Papa tabadte shubu uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiapaden naquidquio Pabado nec, quequin tantiatsiash. <sup>25</sup> Ëmbi isadaidpembo Esuquidistu tantiaquid utsibo dada uaqin naden chuioaombi: “Nuquin Papan, Naden nata, quequin chiaid dada uamiampid nëidtedictsëqui mimbi natequid nendac. Nëidic, Nuquin Papan uaidbimboecnuc nacenaid tantiaquidon pete sanaid penda; adembidi, min chiduidtsëqui chudta; adembidi chidon min bënëidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin

Papan chiac ted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

*Pabado bedaid*

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoesh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: <sup>28</sup> —Isadaidbodedishun tantiatata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. <sup>29</sup> Epeso yacnoesh choquid isadaidpembo Tēdopimo Pabadobēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcuē bētashpondash. <sup>31</sup> Aden Pabado buanec, Cuesunenu, quec cuēdcuededsho tantiashun chuitanac <sup>32</sup> abi chuiquidbēd sondado cho-chosho isun Pabado cuesbededquin isadaidbon ēmpondash.

<sup>33</sup> Adec choshon sondado chuiquidēn bedtan cac Pabado bedshun shocosh bucin mētanemepondash. Aden mētanemias: —¿Tsutsi nēid nepec? ¿Atotsi icsamboen naosh? —quepondash sondado chuiquid. <sup>34</sup> Adoaquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi cuēdcuededquidon tsucuscuededtsēcquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuēdcuededquido: —Aidien cuesunetiad —quepondash sondado chuiquid chiec.

*Ambi nabanaid iccuededquido Pabadon chiaid*

<sup>37</sup> Adec abi buanec shubun puduedtsenubi Pabado: —¿Ada ēbi onquesho tantiatsia? —quepondash Quidieco matsesēn onqueten Pabado sondado chuiquid chiec.

Adoaquien: —¿Quidieco matsesēn onqueten onquequidta mibi ne? <sup>38</sup> Chuiquid dapa icnuequin Equipito yacnocquid matses dadpen cuēte nibēdacno buanaccondaidien nechitec, qeshun mibi bedombi. <sup>39</sup> Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoaquien: —Ai, onqueta —capondash sondado chuiquidēn.

Adoac abuc dectatoten nidtoash nidec, Otacquoio tabad, quequin ismequin Pabadon mēdante uic-uiccapondash. Aden nasho isash isadaidbo otacquoio tantiec tabadsho isash: —Ebedeyon, nuquin onqueten mibi chuinu —quec naded Pabado onquedopondash:

## 22

1 —Ēmbi naid mibitedi chiembique. Isadaidbo tsusiobobēdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquo tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nēmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabêdta aton chido chedo bedmeshun mëyamequin quënën nauedmeshun unës uamepondambi. <sup>5</sup> Ëmbi adobanquin naondaaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bēmenu, quesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushë abuctoan Damasco caid anoentsëqui choshobi abucüësh shocosh tabote dapa bed-bedquiachimboec chënquequin dëcatepondashi. <sup>7</sup> Adec chënquequin dëcatiac nidaidën paëdshun nadec abucüësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tiantianu,’ capondashi.

<sup>8</sup> “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaaid mimbi mëyanaid Esus nebi,’ capondashi.

<sup>9</sup> “Adnubic ëbëd icquidon shocosh bed-bedquiachimboec chënquesho isequi con Icbon chuïsho tantienquo yec tabadpondash.

<sup>10</sup> “Aden dëcatiac uequin ëmbentsëqui tantiec: ‘¿Atotsimbi nape, Icbo?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoaquini nidtoquin shocosh bed-bedquiachimboec chënquequidën bëshuacsho isun ëbëd icquidon mëdinanquin Damasco yacno buampondashi.

<sup>12</sup> “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquo icsho isadaidbo utsibon bëdamboen isaidquo icpondash. <sup>13</sup> Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

<sup>14</sup> “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuïsho mimbi tantiendac. <sup>15</sup> Aden aid isquin tantiashun utsi-utsien dadpen mimbi isaidbêdta mimbi tantiaid mimbi chuibenendac,’ quequin <sup>16</sup> chuïshumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacimboen utsibo ismenuen acten mentometa,’ capondashi Ananiasën.

<sup>17</sup> “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquac

ushac bimboec tsadpondabi. <sup>18</sup> Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquo nidtan, quequin Nuquin Icbon chuipondashi.

<sup>19</sup> “Adoquimbi: ‘Aidon isnubi mibi tantiaquid dadpen bedmeshun quënën nauedmondambi. Adembidi, aidon isoanubi mibi tantiaquid utsi-utsien comapenen mëyamiondambi. <sup>20</sup> Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

<sup>21</sup> “Adoquini Nuquin Icbon: ‘Isadaidpembo yacno mibi nidmembique. Nidtan,’ capondash —quepondash Pabado ambi nabanaid iccuedquido chiec.

*Pabado cuestsenaïd*

<sup>22</sup> Pabado ambi nabanaid chuibansho tantiec iccuedquido otacquo tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquo ictiadquidi nec. Aid unës uata —quec cuëdcuededpondash iccuedquido.

<sup>23</sup> Adec cuëdcuededec aton dashcute bëntsecquid canchepamboec dachiquidshun nidaïd putu bedtanquin abuc secapondash Pabado chuiboed tantiatemaid nec, quequin ismequin. <sup>24</sup> Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëïd cuesunete bumpeba? Ambi naid icsa chuimenuen comapenen paëmboconoc cuesta, quequin sondado chuiquidën chuipondash. <sup>25</sup> Adoquien cuate nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaïdënshun tishaid icsho ëmbi naid chuimiabida ëbi cuese? —quepondash Pabado sondado chuiquid chiec.

<sup>26</sup> Adsho tantiash sondado chuiquid puduanec nidec abi chuiquid comandante caïd yacno choash: —¿Atotsi natseno? Bëboed: “Domanobon nidaïdënshun tishaid nebi,” quïosh —quepondash sondado chuiquid comandante chiec.

<sup>27</sup> Adoquien Pabado yacno nidshun comandanten: —¿Domanobon nidaïdënshun tishaidta mibi nepe? —capondash Pabado chuiquin.

Adoquien: —Ai, domanobon nidaïdënshun tishaidquo nebi —quepondash Pabado.

<sup>28</sup> Adoquien: —Domanobon nidaïdënshun tishaidpenquo ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoquien: —Con tan tishaid yec domanobo nebi —quepondash Pabado comandante chiec.

<sup>29</sup> Aden Pabado chuisho tantiash ambi naid chuimenuen cuestsemboedo nidanepondash. Aden chuïsho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

*Isadaidbo tsusiobo iccuededacno Pabado buanaïd*



<sup>30</sup> Adshumbic, badiadshun ambi mëtanemeboed chicmeshun isadaidbo tsusio buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

## 23

<sup>1</sup> Aden nidtomiaquien isadaidbo tsusiuidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquo icteniobi —quepondash Pabado.

<sup>2</sup> Aden chuisho tantiashun: —Muaquin chieque. Ëccues —Isadaidbo tsusio dapan Ananiasën cac Pabado dayunquio icquidën Pabado ëccuespondash.

<sup>3</sup> Aden ëccuesaquien Pabado: —Mibi icsaid nibëdacbimboec mibibi tsadsho Nuquin Papan mibi ëccuesmendac. Nuquin Papan naden nata quequin chiaid tantiemi, quequimbi ëbi ëccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

<sup>4</sup> Aden Pabado chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

<sup>5</sup> Adoquien: —Ëmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquo icsho ëmbi chuibocpaden chienquio ictsenombi. Mimbi abimbo chioc. Ëmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Èbibi padiseyobon tishmiad nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic. <sup>7</sup> Aden Pabado chiaquien saduseyobo, Uinciente nibëdendac, quequin ëmbi tantiacpaden Pabado tantienquio iquec, quec comapenec onquecuedednubi padiseyobo, Uinciente iquendac, quequin ëmbi tantiacpaden Pabado tantiec, quec comapenec onquecuededpondash. <sup>8</sup> Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoac saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoac.

<sup>9</sup> Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdamboquid nec. ¿Mayanën chioishi, queshodambi muc nec capadi? Adecbidi, ¿Nuquin Papan uaid mayan bëdan chioishi, queshodambi muc nec caopadi? Padenquio iquembi. Pabado chuiboed abimbo iquec, quepondash padiseyobo saduseyobo caic. <sup>10</sup> Adec comapenec onquec natiambo chushcanansho tantiashun comandanten: —Podon shoyonquin canite dëchicnushë queshun mënchicshun shubu nuntan bëoata —cac sondadon Pabado mënchicpondash.

<sup>11</sup> Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnubi Nuquin Icbo chopondash: —Mimbi Edusaden yacnoshon ēbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquoio yec dayacquoio icta —capondash Nuquin Ichon Pabado chuiquin.

*Pabado cuesunenu quequin ompoquin cainaid*

<sup>12-13</sup> Adec Pabadobēd Nuquin Icbo onquebombien badiadash isadaidbo 40ted Pabado cuesuniabi icquin buna mēmumembi, quequin abimbo chiembi, quepondash. <sup>14</sup> Aden nanu quiash isadaidbo tsusiobo yacno nidash: —Pabado cuesuniabi icquin buna mēmumembi, quequin muenquiocquin chuibanombi. <sup>15</sup> Ēbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabadon naid bēdamboen tantianuna. ¿Ada padpiden isadaidbo tsusiobo iccuededte shubuno bēmeoatsia? quequin chuitan Pabado bēmeoatsiashe. Aden Pabado sondadon bēsho Pabado cuesunenuna —quepondash Pabado cuesunenuquido isadaidbo tsusiobo caic.

<sup>16</sup> Aden aidon chuishobien Pabadon piaquēn tantiashun Pabado yacno nidshun chuioapondash aton piaquēn.

<sup>17</sup> Adoquien Pabadon sondado 100ted chuiquid cho, cata cac nidshun aton piaquēn chiac Pabado yacno sondado chuiquid chopondash. Adec chosho isun: —Nēid con piac nec. Aidi comandante chuite buneque. Aid yacno buanta —Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quēnēn nauedboed Pabado cuēmēdquidēn ēbi chomeshun: “Con piac comandante chuite buneque. Aid yacno buanta,” cac bēombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mēdinanquin udictsēc buanash comandante: —¿Atotsi ēbi chuinuec cho? —quepondash comandante.

<sup>20</sup> Adoquien Pabadon piac: —Badiadshun isadaidbon ambi nami-aid mibi yacno chomec. Aden chomiac nēmbo choshon naden chiec: “¿Ada isadaidbo tsusiobo iccuededte shubuno Pabado mimbi bēoapatsia? Aidēn naid chuibanasho bēdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid.

<sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiashe, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mēmumembi,” quiosh. Con cu cuesunenuen nēbimbobi podqued cuēmanshun ompodshon cainec —quepondash Pabadon piac comandante chiec.

<sup>22</sup> Adoquien comandanten: —Isadaidbon chiaid mimbi chuiboed utsi chienquoio yec nidec nid —capondash Pabadon piac chuiquin. <sup>23</sup> Aden Pabadon piac nidmeshun sondado 100ted icquido chuiquid daēd chomiashe comandante nadpondash: —Ēnden inchēshan Sesadeya yacno ma mibēdi mimbi namiaid sondado 200ted nidnu mitsana buanuequin nacentata cata. Adomboembidi, cabayo catsadquid 70ted icquido chuiquin nacentata, quequin chuioata. Adomboembidi shocosh sianten senuequin sananquid 200ted icquido chuiquin mitsana nacentata, quequin chuioata. <sup>24</sup> Adembidi Pabadobēd icquido cobednadod Pediques yacno

buanun cabayo nacnenta —capondash comandanten sondado 100ted chuiquin daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin: <sup>26</sup> “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. <sup>27</sup> Nadquo iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembëd choquin mënchiccombi. <sup>28</sup> Aden mënchicshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeopombi. <sup>30</sup> Aden Pabado quënën nauedmeoashumbic, Podqued cuëmanshun Pabado cuesunuequin isadaidbon cainec, qesho tantiashun badedquo mibi yacno buamiombi. Adembidi, Pabado icsambocquid nec, quequin aid cuesunuequido mibi yacno nidmembi. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta —capondash comandanten.

<sup>31</sup> Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuidquo Pabado buanec nidnubi sondado utsitedi aubidi nidaneoapondash. <sup>33</sup> Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoshon tishaid nebi —quepondash.

<sup>35</sup> Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquo Pabado nauedsho isun: —Puduenanec cuenushe ista —capondash sondado chuiquin.

## 24

### *Pediquesën tantianubi Pabadon ambi naid chiaid*

<sup>1</sup> Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinec Sesadeya caid yacno chopondash ambi tantiacpaden chuinequid Tedtudo cuëmëdquid bëquin. <sup>2</sup> Aido chosho isun Pediquesën Pabado chomiacsho isun isadaidbo tsusiobon tantiacpaden chuinequidën Tedtudon naden Pediques chuipondash: —Mibi chuinu. Tantia. Chuiquid bëdambocquid icquin mimbi bëdamboen

nabanac isadaidbo bēdamboec tabadec. <sup>3</sup> Mimbi aden nabansho isun, Bēdambocquid mibi nec, quequin mibi chiemi. <sup>4</sup> Aden chuishun mibi chieshmenquiocnequin isadaidbon chushcaboed badedquio chuinu. Tantiata.

<sup>5</sup> “Nēid mimbi bēmeboed Pabado caidbēd ictiapimbo iquebi. Nēid Nasaded yacno iccondaid tantiaquido tsusio nec. Aidēmbi nidaidtedi yacno nidshun ambi tantiaid chuibanquin isadaidbo comapenen chushcamequin cuēdcuededmiac cuēshēd-cuēshēdposh. <sup>6</sup> Aidēmbi Nuquin Papa tabadte shubu uashunaidēn puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuēmēdquid choshon Pabado mēnchicanquin buamposh. <sup>8</sup> Pabadon ambi naid chuisho mimbibi tantiashun, Isadaidbo tsusiobon abimbo chiosh. Icsambocquid nec, quequin mimbi chuiopatsiac—quepondash isadaidbo tsusiobon tantiaquiden chuinequid Pabado icsambocquid nec, Pediques camenuc.

<sup>9</sup> Aden Tedtudon chuiquin nainan isadaidbotedi, Ai, Tedtudon chiacpadeccosh, quequin chuibededpondash.

<sup>10</sup> Adsho tantiashun, Onqueta, quequin mēdante uiccaquin Pediquesēn ismiac Pabado nadec onquepondash: —Chuiquid dapan tantiata. Ēmbitsen chuinu. Dadpen seta matamequin con matses isadaidbo abi chushquiaid tantiashun mimbi bēdamboen tantiacpaden namedenioc. Adquid mibi nec, quequin tantiaquin, Ēmbi naid chuibanec bēdambo iquebi, quec dacuēdenquio yec onquebique. Tantiata. <sup>11</sup> Edusaden yacno choash ambobi 12tedec ushobi. Ēbi anoshon isboedon, Abimbo iquec, quequin nēmbi choshon mibi chuishiash. Edusaden yacno choash Nuquin Papa shubu uashunaidēn puduedec Nuquin Papa tantianec choapobi. <sup>12</sup> Ambo puduedash utsibēd chushcananenquio yec tabadsho istuidash, Icsambocquid nec, queposh. Adembidi chuibanquin utsibo nēishmequin chushcamenquio iccombi. Pabado icsambocquid nec, quequido Pabadon chiaid abimbo iquec, quetiadquidi nec. <sup>13</sup> Ēmbi naid Tedtudon chuibamboed, Abimbo iquec, quetiapimbo iquec tsusiobo. <sup>14</sup> Nēiduidtsēqui abimbo iqueque. Chuinu. Tantiata. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquo nebi. <sup>15</sup> Adembidi, matses unēsacsho Nuquin Papan uincuemiap abi tantiaquid abēdi tabadnubi abi tantiesa chian anēdēnquequid nēsecaindac, quequin tantiembi isadaidbo tsusiobon tantiacpadembi. <sup>16</sup> Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matsestedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

<sup>17</sup> “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bēdamboen dayun uabenioshi, quequin piucquid menenuc choapobi. <sup>18</sup> Aden menenuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. <sup>19</sup> Ēbi capusho istuidquido isadaidbo nidaid Asia caid yacnoēsh choquido niosh.

Aido, Pabado icsamboec tabadsho isombi, quepac caosh. Ambi chiaid abimbo icnuc nëshuntsen adomboembidi chuitiadquidi nec.<sup>20</sup> Adembidi isadaidbo tsusiobon: ‘Padiseyobo yec bēdamboquid nec,’ quequin ēbi anoshon chiacpadembidi nëshuntsen adomboembidi chuioatiadquidi nechitec.<sup>21</sup> Anoshon nëduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ēbi mibi chiec caimbi —quepondash Pabado Pediques chiec.

<sup>22</sup> Aden Pabadon chuisho tantiash Pediques tantiauidquid iquec: —Nēbi mimbi aidtedquio chuibansho tantiembi. Comandante Disias nēmbo choan mibi padpiden chuimembi —quepondash Pediques Pabado chiec.<sup>23</sup> Aden chuishumbic naden Pediquesēn sondado chuipondash: —Shubuno Pabado buanshun puduednushe queshun ista. Abi menuequid abi isnuequid chedo chosho isun yuedta —quepondash Pediques ambi Pabado ista caid chiec.

<sup>24</sup> Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabadon chuibanac Pediquesēn tantiauidpondash.<sup>25</sup> Aden chuibanquin Pediques Pabadon nadopondash: Utsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuioapondash Pabadon. Adembidi, Esuquidistu tantienquio icsho chian anēdēnquequid Nuquin Papan nēsecanushe quequin Esuquidistu tantiata, quequin Pabadon chuioapondash. Aden Pabadon chuisho tantiash: —Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid —cac Pabado nidpondash.<sup>26</sup> Adshumbic, adembidi abi yacno Pabado Pediquesēn bēmeded-bēmededpondash. Nidtiadquio icquin piucquid Pabadon ēbi menetsiash, quequin tantiaquin Pabado bēmiash aibbēd Pediques onquepondash.

<sup>27</sup> Adashic, seta daēd matamiash Podsio Pesto cuēmēdquid cobednadod yanpondash. Aidi cobednadod yanuc nidnuequin, Nidta, cainquiocquin Pediquesēn Pabado shubu nuntan niampondash naden tantiaquin: Pabado shubun nauedshun ēmbi niansho isash, Bēdamboquid nec, quequin isadaidbon ēbi cain chuibededpec, quequin Pediquesēn Pabado shubun nauedshun niampondash.

## 25

### *Pabadon ambi naid Peston chuimiaid*

<sup>1</sup> Pesto cobednadod yanash Sesadeya yacno choash 3tedec ushanec Edusaden yacno nidpondash.<sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido:<sup>3</sup> —Ĵēbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenequidon cainshun cuesunepec, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi.<sup>5</sup> Pabadon icsamboen naosh, quec

utsi-utsiec ëbëdi nidshun anoshon Pabadon naid icsa ëbi chuita — quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmepondash isadaidbo tabadnubi. <sup>7</sup> Aden bëmiacsho isash Pabado dëcatec isadaidbo Edusaden yacnoësh chobedo Pabadon naid chiec abimbo chiacbimboec onquecuededpondash.

<sup>8</sup> Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

<sup>9</sup> Adoquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. <sup>10</sup> Adoquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec. <sup>11</sup> Icsambocquidquio iquec Pabado unës uame, qesho tantias, Adoanenda, quenquioctsiabi. Isadaidbon abimbo chiacbimboen chuisho tantias, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindami —quepondash Pabado Pesto chiec.

<sup>12</sup> Aden Pabadon chuisho tantias Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

*¿Atotsimbi Pabado napatsia? quequin Peston Aquidipa caid*

<sup>13</sup> Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. <sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquestën quënën nauedmiaid Pabado cuëmëdquid chuïnu. Tantiata. Aidi abi iquec shubu nuntan. <sup>15</sup> Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

<sup>16</sup> “Adoquien, Mibi abëdi chushquiaid Pabadontsen chiambocon unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. <sup>17</sup> Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. <sup>18</sup> Aden Pabado bëmiacsho ëmbi tantiacpaden abi chushcaquidon Pabadon naid chienquiocpoh. <sup>19</sup> Ëmbi tantiaidpenquio Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. <sup>20</sup> Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden

yacno buamiac mimbi naid anoshon chiac bēdambo ictsiash, quequin chiombi. <sup>21</sup> Adoaquien: ‘Empedadod, Sesad yacno nidshun ěmbi naid chuitiadquio iquebi,’ queposh Pabado. Aden chiac quēnē yacnoshon aid puduedmetiapimbo iccobi. Nēmbobi Pabado quēnēn tabadec — quepondash Pesto Pabado chiec Aquidipa tantiamenuequin.

<sup>22</sup> Adoaquien Aquidipa: —Ĕbi aidēn chuibansho tantiate bunebi — quepondash.

Adoaquien Pesto: —Badiadshun aidēmbi chuisho mimbi tantierendac — quepondash.

### *Aquidipa ambi naid Pabadon chiaid*

<sup>23</sup> Aden Peston chiaquien badiadash bēdaidquio dasiuidash Aquidipabēd aton chuchu choash iccuededte quēnēn puduedash sondado chuiquido chuiquid utsibobēd aid daēdi tabadpondash. Aido tabadsho isun Peston Pabado bēmepondash. <sup>24</sup> Bēmiac Pabado nēnantanquio nidtonobi Pesto nadpondash: —Ancanquid Aquidipan mibēd iccuededquidon ěmbi bēmeboed mibitedishun isec. Aidi chuinu. Tantiata. Isadaidbon, Nēid dada icsambocquid neque. Unēs uame, quequin chioši. Ĕbi Edusaden yacno choacsho isun adoposh. Adomboembidi nēshun Sesadeya yacnoshontsen aidombidi chuioaposhi. <sup>25</sup> Aden chuisho tantiashun nēid ambi naid chuimeoapombi. Aden Pabadon chiaidtsen tantiashun, Nēid unēs uatiapimbo iquebi, quequin tantiapombi. Aden ěmbi tantianubi, Empedadod yacno nidshun ěmbi naid chuite bunebi, quequin Pabadon chuiposhi. Adoac Doma yacno aidi buamenuna. <sup>26</sup> Aden buamenuen ĵatotsimbi dada uaquin empedadod chuiPATIA? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. <sup>27</sup> Ambi icsamboen naid nibēdnuc Doma yacno buametiapimbo iquebi —quepondash Pesto ancanquid Aquidipabēd iccuededquido chiec.

## 26

<sup>1</sup> Aden Peston chiaquien: —Mibibi onquequin mimbi naid chui. Tantiyanu —quepondash Aquidipa Pabado caic.

<sup>2</sup> Adoaquien Pabado nadpondash: —Ancanquid dapa Aquidipa mibi tabadnubi isadaidbon ěbi chushcaid chuibanec bēdambo iquebi.

<sup>3</sup> Isadaidbon naden nata quequin chiaidbēdta abi onquiaid mimbi tantiec. Aden tantiaquid mibi icsho ěmbi nabanaid ěmbi chuibansho tantiata. Chuinu.

<sup>4</sup> “Ĕbi tishondacnoēsh canidosho con matsesēn isadaidbon istenepondashi. Nēbi caniquid iquec Edusaden yacno choash tabadsho adembidi aidon istenepondashi. <sup>5</sup> Ĕbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquid nec. <sup>6</sup> Unēsash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ěbi icsho isash, Icsambocquid nec, quec isadaidbo. <sup>7</sup> Nuquin tsusedpa Acobo isadaid caidēn madobon tsyuecquidon, Unēsacsho Nuquin Papan uincuemetē iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquid uincuemetē chiaid mimbi tantienquio icpe.

<sup>9</sup> “Ēnden ěmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampondambi. <sup>10</sup> Edusaden yacnoshon adquid dadpen mēyamepondambi. Isadaidbo tsusiobon, Adota, cac ěmbibi Esus tantiaquid bēdambocquid icsho bedshun quēnēn nauedmepondambi. Unēs uanu, qesho tantiash, Ai, unēs uatiadquio iqueque. Adota, quepondabi. <sup>11</sup> Nuquin Papan chiaid chuibantē shubu utsi-utsiec yacno nidted-nidtedondabi aido mēyamenuec. Esus, Nuquin Papan madopenquio nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameoapondambi.

<sup>12</sup> “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. <sup>13</sup> Adec nidquimbi ushē cuembo yanec ushē comapenec chēnquequidēn ěbēd icquidobēdta ěbi dēcatesho isondambi. Abimbo iquec, quequin mibi chuinu. Ancanquid dapan tantiata. <sup>14</sup> Aidēn dēcatiac ěbitedi nidaidēn uebudcuededondabi. Adec uequimbi con matsesēn onqueten ebedeyon onqueten abucuēsh onquesho naden tantiondambi: Saudo, ¿atotsieshun ěbi tantiaquido mimbi mēyampe? Ēbitsen mēyantiadpambocquin mimbi aido mēyanec, quec onquequin chiondashi.

<sup>15</sup> “Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mēyanaid Esus nebi. <sup>16</sup> Ēmbi namiaid mibi icmenuec chobi. Esus isombi, quequin ¿ěbi chuibeneta caid nēbi mibi yanec? Ēbi chuibenequin mimbi isaidbēdta ěmbi yueshun ismetequid chuibeneta. <sup>17</sup> Aden ěbi chuisho mibi cuesunete bunquid isadaidbobēd Isadaidpembo icsho mibi mēnchiquendambi. Adquid chuibanta, quequin mibi nidmembi. <sup>18</sup> Aden chuibanac utsin-utsinquien pashuacimboecheoedēmbi tantiendac. Icsambocquid nebi, quequin tantienquiochoedi, Icsaobique. Ēbi pauc, Papa, quependac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiaid ěbi tantiaquid utsibēd iquendac, quequin Esusēn chuipondashi.

<sup>19</sup> “Aid abucuēsh onquesho tantiashun chieshenquiocquin chuibeniombi caimbi, mibi chuiquin Aquidipa. <sup>20</sup> Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanooandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ěnquin Nuquin Papa abimbo tantiaquin ambi chiacpaden nabanta, quequin chiombi. <sup>21</sup> Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. <sup>22</sup> Padnuen ěbi dayun uaquid Nuquin Papa icquin isadaidbon cuesunenushe qeshun cudasēmposhi. Adoac nēid ushēnquio mibēdtabi mimbi namiaido mibi chuibanec nebi, ancanquid Aquidipa. Moisesēn, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. <sup>23</sup> Nuquin Papan Chomiaid, Quidistu, mēyanac unēsash uincuenaid yec ěbi tantiaquid ěbēdi tabadendac, quequin aton matsesbēdta isadaidpembo Quidistun chiendac, quequin



chiampicpadec chopanëdash —quepondash Pabado iccuededquido chiec.

<sup>24</sup> Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquoio yec onquechitequien mibi nec —quepondash Pesto Pabado caic.

<sup>25</sup> Adoaquien Pabado: —Bëdamboen tantiec onquebi. Ęmbi chiaid abimbo iquec, caimbi mibi ancaquid Pesto. <sup>26</sup> Ancanquid Aquidipan Ęmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiembi. Ęmbi chuibamboed ompoenquiocquin isquidon chuisho aidëmbi tantiapondash. <sup>27</sup> Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

<sup>28</sup> Adoaquien Aquidipa: —¿Mimbi chuiboedtedtsëqui tantiashtabi Esuquidistu tantiaquid yampe? —quepondash Aquidipa Pabado chiec.

<sup>29</sup> Adoaquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënuquo daëdpactsëc chiombi. Aidtedtsëqui chiac tantiatiapimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

<sup>30</sup> Aden Pabado chuibanaquien ancanquid Aquidipa nidtopondash. Nidtocho isash Pestobëd Bedenise iccuededquid utsibo chedo nidtocuededpondash. <sup>31</sup> Adec nidtocuededash puduenash onquecuededec: —Chuibamboed icsamboen nainquioccosh. Adoenquiocsho unësh uainquioctiad. Adembidi ënden quënën nauedenquiocpatecnëdan —quepondash ancanquido.

<sup>32</sup> Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

## 27

### *Doma yacno Pabado buanaid*

<sup>1</sup> Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. <sup>2</sup> Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icbo, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantiash Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

<sup>3</sup> Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaguin sondado chuiquidën, Udion, chuipondash. <sup>4</sup> Adshumbic Sidon caid yacnoësh puduanec nidquin potesho cunquequidën bëquedtuidec ushë choacmi cuenadtanquin acte nënantan nidaid nacrëdquid Chipide

caid datampondash. <sup>5</sup> Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. <sup>7</sup> Adec Mida yacnoësh puduanash nidquin potec dadpen ushacsho cunquequidën cano bëquedtuidpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactnëdquid Quideta caid yacno buanoapondash. Uquë cuëma utsiuc Sadmon caid icpondash. <sup>8</sup> Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

<sup>9</sup> Cunquequidën bëquedac yuenquo potiactanetsëcquien buampondash. Comapenec cunquequidën nuqui bëquedendac, quequin tantiaquin Pabodon nadopondash: <sup>10</sup>—Chuinu. Tantiata. Nëuëshquo puduanquin potesho cunquequid dapan bëquedshun cano chic-chictsiash. Acten mentoadmane quequin potenquo iquembi, quequin chuita —capondash Pabodon sondado chuiquid chuiquin. <sup>11</sup> Aden Pabodon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. <sup>12</sup> Cunquequid dapa cunquenubi Buenos Puedtos yacno tabadec iquen uanquid dapanquo nuqui iquenendac, qiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

*Acte dapa potesho cunquequid dapanquo cano bëquedte*

<sup>13</sup> Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. <sup>14</sup> Adec nidequi udictsëc yanshobi ushë cho-choaid ëquëctsëcshun Quideta caid nidaid mananucuësh cunquequid dapa choquin bëquedtuidquin <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidën buanaqui acte nënantan nidaid nactnëdquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe qeshun anandopondash. <sup>17</sup> Aden canompi anandoshon cano dapa canchednushe qeshun uidën uaqin datanebanshombic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash. <sup>18</sup> Aden cano cunquequid dapan buanubi badiadnuc acte natiambo tëccoasquesho isun ambi ansandoshon bëboed acte nësiapondash. <sup>19</sup> Adshumbic 3tedec ushun bucu dënëshun cano dashcute indotetedi nësiaopondash. <sup>20</sup> Aden nësecanec nidquimbi inchëshën ushëbëdta uispa abu chëshën bëtinacsho isenquo iccondambi. Adembidi badiadën ushë isenquo iccondambi. Dadpen ushquin aidtedi isenquioccondambi. Aidted isenquiocnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quequededpondash.

<sup>21</sup> Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash:

—Chuinu. Tantiata. Quideta caid yacnoësh puduanenda caombi. Adsho tantiaboshi tantienquoio yec mibi puduam poc. Ĕmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquoio nuqui ictsiandac. <sup>22</sup> Padnuen acte tēccoasquenubi nuquitedi unësenquoio iqueque. Dacuēdenquoio yec dayacquoio icta. Canouidi canched-canchedendac. <sup>23</sup> Nuquin Papan namiaidquoio nebi. Adquid icsho inchëshēn ambi uaidēn mayan bēdan ambi chomiaidēn naden chioishi: <sup>24</sup> “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquoio yec tabad,” caposhi Nuquin Papan uaid mayan bēdan. <sup>25</sup> Aden aidēn chiac dayacquoio icta. Nuquin Papa ambi chiacpaden nabanquid nec, quequin tantiombi. <sup>26</sup> Adembidi, acte tēccoasquequidēn nuqui acte nēnantan nidaid nacrēdquid cuēmano buanshun cano cancheshunendac, quequin tantiombi —quepondash Pabado canon antabēdtoaido chiec.

*Cano canched-canchedaid*

<sup>27</sup> Adashic, Buenos Puedtos caid yacnoësh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchëshpotsembo yanuc, Cuēma anoentsēquien nuqui choendac, quequin cano nidmequidon tantiapondash. <sup>28</sup> Aden tantiaquin, ¿Tionda iqueque? Tanu, qeshun yuēmbocquid shocosh bucu dēdectanshun pumbudquin tampondash. Aden tanshun, Aidtiompenquoio iquec, quequin chuipondash. <sup>29</sup> Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiash tabadpondash. <sup>30</sup> Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenuequin adopondash. <sup>31</sup> Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. <sup>32</sup> Aden Pabado chiaquien abi dectante bucutedi sēnac canompi nēpaēdpondash cuenuequido nidtiapimbo yec.

<sup>33</sup> Adashic, badiadte anoentsēc yanubi Pabado nadpondash: — Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc. <sup>34</sup> Mibi mentoadenquoio iqueque. Min manēdaid abentsēc paēdenquoio iqueque. Penquiocboedi unëshitomane quenquiocquin peta —quepondash Pabado. <sup>35</sup> Aden chuishumbic utsitedi ismequin pan bedshun Nuquin Papa chuishun pan cuëshun Pabado pondash. <sup>36</sup> Aden Pabado pesho isun, Nuquitsen penuna, qeshun abitedishun pebededpondash. <sup>37</sup> Cano antabēdtoquido 276ted icpondash. <sup>38</sup> Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

<sup>39</sup> Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun <sup>40</sup> uidēn uaid tebanac acte nēpaēdpondash. Adembidi, cano dēbidiamete bucutedi seccudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno

buampashuni, quequin. <sup>41</sup> Aden cano nidmenubi cano dēbiaten masi se-tuidec dēchiquidtiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

<sup>42</sup> Adsho isash sondado, Mētaniaidtedi cuentsiashe. Cuesunenu, qesho <sup>43</sup> tantiash Pabado cuesunenushe qeshun: —¡Chēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi <sup>44</sup> tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chi-acpadquiec nidanec mentoadenquio yec abitedi nidaid yacno choash dectatocuededpondash abitedi.

## 28

### *Madta caid yacno Pabadobēd icquido choaid*

<sup>1</sup> Adec nidaid yacno choash dectatoneshun, Nēid acte nēnantan nidaid nacnēdquid Madta caid nec, qesho tantiabededpondash. <sup>2</sup> Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēec cho, quequin chuipondash. <sup>3</sup> Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. <sup>4</sup> Aden mēpiash ēcchiquidenquio yec mēdiadsho isashien anocquido: —Nisin piaid cuesuni-anquid nepanui. Mentoadenquio yec actenuēsh dectatoacsho nisin piac unēschitequien iquec. Abi icsaid cuidtequidien nechitec.

<sup>5</sup> Adec onquecuedednubien Pabadon comapenen uicac nisi cuēte dētsiadaidēn nēpaēdpondash. Adnubien Pabado abi bēdambo icpondash. <sup>6</sup> Aden Pabadon uicac nisi paēdsho isun Pabadon mēdante mēbidisquetsiashe. Isnu, quequin isbededpondash. Aden tantiaquin yuen cainquin mēbidisquenquiocsho isash, Nisin mēpeboed utsibon papa cain cuēnaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsēqui icpondash. Tsusio dapa Pudio cuēmēdquid icpondash. Aidēmbi aton shubu yacno canon choboedotedi yuedshun abentsēc chotsēcncuc ushquin ēbitedi bēdambo icmepondash. <sup>8</sup> Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquiobi Nuquin Papa chuishumbic Pudion papa damishquin bēdamepondash Pabadon. <sup>9</sup> Pudion papa bēdanacsho isash Madta caid yacnocquido nēnquidbēd daicsaid chedo cho-chopondash. Ēbitsen bēdametsiashe, quiash cho-chosho aidotsen bēdamepondash Pabadon. <sup>10</sup> Adosho isun canon choquido bēdamboen tabadmepondash anocquidon. Nidnuesho tantiashun menebampondash mitsana nibēdec quequin.

### *Doma yacno Pabado choash tabadaid*

<sup>11</sup> Adashic ushē 3ted nidmiash Madta caid yacnoēsh puduampondash. Madta caid yacno choash cano icbo, Iquenoampamboec icnuc nēmbo tabadnuna, quiash tabadash: —Nidnu. Nid —quianec aton cano antabēdtosho isun Pabadobēd icquido sondado chuiquidēn antabēdtomepondash. Aid cano shubu dadpen icquid Adecandedia caid

yacnoësh chopondash. Cano icbon papa cain cuënaid daëd ambi tantiaidbimboecnuc cano dēdecantquin nacnenaïd icpondash. Ambi papa cain cuënaïd abentsēc Castod icnuc utsi Podus icpondash. Adembidi aton cano cuëmpondash icbon. <sup>12</sup> Aidën puduanec nidequi acte nēnantan nidaïd nacnēdquid utsi yacno choash shubu dadpen icquid Sidacusa caïd yacno choash 3tedec ushquin tabadmepondash. <sup>13</sup> Ambo tabadash puduanquin aid acte nēnantan nidaïd nacnēdquid cuëma anoentsēqui potequi nidaïd Itadia caïd cuëmano choashun shubu dadpen icquid Dequoïd caïd yacno buampondash. Ambo choash ushash badiadash puduanec nidec cano tsitsumishun cunquequidēn buanac badiad utsin shubu dadpen icquid Puteyodi caïd yacno chopondash. <sup>14</sup> Ambo choshon Pabadobēd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobēd tabadashic auëshquïo puduanec podquedēn nidequi shubu dadpenquïo icquid Doma caïd yacno chopondash Pabadobēd icquido. <sup>15</sup> Podqued Apio caïdēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuënaïd yacnocquido Pabado bēquedoaic nidaneoapondash. Aïdo cho-chosho isashien, Ēbi dayacquïo icmenuen nēïdtedi mimbi chomioc, Papa, quec dayacquïo iquebi, quiampondash Pabado. <sup>16</sup> Adec aïdo bēquedec choash auchidi nidec Pabadobēd Doma yacno choapondash. Doma yacno choacshobien Pabado quēnēn nauedenquïocquin shubun tabadmepondash sondado abentsēcshun abēd tabadquin isnubi.

*Doma yacnoshon Pabadon Esuquidistu chuïbante*

<sup>17</sup> Adec aton shubun tabadec 3tedec ushun isadaïdbo tsusiobo chuïnuequin, Aïdo chome, capondash. Aïdo chomiacsho isun Pabadon nadopondash: Chuïnu. Tantiata. Nuquin matses icsamboen nainquïoccombi. Adembidi nuquin tsusedpabon naden nata quequin chiaïd niacambo iccombi. Adoenquïocshobi Edusaden yacnoshon nuquin matsesēn bedshun domanobo chuïquid meniondashi. <sup>18</sup> Aden meniac domanobo chuïquidēn, Mimbi naïd chuïban, cac chuïbanondambi. Aden chuïbansho tantïash, Unēs uainquïoctïadquidi mimbi naic, quepondash domanobo chuïquid ēbi caic. <sup>19</sup> Aden domanobo chuïquidēn tantianubi nuquin matses tsusiobon, Unēs uatiad, quequin chïac, Empedadod, Sesad yacno nidshun Ēmbi naïd chuïte bunebi, quequin chuïpondambi, Con matses icsambo iquec, quenquïocquin. <sup>20</sup> Ēmbi chuïboed mibi chuïnuequin mibitedi chomiombi. Unēsash uincuenta nec, quequin tantiaquin nuquin matsesēn cainacpaden cainquid icsho mētaniaïd nebi —quepondash Pabado isadaïdbo tsusiobo chïec.

<sup>21</sup> Adoaquien: —Nidaïd Udeya caïd yacnoshon mimbi naïd chuïquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chïenquïoccosh. <sup>22</sup> Padnueni mimbi tantiaïd chuïsho tantiate bunec. Utsi dadpen Quidistubo icsambocquid nec, quec —quepondash isadaïdbo Doma yacnocquido tsusiobo Pabado caic.

<sup>23</sup> Aden Pabadon tantiaïd tantianuec, Nēïdted ushash padpïdec choandabi, quianec nidanepondash tsusiobo. Adec nidaniaash ambi chïactedec ushash Pabado tabadacno choapondash isadaïdbo tsusiobobēd utsibo dadpen. Adec cho-choash tabadsho isun: —Matses

icsaquid icsho Nuquin Papan cuidnushe quiash abided cuidadec Esuquidistu unēspanēdash. Aid tantiaquid yec Nuquin Papabēd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbēdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidēn chiaid Nuquin Papan madombo Esuquidistu nec, quequin badiadnubi chuiquin tauashun inchēshbudtsēqui chuiquin ēmpondash Pabadon. <sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. <sup>25</sup> Aden abentsēc tantiacimboen tantiatipimbo yec comapenec onquesho tantiasien Pabado nadpondash. —Nuquin Papan Mayanēn Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ēmbi nadatiambocquin nabanaid isted-istedquimbi abimbo isenquo iquendac.

<sup>27</sup> Bēdamboen tantiaboedobi nēbi min matses pamumēdacimboec tabadec; pashuacimboen tantiec tabadoaic; ushacimboecbidi tabadoaic.

Adec tabadenquiocquin ěmbi nabansho mimbi istsiac. Adembidi ěmbi chiaid mimbi tantiatsiac. Aden tantiasun mibi icsaid mimbi ěntsiac.

Adquiduidi ěmbi bēdambo icmiaid nendac.”

<sup>28</sup> Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado <sup>29</sup> Nuquin Papan dada uamiampicpaden chuiquin isadaidbo Doma yacnocquido tantiamenuc. Aden chuisho tantiasun isadaidbo nidanepondash.

<sup>30</sup> Adembidi seta daēd matamec tabadquin Pabadon Esuquidistu chuibampondash. Aton shubun tabadquin abi isedec choquidtedi Pabadon yuedpondash. <sup>31</sup> Utsi, Chēn, quenquiocnobi dacuēdenquiocquin, Nuquin Papabēd tabadte iquec, quequin huibampondash. Adembidi Esuquidistu tantiamenuen chuibampondash Pabadon.

Padi. Esuquidistun, Ēbi chuibeneta, caidon naid chuibanquin aidtedi dada uaombi, Teyopido.

## DOMA YACNOCQUIDON ISTE

### *Tauamboen chiaid*

<sup>1</sup> Esuquidistun yuambo Pabado nebi. Aidën: —Ëbi chuiheneta —caidquio nebi. Adembidi Nuquin Papantsen: —Con Mado chuiheneta —caidquio nebi. <sup>2</sup> Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. <sup>3</sup> Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. <sup>4</sup> Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. <sup>5</sup> Aidën: —Pabadon chuiheniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. <sup>6</sup> Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. <sup>7</sup> Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

### *Doma yacnocquido iste Pabado bunaid*

<sup>8</sup> Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. <sup>9</sup> Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuihenenuc. <sup>10</sup> Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi. <sup>11</sup> Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. <sup>12</sup> —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

<sup>13</sup> Tanta, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpeshun Esus tantiabeneacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. <sup>14</sup> Esuquidistun chiacpadomboen ambi naid matses abitedi chuibantsiadquio iquebi. —Dadpen tantiaquidobëdtabi tantienquio icquidontsen chuihenenuc. Adembidi dada uaquidobëdtabi dada uainquio icquidontsen

chuihenenu —quiash nebi. <sup>15</sup> Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

<sup>16</sup> Esusën naid chuibenec bēdambo iquebi naden tantiash. —Nuquin Papan tantiacpadeq matses cuidmenquio icnuec Esus abided cuidadec unēsac caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaid-pembo matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bēdambo iquebi. <sup>17</sup> Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquio nec,’ quequin abi tantiec tabadquid Nuquin Papan bēdamboen isec,” quequin dada uamepampic.

*Matses utsibo icsamboec tabadaid*

<sup>18</sup> —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpenshun Nuquin Papan cuidte tantiatiapimbo iquec. <sup>19</sup> Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquio matses icpec. —Adquidshenda Nuquin Papa nepec —matses camenuen Nuquin Papan abitedi uapampic. <sup>20</sup> Nidaid uaquinc cuēte uaquin aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nadquio icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquio yec abitedishun Ichoen nechitec —quetiadquidi adenquio matses iquec. Adquid Nuquin Papan cuidendac.

<sup>21</sup> Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumēdabimboecquin Nuquin Papa tantiatiapimbo matses iquec. <sup>22</sup> —Dadpen bēdamboen tantiemi —quequimbi tantienquio matsesën iquec. <sup>23</sup> Aden unēstiapimbo icquid Nuquin Papambo tantiatiapimbo icquimbi unēsquid-uidquio tantiaquin aidbimboecnuc nacenenshun papa quequin chianec. Utsibon matsesbimboecnuc nacenenshun: —Ēbi bēdamboen ista, papa —quequin ambi nacenaid chiec. Utsibombic aben icquid nidaidēn capuquidbimboecnuc nacenenshun adembidi chiec. Utsibombic uicchun podochoquidbimboecnuc nacenenshun adembidi chiec. Utsibombic aben icquid tacbidēn siuidquidbimboecnuc nacenenshun adembidi ambi nacenaid chiec. Ēnden adquio matses yampicpadomboembidi nēbi adomboembidi matsesën naic.

<sup>24</sup> Adsho isash Nuquin Papa: —Ma bēdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnēdambic nēbi abi bunacpadeq icsamboec tabadec utsin chido chudteuidi bunquieq dada. Adecbidi aton bēnēpenquio chudmeteuidi bunquieq chido. <sup>25</sup> —Abitedi uaquidquio Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bēdamboshē iquec —quequin ēnenquio icquin chuitiadquidi aidon padenquio icpec.



<sup>26</sup> Adsho isash: —Ma abi bunacpadeç icsamboec tabadpanu —quiampampic Nuquin Papa. Adnëdambic nëbi icsabudquiec dada bunenquio yequi chido daëdi dachudnanec. <sup>27</sup> Adeçbidi chido bunenquio yequi dada daëdi chichudnante natia bunquiopec. Aden ambi chiaid niacniaquec icsamboec tabadsho Nuquin Papan cuidendac.

<sup>28</sup> Adeç abi tantiate bunenquio icsho isash: —Ma bëdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdadbimboecquin Nuquin Papan chiaid niac-niaquec icsamboec tabadpec bëdambo ictiadquidobi. <sup>29</sup> Nadquido icsamboec tabadquido nec. Nëidic aton chidopenquio chudquido. Nëidic aton bënëpenquio chudmequido. Nëidic icsamboshë icquido. Nëidic aton na dadpen bedteuidi bunquido. Nëidic chieshquido. Nëidic matses utsibobimboec icte bunec chieshëmënuquido. Nëidic cunesunianquido. Nëidic chieshëmënuquido. Nëidic muaquido. Nëidic icsa uate bunquido. Nëidic utsibo icsaiduidi chuiquido. <sup>30</sup> Nëidic ambenquio bi chuishunquin chieshënquin muauaquido. Nëidic Nuquin Papa chieshënquido. Nëidic mamënshumënuquido. Nëidic utsibo nashunenquio icquin aton nauidi naquido. Nëidic: —Ëbiuidtsëqui bëdambo iquebi —quequido. Nëidic: —¿Icsaquin atotsimbi utsi nape? —quec icsate bunquido. Nëidic anibëdtan amën chiaid niac-niacquido. <sup>31</sup> Nëidic piushbimboecquin Nuquin Papan chiaid tantienquio icquido. Nëidic aton matses tantienquio icquido. Nëidic nëishash baded nëish bëdanenquio icquido. Nëidic utsibo bëdamboen istiapimbo icquido. Adquidtedi Nuquin Papan chiaid niac-niacquiec icsamboec tabadquid nendac. <sup>32</sup> —Abi icsaid ëntiapimbo icquido Nuquin Papan cuidquin chian anëdënquiacno nësecaindac —quequin tantiequi ënëdenquio yec icsaded-icsadedquiec. Utsibotsen icsasho isash cuishonquec. —Bëdambo iquec. Èbipadquidquido nec —quepec.

## 2

### *Matsesën naid Nuquin Papan abimbo chuite*

<sup>1</sup> Aden icsamboec tabadaid ëmbi chuisho tantiashe: —Adquid icsamboshë iquec —¿quecta ique? —Aden naic aid icsaic —queboedi mibitsen adeçbidi icsapeç. —Icsaquidpenquio nebi —quec mibi muaic. <sup>2</sup> Nuquin Papambien matsesën naidtedi tantiaquid icquin: —Nëido icsambo iquec. Icsano nidmenu —quequin abimbo chiendac. <sup>3</sup> —Matses utsibo icsambo iquec —queboedombi mibitsen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac. <sup>4</sup> Ambi uaido matses abitedi icsambo icsho isash unësquio icquin matses bëdamboen iste bunquin icsaidobi Nuquin Papan baded cuidenquio iquec. —“Icsaboedi nëbi Nuquin Papan chiacpadeç bëdamboec tabadtiadquio iquebi,” quequin ma matsesën ëbi tantianu —queshun Nuquin Papan matses baded cuidenquio iquec. Abi icsaid ënenquio icsho isun cuidendac. ¿Adsho tantiashta mibi nadpe? —Mua. Nuquin Papan ëbi cuidtiapimbo iquec. Ambi chiaid niaquesambo nebi —¿quecta ique? Adeç onquec mibi muapec.

<sup>5</sup> —Nuquin Papan chiaid niacboedëmbi ënta —caqui: —Padi. Èmbi naiduidi naic bëdambo iquebi —quequin ënenquio icquin Nuquin Papan chiaid niac-niacbudeç icsamboecuidi mibi tabadec. Aden mimbi

Nuquin Papa cuidmendac. Nuquin Papan matsesën naidtedi chuite ushëmbi mîmbi icsamboen naidtedi chuishun Nuquin Papan mibi cuidendac. <sup>6</sup> Matsesën naidtedi tantiaquin matses cuidendac. Bëdambo icquido abëdi tabadmequin icsaido icsano nidmendac Nuquin Papan. <sup>7</sup> Abi tantiec bëdambo icquido: —“Mibi bëdambo iquec,” mabi Nuquin Papan canu —quiash abëd tabadte bunec Nuquin Papan chiacpadec bëdamboec tabadec nec. Aido unësacsho Nuquin Papan abëdi tabadmendac padpidec unëstiapimbo icnuc. <sup>8</sup> Icsaquidoen Nuquin Papan chiaid chiaqui tantiate bunenquoio icquin aton nauidi naic icsamboecuidi tabadsho Nuquin Papan comapenen cuidendac. <sup>9</sup> Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. <sup>10</sup> Abi tantiec bëdamboec tabadquido unësacsho abi yacno tabadmeshun: —Nëid bëdamboec tabadquid niondash —quequin utsibo tantiamequin Nuquin Papan bëdambo icmendac. Ambia Nuquin Papan chiaid tantiondaido Isadaidbo abi tantiaquid icsho abëdi tabadmequimbi matses utsibotsen abi tantiaquid icsho Nuquin Papan abëdi tabadmendac. <sup>11</sup> Icsamboec tabadquido icsano nidmequin bëdamboec tabadquido abëdi tabadmendac. —Isadaidbouditsëqui bëdamboen isembi —quenquoio icquin adoendac.

<sup>12</sup> Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidën chiaid niac-niaquec icsamboec tabadsho adembidi cuidendac. <sup>13</sup> Ambi: —Naden nata —quequin chiaid tantiashumbic adomboen naisa bëdamboen istiapimbo icquin ambi chiacpadec tabadquid Nuquin Papan bëdamboen istiasash. <sup>14</sup> ¿Ada Nuquin Papan chiaid tantiacmaidon matses utsibon bëdamboec tabadte tantienquoio iccuededpec? Ma bëdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bëdamboen naic Nuquin Papan chiaid tantiashumbimboen. <sup>15</sup> Adec bëdamboec tabadec: —Bëdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. <sup>16</sup> —Adec matses abitedi bëdamboec tabadte tantiequi adquieci tabadenquoio iquec —qeshun Nuquin Papan chiacpadën Esuquidistun matses cuidendac. Matsesën otacquoio tantiaidbëdta matsesën ompoquin naidtedi ambembi tantiashun Esusën matses cuidendac. Esus chuibanquin aden aidën cuidte chiombi.

### *Isadaidbon Nuquin Papan chiaid niac-niacaid*

<sup>17</sup> Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidën tsyuecquid icsho Nuquin Papan ëbi bëdamboen isec. Utsibon Nuquin Papa tantienquoio icnubi Nuquin Papambo con matsesbëdtambi bëdamboen tantiembi. Bëdambo iquebi —mibi quepec. Adboedi mibi icsaic. <sup>18</sup> Nuquin matses tsusiobon chuibanac Nuquin Papan ambi chiaid Moises dada uamepampid mîmbi tantiec. Nuquin Papan chiacpadec utsibo bëdamboec tabadsho isash: —Aido bëdamboec tabadec —queboedi mibi bëdamboec tabadenquoio icpec. <sup>19</sup> Adecbidi: —Nuquin Papan chiaid tantiacmaido Nuquin Papan chiaidquoio chuibanquid nebi.

Paposhquiacbimboecnuc tantiamequidquio nebi —mibi quepec. Ad-boedi aidën chiaid niaquec mibi icsaic. <sup>20</sup> —Chuisho tantiabi icquido nëbi tantiabentsëcquidobëdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquio chuibanquid nebi —mibi quepec. <sup>21</sup> Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. — Ampenda —queboedëmbi mimbitsen ampepec. <sup>22</sup> —Utsin chido chudenda —queboedëmbi utsin chido mimbitsen chudpec. Papa quequin matsesbimboecnuc matses utsibon nacnenaaid isash: —Nuquin Papa tantienquio yec nëid nacnenquid icsambo iquec —queboedëmbi aidën nacnenaaid tantiate shubun puduedshun mimbi ampepec. <sup>23</sup> —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. <sup>24</sup> Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquio iquec.

*Nuquin Papa tantiaquidquio icte chiaid*

<sup>25</sup> —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaid ambi chiaid niac-niaquenquio yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cacmaidobimboecnuc. <sup>26</sup> Nuquin Papan con matses cainquio icpampido matses utsiboen ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caidobimboecnuc. <sup>27</sup> Adec matses utsibo Nuquin Papan chiacpadec bëdamboec tabadsho isash isadaidbo nadec chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. <sup>28</sup> ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. <sup>29</sup> ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuio icnubi.

### 3

*Nuquin Papan isadaidbo tantiec, quequin chiaid*

<sup>1</sup> Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantiash: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? <sup>2</sup> Ai, aido nashunquiac. —Ëmbi chiaid dada uaid ma aidomba tantianu —quequin

con matses isadaidbo tsusedpabo ambi chiaid Nuquin Papan dada uamepampic. <sup>3</sup> Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsiniquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? <sup>4</sup> Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papan abimbo chuiquidquio nendac. Aden chuiquin Nuquin Papan con tsusedpa dada uamepampic. “Nuquin Papa abimbo chuiquidquio nec.

‘Nëid bédambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin Nuquin Papan: ‘Mibi icsaoc,’ quequin ëbi chuiboed chiombi,” quequin dada uapampic.

<sup>5</sup> Ëbi adsho bédamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bédambo icte tantiameshobi Nuquin Papan ëbi cuidac icsambo ictsiash —quequin icsamboen tantienda. <sup>6</sup> Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquio iquembi —quetiapimbo Nuquin Papa iquec. Muesambo nec. <sup>7</sup> Nadembidi icsamboen tantienda. —Ëbi muaquidquio icnubi: “Adquidpenquio Nuquin Papa nec. Bédamboshë iquec. Muesambo nec,” quetsiash con matses. Adec muaquimbi Nuquin Papa muainquio icte con matses tantiametsi-ambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda. <sup>8</sup> Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

*Matses abitedi icsaquido nec, quiaid*

<sup>9</sup> Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibëdec. Matses utsibo con matses isadaidbobëd abembi bédamboec tabadtiapimbo iquec. Abitedimbo icsamboec tabadquido nec. Aden mibi chiombi. <sup>10</sup> Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

<sup>11</sup> Nuquin Papa tantiaquin ambi chiacpadomboenuidi naquidquio nibëdec.

Nuquin Papa tantiate bunquidquio nibëdec.

<sup>12</sup> Bëndushun podqued tantienquio yacbimboen Nuquin Papa tantienquio icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibëdec.

Abitedimbo icsapec.

13 Nadquio iquec. Nēid icsamboec chuishumēnquido. Unēsaid ēnden chococacno shēdec: ‘Pisenac,’ quequin tantiacbimboen adquido onqesho tantiash: ‘Icsambo icquido nec,’ quequin matsesēn tantiec.

Nēidic muaquido.

Nēidic nisin pequin icsa uacbimboen icsa uate bunec icsamboec onquequido.

14 Nēidic nēishash chieshēmēnec: ‘Unēschitoshon,’ quequin icsamboenuidi chuiquido.

15 Nēidic intac mēyamec badedquio cuesunianquido.

16 Nēidic abēd icquido natiamec chieshēmēnquido.

17 Adquidtedi cuesnante bunec bēdamboec tabadtiapimbo iquec.

18 ‘Nuquin Papan cuidnushe,’ quenquio icquid Nuquin Papa tantiesabonec,”

quequin dada uamepampic.

<sup>19</sup> Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedidibēdtabi isadaidbotsen chiac: —Abimbo chiec —quiash dacuēdec ēcbedanenquio tabadendac matses abitedi. <sup>20</sup> Aden ambi chiaid niaquesambo nibēdnuc: —Ambi chiaid niaquesa icsho Nuquin Papan nuqui bēdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

*Nuquin Papa matses bēdamboen ismete chiaid*

<sup>21</sup> Aden ambi chiactedi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ēndenquimbo. Aden ambi dada uamepampicpadomboen nēbi Nuquin Papan abi matses bēdamboen ismequid matsesmpac caondash. <sup>22</sup> Adoac Nuquin Papa abi tantiacquido bēdamboen ismenuc Esuquidistu abided cuidadec unēspac caondash. Nēbi aidquio tantiasho Nuquin Papan matses bēdamboen isec. Isadaidbobēdtambi matses utsibontsen Esus tantiasho adoendac. <sup>23</sup> Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec. <sup>24</sup> Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc. <sup>25</sup> —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. <sup>26</sup> Nēbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquio iquendac.

<sup>27</sup> Ēmbi aden chuisho tantiash: —Ambi chiacpadomboenuidi nasho Nuquin Papan bēdamboen isebe —quequin mimbi abimbo chuitiapimbo

iquec. Matsesën Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec. <sup>28</sup> Aden matsesën ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec. <sup>29</sup> ¿Isadaidboudida Nuquin Papan bēdamboen ispatsiash? Padenquoio. Matses utsibo isadaidpembobi Nuquin Papan bēdamboen istsiash. <sup>30</sup> Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. <sup>31</sup> Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquoio. Esus tantiaquido icquin Nuquin Papan chiacpadomboen natiadquoio nuqui yanec.

## 4

### *Nuquin Papan Abadauan bēdamboen isaid*

<sup>1</sup> Tanta. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic? <sup>2</sup> Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembi —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquoio icpampic Nuquin Papa. <sup>3</sup> Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuipampic. <sup>4</sup> Matsesien adenquoio iquec. —Ambi chiacpadomboen nasho icbon yua bēdamboen isquid —nuqui quepec. <sup>5</sup> Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. <sup>6</sup> Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

<sup>7</sup> “ ‘Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ēbi bēdamboen isec ēbi icsaid bēpiscudacimboen.

Icsaisabimboecnuc ēbi bēdamboen isquin ēbi cuidenquoio iquendac,’ quiash matses bēdambo yec cuishonquec.

<sup>8</sup> ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquoio iquendac,’ quiash matses bēdambo iquec,”

quequin Dabidēn chuipampic ēndenquimbo.

<sup>9</sup> ¿Shui dēbid dēteshun secaido isadaidboudida Nuquin Papan bēdamboen ispec? Padenquoio. Matses utsibotsen bēdamboen istsiash. Tanta. Ēmbi chuiboedbidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacacmaidbimboecnuc. <sup>10</sup> ¿Ambi chiacpadomboen shui dēbid dēteshun

secacshoda Nuquin Papan Abadauan bēdamboen isbempampic? Padenquo. Shui dēbid dēteshun secabi icsho Nuquin Papan Abadauan bēdamboen isbempampic. <sup>11</sup> Bēdamboen isbenshumbic: —Abadauan, ěbi chiacpadomboen nabenta. “Nuquin Papan bēdamboen isaïdo nebi. Aid bēshunchitomane,” queshun min matsestedi shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon Esus tantiasho Nuquin Papan bēdamboen isendac ambi chiaïd niacniacmaidbimboecnuc. <sup>12</sup> Abadauanēn tsyuecquido isadaïdbo Abadauambimboecquido Nuquin Papa tantiaquido abi iquec. —Shui dēbid dētemenēdaïd icsho Nuquin Papan bēdamboen isebi —quenquo icquin Nuquin Papabēda Esus tantiasho isadaïdbo Nuquin Papan bēdamboen isaïdo abi iquec.

*Nuquin Papan Abadauan chiaïd*

<sup>13</sup> Ĕndenquimboshē Nuquin Papan Abadauan naden chuipampic. —Abadauan, mibi nibēdanan yuecshun min tsyuecquid abentsēcshun ut-sibo bēdambo icmendac. Nidaïd utsi-utsiec yacno tabadquido adoendac —quepampic Nuquin Papa. —Min tsyuecquid abentsēqui tantiasho mat-ses bēdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuïdi Abadauanēn nashoda Nuquin Papan aden chuipampic? Padenquo. Nuquin Papan chiac: —Ai, abimbo caic —queshoen Abadauan bēdamboen isbenshun Nuquin Papan adopampic. <sup>14</sup> ¿Nēbi: —Moisesēn chiaïd niaquesa icsho Nuquin Papan bēdamboen isebi —quec muaquïdoda Nuquin Papan bēdamboen ispadic? Padenquo. Adec muaquïdobi bēdamboen isquin ambi Abadauan chiaïd niactsiash. Adotiapimbo icquin ambi chiacpadomboen Abadauanēn tsyuecquid tantiaquïdoen bēdamboen isec. <sup>15</sup> —Moisesēn chiaïd niaquesambo nebi —queboedombi aidēn chiaïd niac-niacsho isun Nuquin Papan cuidendac. Ambi chiaïd niaquesambo nibēdec. Nuquin Papan: —Bēdamboec tabadta —quequin chiaïd nibēdnuc ambi aden chiaïd mat-sesēn niactiapimbo ictsiash. Ambi: —Bēdamboec tabadta —quequin chiaïd abi iquec. Aid niaquesambo nibēdec.

<sup>16</sup> Nuquin Papan naden Abadauan chuipampic. —Abadauan, ěmbi chuïsho tantiash: “Mimbi abimbo caic,” quesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquïdo Nuquin Papan bēdamboen isec. Nuquin Papan ambi chiaïd dada uamepampidēn Moisesēn tsyuecquido isadaïdbon Esus tantiasho Nuquin Papan bēdamboen isec. Abadauanēn Nuquin Papa tantiacpadomboen matses utsibontsen Esus tantiasho adembidi bēdamboen isec. Esus tantiaquïdtedishun papabimboecquid Abadauan nec. Ambi Nuquin Papa tantiacpadomboen nuqui tantiec. <sup>17</sup> Ambi aden Abadauan chiampid chuïquin Nuquin Papan isadaïdbo tsusedpa naden dada uamepampic. “Mibi unēsan yuectaneshun min tsyuecquido nidaïd utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanēn tantiapampic. —Comapenen tantiaquin unēsau uincuequïdquïdo icquin ambi chiacpadomboen ěbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin

Papa tantiacpadomboen Esus tantiaquido: —Nuquin papabimboecquid Abadauan nec —quepec.

<sup>18</sup> Nuquin Papan: —Min tsyuecquido dadpenquo iquendac —cac: —¿Mitsipadoac aitedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibëdnubi. Adshun tsusioctsäcquo icquimbi aton mado tishmepampic. Nëbi aton tsyuecquido dadpenquo iquec Nuquin Papan chiampicpadequi. <sup>19</sup> —Con seta dadpenquo 100tedi icnuc tsusiobudtsëcshun ëmbimbo bacuë tishmetiapimbo iquebi. Con chido ëndenquo machobudtsëccondaic icquin bacuë usundotiapictsäcquo iquec —quequin tantiequi: —Nuquin Papan abimboen caosh —quepampic. <sup>20-21</sup> —Nuquin Papa mue nec —quenquo yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatsëcboedëmbi aid tantiaquiopampic. Adshun: —Mibi bëdamboshë iquec, Papa —quequin Nuquin Papa chuipampic. <sup>22</sup> Adsho tantianshun Nuquin Papan bëdamboen isbempampic icsaisabimboecnu.

<sup>23</sup> Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? <sup>24</sup> Padenquo. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icho Esusbëdta abi uincuemequid Nuquin Papa tantiasho nuquitsen bëdamboen isec. <sup>25</sup> Nuquin Papan tantiacpadeq nuqui cuidmenquo icnuec nuqui icsaid bedshunec abided ciudadec Esus unëspanëdash. Aden Nuquin Papa abi tantiaquido bëdamboen ismenuec unësash uincuepanëdash Esus.

## 5

### *Esus tantiaquido Nuquin Papan bëdamboen isaid*

<sup>1</sup> Aden Esus tantiasho Nuquin Papan bëdamboen isaido yec abi cuidte dacuëdënenquo yec abëdi nuqui bëdamboec tantiananec. <sup>2</sup> Ëmbi chuibocpaden abi tantiaquido nuqui cuidmenquo icnuec abided unësqwin Esusën Nuquin Papa nuqui bëdamboen ismepec. Adoac nuqui nadpec. —Nuqui bëdamboen isquin unësacsho nuqui abipadquid icsaisa icmequin Nuquin Papan abëdi nuqui tabadmendac —quec nuqui cuishonquec. <sup>3</sup> Nadectsen nuqui cuishonquec. —Esus tantiaquid icsho utsibon chieshënaqui Esus tantiatsëcboedi chieshtoenquo icquin Esus tantiaquidquo yanebi —quectsen nuqui cuishonquec. <sup>4</sup> Aden chieshtoenquo icquin Esus tantiasho Nuquin Papan nuqui bëdambo capec. Adoac: —Esus tantiaquid icsho Nuquin Papan ëbi bëdambo icmec. Unësacsho abi yacno ëbi tabadmendac ambi chiacpadomboen —quepec nuqui. <sup>5</sup> Adec: —Abi yacno ëbi tabadmendac —quequin Esus tantiaquid ¿ada Nuquin Papan cacumepec? Padenquo. Aton Mayan nuquibëd icmiac paposhquiabimboen nuqui naden tantiec. —Nuquin Papan ëbi bëdamboen tantiaquin abi yacno ëbi puduedmendac —quequin nuqui tantiec.

<sup>6</sup> Aden matses tantiaquiec Nuquin Papan tantiacpadeq Esus nadpanëdash. Matses abitedi abembi bëdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquo icnuec abided ciudadec Esus unëspanëdash. <sup>7</sup> ¿Ada adquid matses icpadic?



Padenquio. ¿Cuesanquidën matses bëdambo icquid caic: —Cuesnu —quesho tantiaishunda dadpeshun: —Aid cuesenda. Èbiquien cuesta —capatsiash? Padenquio. Bëdamboshë icquid cuesmenquio icnuen: —Nëid cuesenda. Èbiquien cuesta —cachitembien ictsiash abentsëcshun. Icsambo icquid icshoen aden chienquio ictsiash. <sup>8</sup> Padnuen matses abitedi icsamboecuidi tabadnuc nuqui cuidmenquio icnuec Esuquidistu abided cuidadec unëspanëdash. —Nuquin Papan ëbi tantiaquiec —matses camenuen Nuquin Papan aden Esus namepanëdash.

<sup>9</sup> Nëbi abided cuidadaidquio Esus tantiaشو Nuquin Papan nuqui bëdamboen isec icsaisabimboecnuc. Aden bëdamboen isquin Nuquin Papan nuqui cuidtiapimbo iquendac. <sup>10</sup> Matsesën abi chieshënsho isun aido cuidte bunenquio icquin Nuquin Papan aton Madoded cuidpanëdash. Aden aton Madoded cuidash nëish bëdandshun Nuquin Papan aton Mado tantiaquid bëdamboen isec. Nëbi Nuquin Papan uincuemënëdaid icquin Esusën nuqui bëdamboen tabadmec. <sup>11</sup> Adembidi aidën tantiamiacpadomboen nuqui: —Èbi cuidenquio icnuen aton Madoded cuidquid bëdamboshë iquiec —quequin Nuquin Papa tantiec nuqui cuishonquiec.

*Adanën naidbëdta Esusën naid chiaid*

<sup>12</sup> Nuqui bëdamboen ismequid Esus tishabi icnuc abia matses uaidën Adanëmba Nuquin Papan chiaid niac-niaquiec icsasho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan icsacpadecebidi icsate tantiaquimbi Nuquin Papan unësquidouidquio matses icmepampic. <sup>13</sup> Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Èmbi Moises chuimiaid mimbi niac-niaquiec —Nuquin Papa quetiapimbo icnubi matses icsapampic. <sup>14</sup> Nuquin Papan chuiboedquiobi niaquiec Adamba icsasho Nuquin Papan cuidac unësec taëpampic. Adan unësbambic aidën nacpadomboen nabi icsa utsi naidquid matses abitedi icsasho adembidi unësquidouidquio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquio Esuquidistu nec.

<sup>15</sup> Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidouidquio Nuquin Papan icmepampic. Adecebidi Nuquin Papa matses bëdamboen ismequid abentsëc iquiec. Esusuidtsëqui abi tantiaquidotedi cuidmenquio icnuec abided cuidadec unëspac caondash. Nëbi aid tantiaشو Nuquin Papan nuqui bëdamboen isec. <sup>16</sup> Adanën nacbimboen Nuquin Papa matses bëdamboen ismequidën nambo. Adan abentsëqui icsaquin Nuquin Papa cuidmiac abi unëscapadquiec matses abitedi unësquidombo yanac. Nuquin Papa bëdamboen ismequidëmbien matses icsaid bedshunec abided cuidadquin Nuquin Papa abi tantiaquidotedi bëdamboen ismec icsaisabimboecnuc. <sup>17</sup> Ambi chuiboedi niacquin Adanën Nuquin Papa cuidmiash unësquid yanacpadece matses unësquidouidquio iquiec. Esuquidistunuidtsëqui nac Nuquin Papan matses bëdamboen isendac. Nëbi aid tantiaشو Nuquin Papan nuqui bëdamboen isquin bëdamboec tabadquid icmendac.

Adec bēdamboec tabadec unēsash Esusbēdtan Nuquin Papan namiacno bēdamboshē yacnombo nuqui tabadendac.

<sup>18</sup> Adec matses abentsēqui icsasho aidbēdta aton tsyuecquido matses abitedimbo cuidquin Nuquin Papan unēsquidoidquio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. <sup>19</sup> Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoidquio yanac. Padnuen Nuquin Papan chiaid niaquesambo icquin Esusēn Nuquin Papa nuqui bēdamboen ismec. <sup>20</sup> ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bēdamboen isec. <sup>21</sup> Taēc matses icsasho cuidac unēsquidoidquio yanac. Adsho isun matses bēdamboen isnuen Nuquin Papan ambi chiaid niaquesambo Esusded cuidac. Nēbi Nuquin Icho Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

## 6

### *Esus tantiaquid bēdamboec tabadquid, quiaid*

<sup>1</sup> Nuquin Papan bēdamboen iste ěmbi chuisho tantiashun naden tantienda. —Icsaido cuidmenquio icnuec abided Esus cuidadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. <sup>2</sup> Esus tantiaquido adesambo nec. Esus tantiec icsateuidi nuqui bunenquio yanec. <sup>3</sup> ¿Tantienquioda ique? Naden chuiquin mimbi acten mentomiac. —Ěbi cuidmenquio icnuec abided cuidadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. <sup>4</sup> Aden Esus abided cuidadec unēsaid tantiasho Nuquin Papan utsiacbimboecnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuenec.

<sup>5</sup> Adec abided cuidadec unēsaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiacbimboecnuc icmiaidtsen nuqui nec. <sup>6-7</sup> Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yacbimboec matses abembi icsaic ěnēdtiapimbo iquec. Adboedi Esus tantiec nuqui icsate bunenquio yanec.

<sup>8</sup> Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. <sup>9</sup> Nuquin Papan uincuemiab Esus padpidec unēstiapimbo iquendac. Aton dada unēsquid icboedi unēstiapimbo icquid yanac. <sup>10</sup> Matses

icsaido cuidmenquo icnuec abided abentsequi cuidadec Esus unēsac caondash padpidec unēsenuio yec. Adsho uincuemiāc Nuquin Papan chiacpadomboen nabanec aīdbēd tēshnanenquo yec tabadec.

<sup>11</sup> Ēbi adsho tantiash nadta. —Ēbi cuidmenquo icnuec abided cuidadec unēsacsho uincuemiāid Esus ēbēdi iquec. Aīd tantiec icsainquo yanēbi. Ambi nacpadec tabadiadquo iquebi —queta. <sup>12</sup> Icsamboec tabadenquo icnuna. Nuqui icsate bunaid nainquo icnuna. <sup>13</sup> — Icsaquionona —quesho tantiash: —Padi —quenuna. Unēsacimboen Nuquin Papa tantienquo ictenedēmbi uincuenacimboen Nuquin Papa nuqui tantiabenondaque. Ambi chiacpadec bēdamboequien tabadiad. <sup>14</sup> —Nuquin Papan ambi: “Bēdamboec tabadta,” quequin chiaid Moises dada uamiactedi naquin ēmbimbo Nuquin Papa bēdamboen ismembi —quenquo icquin Esus tantiasho Nuquin Papan nuqui bēdamboen isec. Ambi bēdamboen isaido yec nuqui icsate bunenquo nuqui yanēque. Bēdamboec tabadnuna.

*¿Tsuṣṣin yuabo Esus tantiaquido icpec? quequin chiaid*

<sup>15</sup> —Aden Nuquin Papan nuqui bēdamboen isec —quequin ēmbi chuisho tantiashun naden icsamboen tantienda. —Nēbi abided cuidadaid Esus tantiasho ēbi bēdamboen isec. Ēbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. <sup>16</sup> ¿Tantienquioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ēntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuenendac. <sup>17</sup> Mibi adec tabadsho isun: —Esus chuibanac icsaid ēntiapimbo icboedi Esus tantiabenash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. <sup>18</sup> Satanasēn yua icquin mimbimbo mibi icsaid ēntiapimbo icsho Nuquin Papan nac ambi chiacpadquiec mibi bēdamboec tabadcuenac.

<sup>19</sup> —Matses icquin: “Nuquin Papan chiaid tantiadenquo iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaidi nēbi Nuquin Papan chiacpadequien bēdamboec tabadiad. <sup>20</sup> Satanasēn yua yec icsaquiec Nuquin Papan chiacpadec bēdamboec tabadiapimbo mibi iccondac. <sup>21</sup> ¿Ada bēdamboec tabadonda? Ma mibi chieshēmēnquiec tabadteneyoc. —Ēbi chieshēmēnquiec tabadondaid tantiashun: “Mibi icsambo iquec,” ēbi canushe —queshun mimbi naondaid ma mimbi chienquo iccondac. Icsaid ēnabi yec unēsash icsano mibi nidtsenac. Adecbidi icsaid ēnenquo icquido unēsash icsano nidendac. <sup>22</sup> Nēbi nuqui Esus tantiasho Nuquin Papan aton yuabo nuqui icmiac. Adoac icsaid ēntiapimbo icboedi nēbi nuqui bēdamboec tabadcuenec. Adquid unēsacsho Nuquin Papan abēdi tabadmendac. <sup>23</sup> Icsaido cuidquin Nuquin Papan icsano nidmendac. Abided cuidadec unēsaid Esuquidistu Nuquin Icbo tantiasho Nuquin Papan nuqui bēdamboen isquin unēsacsho abēdi tabadmendac.

## 7

*Bēdamboec tabadte chuinuen chido bēnēchoquid Pabadon chiaid*

<sup>1</sup> Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen matsesēn naquid. Unēsun aidēn chiaid natiapimbo iquec —quequin mimbi tantianēdac. <sup>2</sup> Nuquin Papan chiapadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. <sup>3</sup> Bēnē unēsabi icnubi aton bēnē nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsias.

<sup>4</sup> Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidi abided ciudadec unēsaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincumenēdaidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash. <sup>5</sup> Esus tantiabi yec nuqui bunacpadecuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquinona —quiash nuqui icsaquiodenec. Adquid yec unēsacsho icsano nidmequin Nuquin Papan nuqui cuidtsenēdash. <sup>6</sup> Esus tantiabi yec nuqui nadondac. —Moisesēn chiapadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaidi nēbi Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

*Icsaquid nebi, quequin Pabadon chiaid*

<sup>7</sup> —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. <sup>8</sup> Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi. <sup>9</sup> Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. <sup>10</sup> Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac. <sup>11</sup> —Ambi chiapadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. <sup>12</sup> Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

<sup>13</sup> ¿Nuquin Papan chiaid isbanashta matses Nuquin Papan cuidtequido yanactic? Padenquio. Matses Nuquin Papan cuidtequido yanambic Nuquin Papan ambi chiaid dada uamepampic. —Nëid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Èbien cuidchitec —nuqui quianondac. <sup>14</sup> Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yacbimboen icsaquido icquin Nuquin Papan chiacpadomboen natiapimbo nuqui iquec. <sup>15</sup> —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. <sup>16</sup> —Nuquin Papan chiaid bēdamboen icchitec. Aidēn chiaid niacte bunenquio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. <sup>17</sup> Bēdamboecuidi tabadtiadquidini icsaquid yec ēbembi icsadenechitec. <sup>18</sup> —Bēdamboec tabadnu —queboedi icsaquid yec ēbembi bēdamboec tabadtiapimbo iquebi. Icsaquidini nec. <sup>19</sup> —Bēdambo icte bunebi —queboedi ēbembi bēdamboec tabadtiapimbo iquebi. —Icsate bunenquio iquebi —queboedi ēbenquiobi icsaded-icsadedebi. <sup>20</sup> Icsate bunenquio icboedi icsaquid yec ēbembi bēdamboec tabadtiapimbo iquebi.

<sup>21</sup> —Adquid nebi. Nuquin Papan chiacpadec bēdamboec tabadtiadquidi badedquio icsaded-icsadedebi —quequin tantiembi. <sup>22</sup> —Nuquin Papan chiaid bēdambo iqueque. Ambi chiacpadec ēbembi bēdamboec tabadnu —queboedi <sup>23</sup> icsaquid yec ēbembi bēdamboec tabadtiapimbo iquebi. Mētaniaid abembi mēnchiquidtiapimbo yacbimboen ēmbi naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. <sup>24-25</sup> Adquid yec shubitiadquio icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiembi. —Èbi bēdamboen tabadmequid Esus mimbi èbi tantiamiac. Mibi bēdambo iquec, Papa —quequin Nuquin Papa chiembi.

## 8

### *Nuquin Papan Mayanēn namiaid*

<sup>1</sup> Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. <sup>2</sup> Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniic aidēn tantiamiacpadec nuqui bēdamboec tabadanendac. <sup>3</sup> —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēspanēdash. <sup>4</sup> —Abided ciudadaid con Mado Esus tantiasho bēdamboen isquin con Mayan matses

menendambi. Adoac aidën tantiamiac ëmbi Moises chuimiampicpadec bëdamboec tabadendac. Matses abi icsate bunacpadec icsainquo yec bëdamboec tabadendac —qeshun Nuquin Papan Esused cuipac caondash.

<sup>5</sup> Adec Nuquin Papan Mayanën tantiamiaid Esus tantiaquid Nuquin Papan tantiacpadec bëdamboec tabadte bunec. Padnuen icsaquid: — Ëbi bunaid nanu —quequin ambibi tantiacpadec icsaic. <sup>6</sup> Aden abi bunaidquo naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquo yec bëdambo yec unësash Nuquin Papa yacno tabadendac. <sup>7</sup> —Icsate bunquidën ëbi chieshë nec. Ambi naiduidtsëqui naquin ëmbi chiacpadomboen natiapimbo iquec —qeshun Nuquin Papan cuidendac. <sup>8</sup> Adquido chuquin: —Mibi bëdambo iquec —catiapimbo Nuquin Papa iquec.

<sup>9</sup> Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bëdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec. <sup>10</sup> Abided cuidadaid Esus tantiasho bëdamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho Nuquin Papan abëdi tabadmendac. <sup>11</sup> Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

<sup>12</sup> ¿Ëbi adsho tantiashta Esus tantiaquid abi bunacpadequi icsapec? Padenquo. Bëdamboec tabadte bunec. <sup>13</sup> Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid nuqui ë nec. Adash unësash Nuquin Papa yacno nuqui tabadendac.

<sup>14</sup> Aden aton Mayanën bëdamboec tabadmiaido Nuquin Papan: —Con mado nec. Con champi nec —capendac. <sup>15</sup> ¿Icbo icsambo icquidën yua dacuëdmiacbinboenda Nuquin Papan Mayanën nuqui dacuëdmecc? Padenquo. Nuqui bëdambo icmec. Aidën tantiamiacpadomboen Nuquin Papauidtsëqui papa nuqui capec. <sup>16</sup> Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. <sup>17</sup> —Con mado nec. Con champi nec —qeshun nëbi Nuquin Papan nuqui bëdamboen isquin unësacsho abëdi tabadmequin nuqui bëdamboshë icmendac. Utsibon chieshë nac chieshtoenquo yec unësacsho Nuquin Papan abëdi tabadmequin Esus bëdamboshë icmiac. Adembidi Esus tantiaquid icsho utsibon chieshënaqui chieshtoenquo icquin Esus tantiequi unësacsho Nuquin Papan abëdi tabadmequin nuqui bëdamboshë icmendac. Nuquin Papa yacnombo Esuquidistun natedi nuquin na nendac.

*Nuquin Papan bëdamboshë icmete chiaid*

<sup>18</sup> Adec Nuquin Papa yacno nuqui bëdamboshë icte tantiaquin nuqui nidaidën natiaic tabadaiduidi ma nuqui tantiatiapimbo iqueyoc. <sup>19</sup> Aden Nuquin Papan nuqui bëdamboshë icmete tantieci ambi uaid utsitedi nidaidën icquidtedi aben icquidtedi: —Nëbimbobi bëdambo icmepashuni —queded-quededec tabadec. <sup>20</sup> Abia matses uaid Adan icsasho

cuidquin ambi uaid nidaidën icquidtedi Nuquin Papan unësquiduidquo icmepampic aidon: —Padi —catiapimbo icnuc. <sup>21</sup> —Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi chodquete icboedi utsi uain bëdamboshë icmendambi —quequin tantiaquimbi unësquiduidquo icmepampic. Aden Nuquin Papan chiaid tantiaquin ambi uaidon nidaidën icquidtedishun aton dada abi bëdambo icmete tantiaquin cainec tabadec. <sup>22</sup> Unëstiapimbo icte bunec unësquid yec: —¿Tedectsicshun Nuquin Papan nuqui utsi uapeba? Nëbimbobi Nuquin Papan utsi uapashuni —queded-quededec Nuquin Papan uaidtedi. Bacuë tishquid bacuë paëmbo icnuc: —Badedquo tishmepashuni —quiabimboec adpec. <sup>23</sup> Nuquin Papan meniaidën aton Mayanën tantiamiacpaden nuquitsen naden chiec. —Con dada utsi uaquin unëstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unëstiapimbo icquid icmendac —queded-quededquin nuquin dada utsi uate tantiaquin nuqui cainec. <sup>24-25</sup> —Esus tantiaquido unësacsho Nuquin Papan nuquin dada utsi uaidac —quequin tantiaquin nuqui Esus tantiabonondac. Nuquin dada utsi uabi icnubi: —Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iquendac.

<sup>26</sup> —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibëd icquin bëdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquo icsho isun Nuquin Papan Mayanën abi chiec. Unësquo icnuc onquenquio icquin chiec: —Mimbi tantiacpadomboen aid matses bëdambo icmeta, Papa —quequin Nuquin Papan Mayanën nuqui comapenen chuided-chuidedec. <sup>27</sup> Aden Nuquin Papan: —Ma Esus tantiaquido bëdambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

*Nuquin Papan nuqui bëdambo icmiaid*

<sup>28</sup> Aden tantiasahun nuqui naden tantiec. Ambi tantiamiacpadomboen abi tantiaquido bëdambo icmete bunquin Nuquin Papan bëdamboen nashunec. Unësquo yec tabadsho aden naic. Natiambo icsho adembidi naic. Cuishonquesho adembidi naic. <sup>29</sup> Ëndenquimboshë nidaid uabi yequi Nuquin Papa nadpampic. —Ëmbi tantiaidtedi ëbëdta con Mado tantiaquid icmequin Esuspadquo icnuc bëdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bëdambo icmenuen Nuquin Papan naic. <sup>30</sup> Ëndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuc abided cuidadaid Esus tantiasho Nuquin Papan nuqui bëdamboen isec isaisabimboecnuc. Nuqui bëdamboen isquin nuqui bëdamboen tabadmec. Unësacsho nuqui unëstiapimbo icquid icmeshun abëdi tabadmendac.

<sup>31</sup> ¿Embi aden chiaidtedi tantiashta Esus tantiaquido dacuëdpec? —Nuqui cudashun Nuquin Papan nuqui bëdambo icmendac. Ëbi chieshënquidën: “Cuid,” cac Nuquin Papan ëbi cuidenquio ictsiash —quec nuqui dacuëdenquio iquec. <sup>32</sup> Nuquin Papan nuqui tantiaquiec.

Aton Madombo cudasenquo icquimbi nuqui cuidenquo icnuen aton Madoded cuidquin unës uamepanëdash. Adshumbic Esus tantiasho ënenquo icquin bëdamboen isquin nëbi bëdambo icmequin unësacsho abëdi tabadmequin nuqui bëdamboshë icmendac. <sup>33</sup> ¿Nuquin Papan nuqui bëdamboen isquidëmbida nuqui cuidpec? Padenquo. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquo. <sup>34</sup> ¿Esusëmbida nuqui cuidpec? Abi tantiaquido cuidmenquo icnuec abided ciudadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Ëbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquo. <sup>35</sup> Nuqui bëdamboen isquin ënenquo icquin Esusën nuqui tantiaquiec. ¿Shubisho isunda Esusën nuqui tantienquo icpec? Padenquo. ¿Dacuëdshoda Esusën nuqui tantienquo icpec? Padenquo. Adembidi nuqui tantiaquiec. Utsibon chieshënsho bëdamboen isquinc pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Ëbi acshunendac —quesho bëdamboen isquinc chieshëmëñquidon: —Cuesunenu —casho bëdamboen isquinc nuqui caindac Esusën ënenquo icquin. <sup>36</sup> Aden utsibon Esus tantiaquido chieshënte chuiquin Nuquin Papan dada uamepampic naden. “Mibi tantiasho ëbi: ‘Cuesunenu,’ caded-cadedec uimanëmëñquidon. Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

<sup>37</sup> Aden utsibon nuqui chieshënsho Esuquidistun nuqui bëdamboen tantiaquiec. Shubisho abi nuqui tantiamec. Adoac Esus tantiatsec shubiquimbi chieshtoenquo icquin nuqui Esus tantiaquiec yanendac. <sup>38-39</sup> Nuquin Papantsen ënenquo icquin nuqui tantiaquiec. Nuquin Icho Esus tantiasho Nuquin Papan nuqui bëdamboen isec. Unësacsho nuqui bëdamboen tantiatsiash. Unësabi icsho nuqui bëdamboen isec. ¿Nuquin Papan abi yacnoshon uaid mayan bëdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquiotsiash. ¿Podobitsi icsabon icbo Satanasën: —Aid tantienda —cacta Nuquin Papan nuqui chieshëmpatsiash? Padenquo. Adembidi nuqui tantiaquiotsiash. Nëbi nuqui bëdamboen tantiec. Yüecshun adembidi nuqui bëdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bëdamboen tantiatsiash. Nidaid uquëducquo nidacsho adembidi nuqui bëdamboen tantiatsiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bëdamboen tantiatsiash ënenquo icquin.

## 9

### *Pabadon aton matses isadaidbo chiaid*

<sup>1-2</sup> Aden con matses isadaidbo tantiaquid Nuquin Papa nec. —Aden abi tantiaquidi con matsesën bëdamboen tantienquo iquec —quiash shubitiadayan iquebi. Muainquo iquebi. Esus tantiaquid icsho Nuquin Papan Mayanën tantiamiaid icquin abimbo chiembique. Tantiata. <sup>3</sup> Con matses isadaidbo tantiec unësquo yec tsadebi. Nuquin Papan: —Min



matses abitedi cuidenquo icnuen mibiuidtsëqui Esusbëd tabadmenquo icquin icsano nidmequin cuidnu —capatecnëdani. Adoac: —Ai, con matses cuidenquo icnuen ëbided cuid —quetsenondabi. <sup>4</sup> Con matses tsusedpa Acobo caid Nuquin Papan Isadaid caidën tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibëdi tabadebique. Mibi ismenu —quequin con matses tabadacno abu ushu bëchamauanquiecqquad chomequin ismepampic. Adashic nadpampic. —Ëmbi chiacpadec bëdamboec tabadsho mibi bëdamboen isquin bëdambo icmendambi. Mibi nianenquo iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bëdambo icmendambi —quequin Nuquin Papan con matses chuiampic ëndenquimboshë. <sup>5</sup> Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquobi yec abitedishun Icho yec matsesac caondashe. Esu chuiquin: —Nuquin Papa padquobi yec mibi bëdamboshë iquec —canuna ënenquo icquin.

<sup>6</sup> Ëmbi chiacpaden Esus tantienquo icsho Nuquin Papan con matses dadpen bëdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquo icquin con matses bëdamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpenshun Nuquin Papa bëdamboen tantienquo iquec. Ambi tantiatedishun abi tantiasho ambi chiacpadomboen Nuquin Papan bëdamboen isec. <sup>7</sup> Ëndenquimboshë con tsusedpa Abadauanën mëdaittedi adembidi Nuquin Papan bëdamboen isambo. Abadauanën mado abentsëqui Isac caic: —Aidën tsyuecquido ëmbi mibi cuënacpadomboen con matses caindambi —quequin Nuquin Papan chuiampic. <sup>8</sup> ¿Abadauanën bacuëbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquën tsyuecquido Nuquin Papan con matses caido nec. <sup>9</sup> Naden Nuquin Papan Isac tishte chuiampic. “Ëmbi tantiacpadën choashun ëmbi namiac Sadan min chidon dada bacuë tishendac,” quepampic Nuquin Papa Abadauan chiech.

<sup>10</sup> Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquën bacuë abi ushëmbi daëd tishte chuiampic. Adnubien con tsusedpa Isaquën aton chido Debeca caid bedshun chudquin dada bacuë daëd usundomepampic Nuquin Papan chiacpadomboen. <sup>11-12</sup> Aid dada bacuë daëd tishabi icshobi Nuquin Papan ani naden chuiampic. “Ëmbi tantiacpadquid min madon utsimpi bëyucquidbimboecquid nendac,” quepampic. Aid daëd tishabi bëdamboec tabadtiapimbo icnubi: —Tishacsho ëmbi tantiacpadembi tsyuec tishtsaidëmpi abentsëqui bëdamboen isendambi —quequin tantiec adpampic Nuquin Papa. <sup>13</sup> Adembidi Isaquën mado chuiquin Nuquin Papan ambi chiaid dada uamepampic. “‘Acobouidtsëqui tantiaquiquin aton buchimpi Esu bëdiactsëc tantiatendambi,’ quepampic Nuquin Papa,” quequin dada uamepampic.

<sup>14</sup> ¿Ëmbi aden chuisho tantiash: —Nuquin Papa icsambo iquec — quecta mibi ique? Ma Nuquin Papa icsapenquio icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bēdamboen isec. <sup>15</sup> Aden Nuquin Papan con tsusedpa Moises chuipampic.

“Embi tantiactedi matses bēdamboen isendambi. Aidedi cuidenquio iquendambi,”

quequin chuipampic. <sup>16</sup> ¿—Ëmbembi nasho Nuquin Papan bēdamboen istsiash —quec matses bunacpadenda Nuquin Papan matses bēdamboen ispec? Padenquio. Ambi tantiactedishun abi tantiasho Nuquin Papan bēdamboen isendac. <sup>17</sup> Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuipampic. “ ‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icbo yec nadatiambo icquidquo nec, ma ēbi canu,’ quequin mibi chuiquid dapa icmiondambi. Mibi icsasho pacuēnēdācbimboecnuc mibi icmembi,” quequin Nuquin Papan padaon chiaid Moisesēn dada uapampic. <sup>18</sup> Aden ambi tantiacpadomboen utsi-utsien icsaido pacuēnēdācbimboecnuc icmequin abi tantiamenquio iquec. Adembidi utsi-utsien bēdamboen isquin abi tantiamec.

<sup>19</sup> ¿Ēbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icbo icquin Nuquin Papan namiacta matsesēn nainquio icpadic? —¿quecta ique? <sup>20</sup> ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ēbipadquid matses uao, Papa? —¿capenda nuqui ique? <sup>21</sup> ¿Ada abi nacnenquid matsun chushcapadic? Padenquio. Matsu nacnenquidēn ambi tantiacpadomboen nacnenendac. —Nēid nidaid tēshē tēchu bēdambo icquid actē uetequid nacnenu. Nēid nidaid tēshē matsumpi icsactsēcquid opa acmete nacnenu —quequin matsu nacnenquid. Aden ambi tantiacpadomboen nidaid tēshun nacnenquid.

<sup>22</sup> Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquo nebi. Adquid icquin icsaido cuidquid nebique. Ismenu —queboedēmbi ambi cuidtequido baded cuidenquio iquec. Ambi ēndenquimboshē tantiacpadomboen aido icsano nidmendac. <sup>23</sup> —Ma ēmbi bēdamboen isaidon naden tantianu. “Icsaisambo icquin matses bēdamboen iste bunquin Nuquin Papan icsaido badedi cuidenquio iquec,” quequin ma tantianu —qeshun icsaido badedi cuidenquio iquec. Ambi ēndenquimboshē tantiacpadomboen ambi bēdamboen isaido abēdi tabadmendac.

<sup>24</sup> Aden ambi tantiacpadomboen Esus tantiasho Nuquin Papan nuqui bēdamboen isec. Isadaidbon abi tantiasho bēdamboen isquinc isadaid-pembo matses utsibon abi tantiasho bēdamboen isquinc nuqui caindac. <sup>25</sup> Ambi matses utsibotsen aden bēdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ēmbi con matses cacmaidobi con matses cabenendambi. Adembidi ēmbi bēdamboen tantiacmaidobi matses utsibo bēdamboen isbenendambi,”

quequin Nuquin Papan chiaid dada uashun <sup>26</sup> nadentsen dada uapampic.

“Matses utsibo ambi con matses cacmaidobi ambi tantiacpadēn aido abentse-abentsen Nuquin Papan bēdamboen isendac. Bēdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bēdamboen iste chuiquin dada uapampic.

<sup>27</sup> Ambi con matses caidombi abi tantiatipimbo icsho isash Nuquin Papa chushquaid con tsusedpa Isayasēn naden dada uapampic. “Masitedi dadpenquo caidnēdaido isadaidbo daēdpectsēcshun abi tantiasho bēdamboen isquin aitedtsēqui Nuquin Papan cuidenquo iquendac.

<sup>28</sup> Ambi chiacpadomboen ambi tantiacpadēn matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasēn dada uapampic. <sup>29</sup> Nuquin Papan chiaid padpiden dada uaquin isadaidbo cuidte Isayasēn chuipampic naden.

“Shubu dadpen icquid Sodoma caid yacnocquidobēda shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibēdquiec iquendac.

Adembidi con matses Nuquin Papan uesquin cuidtsempanēdash.

Abitedishun Icho icquin con matses nibēdquiecnuc cuidtsempanēdash.

Dadpen cuidquin daēdpectsēc cuidabi icpanēdash,”

quequin dada uapampic Isayasēn.

*Isadaidbo bēdamboen istiapimbo icte chiaid*

<sup>30</sup> Aden Isadaidbo dadpenhun abi tantienquo icsho Nuquin Papan bēdamboen istiapimbo iquec. Padnuen matses utsibo: —Mabi Nuquin Papan bēdamboen isnu. Ambi chiacpadec bēdamboec tabadnu —quesabobi: —Ēbi cuidmenquo icnuec abided cuidadec unēsaid Esus bēdamboshē iquec —quesho Nuquin Papan bēdamboen isec icsaisabimboecnuc. <sup>31</sup> Isadaidboen: —Moisesēn chiampiduidi ěmbembi nasho Nuquin Papan bēdamboen isebi —queboedombi nainquo icsho Nuquin Papan bēdamboen istiapimbo iquec. <sup>32</sup> ¿Atotsieshun Nuquin Papan isadaidbo bēdamboen istiapimbo icpec? —Ambi chiacpadomboenuidi ěmbembi naquin Nuquin Papa bēdamboen ismembi —queboedombi adotiapimbo icquin Nuquin Papa bēdamboen ismequidquo Esus chieshēnec.

Adsho Nuquin Papan bēdamboen istiapimbo iquec. <sup>33</sup> Esus tishabi icnuc isadaidbon Esus chieshēnte chuiquin Nuquin Papan con tsusedpa naden dada uamepampic.

“Buintad bēdambo icquid istuidash: ‘Nēidquo shubu uanun nitsinembi,’ quiachimboen

Edusaden yacno ěbi bēdamboen ismequidquo isadaidbobēd tabadmendambi.

Adec tabadsho anocquidon chieshēnendac.

Aid chieshēnquid nadquo iquendac. ‘Cuēte mabud iquec,’ quequin tantienquo yec nidec tocoshquetanec uebudacimboec

ěbi bēdamboen ismequid tantienquo yec unēsash icsano nidendac.

Aid tantiaquido: ‘Nēid tantiasho Nuquin Papan abi yacno nuqui tabadmendac,’ quequid unēsacsho ěbi yacno tabadmendambi,”

quequin Nuquin Papan ambi chiaid dada uamepampic.

## 10

<sup>1</sup> Con matses isadaidbo tantiac unēsquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bēdamboen ista, Papa —quequin Nuquin Papa chianiombi. <sup>2</sup> Esus tantiabi ěmbi chuidenecpadomboen chiec: —Nuquin Papan chiacpadomboenuidi naquin Nuquin Papa bēdamboen

ismembi —quetsēchoedombi con matsesēn Nuquin Papa bēdamboen ismete tantienquo iquec. <sup>3</sup>—Abided cuidadaid Esus tantiasho Nuquin Papan bēdamboen isebe —quetiadquidi icsamboen tantiec. —Nuquin Papan: “Bēdamboec tabadta,” quequin chiaid Moisesēn dada uactedi naquin Nuquin Papa bēdamboen ismembi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec. <sup>4</sup> Esusuidtsēqui Nuquin Papan: —Bēdamboec tabadta —quequin chiaid Moisesēn dada uactedi naquidquo nec. Adec icsaisa yec matses icsaid bedshunuec abided cuidadec unēsac caondash. Nēbi Esus tantiasho Nuquin Papan matses bēdamboen isec icsaisabimboecnuc.

<sup>5</sup> Nuquin Papan chiaid dada uaquin Moisesēn chuipampic naden. “Ambi chiacpadomboenuidi naquid Nuquin Papan bēdamboen isquin abēdi tabadmetsiash,” quequin Nuquin Papan chiaid Moisesēn dada uapampic. <sup>6</sup> Aden ambi chiacpadomboenuidi natiadquidombi natiapimbo icsho Nuquin Papan matses bēdamboen istiapimbo icpanēdash. Nēbi abided cuidadaid Esus tantiasho nuqui bēdamboen isec. Adoac Esus tantiaquido nadenquo iquec. —Nuquin Papa yacno nidshun ¿tsuntsin Nuquin Papa nuqui bēdamboen ismepatsiashba? —quenquo nuqui iquec. —Esusquo Nuquin Papa bēdamboen ismequidquo nec —quequin nuqui tantiec. <sup>7</sup> Aden tantiec: —¿Tsuntsin Nuquin Papa bēdamboen ismequidquo uincuemepatsiashba? —quenquo nuqui iquec. —Abided cuidadec unēsacsho Esus uincuemiac caondash —quequintsen nuqui tantiec. <sup>8</sup> Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiembi,’ qesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenequid nebi. <sup>9</sup> —Nuquin Papan uincuemiaid Esus abitedishun Icbo neque. Con Icbo Esus canu —quequin chuisho Nuquin Papan nuqui bēdamboen isquin cuidenquo iquendac. <sup>10</sup> —Ēbi cuidmenquo icnuec abided cuidadaid Esus tantiembi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquo iquendac.

<sup>11</sup> Ambi chiaid Nuquin Papan dada uamiacpaden:

“Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

<sup>12</sup> Isadaidbo yec matses utsibo yec quequido Esus tantiaquidtedi adoendac. Aden abitedishun Icbo icquin abi tantiaquidtedi Esusēn bēdambo icmendac. <sup>13</sup> Aden Esusēn nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique. Ēbi bēdamboen ista, Icbo,’ qesho bēdamboen isquin cuidenquo iquendac,” quequin dada uapampic.

<sup>14</sup> ¿Mitsipaden matsesēn Esus tantiabempec? ¿Esusēn naid chiabi yacta matsesēn tantiapec? Padenquo. Esusēn naidquo chuibanapien tantiendac. ¿Esusēn naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiembique. Ēbi bēdamboen ista, Papa —quequidien Esus tantiaquid nec. <sup>15</sup> ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquo. Nuquin Papan: —Con Mado

chuiheneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

*Isadaidbo dadpeshun Esus tantienquo yaid*

<sup>16</sup> Adquidën Esusën naid chuibanac isadaidbo dadpeshun Esus tantienquo iquec. Daēdpactsēcshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquo ëmbi chuibansho ¿tsuntsin tantiapec, Papa? Daēdpactsēcshun: ‘Abimbo mimbi chiec. Mibi tantiaquin mimbi chiacpadomboen naimbi,’ ëbi caindac, Papa,” quequin Esusën aton Papa chuite Isayasën dada uapampic. <sup>17</sup> Aden Esusën naid chuibansho tantiaashun: —Abimbo caic —queshun utsibon Esus tantiec.

<sup>18</sup> ¿Esusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc.

<sup>19</sup> Aden Nuquin Papan chiaid chuisho tantiaash: —Tantiadenquo yec onquec —¿quepecta icnēdash con matses? Padenquo. Tantiashi abi bēdamboen tantiate bunenquo icsho isun matses utsibo bēdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ëmbi bēdamboen iste mimbi danubi ëmbi con matses cacmaidobi matses utsibo bēdamboen isbenendambi.

Ëmbi matses utsibo bēdamboen iso isash: ‘¿Atotsieshun Nuquin Papan matses utsibo bēdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bēdamboen isquin mibi nēishēmendambi,”

quequin Nuquin Papan Moises dada uamepampic. <sup>20</sup> Adembidi dacuēdenquo icquin Isayasën Nuquin Papan matses utsibo bēdamboen iste dada uapampic.

“ ‘Nuquin Papa tantiatadquo iquebi,’ quenquo icquidombi ëbi tantiahenosh.

‘¿Mitsipadembimbi Nuquin Papa bēdamboen ismepeba?’ quesabobi ëmbi bēdamboen iste tantiamiombi,”

quequin Isayasën Nuquin Papan chiaid dada uapampic.

<sup>21</sup> Isadaidbotsen chuiquin Nuquin Papan chiaidquidobi Isayasën naden dada uapampic. “ ‘Mibi tantiac unēsquo iqueque. Ëbi bēdamboen tantiaata,’ cadeniaqui: ‘Padi, mibi tantiatapimbo iquebi,’ quequin ënenquo icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

## 11

*Ambi chiactedi isadaidbo Nuquin Papan bēdamboen isaid*

<sup>1</sup> ¿Ambi chiaid niac-niacsho isadaidbotedida Nuquin Papan chieshēmpic? —Con matses catiapimbo iquebi —¿quecta iquec? Padenquo. Isadaidbombo nebi. Ëndenquimboshē con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan

chieshēnenquo iquebi. <sup>2</sup> Ēndenquimboshē nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshēnenquo iquec. ¿Ediasēn chiampid tantienquioda ique? Aton matses isadaidbo nēishēnshun Nuquin Papa naden chuipampic. <sup>3</sup> “Mimbi con matses caidotedi icsamboshē icquec, Papa. Mimbi chiaid chuibanquidobi cuesun secac. Papa quequin mibi menequin ismete cuēnote nacnenaid uesquin chic-chicpac, Papa. Icsamboshē iquec. Ēbiuidtsēqui bēdambo iquec. Mimbi chiaid chuibancho tantiashun ēbi cuesunetiadquo iquec, Papa,” quequin Ediasēn Nuquin Papa chuipampic. <sup>4</sup> Adoac ¿mitsipadomboen Nuquin Papan chuipampic? “Ēbi tantiaquido abi iquec. Ēmbi namiacpadomboen isadaidbo dadpenshun 7000tedishun ēbi tantiec. Ēbi tantiesabon papa quequin nacnenaid Bad caid tantienquo icquin ēbi tantiec,” quequin Nuquin Papan Edias chuipampic. <sup>5</sup> Adembidi nēbi con matses isadaidbon ambi tantiatedishun Esus tantiasho Nuquin Papan bēdamboen isec. <sup>6</sup> ¿Ambembida con matsesēn Nuquin Papa bēdamboen ismepec? Padenquo. —Ēmbi chiacpadomboenuidi nasho matses bēdamboen isembi —¿quecta icpec Nuquin Papa? Padenquo. Aden naquid nibēdsho bēdamboen istiapimbo icboedēmbi ambi tantiatedishun icsaboedon Esus tantiasho Nuquin Papan bēdamboen isendac.

<sup>7</sup> Isadaidbon ambi tantiatedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ėmbimbo nanu —queboedombi nainquo icsho Nuquin Papan bēdamboen istiapimbo iquec. Abi bēdamboen ismequidquo Esus chieshēnsho Nuquin Papan pacuēnēdabimboecnuc isadaidbo icmepanēdash. <sup>8</sup> Aden ambi isadaidbo pacuēnēdabimboecnuc icmete chuiquin Nuquin Papan dada uamepampic naden.

“Nuquin Papan pacuēnēdabimboecnuc icmiac Nuquin Papan chiaid chiqui tantiatiapimbo iquec,”

quequin dada uamepampic. <sup>9</sup> Adembidi ambi isadaidbo pacuēnēdabimboecnuc icmete chuiquin Nuquin Papan con tsusedpa Dabid naden dada uamepampic ėndenquimboshē.

“‘Ēbi bunaiduidi naic ėbibi bēdambo iquebi,’ quequidēmbi Nuquin Papa bēdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ēmbembi naic bēdambo iquebi,’ quendac.

Adec abi tantienquo yec icsasho Nuquin Papan cuidpashun.

<sup>10</sup> Pacuēnēdabimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

*Nuquin Papan matses utsibo bēdamboen isbenaid*

<sup>11</sup> ¿Aden pacuēnēdabimboecnuc icmiac Esus tantiatiapimbo icsho isadaidbo padpiden bēdamboen tantiametiapimboda Nuquin Papa icpec? Ambi tantiacpadomboen bēdamboen tantiamendac. Nēbi isadaidbo dadpen bēdamboen istiapimbo icquimbi matses bēdamboen iste bunquin Nuquin Papan matses utsibo Esus tantiamequin bēdamboen

isbenec. —Ĕmbi adosho isash isadaidbotsen ma nadnu. “Nuquin Papa bēdamboen ismete bunquiebique. Ĕmbitsen Esus tantianu,” ma quenu —qeshun Nuquin Papan aden matses utsibo ambi bēdamboen iste tantiamiac. <sup>12</sup> Ambi chomiaid Esus tantienquo icsho isadaidbo dadpen bēdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bēdamboen isbenec. Ambi tantiacpadēn ambi tantiamiacpadomboen isadaidbo dadpenshun Esus tantiabensho Nuquin Papan bēdamboen isendac. Adshumbic matses utsibobēdta isadaidbo Nuquin Papan bēdamboshē icmendac.

<sup>13</sup> Tantia, matses utsibo. Mibitsen chuinu. Nuquin Papan icmiacpadomboen matses utsibo Esusēn naid chuibenequidquo nebi. Ĕmbi chuibeneboed con matses isadaidbo chuibanombi naden. —Esusēn naid Ĕmbi chuibeniac matses utsibon Esus tantiabenosh. Adsho Nuquin Papan aido bēdamboen isbenosh —quequin con matses chiombi. <sup>14</sup> — Aden Nuquin Papan matses utsibo bēdamboen isaid Ĕmbi chuisho tantiash Nuquin Papa bēdamboen ismete bunquin Esus tantiatsiash. Adsho Nuquin Papan bēdamboen istsiash —qeshun con matses aden chiombi. <sup>15</sup> Aden isadaidbon Esus chieshēnsho isun Nuquin Papan matses utsibo Esus tantiamequin bēdamboen isbenac. Ambi tantiacpadēmbi isadaidbontsen Esus tantiasho Nuquin Papan bēdamboen isbenendac. Isadaidbontsen Esus tantiabededsho isumbic Nuquin Papan matses unēsaidotedi uincuemendac. <sup>16</sup> Con tsusedpa Abadauan abi tantiaquidquo icsho Nuquin Papan bēdamboen isquin: —Con matses mibi caimbi. Adembidi min tsyuecquidotsen Ĕmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuēte caniacsho: —Tapunuidtsēqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaidbotedi con matses caic. Caniec taēquid cuēte tapumbimboecquid abia con matses caid Abadauan nec. Cuēte cuidibimboecquido Nuquin Papan con matses caidobidi Abadauanēn tsyuecquido isadaidbo nec.

<sup>17</sup> Aden ambi con matses caidombi ambi chomiaid chieshēnsho cuēte cuidi utsi pobinun pateshuniacimboen Nuquin Papan isadaidbo dadpen bēdamboen istiapimbo iquec. Matses utsibo Esus tantiamequin cuēte dada utsi pobiacimboen aton matses icmequin ĕbipadquid isadaidbo ambia Esus tantiaquidobēdta Nuquin Papan mibi bēdamboen isec. <sup>18</sup> Adoac icsamboec onquenda. —Isadaidbo dadpen bēdamboen isenquo icquin Nuquin Papan ĕbien bēdamboen isec. Isadaidbo icsambo iquec. Ĕbien bēdambo iquec —quequin icsamboen chienda. Aden icsamboen chuitiadquo icquimbi nēid chiaidtsen tantiata. Cuēte tapunabi icnuc dada yec podō yec quec cuēte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibēdtsempampic. Isadaidbo nibēdnuc isadaidbon chidon Esus tishenquo ictsempanēdash. Ĕmbi aden chiac isadaidbo chiec icsamboec onquenda.

<sup>19</sup> ¿Ĕbi adsho tantiashta mibi nadpe? —Ambi con matses caido chieshēmēnsho isun cuēte cuidi pateshuniacimboen nēbi isadaidbo dadpen Nuquin Papan bēdamboen isenquo iquec. Ĕbipadquid matses utsiboen bēdamboen isbenac —¿quecta iquec? <sup>20</sup> Abimbo mimbi caic. ¿Atot-

sieshun Nuquin Papan isadaidbo bēdamboen istiapimbo icpec? Ambi chomiaid Esus tantienquo icsho Nuquin Papan aido bēdamboen istiapimbo iquec. Padnuen Esus tantiasho mibi bēdamboen isec. Adoac: —Ēbi bēdambo icnubi isadaidbo icsambo iquec —quenda. —Esus tantienquo icsho isadaidbo cuidacpadomboen ēbitsen Nuquin Papan cuidpanundac —quequin Nuquin Papa Esusbēda tantiaquiota. <sup>21</sup> Ambi con matses caidon Esus tantienquo icsho Nuquin Papan bēdamboen istiapimbo iqueque. Adembidi matses utsibon Esus tantienquo icsho Nuquin Papan mibi bēdamboen istiapimbo iqueque. Esus tantiaquiota.

<sup>22</sup> Aden Esus tantiash nadec onqueta. —Esus tantiasho bēdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuēte cuidi pateshuniacimboen cuidquin isadaidbo bēdamboen isenquo iqueque. —Esus tantienquo yansho adembidi ēbitsen cuidpanundac —queshun chieshtoenquo icquin Esus tantianuna. <sup>23</sup> —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. <sup>24</sup> Min matses abitedi Nuquin Papa tantiesabo icnēdash. Nēbien cuēte icsan cuidi pateshuni-aid pobiacimboen Esus tantiamequin Nuquin Papan mibi bēdamboen isec. Adoac Esusbēda Nuquin Papa mimbi bēdiactsēc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ēnden dada uapampic. Ambi tantiacpadën ambi cuēte bēda cuidi peteshuniaid abibidi pobioacimboembi Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēda Esus bēdamboen tantiaquiendac.

*Ambi chiacpadën Nuquin Papan isadaidbotsen bēdamboen isoaid*

<sup>25</sup> Tantia. —“Isadaidbo icsambo iquec,” quequin chuinushe —queshun mimbi tantiacmaid Nuquin Papan chiaid mibi chuinu. Nuquin Papan pacuēnēdabimboecnuc icmiac con matses dadpen Esus tantiate bunenquo iquec. Daēdpactsēcshun Esus tantiec. Nuquin Papan tantiatedishun matses utsibo dadpenshumba Esus tantiambic <sup>26</sup> paposhquiacimboen con matses isadaidbo dadpenhun Esus tantiendac. Aden tantiasho Nuquin Papan con matses bēdamboen isendac. Aden ambi isadaidbo bēdamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuec Nuquin Papa yacnuēsh choquid isadaidbon chidon tishaid iquendac.

Aidēmbi isadaidbo Nuquin Papa tantiaquid padpiden icmendac.

<sup>27</sup> ‘Aden ēmbi chiacpadomboen ēmbi chomiaid tantiasho abi icsaid bēpiscudquin isadaidbo bēdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

<sup>28</sup> Nēbi Esus chieshēnsho isadaidbo bēdamboen istiapimbo icquin Nuquin Papan matses utsibo mibi Esus tantiamiac. Ambi nēbi bēdamboen istiapimbo yaido isadaidbo unēsquo icnuc Nuquin Papan tantiaquiec. —Ēmbi aton tsusedpabo chiampicpaden aido con matses caimbi —queshun adoec. <sup>29</sup> Aden ambibi chiampid niactiapimbo



icquin con matses isadaidbotedi tantiaquin Nuquin Papan con matses caic. <sup>30</sup> Min matsesën isadaidpembon Nuquin Papa tantienquo yacbimboen nëbi isadaidbon Nuquin Papa tantiaquid Esus tantienquo iquec. Aden Esus tantiatipimbo icsho isun Nuquin Papan Esus tantiaquid matses utsibo bëdamboen isbenac. <sup>31</sup> Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bëdamboen isendac. <sup>32</sup> Aden matses abitedishun ambi chiaid niac-niacsho isun: —Abitedimbo icsaquiec —quequin matses bëdamboen istiapimbo icboedëmbi nëbi Esus tantiasho Nuquin Papan bëdamboen isendac isadaidbo yec matses utsibo abitedi yec quenuc.

<sup>33</sup> Aden Nuquin Papan bëdamboen iste chuisho tantias nadnuna. Nuquin Papa bëdamboshë iquec. Abipadquid utsi nibëdec. Matsesën naidtedi tantiaquid nec. Abitedimbo tantiaquid icquin ambi natiapimbo ictequid nibëdnuc bëdamboen naquidquid nec. ¿Ada adquid icsho Nuquin Papan naidtedi matsesën tantiapadic? Padenquo. Ambi naidtedi matsesën tantienquo iquec. <sup>34</sup> “¿Nuquin Papan otacquo tantiaidtedida matsesën tantiapadic? Padenquo. ‘¿Mimbi tantienquo iquec. Èmbi chiacpadomboen nata,’ quequinda matsesën Nuquin Papa chuipadic? Padenquo. Ambi tantiacpadomboembien Nuquin Papan naindac.” <sup>35</sup> “¿Ada matsesën Nuquin Papa menepadic? Padenquo. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquo. Matsesën: ‘Con na nec,’ caidtedi Nuquin Papan na nendac.” <sup>36</sup> Abitedimbo uaquidquid yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquid nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquo icquin.

## 12

### *Esus con Icho cain ambi chiacpadomboen naid*

<sup>1</sup> Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bëdamboen isequie. Nuquin Papa bëdamboen tantiatadquid icquin nadonona. —Èbi bunaid nainquo yec mibi bëdambo icmenuec mimbi chiacpadec bëdamboec tabadtiadquid iquebique. Min yuambo ëbi icme, Papa —quequin Nuquin Papa chuinuna. <sup>2</sup> Esus tantiesabon nacpadomboen nainquo icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bëdamboec tabadquin nuqui tantien-dac. Aden naic nuqui bëdambo iquendac.

<sup>3</sup> Tantia. Nuquin Papan tantiamiacpadomboen mibi chuinu. Nadenda. —Èbiuidtsëqui bëdambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datantiadec: —Adquid nebi —quequin abimbo chuita. <sup>4</sup> Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquid abitedi chuiquid dapa yampatsiash? Padenquo. ¿Mitsipadquid min dada icpec? ¿Abichobida bedantequid icpec? Padenquo. Mëdanteuidtsëquien bedantequid iquec. ¿Abichobida istequid icpec? Padenquo. Èshëuidtsëquien istequid iquec. ¿Abichobida

shēdtequid icpec? Padenquo. Dēbiateuidtsēquien shēdtequid iquec.  
<sup>5</sup> Min dada yacbimboec Esus tantiaquido iquec. Abentse-abentsec  
 chuiquid dapa yanubi abentse-abentsec utsibo nashumbanequid yanec.  
 Esus tantiaquidotedi yec bēdamboec tantiananquin nashunanquido  
 yanec. <sup>6</sup> —Ma utsibo nashunu —qeshun Nuquin Papan Mayanēn  
 namiaid nec Esus tantiaquido. ¿Atotsi naquid Nuquin Papan Mayanēn  
 mibi icmiac? Nuquin Papan ambi tantiaidquio oncamiaid iquendac.  
 Adquid icquin Nuquin Papan Mayanēn tantiamiaiduidi chuibanta.  
<sup>7</sup> Utsibic: —Utsibo nashunquid icta —caid iquendac. Adquid icquin  
 bēdamboen nashumbanta. Utsibic Nuquin Papan: —Ēmbi chiaid  
 bēdamboen tantiaishun chuibanta —caid iquendac. Adquid icquin  
 Nuquin Papan chiaid tantiatsēcquido bēdamboen tantiameta. <sup>8</sup> Utsibic: —  
 Chieshtoenquo icquin Esus tantiec bēdamboec tabadnuna —quequin  
 bēdamboec tabadquin ismequid iquendac. Adquid Nuquin Papan  
 icmiaid icquin Esus tantiaquido bēdamboec tabadte tantiameta.  
 Utsibic aton na nibēdquido aton na menequid Nuquin Papan icmiaid  
 iquendac. Adquid icquin cudasenquo icquin menianeta. Utsibic:  
 —Esus tantiaquido chuiquid dapa icta —caid iquendac. Adquid  
 icquin Esusēn namiacpadomboen Esus tantiaquido bēdamboen nameta  
 chieshenquo icquin. Utsibic dada icsaido yec isedanquido yec aton  
 shubu nibēdquido yec aton pete nibēdquido yec macho yec tsusioctsec  
 yec qesho bēdamboen nashunquid iquendac. Adquid icquin Esusēn  
 chiacpadomboen chieshtoenquo icquin nashumbanta.

*Esus tantiaquidon nadoquid, quiaid*

<sup>9</sup> —Mibi tantiac unēsquo iquec —quequin utsibo chuiquin abimbo  
 chuinuna. Muainquo icquin utsibo tantiaquionona. Chieshēmēnenquo  
 yec bēdamboec tabadnuna. Utsibon: —Icsanuna —caqui: —Padi —  
 quiash icsainquo yec bēdamboec tabadnuna. <sup>10</sup> —Ēbēdtan Esus tanti-  
 aquido con utsibobimboecquido nec —quiash bēdamboec tantiananuna.  
 —Nēid con buchibimboecquid bēdambo iquec. Aidēn chuisho bēdamboen  
 tantianuna —canuna nuquibēdtan Esus tantiaquido chuiquin. <sup>11</sup> Nuquin  
 Papan chiacpadomboen naic chieshtoenda. Nuquin Papan Mayanēn  
 tantiamiacpadec Esus tantiec chieshtoenquo yec bēdamboec tabadnuna.  
<sup>12</sup> —Unēsacsho abi yacno Nuquin Papan ēbi tabadmendac —quec cuis-  
 honquenuna. Esus tantiaquido icsho utsibon chieshēnaqui chieshtoen-  
 quo icquin Esus tantianuna. ¿Atotsi natiامية utsi icpec? Adquid  
 tantiec shubiquimbi chieshtoenquo icquin Esus tantianuna. Baded-  
 badedquien Nuquin Papa chian-chianuna. <sup>13</sup> Nuquibēdtan Esus tanti-  
 aquido aton na nibēdsho isun nuquin nabi menenuna. Isedanquido  
 bēdamboen isnuna. Pemequinc nuquin shubun ushmequinc canuna.  
<sup>14</sup> Esus tantiaquido yec nuqui chieshēnquidobēdi chieshēnanenquo ic-  
 nuna. Chieshēnanenquo icquin Nuquin Papa naden chuinuna. —Ēbi  
 chieshēnquido bēdamboen tantiameta. Chiesh bēdameta, Papa —quequin  
 Nuquin Papa chuinuna. <sup>15</sup> Utsi bēdambo yec cuishonqesho isash aibdēdi  
 cuishonquenuna. Utsi unēsquo icnuc shubisho isash aibdēdi shubin-  
 una. <sup>16</sup> Cuesnanenquo yec chieshēmēnenquo yec bēdamboec tabadnuna.  
 —Con nauidtsēqui naimbi —quenquo icquin utsibobēdtan bēdamboen  
 nanuna. —Ēbiuidtsēqui bēdambo iquebi. Ēmbi tantiacpadomboenuidi  
 naimbi. Utsibon chiaid natiapimbo iquebi —quenquo yec bēdamboec

tabadnuna. —Chuiquid dapabèduidtsèqui onquequid nebi —quenquio yec matses abitedibèd onquec bédamboec tabadnuna.

<sup>17</sup> Chieshènaqui cuidnanenda. —Ma utsibo: “Bédamboec tabadquido nec,” quenu —quiash bédamboecuidi tabadnuna. <sup>18</sup> Uimanèmènquido icsasho isun aid chuiquin: —Bédamboequien tabadtiad —canuna. Adquidobèd chieshènanenda. <sup>19</sup> Èmbi tantiaido mibi neque. Tantia. Chuinu. Nuqui chieshènquidobèdi cuidnanenquio icnuna Nuquin Papan naden chiaid tantiash. “Matses cuidnanac icsambo iquec. Èbentsècquiobini icsaido cuidquid nec,” quequin Nuquin Papan chiaid dada uapampic. <sup>20</sup> Nuqui chieshènquidobèdi cuidnanenquio icquin bédamboen isnuna. “Pete bunsho pemequinc acte bunsho acmequinc canuna. Nuqui chieshènquido: ‘Bédambo icquidi chieshènec icsachitobi,’ quiash ma nèish bédanu,” quiash <sup>21</sup> adec cuidnanenquio icquin nuqui chieshènquido bédamboen isnuna.

## 13

### *Chuiquid dapan chiapadomboen Esus tantiaquidèn naquid*

<sup>1</sup> Aton matses chuiquid dapan chiapadomboen Esus tantiaquidèn naquid. Adembidi aton nidaid pais caidèn tabadquidotedi chuiquid dapabon chiapadomboen naquid. —Nuquin Papan adquid chuiquid dapa icmiabi yac nibèdtsiash. Nuquin Papan chuiquid dapa icmiadien aido nec —qeshun aidon chiapadomboen naquid Èsus tantiaquidèn. <sup>2</sup> Nuquin Papan chuiquid dapa icmiaidèn chiaid niacquid Nuquin Papan chiaidbidi niacquid nec. Aden ambi chiaid niacasho chuiquidon cuidquid. <sup>3</sup> Bédamboec tabadquidon chuiquid dapan cuidte dacuèdèntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bédamboec tabadta. Adsho isun: —Mibi bédamboec tabadec —catsiash chuiquid dapabon. <sup>4</sup> —Ma matses bédamboec tabadnu —quequin Nuquin Papan chuiquid dapa icmiaidèn mibi bédamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan èbi cuidpanundac —quiash icsaquid dacuèdendac. <sup>5</sup> Èbi adsho tantiashun chuiquid dapabon chiapadomboen nanuna. —Cuidnushe —qeshun adonona. —Pabiate cuembo icquin Nuquin Papan chiapadomboen natiadquio iquebi —qeshun adonona.

<sup>6</sup> Bédamboen tabadmenuen Nuquin Papan chuiquid dapa icmiaidon: —Èmbi chiapadomboen nata —cac naquid Esus tantiaquidèn. <sup>7</sup> Aden chuiquid dapan chiapadomboen nanuna. Aid bédamboen isnuna. Aidèn: —Nata —cac nanuna chieshenquio icquin.

### *Utsibo tantiaquionona, quiaid*

<sup>8</sup> —Èmbi nashumbocpadomboen èbi cuidquin nashunenquio iquec —camenda. Abi nashunquidobèd cuidnanquid Esus tantiaquid. Esus tantiaquidbidi bédamboec tantiananquid. Adec bédamboec tantiananquin Nuquin Papan Moises chiampicpadomboen nuqui bédamboen natsiac. <sup>9</sup> “Ambi naiduidtsèqui nainquio yec abibi datantiadac bimboec ma matses bédamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bènèpenquio chudmenda chidon. Cuesunenda. Ampenda. Utsin na isash:

‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadacimboen utsibotsen tantiaquionona. <sup>10</sup> Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naïc ëmbi Moises chiacpadec bëdamboec tabadec —caindac.

<sup>11</sup> —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacimboen nainquio ichoedi nëbi ushash isucunacimboec dayacquio yec chieshtoenquio icquin Nuquin Papan chiacpadomboen nanuna. Esus tantiabensh: —Yuecashien Esus choec —quiondaidi: <sup>12</sup> —Nëbien Esus chochitec —quedonetsëcquieç bëdamboec tabadnuna. —Satanasën yuanushe —queshun Esus tantiaquin nuqui icsaid ënshun bëdamboen nanuna. <sup>13</sup> Icsainquio yec: —Bëdambo iquebique. Ma isnu —quiash bëdamboec tabadnuna. Tantiadenuen acteçquid paëmbo icquid aquenquio icquinc utsin chido chudenquio icquinc utsin bënë chudmenquio icquinc chido utsi mëismenquio icquinc canuna. Adeçbidi utsin na isash: —Con na adquid nibëdec —quiash chieshëmë nec tabadenquio icnuna. Adembidi utsin mibi bunaid nasho isash: —Aden ëbi namenquio icpec —quec chieshëmënenquio icnuna. Icsainquio yec bëdamboec tabadnuna. <sup>14</sup> —Icsate bunchitebi. ¿Mitsipaden naiquini icsape? —quenquio yec Esus tantiaquieç abi tabadacpadquieç bëdamboec tabadnuna. Nuqui icsate bunaid ënquionona.

## 14

### *Esus tantiaquido utsibo bëdamboen isaid*

<sup>1</sup> Nuquibëdtan Esus tantiatsëcquidon nuqui nacpadomboen nainquio icsho bëdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chieç nuquibëdtan Esus tantiatsëcquido: —Ëmbi natemaid nec —queshobi: —Icsamboen chieç —cainquio icnuna. <sup>2</sup> Esus tantiaquidquido: —Pete abitedi pambidbëdta pesho Nuquin Papan nëishënenquio iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. <sup>3</sup> Pambid pequidobëdtan pambid isuidquidombi Esus tantiasho Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamënshunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash. <sup>4</sup> ¿Içbonpenquioda: —Yua icsambo iquec —capadic? Içbombien adoquid. Adembidi: —Mibi bëdambo iquec —caquid içbon. Nuquibëdtan Esus tantiaquid Nuquin Içbon yua icsho: —Ëmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bëdambo iquec —quequin Nuquin Içbo Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

<sup>5</sup> Esus tantiaquido utsi-utsieç: —Aid badiadquidënuidtsëqui Esus tantieç cuëdënac bëdambo ictsiash —quenubien utsibo: —Badiadquidën badiadquidënuieç Nuquin Papan Esusbëdta tantieç cuëdënebi —quecuededpec. Adquid daëd icsho Nuquin Papan nëishënenquio iquec.

Esus tantiaquid ambi tantiacpadēnquiobi cuēdēnac bēdambo ictsiash. <sup>6</sup> Aden Esus tantiaquin nac bēdambo ictsiash. Adembidi Esus tantiaquin: —Mimbi pete uaid bēdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bēdambo iqueque. Aid penu —queshun utsi pequimbi pambid isuidquid iquendac.

<sup>7</sup> ¿Esus tantiaquid ambi naid-uidi naquidta nedic? Padenquoio. ¿Ambi tantiacpadēn unēsquidta nedic? Padenquoio. <sup>8</sup> Nuquin Icho Esusēn chiacpadomboen natiadquoio yec nuqui tabadec. Ambi tantiacpadēn nuqui unēsendac. Unēsabi yec tabadec Esusēn yuambo icboedi unēsash adecbidi aton yuambo nuqui iquendac. <sup>9</sup> Adec Nuquin Icho icnuec abided cuidadec unēsash Esus uincuemanēdash. Unēsabi yec nuqui tabadnuc Nuquin Icbombo icboedi nuqui unēsān adecbidi Nuquin Icbombo iquendac.

<sup>10</sup> —Adquid Nuquin Icho iquec —quesho ¿tantiaashunda nuquibēdtan Esus tantiaquid mamēnshuntiad? Padenquoio. ¿Nuquin Papan chiacmaid chiec: —Ēmbi nacpadomboenuidi nainquoio yec icsambo iquec —quequinda chushcatiad? Padenquoio. Nuquin Icho Esusbēdtan Nuquin Papanuidtsēqui matsesēn naidtedi chiendac. —Nēid bēdambo iquec. Utsi icsambo iquec —quequin chiendac matses abitedishun tantianubi. <sup>11</sup> Adote chuiquin Nuquin Papan ambi chiaid naden dada uamepampic. “Tantia. Abimbo caimbique.

Naden matses abitedishun ēbi chiendac.

‘Abitedishun Icbombo mibi nec.

Bēdamboshē icquidquoio mibi nec.

Abitedishun naid tantiaquid icquin mimbiuidtsēqui: Nēid icsambo iquec. Nēidien bēdambo iquec, quequin abimbo chiendac,’ quequin matses abitedishun ēbi chiendac,”

quequin Nuquin Papan dada uamepampic. <sup>12</sup> Aden ambi cuidte ushēn Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

### *Utsibo icsamenquoio icnuna, quiaid*

<sup>13</sup> Ēbi adsho tantiaashun Nuquin Papan: —Adoenda —quequin chiacmaid nuqui tantiaid chienquoio icnuna. —Ēmbimbo natemaid naic aido icsambo iquec —nuquibēdtan Esus tantiaquido cainquoio icnuna. Adenquoio icquin nadonona. —Ēmbi ambi natemaid nasho isash chieshtoshon Esus tantienquoio yanushe. Ambi natemaid naquin ismenquoio iquembi —queshun Esus tantiaquidtedi bēdamboen isnuna. <sup>14</sup> Nuquin Icho Esuquidistu tantiaquidquoio icquin ěmbien naden tantiec. —Nēbi Nuquin Papan: “Petemaid nec,” caid nibēdec —quequin tantiembi. Ēbi adnubi utsibo: —Petemaidquoio nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. <sup>15</sup> Adsho tantiaashun aido bēdamboen tantiaquin ambi petemaid nuqui pemenuo ictsiac. Ambi petemaid pemequin mimbi aido tantienquoio iquec. —Ēmbi petemaid piash icsachitobi —quequin Esus tantienquoio yanushe. Ambi petemaid pemenda. —Nēid petemaid nec —quequido aidotsen tantiaquin cuidmenquoio icnuec abided cuidadec Esus unēsaque. Aido tantiata. <sup>16</sup> —Nuquin Papan chiaid niaquenquoio icquin Esus tantiaquido utsibon: “Aden naic icsatsiash,” caid naimbi. Ēmbi tantiacpadomboen naimbi —queshun mimbi tantiacpadomboen naquin utsibo icsamboen

chuidenda. —Is. Esus tantiaquid icsambo iqueque. Ęm̄bi natemaid naique —camenda. <sup>17</sup> ȷ—Nadquid petemaid nec. Nadquid actemaid nec —quequin petebēda acteuīdi tantiecta Nuquin Papan chiapadec Esus tantiaquido bēdamboec tabadpatsiash? Padenquio. Aton Mayan nuquibēdi tabadmiac chieshēmēnenquio yec cuishonquec Esus tantiaquido bēdamboec tabadendac. <sup>18</sup> Adec Esuquidistun chiapadec tabadsho isun Nuquin Papan: —Bēdambo iquec —caindac. Matsēsētsen: —Aido bēdambo iquec —caindac.

<sup>19</sup> Ęm̄bi chiapadec chieshēmēnenquio yec bēdamboec isnanuna. —Esus tantiec chieshtoenquio yec bēdamboec tabadnuna —quec chuinanuna. <sup>20</sup> —Nuquin Papan bēdamboen isaidon Nuquin Papa Esusbēda tantienquio yanushe —queshun utsibon petemaid pequin aido chieshtomenda. Nuquin Papan: —Matsēsēn petemaid nec —caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiac. <sup>21</sup> —Ębēdtan Esus tantiaquido icsamemane —queshun ambi petemaid pambid penquio icquinc ambi actemaid acte paēmbō icquid aquenquio icquinc ambi natemaid utsi nainquio icquinc cac bēdambo ictsiash. <sup>22</sup> Nuquin Papan: —Matsēsēn natemaid nec —cacmaid tantiaquin: —Ęmbimbo petequid nec. Ęmbimbo actequid nec. Ęmbimbo natequid nec. Aden nasho Nuquin Papan ēbi cuidenquio iquec —quequin mimbi tantiaid caic: —Natemaid nec —quequido naden chienda. —Ęm̄bi nacpadomboen nainquio yec mibi icsambo iquec —cainda. Adembidi aidon: —Ęm̄bi natemaid nec —caboed naquin ismenda. Chieshtonoshe. <sup>23</sup> Adquid ambi: —Aid pesho Nuquin Papan nēishēnchitembini ictsiash —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsiash. —Aden naic icsachitequini ictsiac —nuqui caidtedi naic nuqui icsatsiac.

## 15

### *Nuqui bunaiduidi nainquio icnuna, quiaid*

<sup>1</sup> Esus tantiaquidēnquio Esus tantiatsēcquid chieshēnenquio icquid. —Natemaid nec —quequin Nuquin Papan chiabi icnubi Esus tantiatsēcquid: —Esus tantiaquin Ęmbimbo natemaid nec —quesho tantiashun ambi natemaid naquin ismequin chieshtomenda. Aid tantiaquin ambi natemaid nainquio icquin nuqui bunaiduidi nainquio icnuna. <sup>2</sup> —Esus tantiatsēcboedēmbi ma Esus bēdamboen tantiabenquiono —quequin nuquibēdtan Esus tantiatsēcquidēn natemaid nainquio icnuna. —Aden naic mibi bēdambo iquec —camenuen ambi natemaid nainquio icnuna. <sup>3</sup> Esuquidistun ambi naiduidi nainquio icquin Nuquin Papan chiapadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ēbi icsamboen chuishunec, Papa,” quequin Esusēn abi chuite Nuquin Papan dada uamepampic. <sup>4</sup> Aden con matses isadaidbobēda matses utsibo abitedi bēdamboen tantiamenuen Nuquin Papan ambi chiaid dada uamedenepampic. —Nēid isban-isbanquin ēbēda Esus ēnenquio icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadendabi,” ma matses quenu

—qeshun ambi chiaid dada uamepampic. <sup>5</sup> Aden matses chieshtoenquio icnuc bēdamboen tabadmequid Nuquin Papa mibi chianembi. —Chieshtoenquio icquin Esus tantiaquid icmequin dayacquio yacbinboecnec matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isanquid icmeta, Papa. <sup>6</sup> Mimbi adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Icbo Esuquidistun Papa mibi nec. Mibi bēdamboshē iquec,” quequin mibi chuitsiash, Papa —quequin Nuquin Papa mibi chianembi.

*Nuquin Papan matses utsibo Esus tantiamiaid*

<sup>7</sup> Tantia. Padpiden mibi chuinu. —Nuquin Papa bēdambo iquec —nuqui camenuen Esuquidistun nuqui bēdamboen isequē. Bēdamboec isanuna. Isadaidbo yec isadaidpembo yec quec bēdamboec isanuna. <sup>8</sup> Esuquidistu matses abitedi bēdambo icmenuēc matsesbēd tabadpanēdash. Esus chote chuiquin Nuquin Papan dada uamepampicpadec isadaidbobēdi tabadquin Esusēn aido nashumpanēdash. —Nuquin Papan abimbo chuipampic —quequin tantiamenuen adopanēdash. <sup>9</sup> —“Icsaboedombi Esus tantiasho Nuquin Papan bēdamboen isquin cuidenquio iquec. Nuquin Papa bēdambo iquec,” ma isadaidpembo matses utsibo quenu —quebidi Esus matsespanēdash. Aidēn abi chuite chuiquin Nuquin Papan naden dada uamepampic.

“Isadaidpembo matses utsibobēdtan mibi naden chiendambi.

‘Nuquin Papa bēdambo iquec,’ caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic.

<sup>10</sup> Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobēdi cuishonqueta.

‘Nuquin Papa bēdambo iquec,’ quec cuishonqueta,”

quequin Nuquin Papan chiaid dada uapampic. <sup>11</sup> Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bēdambo iquec,’ cata.

‘Nuquin Papa bēdambo iquec,’ quec cuēdēncuededec tabadta,”

quequin dada uapampic. <sup>12</sup> Adembidi isadaidpembon matses utsibon Nuquin Papabēdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidēn papa Isai caid ēnden unēsampidēn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nēidēn nuqui cuidmenquio iquendac,’ quependac isadaidpembo matses utsibo,”

quequin dada uapampic.

<sup>13</sup> Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquio mibi neque. Mibi tantiaquid Doma yacnocquido cuishoncameta, Papa. Adembidi dacuēdenquio icnuc bēdambo icmeta. Aden min Mayan

aidobëdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

*Matses utsibo Esus chuibanquid nebi, quiaid*

<sup>14</sup> Con utsibo mibi caimbique. Tantia. Mibi chuinu. —Nuquin Papan Mayanën tantiamiacpadec bëdamboec isnanec bëdamboec tabadtiaidquo icquidien nec. Aidën tantiamiacpadomboen Nuquin Papan chiaid bëdamboen tantiec: “Nuquin Papan chiacpadec bëdamboec tabadnuna,” quec chuinanquidien nec —quequin mibi tantiombi. <sup>15</sup> Aden tantiash: —Nëishënushe —quenquo icquin: —Bëdamboec tabadta —quequin chuiquin nëid dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquo bëdamboen mibi tantiamenuen dada uaimbi. <sup>16</sup> Nuquin Papan icmiacpadquid Esusën naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bëdamboen iste chuibeniombi. Adoac matses utsibon Esus tantiabensho isun aton Mayanën bëdamboen tabadmesho: —Bëdambo iquec —caindac Nuquin Papan.

<sup>17</sup> Aden: —Esuquidistu bëdamboshë iquec —quequin matses utsibo dadpen Esusën naid chuibeniombi. <sup>18-19</sup> Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibenequimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choabi Edusaden yacnobidi. <sup>20</sup> Esusën naid chiacmanouidquo Esusën naid chuibenetiadquo iquebi. Utsibon Esusën naid chuibanacno nidtiapimbo iquebi. Esusën naid chuisho tantiacmaido Esus chuite bunquiebi. <sup>21</sup> Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidën naid chuisho tantiacmaidon tantiabenendac.

Adshun paposhquiacbimboen bëdamboen tantiendac,”

quequin dada uamepampic. <sup>22</sup> —Aden Esusën naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantiash —quiash mibi yacno nidabi iccobi. Nëbi mibi yacno nidtiadquo iquebi.

*Mibi yacno nidtiadquo iquebi, quiaid*

<sup>23</sup> —Nëbi Ididico yacno Esusën naid uesquin chuibeniac —quiash mibi yacnotsen nidtiadquo iquebi. Ëdenquimbo taëec mibi yacno nidte bunondaïdi seta dadpen matamiashic adi nëbi mibi iste bunquiebi. <sup>24</sup> Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquo iquebi. <sup>25</sup> Nëbini Edusaden yacnoba nidendac. Anocquido Esus tantiaquido utsibon meniaid menuec nidendabi. <sup>26</sup> —Edusaden yacnocquido Esus tantiaquido utsi-utsiec aton piucquid nibëdeque. Nuquin nabï ma buanshunu. Menenuna —queshun Esus tantiaquido icquin



Acaya yacnocquidobëdtambi Masedonia yacnocquidon: —Con na buanshun meneta —caposhi. <sup>27</sup> Aden ambi tantiacpaden nasho: —Bëdambo iquec —caombi. Edusaden yacnoshon Esusën chiac isadaidbomba Esus tantiapanëdash. Adshumbic aidon chuibeniác matses utsibontsen Esus tantiapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiác caoshe. Menenuna —quesho: —Bëdambo iquec —caombi. <sup>28</sup> Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. <sup>29</sup> Mibëdi tabadquin ëmbi Esus tantiamequin chuisho Esusën nuqui bëdambo icmendac.

<sup>30</sup> Ëmbi tantiaidombo mibi neque. Tantia. Chuinu. Nuquin Icho Esuquidistun aton Mayambëdtan tantiamiacpadec nuqui bëdamboec tantiananec. Ëbi tantiaquin Nuquin Papa chianeta. —Ënenquio icquin Esus tantiamequin mimbi chiacpadomboen Pabado name, Papa. <sup>31</sup> Udeya yacno nidsho Esus chieshëñquidon Pabado cuesnusho. Bedmenda, Papa. Piucquid buanacsho Edusaden yacnocquido Esus tantiaquido bëdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquio icnusho. Bëdamboen bedmeta, Papa —quequin Nuquin Papa chianeta. <sup>32</sup> Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. <sup>33</sup> Aden mibi tantiaquin: —Nuqui dacuëdenquio icnuc bëdambo icmequid Nuquin Papa mibëd icpashun —caimbi.

## 16

### *Mibi unësquio iquec, quequin chiaid*

<sup>1</sup> Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquido nioshe. <sup>2</sup> Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —queshun bëdamboen isquin aidën: —Ëbi nashunta —cacpadomboen aid nashunta.

<sup>3</sup> Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniõndashe. <sup>4</sup> Aden Esusën naid chuibenesho: —Cueschitomane. Aden chienda —Esus chieshëñquidon caqui aidon adembidi ëbëdtan Esusën naid chuibeniõndash. Adsho isun: —Mimbi bëdamboen naoc —caondambi. Adembidi aidon chiondaidõn isadaidpembon chiondash. <sup>5</sup> Aquidan shubuno Esus tantiec cuëdëñec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabeniõndaid ëmbi tantiaidquio Epeneto caidtsen adembidi chuita. <sup>6</sup> Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquido. <sup>7</sup> Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëñquidon bedshun quënën nauedõndash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoquio icquin Esus chuibenequido nec.

<sup>8</sup> Nēidteditsen chuiquin: —“Mibi unēsquo iquec,” quiosh —cata. Nēidic Esus tantiaquid utsi Ampidias caid ěmbi tantiaidquo. <sup>9</sup> Nēidic Esusēn naid chuiquid utsi Udbano caid. Nēidic ěmbi tantiaidquo utsi Estaquis caid. <sup>10</sup> Nēidic Apedes caidtsen. Utsibon chieshēnaqui chieshtoenquo icquin Esus tantiaquidquo nec. Nēidic Adistobudo caidēn shubun icquidotedi. Aidtedi: —Mibi caic: “Unēsquo iquec,” quiosh Pabado —cabanta. <sup>11</sup> Nēidotsen adembidi chuita. Nēidic con matses utsi Edodion caid. Nēidic Nadsiso caidēn shubun icquido Esus tantiaquidtedi. <sup>12</sup> Nēidic chido Tidipena chedo Tidiposa caidbēdi. Aido Esus tantiec dayacquio icquin ambi chiapadomboen nabanquido nec. Nēidic chido utsi Pedsida caid con chu icbobimboecquidquo. Aidsen Esus tantiec dayacquio icquin ambi chiapadomboen naquidquo nec. <sup>13</sup> Nēidic Dupo caid Nuquin Papan Esus tantiamiaidquo. Nēidic aton tita con tabimboecquidquo. <sup>14</sup> Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. <sup>15</sup> Nēidic Pidodoco caid aton chido Udiabēdi. Nēidic Nedeyo caid aton chuchubēdi. Nēidic Odimpas caid. Nēidic abēd icquido Esus tantiaquido. Aidtedi chuiquin: —Mibi caic: “Unēsquo iquec,” quiosh Pabado —cabanta.

<sup>16</sup> Esus tantiaquido yec bēdamboec isnanta. —Mibi tantiemi —cananta. Nēmbo icquido Esus tantiaquidtedi mibi caic: —Unēsquo iquec —quiosh. <sup>17</sup> Ěmbi tantiaido mibi neque. Tantia. Mibi chuinu. ¿Ada mibēdtan Esus tantiaquido chieshēmequin cuēshēdmequido icpec? ¿Ada Nuquin Papan chiaid mimbi tantiaid chienquo yec mibi icsamenuec muaquido icpec? Adquidobēd onquec tabadenda. <sup>18</sup> Nuquin Icbo Esuquidistun chiapadomboen nainquo icquin ambi petequid-uidtsēqui aidon chieque. Aidon: —Mibi bēdambo iqueque. Ěmbi chiaid tantiata —quequin ambi chiapadomboen namequin Esus tantiatsēcquid icsamec. <sup>19</sup> —Doma yacnocquido abi tantiec Esusēn chiapadec bēdamboec tabadosh —quequin mimbi naid chuibenesho dadpenshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbēd icsainquo icta. <sup>20</sup> Nuqui bēdamboen tabadmequid Nuquin Papa nec. Aidēmbi matses icsamequidquo Satanas chedo comapenen cuidendac. Nēbi Satanasēn mibi icsametiadquo icsho tantiashun: —Satanas yuamenquo icnuen Nuquin Icbo Esusēn abibi tantiamequiopashun —mibi caimbi.

<sup>21</sup> Nēmbo icquidtedishun mibi tantiec. Mibi caic: —Unēsquo iquec —quiosh Timoteyo ěbēdtan Esusēn naid chuibenequidquo. Adembidi con matsesēn chiosh. Dusio caid yec Ason caid yec Sosipated caid yec quec adosh.

<sup>22</sup> Pabadon —Naden na —cac nēid dada uaquidquo Tesio caid nebi. Esus tantiaquid icquin ěmbitsen mibi tantiemi. Padi. Aidtedtsēqui ěmbimbo tantiaquin chuishun Pabadon chiaidbidi dada uaoaimbi.

<sup>23</sup> Nēidteditsen mibi caic: —Unēsquo iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuadto caid. Aidtedishun mibi aden tantiosh. <sup>24</sup> Doma yacnocquido

mibi tantiaquin: —Nuquin Icbo Esuquidistun bēdamboen isquin mibi bēdamboen tabadmepashun —caimbi.

<sup>25</sup> —Nuquin Papa bēdambo iquec —canuna. Esuquidistu chuibanquin ěmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquio iquec. Ęndenquimboshē Esus tishabi icnuc matsesēn Esus chote bēdamboen tantiambo icpampic. <sup>26</sup> Adnubien Nuquin Papan unēsesambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn chiacpadomboen nanu —queshun Nuquin Papan Esusēn naid chuibenquido icmiac. <sup>27</sup> Aden namec Nuquin Papa bēdambo iquec. Abipadquid utsi nibēdec. Ambi natiapimbo ictequid nibēdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiasho Nuquin Papan nuqui bēdamboen isequē. —Nuquin Papa bēdambo iquec —canuna ěnenquio icquin. Padi. Aidtedi chuiquin dada uaombi.

## CODINTO YACNOCQUIDON ISTE 1

*Pabadon Codinto yacnocquidon iste dada uaid*

<sup>1</sup> Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. <sup>2</sup> Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

<sup>3</sup> Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

*Mibi tantiaquin Nuquin Papa chuided-chuidedaid*

<sup>4</sup> Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboquidbimboecnuc mimbi isec, quec bëdambo iquebi, Papa, quequin chuided-chuidedembi. <sup>5</sup> Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

<sup>6</sup> Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. <sup>7</sup> Adquido yec Esuquidistu choate caimbudec Nuquin Papan abi bëdamboec tabadaid tantiamiabi iccoshi quetiapimbo mibitedi iquec. <sup>8</sup> Aden abi bëdamboec tabadaid tantiamequin Nuquin Papan mibitedi chieshenquio icmec ma Esuquidistupadquid icnu quequin mimbi caimbudacpadquio icpanuna aid padpidec choanuc. <sup>9</sup> Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, quesa Nuquin Papa icquin abi mibitedi bëdamboquid icmebanec.

*Esuquidistu tantiaquid cuëshëdacbimboec chushcananquido*

<sup>10</sup> Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiac ënacbimboec tabadenda. Adec tabadec Esuquidistu tantiaquid utsitedi tantiananec ma cuëshëdacbimboec chushcananese yampanuna. <sup>11</sup> Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. <sup>12</sup> Mibi onquiaid chuinu. Tantiata. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec

tabadnubien; Esuquidistun tantiamiaid nebi, quec chushquiacbimboec utsi-utsiec tabadec.

<sup>13</sup> ¿Esuquidistu tantiaquido cuëshëdmenuenda ëbipadquidon chuibandiondash? Padenquoio. Naden chuinu. Tantia. ¿Matses icsaquid icsho cuidnushe quiash ëbida cuidadec unëspanëda? Padenquoio. Adembidi ¿Esuquidistu tantiaquid nebi quequin ëbi mimbi chuishodambi mibitedi acten mentobandionda? Padenquoio. <sup>14</sup> Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. <sup>15</sup> Utsi padenquoio iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. <sup>16</sup> Ai, Estepanasën shubun icquidobidi acten mentondambi. ¿Utsidambi acten mentoponda? Padenquoio iccondambi. <sup>17</sup> Ëbi tantiaquido acten mentoban, Esuquidistun cainquoio yaqui Matses icsaid bedshunec abided cuidadec Esuquidistu cuesten dectanac unëspanëdash quequin chuibeneta, Nuquin Papan cac aden chuibenec nebi. Ëmbibi tantiaid chienquiocquin ma matses icsaquid icsho cuidnushe quiash abided cuidadec Esuquidistu cuesten dectanac unëspanëdash quequin ma utsibontsen tantiapanu qeshun chuibenec nebi.

*Esuquidistu abitedi tantiaquidquo nadatiambocquin nabanquidquibidi*

<sup>18</sup> Nuquin Papabëd icquido icmenuec matses icsaquid icsho cuidnushe quiash abided cuidadec Esuquidistu unëspanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec. <sup>19</sup> Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi. Adquidon tantiatiapimbo yacpadembi natiamequin nabanendambi,” quequin Nuquin Papan dada uamiampid aidëmbi nëbi naid nec.

<sup>20</sup> Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquo icpec? quequin isbanquin, Nadquoio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquoio iquec. <sup>21</sup> Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Ëmbi tantiaidpenquoio tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. <sup>22</sup> Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Ëbi ënden tantiec papuduedaid daëd uanu

queboedëmbi Nuquin Papan chiaid tantiauidoaic. <sup>23</sup> Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoaic. Adoaquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquoio yec tabadec. Isadaidpembo, Esuquidistu mimbi chuiboed ëmbi tantiacpadpenquoio iquec. Adoac mimbi Esus chuibanaid ëmbi ënden tantiaidbëdta daëd uatiapimbo iquebi quec tabadec. <sup>24</sup> Adquidon tantiaidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec. <sup>25</sup> Abitedi tantiaquidquoio icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

<sup>26</sup> Utsibo, ¿mitsipadquidquoio mibi icponda? Nadquid mibi icpondaque. Chuinu. Tantia. Daëdpactsëc tantiatsëcquido mibi icpondac. Namequidpenquoio mibi icpondac. Chuiquid dapan bacuëpenquoio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash. <sup>27</sup> Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna. <sup>28</sup> Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnü quenquiocquin matsesën tantiambo yaid Nuquin Papan cuëmbantequid icnuc <sup>29</sup> ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. <sup>30</sup> Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papan bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac. <sup>31</sup> Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icbo, quequin ëmbi naid chienquiocquin Esusën naidquoio chuibanuna nuquitedi.

## 2

<sup>1</sup> Adembidi chuinu. Tantia. Mibi yacno nidshun dadpen tantiembi quenquiocquin daëdpactsëqui cuembo chuibanondambi. <sup>2</sup> Esuquidistubëdta abi cuesten dectanaid chuinu quequin aiduidi mibitedi chuibanondambi. <sup>3</sup> Codinto yacnocquido dacuëdampambo iquec quequin uëdëequimbi mibi chuibanondambi. <sup>4</sup> Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin

mibitedi tantiamiondash <sup>5</sup> ma Pabadon tantiamiacpadomboen tantiamioshi, quetiapimbo mibitedi icpanuna.

*Nuquin Papan Mayanën tantiamiaid*

<sup>6</sup> Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papuduedquidon bédamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. <sup>7</sup> Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bédambo icmequid con mado nendac, quequin Nuquin Papan tantiapampic. <sup>8</sup> Esuquidistu nuqui bédambo icmetequid Nuquin Papan chomiachso adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenëdash. <sup>9</sup> Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaïd bëda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

<sup>10</sup> Adnubien Nuquin Papan Mayanën Nuquin Papan abi yacnoshon bédamboec tabadte nacnenaïd iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquieç tabadaïd nuqui tantiamioaic. <sup>11</sup> Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocnoc matsesën tantiatiapimbo iquec. Abipadquid aton Mayanënuïdquio tantiec. <sup>12</sup> Con mayan ëbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidënuquio abi yacno bédamboec tabadaïd nuqui tantiamepanuna. <sup>13</sup> Aden aidënuquio tantiamiac adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaïdon tantiaquieç. <sup>14</sup> Nuquin Papan abipadquid meniacmaïdon aidën chiaïd tantiatiapimbo iquec. Aden Nuquin Papan Mayanën chiaïd tantiatiapimbo icquin Nuquin Papan matses bédambo icmenu queshun Esuquidistu chomiachso matses icsaquid icscho cuidnushe quiash abided cuidadec cuesten dectanac unëspanëdash quequin aidon tantiatiapimbo icoaic. Ëmbi tantiacpadomboen Nuquin Papan chienquio iquec, quendac Nuquin Papan abipadquid meniacmaïdo. <sup>15</sup> Nuquin Papan Mayanën tantiamiaïdombien naden utsibo tabadaïd tantiec. Matses bédamboec tabadsho isun, Nuquin Papan Mayanën tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaïd nec, quequin nuqui tantiec. Nuquin Papan Mayanën Nuquin Papan chiaïd tantiamiacmaïdon nuqui naic tabadaïd isash Nuquin Papan chiacpadquieç tabadquid nec quetiapimbo iquec adquid. Adecbidi Nuquin

Papan chiacpadpenquoio yec tabadquid nec quetiapimbo Nuquin Papan Mayanën tantiamiacmaido iquec. <sup>16</sup> Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquoio nec.

¿Adquid Nuquin Papa icsho abi chuiquin ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabaneq.

### 3

*¿Esuquidistu tantiaquid utsi icsambo iquec, quecta ique?*

<sup>1</sup> Adembidi chuinu. Adembi tantiaata. Mibi yacno tabadquin Nuquin Papan chiaid tantiabenebicquid mibitedi icsho daëdpactsëc chuibanondambi. Codinto yacnocquido bacuë uidënabi yacnimboecquido nec queshun Nuquin Papan chiaid daëdpactsëc mibitedi chuibanondambi.

<sup>2</sup> ¿Nëbi tishaidënda pambid pepec? Padenquoio. Mibitedi adquidbimboecsho tantienquoio icnushe queshun Nuquin Papan chiaid daëdpactsëc chuibanondambi. Ènden iccondacpadquiobi mibitedi adquiobidi icoapec. <sup>3</sup> Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nëishec chushcananec mibi. <sup>4</sup> Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiaibi yacnimboecquido mibitedi nec.

<sup>5</sup> ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Èmbembidambi mibi chuibamponda? ¿Ambembida Apodosëntsen chuibampanëdash? Padenquoio. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. <sup>6</sup> Tiedën caniquid ëshë siabi yac dëyuctiapimbo yacnimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosten mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yacnimboecquido Codinto yacnocquido icnushe queshun Apodosën chuibanoapanëdash. <sup>7</sup> Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. <sup>8</sup> Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. <sup>9</sup> Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

<sup>10</sup> Nuquin Papa tabade shubu uashunun buintad teshun abia tabëcacbimboen Esuquidistuba chuibanondambi ma matsesën



tantianueshun. Buintad tabëcachimboen Esuquidistu ëmbi chuibanan utsibon adomboebidi aidbidi chuibeneoaic. Bëdamboen chuibenenuquin ¿Nuquin Papan tantiacpadomboendambi chuibaneque? Tantiyanu, queshun Nuquin Papan chiaid isted-istedtiad ambi chuibeneta caidon. <sup>11</sup> Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu queshun buintad tabëcachimboen Esuquidistu ëmbi chuibanan adquid nec, quequin utsi chuibantiapimbo utsibon iquec. <sup>12</sup> Buintad tabëcaid tabadachimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. <sup>13</sup> Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. <sup>14</sup> Aden nëdëncaquin tanac Nuquin Papan chiaid bëdamboen chuïquidon chuibanac Esuquidistu tantiaquidombo yec buintad taidacmaid nidachimboec abi nidendac. Adsho isun abi bëdamboen chuibanquido Nuquin Papan menetequid nendac. <sup>15</sup> Adomboebidi utsibon abipenquio icnuc chuibanac Esuquidistu tantiatiapimbocquido taidaid bescashun secachimboen secatequid nendac. Adnubi abipenquio icnuc chuibanquido taidtsenachimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaido nendac.

<sup>16</sup> Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? <sup>17</sup> Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmëbanaidobidi nec. Esuquidistu tantiaquido Nuquin Papa tabadtequid nec caindac.

<sup>18</sup> Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. <sup>19</sup> Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” <sup>20</sup> Adecbidi: “Adquidën tantiaidbidi ënëdtequid nec,” quequin Nuquin Papan tantiec. <sup>21</sup> Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. <sup>22</sup> Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. <sup>23</sup> Mibitedishun icbo Esuquidistu nec. Esuquidistun icbo, Edoen, aton Papa nec.

## 4

*Esuquidistu chuishunquido*

<sup>1</sup> Icho Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ĕnden Abia Yampidĕn Nuquin Papan Esuquidistu chuibeneta, quenquiocpampidĕmbi nĕbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. <sup>2</sup> Nuquin Papan, Esuquidistu chuibeneta, cacpadomboen niaquenquiocquin ĕbipadquidon chuibenetiad. <sup>3</sup> Nuquin Icbon, Ĕbi chuibeneta, caid ĕbi icnuc ĵPabadon bĕdamboenda chuipēc? quequin tantianuna, ĵmimbi cactabi dacuĕdpe? Padenquo. Adembidi, Nuquin Papan chiacpadomboen chiombi, quetiapimbo iquebi. <sup>4</sup> Ambi chiacpaden niaquenquo iccombi, quetiapimboecnobi abitedi isquidquo abitedi tantiaquidquo Nuquin Icho icquin ĕbi chuibanec bĕdamboec tabadsho isun aidĕn chiendac. Adembidi ĕbi chuibanec icsamboec tabadsho isun chiendac. <sup>5</sup> Icsamboen natsiash, quec tsadenda. Nuquin Icho choashun icsambocquid cuidendac, quequin cainta. Aidĕmbi choashun matses icsamboen ismec tabadaid abi ompoec tabadaidbĕdta chuibanashun cuidendac. Adembidi, matsesĕn ĕquĕducshun tantiaid chuibanquin cuidendac. Adembidi, utsibo bĕdamboec tabadaid chuibanquin chuioaindac, Bĕdamboen mimbi naoc, quequin.

<sup>6</sup> Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantianbanec, Pabadopadquid utsi nibĕdec, quesa ma icpanuna. Adecbidi, Apodospadquid utsi nibĕdec, quesa ma utsibotsen icpanuna. Nuquin Icbopadquid utsi nibĕdec, quequin tantiec tabad. Adecbidi, Codinto yacnocquidopadquid utsi nibĕdec, quenda. <sup>7</sup> ĵMitsicquidĕn adquid mibi icmebampashba? ĵAbembida mibi adquid icpeba? Nuquin Icbon tantiamiac nabanash, ĵatotsi quiaash, ĕmbi tantiacpaden naombi, quepe mibi?

<sup>8</sup> Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nĕbi mibitedishun tantiauidpec. ĵApecta Nuquin Papan bĕdambo icmiaido tabadpadic? Nuquin Papa yacno ĕnden puduedac bimboec yash chuiquid dapa nebi, quiac bimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibĕd ĕbi yacpadquido ĕbi chedo ĕnden chuiquid dapa yacpadquido icmiondac, Cuishon, quetsiabi.

<sup>9</sup> Adecbidi, Bĕdambo iquebi, quec mibi tabadnubi naden tantiec tsadebique. Tantia. Chuinu. Ĕmbi chuibeneta caido unĕseque. Is, Nuquin Papa quiac bimboecnuc ambi abi yacnoshon uaido mayan bĕdabobĕdtan matsestedishun isbededac bimboecquid nebi, quequin ĕmbibi tantiec tsadebi aden isbededec aido tabadenquiocnobi. <sup>10</sup> Esuquidistu chuibenequidon chuibanasho tantiauidash, Pabiate icsachitashien nec, quequin mamĕnshumbededashic Codinto yacnocquidon ambibi tantiaquin chuibanasho tantiaquidquo nec, quepec Esus tantiesabo. Adecbidi, utsibo dacuĕdampambo iquec, quiaash uĕdĕequin Esuquidistu chuibenequidon Nuquin Papan chiaid chuibanubi cuesambo yac bimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. <sup>11</sup> Esuquidistu chuibenequid yequi pistĕc petsec abi bunec tsadebi. Adecbidi, acte acash bunec tsadquid nebi. Adecbidi

dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquo icquin capucuenequin Esuquidistu chuibenec nebi. <sup>12</sup> Con pete bednuequin shubumpi nacnenquidquio iquec chonoadsho isquin utsibon mamënshunaid nebi. Aden mamënshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiembi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. <sup>13</sup> Adembidi, utsin ëbi mua uaquin chiaqui cuidnanenquiocquin bëdamboen chiembi. Adembidi ëmbi Esuquidistu chuibeniaqui icsactsëcquid nec, quequin ambi secanu caidbimboecnuc ëbi ispec. <sup>14</sup> Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquo yampec, quenquiocquin ëbi tabadaid mibitedi tantiamenuen dada uaombi. Pabado chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquo iquec. <sup>15</sup> Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. <sup>16</sup> Ëmbi nacpadomboen naic tabadta quequin mibitedi chiembi. <sup>17</sup> Mibi ëmbi nacpadquiec tabadte tantiamenuequin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ëmbi chuibeniacpadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuedacnoshon chuibanacpadomboen ismequin chuibanquid aighbidi nec.

<sup>18</sup> Mibi utsi-utsiec Pabado choainquio iquec quequin abimbo tantiacbimboen chuibanec. <sup>19</sup> Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. <sup>20</sup> Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. <sup>21</sup> ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

## 5

### *Esuquidistu tantiaquid ambi chudtemaid chudquid cacumeta caid*

<sup>1</sup> Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembro nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. <sup>2</sup> Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquo icquimbi

aidi cacumepatecnēdan. <sup>3</sup> Mibēd ictiapimbo yequi mibēd yacbimboecquin dada uaqin icsaquid cacumetiadquidi mibi nenēdac quequin chuibanombi. <sup>4</sup> Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabardon naden natsiash quequin <sup>5</sup> icsaquid nidme ma Satanasēn mēyanac icsa bunesa yanacsho Nuquin Icho Esuquidistu choashun ma abi yacno yuedpanuna.

<sup>6</sup> Esuquidistun ēnden bēdambocquid icmiaidtedi nebi, quenda. Icsaquid abentsēc mibēd tabadquin abi icsamboec tabadaid ismiac acte maisac bimboec mibitedi adquiobidi ictsiac. <sup>7</sup> Ēnden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ēbi cuidmenquiocnoec abided cuidadec Esuquidistu unēspane dash, quiash aid icsaisa yacpadquiec tabadta. <sup>8</sup> Aden ambi naid tantiec icsaondacpadpenquo yec ma tabadpanuna. Aidquo tantiambi, quec abimbo tantiadonec ma tabadtenapanuna.

<sup>9</sup> Ambi chudtemaid chudquidbēd iccuededenda, quequin ēnden dada uaondambi. <sup>10</sup> Esuquidistu tantiesabēd iccuededenda, quenquiocquin Esuquidistu tantiaquid adquid icsash iccuededenda, quequin dada uaondambi caimbi. Ambi chudtemaid chudquid Esuquidistu tantiesadapen iquec. Adecbidi, utsin na bunquin mua uain bedquid dadpen iquec. Adecbidi, matsesēn Nuquin Papan uaidbimboecnuc nacneaid tantiaquid Esuquidistu tantiesadapen iquec. ¿Adquido ismane quiash mitsimbo mibi tabadpe? Nuquin Papa yacno adquid nibēdec. Nuquin Papa yacno nidash icsaquid isenquo yec mibi tabadendac. <sup>11</sup> Esuquidistu tantiaquid nebi, quequid icsadenesho isash adquidbēd iccuededenda caimbi. Esuquidistu tantiaquid nebi, qeshun ambi chudtemaid chudquin ēnesabēd iccuededenda. Adecbidi, muaquin bedbanquidbēd iccuededenda. Adecbidi, Esuquidistu tantiaquid nebi, qeshun matsesēn Nuquin Papan uaidbimboecnuc nacneaid tantiaquin ēnesabēd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidēn chuisho mamēnshumēnquin ēnesabēd iccuededenda. Adecbidi, Esuquidistu tantiaquid nebi, qeshun cuesanquin ampequin ēnesabēd iccuededenda. Adecbidi, Esuquidistu tantiaquid nebi, quiash ěmbi chuibocpadquid icsaquidbēd iccuededenda. Adembidi aidobēdtan penda.

<sup>12</sup> ¿Esuquidistu tantiesabi icsaid chuiquin cacumeta, quequindambi chuipe? Padenquo. Esuquidistu tantiaquid mibēd icquid icsadenequin ēnenquiocsho isun Nuquin Papan chiaid comapenen tantiaquin mibi icsaid ěnta, quequin chui. <sup>13</sup> Nuquin Papambien Esuquidistu tantiesai icsaid chuiquin cuidendac. Mimbi Esuquidistu tantiaquid icsadenequid cacumeta.

## 6

*Ēbi chushcananaid tantiashun mimbi tantiacpaden chui caid*

<sup>1</sup> Esuquidistu tantiaquid daēd nēishash chushcananec, queoaic. Adquid chuinu. Tanta. Nēishash chushcananash Esuquidistu tantiesayacno nidshun, Ēbi chushquiaid chuisho tantiashun ¿midapaden mimbi chieque? Ēbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesayacno nidshun mimbi adquid chui, cape? <sup>2</sup> Yueshun, ¿Midapaden mimbi Esuquidistu

tantiesan naid chieque? Tantienu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiemi, qeshun ¿Atotsieshun Esuquidistu tantiaquidbëd chushcananash tantiesa yacno nidshun mimbi chuibampe? <sup>3</sup> Yuecshun, ¿Ëmbi uaido mayanën naid midapaden mimbi chieque? Tantienu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? <sup>4</sup> Adquidon naid ëmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcanansho tantiashun, Esuquidistu tantiesa yacno nidshun, Ëbi chushquiaid chiacsho mimbi tantiacpaden ëbi chui, mimbi capec? <sup>5</sup> ¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe qeshunda Esuquidistu tantiesa yacno nidshun, Ëbi chushquiaid chiacsho mimbi tantiacpaden chui, mimbi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? <sup>6</sup> Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibëd chushcananaid mimbi chieque. Adenda.

<sup>7</sup> Ëbi chushcananaid ëbi daëdshun chiacsho tantiashun mimbi tantiacpaden chui. Tantienu, quequid mibëd icnuc Nuquin Papan bëdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nëishash chushcanampe? <sup>8</sup> Cuidnante bunec mibi adpec. Naden natiad. Ëbëd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

<sup>9</sup> ¿Icsadenequin ënesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ënesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacenaid tantiaquin ënesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bënëpen chudmequin ënesa, adecbidi dada daëd chichudnanquin ënesa, adecbidi chido daëd dachudnanquin ënesa Nuquin Papa yacno yuedtemaido nendac. <sup>10</sup> Adembidi, ampequin ënesa Nuquin Papa yacno yuedtemaid nendac. Adembidi, muaquin utsin na bedquin ënesa, adembidi, ambi tantiacpadpenquiocquidën chuisho mamënshunquin ënesa, adembidi, cuesunianquin ampequin ënesa. Adquido Nuquin Papan ambi abucshun nacenaidën tabadtemaido nendac. <sup>11</sup> Ënden mibi adquo iccondaidi nëbi utsi-utsiec padenquo icsho isash Nuquin Papa mibi cuidenquo yec mibi icsaid bëpiscudac. Adembidi, Nuquin Papan mibitedi bëdambo icmebanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

*Ëmbi chudtemaid chudmane qeshun adquid isuidteneta quiaid*

<sup>12</sup> Ēmbi natemaid naden nata caid nibēdec qeshun naic bēdamboquid ictiapimbo iquebi, quiash padenquoio yec tsadebi. Aden nabanquin ėntiapimbo icmane quiash padenquoio iquec tsadebi. <sup>13</sup> Matsesēn chebudaid pucu yacno budash dada bēdambo icmianquid nec. Yuecash matsesēn dada chodquetequid nendac. Padnuen, ėbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbēd Nuquin Papa iquec. Ad icnuc mimbi chudtemaid chudquid icta, quenquoio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anēdēnquequid nēsecatequid nendac. <sup>14</sup> Nadatiambocquin Esuquidistu Nuquin Icho Nuquin Papan uincuemepanēdash. Aidēmbi nuquitsen abi tantiaquid icsho uincuemendac. <sup>15</sup> ¿Abi tantiaquid icquin, Esuquidistubēd daēdash tabadquid nebi, quequin tantienquioda mimbi icpe? Ai, aibdēdi daēdtequid nuqui nec. ¿Adquidbēd daēdashtabi icsaquidbēd daēdoape? Padenquoio iquebi. <sup>16</sup> ¿Dadpen chudmequid chudash daēdabimboecquid nec, quequin mibitedishun tantienquioda icpe? Aid daēdi dada abentsēc yachimboecquid nec, quequin Nuquin Papan dada uamiampid nec. <sup>17</sup> Nuquin Icbobēd daēdaidien Icbon tantiacpadquieci tabadquid nec.

<sup>18</sup> Ēmbi inacmaid chudmane qeshun chido utsi isuidteneta. Padenquoio yec icsaquidbēd daēdquid mibi iquendac. Ambi chudtemaid chudquid aton namibēd ėquēducuēsh daēdaid nec. Nami umanucuēsh icsaid namibēd daēdtiapimbo iquec. <sup>19</sup> Nuquin Papan Mayan tabadtequid Esuquidistu tantiaquido nec. ¿Nuquin Papan ėbēd tabadmiaid abipadquid nec, quequin tantienquioda mibitedishun icpe? Ēbibi nuquin icho nec, quetiapimbo matses iquec. Adecbidi, Con icho nibēdec. Ēmbi tantiacpaden naĩmbi, quetiapimbo mibi iquec. <sup>20</sup> Nuquin Icho cuesten dectanac matses icsaquid icsho cuidnushe quiash abided cuidadec unēsquid Nuquin Papan icmiac abi tantiaquid yec aidēn na mibitedi nec. Adoaidi ambi chiacpaden ismec bēdamboec tabadteneta.

## 7

### *Dada chidobēdi daēdaid*

<sup>1</sup> Nēbi mimbi dada uaboed isombi. Aid isun ėmbi tantiacpaden chiembiq. Tantiata. Chido inquid dadatedida ictiad quequin mimbi tantiapec. Padnuen, Chido bedenquoio iquembi, qesho chido inta cainda caimbi mibi. <sup>2</sup> Esuquidistu tantiesha yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsēc inquid dada ictiad. Adecbidi dada abentsēcshun inaid chido ictiad. <sup>3</sup> Con chido ėmbi inaid nec, quequin aiduidi chudquid icta. Adecbidi con bēnē ėbi inquid nec, quequin aiduidi chudmequid chido nec. <sup>4</sup> Chidon dada daēdash aton bēnēn dadabidi nec. Adecbidi dadan dada chidon dadabidi nec. <sup>5</sup> Aid daēdi daēdabi yachimboec, Padi, quenda. Adboedi, Nuquin Papa chuinuec nēidtedi ushquin padenquoio nuqui iquec, qeshun ėnta. Aidtedec ushquin padenquiocshon, Ēmbi yuen ėntiapimbocsho isun Satanasēn icsamenushe qeshun padpiden nata. <sup>6</sup> Ēnta quenquoio iquebi. Nēidtedi ushquin padenquoio iquembi quiash mibi daēdi aidtedecuidi ushec ėnēdta caimbi. <sup>7</sup> Padnuen, chido inesa ėbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

<sup>8</sup> Chido inesa ëbi tabadacpadec dada utsitedi tabadec bēdambo ictsiash. Adecbidi dadan inaidpen bēdambo ictsiash chido. Dada bēnua adecbidi bēdambo ictsiash. <sup>9</sup> Adquid icquin isuidtiapimbo yec comapenec chudte bunquin chido inta. Adecbidi chido bēnua dada isuidtiapimbo iquec dadan inaid icta.

<sup>10</sup> Daēdash niamēnenda. Ēmbibi chienquiocquin Nuquin Icbon aden chuinēdacadembibi chiembique. Tantia. <sup>11</sup> Min bēnē nianash utsin inaid iquenda. Dadan inaid icnu quec mimbi niamboedēn inaid icoata. Adem-bidi chido inquid min chido bunenquiocquin abi icsaid dada uashun ismequin nidmenda.

<sup>12</sup> Nēbi Nuquin Icbon naden chuiban cainquiocnobi ěmbia Esuquidistu tantiaquid icquin Esuquidistu tantiaquid utsibo ěmbi chuibocpadembibi mibitedi chuoaimbique. Tantia. Dada aton chidobēdi Esuquidistu tantiesa icboedi aton bēnē Esuquidistu tantiaquid yanuc aton chido padenquio yec, Con bēnē nianu, quenquio ictsiash. Adquid icsho isash. Con chido icsambocquid nec, quenquio yec abēdi tabadquid bēnē. <sup>13</sup> Adecbidi chido utsi aton bēnēbēd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiasash, Con bēnē icsambocquid nec, quenquio yec bēnē nianec nidesa chido. <sup>14</sup> Esuquidistu tantiabi yec daēdacadec aton chido Esuquidistu tantiaquid yanash aibēd abentsēc yac bimboec tabadec bēnē. Adec bēdamboec tabadsho isun Nuquin Papan chido bēdamboen tabadmequin bēnētsen bēdambo icmebampec. Chido Esuquidistu tantiaquid icquin aton bēnē padenquiocnobi aton bacuēbo tantiec, Icsambocquidēn bacuēbo nec, utsibo quenushe quiash bēnēbēd abentsēc yac bimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuēbo tantiec aton chido Esuquidistu tantiesabēd tabadquid dada. Adec abentsēc yac bimboec tabadsho isun, Bēdambocquidēn bacuēbo nec, quequin utsibon ispec.

<sup>15</sup> Utsimbic ambi bedboedēn aton chidon Esuquidistu tantiasasho isun aton chido nidta catsiash. Adoquien, Mibēd tabadte bunebique. Ēbi nidmenda, quetsiash chido bēnē caic. Adoquien, Nidec nid, cac cacuidenquio yec nidquid chido. Chido utsibic aton bēnē Esuquidistu tantiaquid yansho isash, Mibi nianu, quetsiash. Adoquien, Mibi unēsquio iquec, quetsiash bēnē. <sup>16</sup> Adnubien dadan nidta caid aton chido Esuquidistu tantiaquid yec bēdambocquid icsho isash Esuquidistu tantiaquidtsen yantsiash bēnē. ¿Adquid yantsiash, quequin tantienquioda mimbi icpe? Adecbidi, chidon nianu caid aton bēnē bēdambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

<sup>17</sup> Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. <sup>18</sup> Esuquidistu tantiesa shui dēbid dēteshunaid yec Esuquidistu tantiaquid yanash ěbi shui dēbid dēteshunacmaid bimboecnuc nacnemeni quenquio yec tabadta. Adecbidi, Esuquidistu tantiesa shui dēbid dēteshunacmaid yec Esuquidistu tantiaquid yanash shui dēbid dētemeni quenda. <sup>19</sup> Shui dēbid dēteshunaidta nec, quenquio yec Nuquin Papa tsadec. Adecbidi, Shui dēbid dēteshunacmaidta nec, quenquio yec Nuquin Papa tsadec. Adquid nec quenquio yec, Ēmbi chiacpadomboen nadenequidta nec, quec

Nuquin Papa tantiec tsadec. <sup>20-21</sup> Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua icnu quenquo yec tabadoa. <sup>22</sup> Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. <sup>23</sup> Matses icsaquid icsho cuidnushe quiash abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. <sup>24</sup> Adembidi chuinu. Tantiata. Nuquin Papan mibi cuë nuc matses yec Esuquidistu tantiaquid yanash, Èbèd tabadquid con Icbo nec, quec matses yec bédamboec tabadta.

<sup>25</sup> Chido inesabèdta dadan inacmaid chuita quequin mibi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon èbi chuibeneta caid icquin naden mibitedi chiembique. Tantia. <sup>26</sup> Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. <sup>27</sup> Chido inquit yec chido inesa icnu quenda. Adecbidi, chido inesa yec chido inu quenda. <sup>28</sup> Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobèdta con bacuëbo bédambo icmepeba? quec chido inquit tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquiec quenquo yec ma mibi tabadnueshun.

<sup>29</sup> Èmbi chuiboed mibi bédamboen tantiamembique. Tantia. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mëyansho isash Esuquidistu chote anoentsèqui yaneque. Abi yacno utsibo puduedtiapimbo icnushe queshun min chido icnubi Nuquin Papa bunacpadomboen nabanec tabadta. <sup>30</sup> Adecbidi, unësquo yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. <sup>31</sup> Yuecshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

<sup>32</sup> Natiatequid nibèdpashun, queshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec. <sup>33</sup> Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobèdta con bacuëbo bédambo iquebi camepeba? quec tabadec. <sup>34</sup> Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bédamboen istsiashi, quec tabadec. <sup>35</sup> Aden mibi chuibanquimbi chido inesa chido bednu quesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe queshun èmbi tantiaid chuibanec nebi. Nuquin Papan tantiacpadomboen bédamboen



tabadmenuequin aden tantiaquin chuibanec nebi.

<sup>36</sup> Adembidi, Min champi bednu queboed chudte bunec mēmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuē tishtiapimbo yantsiash, quiash, Con champi inec cho, quiash icsatiapimbo adquid icoaic. <sup>37</sup> Adecbidi, min champi inu queboedi, Bedenquo iquemi, qesho tantishun menenda. Aden bedmenquo yec mibi bēdambo icpec. <sup>38</sup> Con champi bedec cho, qeshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

<sup>39</sup> Dadan inaid icquin min bēnē nianenda. Min bēnē unēsan utsin inaid icnu quiash adta. Esuquidistu tantiesan inaid iquenda. <sup>40</sup> Bēnua utsin inacmaid icnu quiash bēdamboshē iquec aid. Ēmbi tantiacpaden ēmbi chuibod Nuquin Papan Mayanēn tantiamiacpaden chiaid nec.

## 8

*Nuquin Papan uaidbimboecnuc nacnenaid tantiaquin pambid dasanaid*

<sup>1</sup> Nēbi Nuquin Papan uaidbimboecnuc nacnenaid tantiaquin pambid dasanaid chuinnun naden chiembique. Tantiata. ¿Matsesēn nacnenaidda nuqui tantiaid ictic? Padenquo. Aden tantiaquin ēmbi tantiacpadpenquo icquid utsibo nec quequin mamēnshumpec. Aden tantiaquin mamēnshunquin utsi tantienquo iquec. Utsien, Naden nabanquindambi utsibo bēdamboen tabadmepeba, quequin tantiaquidquo nec. <sup>2</sup> Ēmbibi tantiēmbi quequid tantiabenabictscquid nec. <sup>3</sup> Nuquin Papa tantiaquidien Nuquin Papan tantiaidquo nendac.

<sup>4</sup> Aden chuishun ¿Nuquin Papan uaidbimboecnuc matsesēn nacnenaidda tantiaquin pambid dasanaidtambi pepe? quequin mimbi chuiquin dada uaboed isun chuinnu. Tantiata. Nuquin Papan uaidbimboecnuc matsesēn nacnenaidda nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquie. <sup>5</sup> Nidaidēn samēdquid papa cain utsin cuēnaidda dadpen iquec. Adembidi abuc samēdquid Papa cain utsin cuēnaidda dadpen iquec. <sup>6</sup> Papa cain nuquin cuēnaidda Abia Yampidquo nec. Adquid utsi Nuquin Papa cainquo nuqui iquec. Aidi abitedimbo uabampampidquo nec. Aidquo tantiec nuqui tabadec. Adembidi Nuquin Icho cain cuēnaidda Esuquidistu nec. Aidēmbi aton Papabēdan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuēmbanaido yec ambi tantiaidda nuqui nec.

<sup>7</sup> Adembidi aid abentsēqui nuqui tantiaidquo icnubi Nuquin Papan uaidbimboecnuc matsesēn nacnenaidda utsibon tantiaidda iquec. Aden nacnenaidda tantiaquin pambid dasanaid aidon pepec. Aden peboedēmbi Esuquidistu tantiaquid yanshun nacnenaidda tantiaquin pambid dasanaid ēmbi pesho isun, Icsaosh, Nuquin Papan canushe, qeshun adquid petiapimbo yanēbi. <sup>8</sup> Nuqui piaidda Nuquin Papa tantiamianesa nec. Ad icnu Nuquin Papan uaidbimboecnuc matsesēn nacnenaidda tantiaquin pambid dasanaid penquiocsho isash, Aid bēdambocquid nec, quenquo Nuquin Papa iquec. Adecbidi, nacnenaidda tantiaquidda dasanaid pesho isash, Aid bēdambocquid nec, quenquo icoaic Nuquin Papa.

<sup>9</sup> Padnuen Nuquin Papan uaidbimboecnuc matsesën nacnenaïd tantiaquin pambid dasanaïd ëmbi bedshun pesho isash, Esuquidistu comapenen tantiaquidën tantiaïd nacnenaïd nec, Esuquidistu tantiabénabictscëcquid quenushe qeshun padenquo iquembi. <sup>10</sup> Aid pesho isash, Nacnenaïd papa cain cuënaïd nepec, qeshun, Aid tantiaquin ëmbitsen pambid dasanaïd penu, quetsiash Esuquidistu tantiabénabictscëcquid. <sup>11</sup> Padnuen ëmbi piaïd Nuquin Papa tantiamianesa nec quequin mimbi tantiec. Aden tantiaquin nacnenaïd tantiaquin pambid dasanaïd mimbi pec. Aden tantiaquin mimbi penubi Esuquidistu tantiabénabictscëcquidën Nuquin Papa tantiamiantequid nacnenaïd tantiaquin pambid dasanaïd nec, quequin pec. Esuquidistu comapenen tantiaquid mibi icquimbi nacnenaïd tantiaquidën dasanaïd ëbi icsainquo ictequid nec quequin pequin Esuquidistu tantiabénabictscëcquido mimbi icsameyoc. Mimbi icsamiaïdo tantiec Esuquidistu unëspanëdash. <sup>12</sup> Ad icnuc Esuquidistu tantiabénabictscëcquid mimbi icsamequin Nuquin Icbon chiacpadomboen niacquid mibi neyoc. <sup>13</sup> Padnuen Esuquidistu tantiaquid utsibon icsamboen tantiaquin penushe qeshun padpiden penquo iquembi ma icsainquo icpanu qeshun.

## 9

### *Esuquidistu tantiaquidon natequid*

<sup>1</sup> Esuquidistu chuibeneta cacmaïd Pabado nec quequidotsen chuïnu. Tantia. ¿Matsesën nata caïdtabi nedi? Padenquo. Esuquidistun ëbi chuibeneta caïd nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuïbanac mibitedi abi tantiaquido yanenquioda ictionda? <sup>2</sup> Ai, ëmbi Esuquidistu chuïbanac Esuquidistu tantiaquid mibitedi yanondac. Utsi-utsiec yacnocquid ëmbi chuïbanacmaïd icnubi, Èmbi chuïbanaido mibitedi nec, quequin tantiembi. Èmbi chuïbanac Esuquidistu tantiaquid mibitedi yanshun, Esuquidistun ëbi chuibeneta caïdquo nebi, quequin Pabadoñ chiaïd abimbo iquec, quequin bëdamboen tantiaquidquo mibi nepec tantesa uainquiocquin.

<sup>3</sup> Aden ëmbi Esuquidistu chuïbanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabadoñ Bednabebëdñan chuïbanasho pemenuoictiad, quequin chiec. Aden chiec onquequid ëmbibi tantiaquin naden aïdo chiembique. Tantia. <sup>4</sup> ¿Esuquidistu chuïbanec bundoenquiodabi icpe? <sup>5</sup> Adembidi, Esuquidistu chuïbanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuïbanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuïbanec ëbëd capuequi aton chido buante bunenquioda Bednabe icpadic? <sup>6</sup> Adembidi, ¿Mibi pemembique. Penuequin nabanenda, capenda Esuquidistu chuïbenequid utsibo mimbi ique? Bednabebëdñta ëbi chiec, ¿Penun daëdshun shubumpi nacnentiad, quepecta mibi ique?

<sup>7</sup> Ad yenquo utsibo iqueque. Tantia. Chuïnu. ¿Sondado icquinda aton na buanshun pepec? Padenquo. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquo. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. <sup>8</sup> ¿Aden chuïquin

ëmbibi tantiaidambi chuipo? Padenquo. Nuquin Papan Moises dada uamiampid ëmbi chiaid nec. <sup>9</sup> Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquo nec. ¿Bacanuidi ma penu quequin Nuquin Papan chiaidta nepadic? Padenquo. <sup>10</sup> Matsesbëdtambi ma penu quequin Nuquin Papan chiaidquo nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. <sup>11</sup> Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedi? <sup>12</sup> Mibi chuibanquid utsibo menebanquimbi ëbia mibi chuiquidquo icsho menetiadquidi menianenquo mibi icpoc. Aden ëbi menenquo yaqui ëmbi chiaid tantienquo icnushe quiash, Bec cho, quetiapimbo iquebi mibi caic. Aden chuibanec bundoquiecapuecuenec nebi. <sup>13</sup> Nuquin Papa tabadte shubu uashunaid yacnoshon nashunquidën ashunquo peshun aquec. Adembidi ashunquo nashunquid utsibon matsesën Nuquin Papa menen bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? <sup>14</sup> Adomboembidi Esuquidistu chuibancho abi tantiaquidon yuedec, quequin Nuquin Papan chiaid nec.

<sup>15</sup> Èbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Èmbi dada uaid buamiacsho isun ëbi yuedtsiash, quequin dada uainquo iccomb. Bunquiecapuecunësbudec mibi caic, Bec cho, quenquo iquendabi. <sup>16</sup> Èmbi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesa yanash unësqquo ictsiabi. <sup>17</sup> Èmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquo nebi. <sup>18</sup> Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

<sup>19</sup> Bec cho, quesa yec utsin yuacmaid nebi. Adquid yequi utsibo chuinuec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. <sup>20</sup> Adecbidi, isadaidbo Esuquidistu chuibanuec aidobëd tabadquin mimbi natemaid ëmbi natemaidpenquo nec, quenquiocquin ambi natemaid nainquo iquembi. Adquiecapuec tabadquin ëmbi chuibanec ma isadaidbotsen Esuquidistu tantiaquido yampanuna. <sup>21</sup> Adecbidi, isadaidpembu chuibanuec aido tabadacpadec abëdi tabadquin Esuquidistu chiapadec niaquenquo yec tabadec nebi. Èmbi adoac isadaidpembotsen ma Esuquidistu tantiaquido yampanuna. <sup>22</sup> Adecbidi, Esuquidistu tantiabenabictscëcquido chuibanuec ëmbi tantiabenabi iccondacpaden bëyuc tauain chiaidquo tantiamenuen chuibanec nebi. Èmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquo yampanuna. <sup>23</sup> Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

<sup>24</sup> Titinguecuededquido icnuc bëyuc abia titinguec choquid iquen-

dac. Adquid icsho isun, Mibi badedquo titinquioc, quequin titinqueta quequidën titinquec abia choquid menendac. Adembidi, Nuquin Papan menete bēda iquec. Aid bednu, queshun Icbon chiacpadomboen nabanta, caimbi mibi. <sup>25</sup> Badedquo titinquenuequid bedte bunaid chodquetequid icnuc, Aid bednu, queshun abi bēdiactsēc titincamete pete icsa actequid icsabēda isuidec titinquenuequid iquec. Nuquien chodquetemaid bednuequin icsaid isuidec. <sup>26</sup> Utsien, Bednu, quenquo yec titinquec. Adembidi, Bednu, quenquo yec utsibēd mēdanten senanu quequin nibēdacnoshombi mēdanten seded-sededec. Aden tantiaquin naisa nebi. <sup>27</sup> Utsibon ma tantianu queshun Esuquidistu chuibenias unēsacsho Nuquin Papan menete bēda bedtiapimbo icmane quiash icsaid mēmunc tsadebi.

## 10

### *Isadaidbon chieshampicpadec tabadenda quiaid*

<sup>1-2</sup> Abi yacno abi tantiesa chosho puduedmenquo icchitoshe quiash Nuquin Papan chiaid chieshēnenquo yec bēdamboec tabad, quequin tantiamenuen, Nadech nuquin tsusedpabo tabadpampic, quequin chiem-bique. Tantiata. Equipito yacnoshon ambi mēnchicaidobēd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic. <sup>3</sup> Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. <sup>4</sup> Adembidi acte bundoacsho isun cuēnote cuesquin acte chomiaid acash, Ēbi bēdambo icmequin Nuquin Papan ambi yuecshun chometequid Quidistubēdtan nadatiambocquin naid nec, quequin tsusedpabon utsin-utsinquien tantiabempampic. <sup>5</sup> Aden tantiabenubien abēd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unēsbudnepampic adquidtedi.

<sup>6</sup> Tsusedpabo chieshampicpadquid icnushe queshun Nuquin Papan aido chuiquin dada uamepampic. <sup>7</sup> Ad icnuc tsusedpabon Nuquin Papan uaidbimboecnuc nacenushun papa cain tantiampicpaden tantienda. Naden Nuquin Papan aido chuipampic. Bacabimboecnuc ambibi nacenaid tantiaquin peshun acash baidacuededpampicpaden tantiaquin nainda. <sup>8</sup> Adembidi, tsusedpa utsibon ambi chudtemaid chudampicpaden chudenda. Aden nasho abi ushēmbi tsusedpabo dadpen 23,000ted Nuquin Papan cuesunemepampic. <sup>9</sup> Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unēsbudnepampic. <sup>10</sup> Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaidi nēmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdabo Nuquin Papan budmiaidën aidtedi cuesunepampic.

<sup>11</sup> Abi tsibanquido tantiamenuenquin tsusedpabo tabadnēdaid icsa Nuquin Papan chuiquin dada uamepampid ěmbi chuiboed nec. <sup>12</sup> Tsusedpabo Nuquin Papa chieshēnec icsapampicpadec icsamane quequin mibi tabadte tantiata. <sup>13</sup> Ēnden tsusedpabo chieshēmete icpampid abi iquec. Adaid natiatequid icnuc chieshēnushe queshun Nuquin Papan mibi tantiaquin uidën uac mibi icsainquo yec chieshtoenquo yec dayacquo iquendac.

*Nuquin Icho Esuquidistu unësaid tantiaquin acshumbic mayan icsa tantiaquin mimbi actiapimbo iquec quiaid*

<sup>14</sup> Nuquin Papan chiaid niacmane quiash, Nuquin Papan uaidbimboecnuc matsesën nacnenaid tantianu, quenda. Dacuëdec cuenacbimboec aid nanacno nidenda. <sup>15</sup> Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. <sup>16</sup> ¿Iccuededquin sicaid acnun Nuquin Papa chiec onqueshun acted-actedquin matses icsaquid icsho cuidnushë quiash abided ciudadec Esuquidistun intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqueshun aton dada mëyanaid tantien icquinda nuqui pedi? <sup>17</sup> Esuquidistubëd abentsëc yacbimboecquido nebi, quequin tantiaquin pete cuësh-cuëshun meniac abentsëcshun piacbimboen abi tantiec iccuededquidon pebededec.

<sup>18</sup> Aden nuqui pebededacimboen isadaidbo icsaid cuidnuen nidaidën capuquidded cuesuniaid pambid tauiquin Nuquin Papan shëdtequid pambid bedshun cuesunequidbëdtan nidaidën capuquid ichon pepanëdash. <sup>19</sup> Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesën nacnenaid tibopecta iquec? Padenquio. <sup>20</sup> Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaid yacnoshon pambid dasanec. Aden aid pambid penu, queshun mayan icsabëd yacbimboecquid nebi, quequin pec. Adquidbëdtan penda. <sup>21</sup> Nuquin Icho Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. <sup>22</sup> ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

*Ëmbi natemaid naden nata caid nibëdec, quiash nanueboedi Esuquidistu tantiaquid utsi icsamemane quiash nainquiocte chiaid*

<sup>23</sup> Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaid tantiaquin pambid dasanaid ëmbi tantiacmaid nec, quiash pambid dasanaid petiadquio iquequi Esuquidistu tantiabenabictsëccquidën, Nëid nacnenaid nuquin papa caid nec, quequin penushe quiash penquio yec tsadebi. <sup>24</sup> Utsi tantienquiocquin nacnenaid pambid dasanaid piash bëdambo iquebi, quenda. Naden natiad. Matsesën nacnenaid pambid dasanaid ëmbi pesho isun utsibon icsamboen tantiatsiash, quequin penda.

<sup>25</sup> Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaid pambid dasanaid bedaidta nec? quenquiocquin bedta. <sup>26</sup> Abu nidaidbëdta uashun aidënquio icquidtedi Nuquin Papan uampidquio nec. Aidtedimbo aton na nec. Nacnenaid yacnoshon pambid sambededaid aton na nec. Aidën bacuëbo iquec aid pambid pequido mibi nec. <sup>27</sup> Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaid tantiaquin pambid dasanaid bedaidta nec, quenda.

<sup>28</sup> Adnubien mibi puduedacno isedquid utsi Esuquidistu tantiaben-abictsēcquid tsadquín, Matsesën nacnenaïd papa cain cuënaïd tantiaquin dasanaïd nëïd pambid nec, cac aid pambid penda. <sup>29</sup> Èmbi papa cain cuënaïd nec, quequin utsin tantianushe queshun aid pambid penda. Matsesën nacnenaïd con pa nec, quequin cuënaïd tantiesac quín ¿atotsieshumbimbi matsesën nacnenaïd tantiaquin pambid dasanaïd penquo iqueque? Chuinu. Tantiata. <sup>30</sup> Nuquin Papa èmbi tantiaïdquio icnuc penun aïdi chuïsho isash ¿atotsieshun matsesën nacnenaïd papa cain tantiaquin pepec utsibo quepec? <sup>31</sup> Edoen utsibo tantiamenuen bédamboen nabanec tabadteneta. <sup>32</sup> Aden naic, Esuquidistu tantiaquid isadaïdbo isadaïd-pembobèdta Esuquidistu bédamboen tantiabemequiono, quec bédamboec tabadta. <sup>33</sup> Naden naic èbibi bédambo iquebi, quenda. Naden èmbi nabanuc èbèdi utsi bédambo ictsiash, quequin tantiata ma Nuquin Papa yacno puduedtequid utsibo yanu queshun.

## 11

<sup>1</sup> Ambia tantiaquidën Esuquidistun icmiacpadquiec tabadec nebi. Adecbidi èmbi chuïquin ismiacpadquiec tabadteneta mibitedi.

### *Nuquin Papa tantiaquin iccuededquin naid*

<sup>2</sup> Mimbïa tantianèdaïdquio mibi nec, quequin mimbi chiaïd tantiaquin nabanec nebi, quequin mimbi dada uashun bëmïaïd isash bédambo iquebi. Adembidï, Esuquidistu tantiabenèdaïdon chuïbanaïd mimbi chiacpadomboen tabadec, quequin mimbi dada uaid bëmïaïdon chuïbansho tantïash bédambo iquebi.

<sup>3</sup> Mimbi natequid utsi chuïnu. Tantiata. Abi tantiaquid chuïquid Esuquidistu nec. Adembidi chido chuïquid dada nec. Adembidi Esuquidistu chuïquid aton Papa, Nuquin Papa caïd, Edoen nec. <sup>4</sup> Adquid Nuquin Papa nec, quequin, Aid chuïnu, queshun aton mauete chicquid dadan. Aid chuïnuen mauéc tabadquín, Èbi chuïquidpenquo Esuquidistu nec, quïacbimboen ismequid nec. Adembidi Nuquin Papan chiaïd tantïamequín chuïbanquidën aton mauete chiquec. <sup>5</sup> Chidoen, Èbi chuïquid Esus nec, quequin ismec mapucudash tsadec. Adec mapucudenquo yec tsadquín Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaïd chuïbanenquo ictïad. <sup>6</sup> Èbi chuïquid nibèdec, quïacbimboec tabadsho matasmetïad. Matasmiash ma mapucudpanu chido. <sup>7</sup> Nuquin Papa aton madobèd onquec: Nuquibimboecnuc matses uanuna, quïampicpaden dadaba uapampic. Nuquin Papabimboec icquid nebi, quïash tsadquid dada. Èbi chuïquid Abia Yampid nec, quequin ismenuéc aid chïec onquec mauete mauesa dada nec. <sup>8-9</sup> Dadaba Nuquin Papan uapampic. Dadabèd icquid uanuna queshun dadan shïctodo chicshun chido uashun, Mibèd nashunanquid nec, quequin dada menepampic. <sup>10</sup> Adquid icmiac dada èbi chuïquid nec, quequin nashunec chidon. Adsho isash Nuquin Icbon abi yacnoshon uaido, mayan bédabo abi chuïquid chïeshënenquo yec Icbon chïacpadquiec tabadec. <sup>11</sup> Nëïd chido nec. Nëïd utsi dada nec, quenubi nashunanquid abi daèdi nec. <sup>12</sup> Dadan shïctodo chicshun chido uapampic. Adecbidi chidon tïshaid dada nec. Ambi tantïampicpaden Nuquin Papan naidtedi nec. <sup>13</sup> ¿Nuquin Papa

chuinuec ëbi chuiquid nibëdeque. Matasadnu quiash chido bëdamboda icpadic? <sup>14</sup> Chido isadacpadec isadnu quec icsambo dada ictsias. <sup>15</sup> Chido isadacpadec dada icsho isash, Chido nec, quetsias. Dada isadacpadec chido isadenquo iquec. <sup>16</sup> Ëmbi chuiboed tantiash, Icsamboen chiosh, quetsias. Adquid naden chuinu. Tantia. ¿Ëmbentsëquidambi aden chie? Padenquo. Ëbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabedec.

*Nuquin Icbo unësash uincuenaid tantiaded-tantiadedta quiaid*

<sup>17</sup> Adecbidi, Mimbi naidtedi bëdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec. <sup>18</sup> Abentsëc yacimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. <sup>19</sup> Nëidtedi ëmbi bëdamboen isaïdo nec. Utsitedi ëmbi icsamboen isaïdo nec, quiash cuëshëdacimboec mibi tabad-cuededec. ¿Adec tabadshoda Nuquin Papan mibi bëdamboen ispec? Padenquo. <sup>20</sup> Adec tabadquin Esuquidistu unëste tantienquiocquin utsin-utsinquien peshun acted-actedec. <sup>21</sup> Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paëmbocquid nua acash tantienquo yec tabadec. <sup>22</sup> ¿Min nuntan pete nibëdpecta iquec? Mitsana iquec. Adec mitsana min shubuno icnuc ¿Esuquidistu unëste tantiec utsibobëd iccuedednu, quenquiocquina mibia choshon pebededpe? ¿Natiamianquiec pete nibëdchitec pete nibëdquid camenuenda mibia pebedede? Aden pebededquido ¿atotsimbi chuipe? ¿Bëdamboen mimbi nabanec quepectabi ique? Padenquo. Aden naquin Esuquidistu unësaid tantienquiocquin mimbi pec.

<sup>23</sup> Nuquin Icbon chiacpadomboen mibitedi chuibanondambique. Tantiata. Chuinu. Nëid inchëshëmbi ëbi chieshënkido ëbëd icquidën ëbi bedmendac, quequin Esuquidistun abi unëste tantiaquin nadopanëdash. Pete bedshun <sup>24</sup> Nuquin Papa chuishun cuësh-cuëshun naden abëd icquido chuipanëdash: “Pete cuëshaid bedash matses icsaquid icsho cuidnushe quiash ëbided cuidadec unëste tantiaquin pebededta,” quepanëdash Esuquidistu. <sup>25</sup> Aden chuishumbic aid pebededsho isun pete utsi pebededquin nainshun adembidi dëshote bedshun sananquin naden Esuquidistun chuipanëdash: “Esuquidistu unësquin ëbi chian anëdënquiacono nësecatequid icsho mënchictequid Esuquidistu iquec, quequin tantiaquin sicaid acbededta. Sicaid acquin ëbi mënchictequid iquec quequin tantiaquin acban.” <sup>26</sup> Aden Esuquidistun ismenëdaccpadomboen pete cuëshëmpi pebededshumbic sicaid acbededta. Nuquin Icbo unësaid tantiaded-tantiadedquin aid padpidec choabicnuc adobanta. <sup>27</sup> Abi unëste tantienquiocquin pete cuëshun peshun acquin Esuquidistun chiaïd niacquid nec. <sup>28</sup> ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata. <sup>29</sup> Esuquidistu unësaid tantienquiocquin peshun acquid Nuquin Papan cuidendac. <sup>30</sup> Aden adquidon peshun acac utsi-utsiec padishec; utsiutiec daicsambo yanec; utsi dadpen ënden unësac. <sup>31</sup> ¿Adabi Nuquin Papan chiaïd niaquenquo yec tsadpe? quequin tantiec tsad. Aden tantiec tsadshumbic, Icsaobi, Papa, queshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquo

iquendac. <sup>32</sup> Adesa icsho Nuquin Papan natiaic camiaid mibi iquendac. Abi tantiesabêdta chian anêdênquequid nêsecadenquo mibi icmenuen Nuquin Papan mibi natiaic camec ma êmbi chiacpadomboen nabanenuequin. <sup>33</sup> Adembidi Esuquidistu unêsaid tantianuec iccuededquin utsibo choabi iquec quequin aido cainta. <sup>34</sup> Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unêsaid tantianuequin naden nata quequin chiombi. Mibi yacno nidash puduedshun êmbi chuiboed daêd uain chiendambi.

## 12

### *Nuquin Papan Mayanên tantiamiaid*

<sup>1</sup> Nuquin Papan Mayanên tantiametequid chuinu. Tantiata. <sup>2</sup> Ênden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesên ismec, Nêid papa cain cuênaid nec, quesho tantiaquido mibitedi iccondac. <sup>3</sup> Adquid iccondaiddi Esuquidistu tantiaquid mibi yanacsho naden chiembique. Tantia. Nuquin Papan Mayanên tantiamiaido: Esus Nuquin Icbopenquo, Nuquin Papan Chomicmaid nec, quetiapimbo adquido iquec. Adecbidi, Nuquin Papan Mayanên tantiamiacmaido: Esuquidistu con Icbo nec, quetiapimbo icoaic.

<sup>4</sup> Nuquin Papan Mayanên, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsêcquiobi tantiamianquid Nuquin Papan Mayan nec. <sup>5</sup> Adecbidi, utsi nashunquido Esuquidistu tantiaquido icnubi utsi nashunquidon Icbo abentsêcquiobi Esuquidistu nec. <sup>6</sup> Adecbidi, nadatiambocquin nabanquid utsi-utsiec icnubi Nadatiambocquin nami-anequid abentsêcquiobi Nuquin Papa iquec.

<sup>7</sup> Esuquidistu tantiaquid utsibêd tantiananquin namenu, quequin aton Mayan Nuquin Papan nuqui menec. <sup>8</sup> Nuquin Papan Mayanên tantiamiac ambia comapenen tantiaquidquo icquin chuibanquid utsi-utsiec iquec. Nuquin Papan Mayanên tantiamiac ambi tantiaid chuibanquid utsi-utsiec iquec. <sup>9</sup> Nuquin Papan Mayanên tantiamiacpaden êmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanên tantiamiac bêdamequid utsi-utsiec iquec. <sup>10</sup> Nuquin Papan Mayanên tantiamiac nadatiambocquin nabanquid utsi-utsiec iquec. Nuquin Papan Mayanên tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanên tantiamiac matses bêdamboec tabadsho isash, Nuquin Papan Mayanên tantiamiaid nec, quequin tantiaquidquo utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanên tantiamiac nidaidên icquid onquiacmaidên onquequid utsi-utsiec iquec. Adembidi Nuquin Papan Mayanên tantiamiac nidaidên icquid onquiacmaidên onquesho tantiaquidên tantienquiocsho isun aidon onqueten chuibanquid utsi-utsiec iquec. <sup>11</sup> Aden Nuquin Papan Mayanên tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanên aden tantiamec.

*Dada abentsêc yacpadquiec Esuquidistu tantiaquidtedi iquec*



<sup>12</sup> Uidënaid dadpen icnubi matsesën dada abentsëc iquec. Adquibidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. <sup>13</sup> Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

<sup>14</sup> Matsesën dada abentsëqui icnubi uidënaid dadpen iquec. <sup>15</sup> ¿Médantepadquidpenquo yec matsesën dada uidënacmaidta taë icpec? Padenquo. Dada uidënaid taë iquec. <sup>16</sup> Adecbidi, ¿ëshëpadquidpenquo yec matsesën dada dëccuësquiaicmaidta dëbiate icpec? Padenquo. Dëbiate dëccuësquequid iquec. <sup>17</sup> Matsesën dada êshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? <sup>18</sup> Nuquin Papan tantiampicpadquiequi matsesën dada uidënaid nec. <sup>19</sup> Dëccuësquequid abentsëc icnuc dada nec quetiapimbo iquec. <sup>20</sup> Uidënaid dadpembëd dëccuësquequid dadpen icnuc matsesën nami abentsëqui iquec.

<sup>21</sup> Matsesën dada ad icnuc, ¿Médante bëdambo icnubi êshë padenquo iquec, quepecta mibi ique? Padenquo. <sup>22</sup> ¿Isadesa uidënaid uquëducquid nibëdnuc matsesën dada bëdamboda icpatsiash? <sup>23</sup> Uidënaid uquëducquid ismenquiocquin ompoaidquo utsi nec. <sup>24</sup> Nami isaidquo ompodesa nec. Nuquin Papan tantiampicpadquiequi ompoaid nibëdnuc matses cuëdenquo yec unësec. <sup>25</sup> Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aibdëdi iquec bëdambo yec nashunanquid aitedi nec. <sup>26</sup> Abentsëc paëmbo iquec matsesën dada bëdambo iquenquo iquec. Adquidtedi bëdambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yachimboec iquec abentsëc icsacsho isash abitedi unësquio iquec. Abentsëc, Bëdambo iquebi, quenuc aibdëd abitedi bëdambo iquec.

<sup>27</sup> Adquidtedi matsesën dada abentsëc yacpadquieci Esuquidistu tantiaquidtedi aidën dada abentsëc yachimboecquid nuqui nec. Abi tabadtequid iquec. <sup>28</sup> Abi tabadtequid nadquid iqueque. Chuinu. Tanta. Ambi chiapaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nadatiamboquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yachimboec nuqui tabadec. <sup>29</sup> ¿Esuquidistu tantiaquidtedida ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. <sup>30</sup> Adecbidi, ¿Esuquidistu tantiaquidtedida bëdamequid icpadic? Padenquo. ¿Esuquidistu tantiaquidtedida abi onquiacmaidën onquequid icpadic? Padenquo. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquo. <sup>31</sup> Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuquin ëmbi abia chuibambocpadquid icte bunquiota.

*Utsi tantiaquidquo*

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquo chuinu. Tantiata.

## 13

<sup>1</sup> Matses utsi-utsiecquid onquiapadquiec anquiadquid, adecbidi Nuquin Papan abi yacnoshon uaid, mayan bēda onquiapadquiec onquequid icquimbi utsi tantiesa icquin chuibansho abipenquo chuisho utsibon tantiendac. <sup>2</sup> Utsibic, Nuquin Papan Mayanën tantiamiac chuibanquid adembidi Nuquin Papan chienquo icampid Nuquin Papan Mayanën tantiamiac tantiaquid aidi niosh. Aidēmbidi Nuquin Papa nadatiambocquin naquidquo nec, quequin tantiaquin, Mananuc macuēsh dapa icboedi acte nantan nēnitsinoa, Papa, cacpadomboen nēnitsinoac nidquid isquid icquimbi utsi tantiesa icsho, Bēdamboquid mibi nec, Nuquin Papan catiapimbo iquec. <sup>3</sup> Utsibic, aton na nibēdsho menequidquo niosh. Adembidi, Esuquidistu tantiesa nebi cata, cac padenquicsho mēyanaid niosh. Adquid icquimbi utsi tantiesa icsho, Bēdamboen mimbi naoc, Nuquin Papan catiapimbo iquec. <sup>4</sup> Padnuen Nuquin Papan Mayanën bēdamboeshë ictequid tantiamiaid nadquid iqueque. Chuinu. Tanti. Utsi tantiaquidquo utsi tantiamequionuec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquo con na bēpashun quesa nec. Utsi tantiaquidquo dēniacanquidquo yec dēniacanquidquo nebi abibi quesa nec. Utsi tantiaquidquo ēbentsēqui tantiaquidquo nebi quiacbimboen nabanesa nec. <sup>5</sup> Utsi tantiaquidquo utsi icsamboen tantiaquin nabanesa nec. Utsi tantiaquidquo, Ëmbentsēqui tantiacpadomboenuidi utsitedishun nabantiad, quesa nec. Utsi tantiaquidquo badedquid nēishesa nec. Utsi tantiaquidquo abi icsamboen nasho cuidesa nec. <sup>6</sup> Utsi tantiaquidquo utsi icsambocsho isash, Unēsquo iquebi, quec tsadquid nec. Adecbidi, utsi bēdamboesho isash, Bēdambo iquebi quec tsadquid neoaic. <sup>7</sup> Utsi tantiaquidquo utsi icsaid chienquo yec tabadquid nec. Utsi tantiaquidquo ambi nanaid nibēdsho isash ampiash badedquid quenquo yec ¿mitsimboembi nampoba? quec onquequid nec. Utsi tantiaquidquid utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bēdamboen nasho isnuen cainquid nec. Mēyanaqui chieshenquo yec dayacquio yec tabadtenequid utsi tantiaquidquo nec.

<sup>8</sup> Utsi bēdamboen tantiaid ēnēdtiapimboctequid nec. Nuquin Papan chiaid chuibantsaidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ēmiac matsesēn isquin tantiaid ēnēdoaic. <sup>9</sup> Nabanaidtedi tantiabenabictsēcquidquo nuqui nec. Adecbidi Nuquin Papan chianpidtedi tantiabenabictsēcquidquo nuqui neoaic. <sup>10</sup> Nidaidēn tabadquin aidtedi tantiabenabictsēcquidquo nuqui icboedi Nuquin Papa yacno puduedash abitedi tantiaquidquo nuqui iquendac. <sup>11</sup> Bacuē yec bacuēmpi onquiapadec onquepadenebi. Adembidi, bacuēmpin tantiabenabi yacpaden tantiapadenembi. Adquid icquin caniaidēn tantiacpadpenquiocquin tantiapadenembi. Adquid icboedi caniaish bacuēmpin tantiacpadpenquiocquin tantiapadenondambi. <sup>12</sup> Nēbi isnanten bēisadquin Nuquin Papabimboecquid nuqui isec. Yuecshun abi

yacno puduedshun aidquiobi Edoen Nuquin Papa nuqui bèistuidendac. Nèbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bèisquin nuqui tantiabendendac aid.

<sup>13</sup> Nidaid ènèdnuc nèidtedi ènèdtemaid iqueque. Chuinu. Tantia. Ambi chiapaden nabanquidquo Nuquin Papa nec, quequin tantiaid ènèdtemaid nec. Adecbidi Nuquin Papa yacnoèsh abipadquid bédambocquidquo iquendabi, quequin cainquin tantiaid ènèdtemaidquo nendac. Adecbidi, utsi tantiaid ènèdtemaidquo neoaindac. Aidedi ènèdtemaid icnuc nidaidèn tabadquin, Utsi tantiambi, quequin ismiac utsi dadpen Esuquidistu tantiaquid yanash mibèdi Nuquin Papa yacno tabadendac. Adquid bédamboshècquid nec.

## 14

### *Mimbi chiaid chuibanquid èbi icme, Papa, quaid*

<sup>1</sup> Utsi tantiaquid icta. Nuquin Papan Mayanèn adquid icmioso, quequin ambi tantiamete utsi bunqueibique. Adec bunsho mimbi chiaid comapenen bédamboen chuibanquid èbi icme, Papa, quequin chuiban. <sup>2</sup> Aden tantiamiac tantiamenu queshun tantianuequidèn onqueten chuiban. Aton onqueten onquenquiocsho aidon tantienquo iquec. Padnuen onquiaidtedimbo Nuquin Papan tantieque. Aden nidaidèn icquid onquiacmaidènquo Nuquin Papan Mayanèn tantiamiacpadec onquequin Nuquin Papa chiec onqueta. <sup>3</sup> Ma Esuquidistu utsibon tantiabenu, queshun Nuquin Papan chiaid chuibanec. Adembidi matses ma bédamboec tabadnu queshun chuibanec. <sup>4</sup> Nuquin Papan Mayanèn tantiamiac nidaidèn icquid onquiacmaidèn onquequin onquequiduidtsèqui tantiabenu yanec. Padnuen Nuquin Papan chiaid Nuquin Papan Mayanèn tantiamiac Esuquidistu tantiaquido ma Nuquin Papan chiaid tantiabenu queshun chuibanec. <sup>5</sup> Nuquin Papan Mayanèn tantiamiac nidaidèn icquid onquiacmaidèn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabendendac. Padnuen nidaidèn icquid onquiacmaidèn chuibanac tantianuequidèn tantienquo iquendac. Aden tantienquiocsho isun abi daèdi onquiaid tantiaquin chuibanquid nibèdnuc nidaidèn icquid onquiacmaidèn chuibanenda caimbi.

<sup>6</sup> Adembidi chuinu. Utsibon tantia. ¿Mibi yacno choash puduedshun nidaidèn icquid onquiacpadec onquenquiocquin èmbi chuibansho tantienquo yec, Bédambo iquebi, quecta mibi tabadpe? Padenquo. Nuquin Papan chiaid dada uamiampid min onqueten èmbi chuibansho mimbi tantiampec. Min onqueten chuibanenquo yec èbibi onquiacbimboecsho mimbi tantienquo ictsiandac. <sup>7</sup> Shoncatempi abibi shoncadtiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuèdèmesan tentencate cuèdèmesho tantias, Adamboen cuèdèmenquo iccosh, quec. <sup>8</sup> Adembidi, utsibo yacno ma cuesnanu queshun chomenuequin sondadon tantiabocpadpenquiocnoc shoncac choenquo iquec. <sup>9</sup> Adecbidi, utsi onquiacmaidèn onquequin chuisho ¿mitsipaden tantiapatsiash? Utsibon tantienquo iquec. Aden chuibanec nibèdacno onquiacbimboec onquepec. <sup>10</sup> Onquete utsi-utsiec dadpen iquec. Aton onqueten onquequin

chuibansho matsesën tantiec. <sup>11</sup> Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. <sup>12</sup> Ad icnuc, Nuquin Papan Mayanën ëbi tantiamepec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

<sup>13</sup> Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. <sup>14</sup> Nuquin Papa chiec ëbi onquiacmaidën onquesho utsibon tantienquio iquendac. <sup>15</sup> Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdëdashic tantiamenuec iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquio iquembì. Adecbidi abi onquiacmaidën cuëdënenquio iquebi. <sup>16</sup> Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. <sup>17</sup> Abi onquiacmaidën onquequin Nuquin Papan naboed chuibanac Esuquidistu tantiadonequidquio mibëd iccuededquido yantiapimbo iquec.

<sup>18</sup> Èbibi utsin-utsinquec onqueten onquequidquio icnubi mibitedi adesa nec. Padnueni adec onquec bëdambo iquec, Papa, quequin chuided-chuidedembi. <sup>19</sup> Padnuen chuinec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquiadquid icquin aidtedictsëqui chiendambi aido onquiacmaidën onquenquiocquimbi.

<sup>20</sup> Adembidi chuinu. Utsibon tantia. Bacuëbo tantiabenabictsëcquid yacpadquec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. <sup>21</sup> Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquio icoaposh,” quequin Nuquin Papan dada uamiampid nec.

<sup>22</sup> Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. <sup>23</sup> Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuededsho tantiash, Aidon tantiate icsabudpash, quepec. <sup>24</sup> Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. <sup>25</sup> Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquiochoed

Nuquin Papa chiashic, Nēmo iccuededquidobēd mibi iquec, Papa, quequin chuibampec Esuquidistu tantiaquid yanshun.

*Abentsēcshun-abentsēcshunquien chuiban, quequin chiaid*

<sup>26</sup> Adembidi chuinu. Adembi tantiata. Esuquidistu tantiaquid iccuededec cuēdēnu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidēnquo onquequin chuīnu, utsi quenubien; mibi onquiacmaidēn chuīsho tantiombique. Min onqueten chuinu, utsi quetsiash. <sup>27</sup> Aided, Chuinu, qesho ¿mitsicquid chuita nuqui cape? qeshun naden chiac bēdambo ictsiash. Chuinu. Tantia. Mibi onquiacmaidēn onquequin chuīnuequid daēd icnuc bēdambo ictsiash. Abentsēc chotsēcncuc adecbidi bēdambo ictsiash. Aided icquin abentsēcshun-abentsēcshunquien onquequin chuiban, cata. Aden abentsēcshun onquequin chuīsho abi onquiaid tantiaquidēn iccuededquidon onqueten chuībanta, cata. <sup>28</sup> Padnuen abi onquiaid tantiaquin chuībanuequid nibēdnuc, Tsadquin Nuquin Papauidi otacquoicquin chuita, cata.

<sup>29</sup> Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuībanquid daēd icnuc bēdambo ictsiash. Abentsēc chotsēcncuc adecbidi bēdambo ictsiash. Aided icquin abentsēcshun chuībanubi, ¿Nuquin Papan Mayanēn tantiamiacpadomboenda chuībaneque? Isnu, quequin chuībanuequid utsibon Nuquin Papan chiaid isban. Adembidi, utsin chuībanubi adomboembidi isbanoaic utsibon. <sup>30</sup> Abentsēcshun chuībanubi Nuquin Papan Mayanēn tantiamiac utsi: Ēmbitsen chuībanu, qesho tantiaishun ma aidēn chuībanu quiash ambia chuībanquid ēnēd. <sup>31</sup> Adquidēn iccuededquidtedi tantiamenuequin abentsēcshun-abentsēcshunquien chuībanta. Aden chuībansho tantiaish ma chieshenquoio yec bēdambo icpanu. <sup>32</sup> Nuquin Papan Mayanēn tantiamiaid utsibēd bēdamboec tabadquid nec. <sup>33</sup> Nuquin Papan tantiamiacpadequi utsi onquenubi onquenquoio utsibo tabadec. Onquenu, utsi quenuc, Ai, onqueta, qeshun onquenquoicquin cainec tabadec chuībanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

<sup>34</sup> Esuquidistu tantiaquido iccuededacno otacquoio tabadquid chido. Chuībanacnoēsh onquenu, quenda chido. Nuquin Papan chiacpadecebi chuīquid dada nec, quec chido. <sup>35</sup> Anoshon chiaid tantienquoio yec tsadquin cainec shubuno nidash, Tantienuquoio iccombique. Nuqui tantiaboed ēbi chui, qesho tantiaishun chiec aton bēnēn. Tantienuquōicquin cainenquoio iquec chido icsambo iquec. <sup>36</sup> ¿Mimbia Nuquin Papan chiaid chuībanquidoda ne? Padenquoio. ¿Chuībanac Esuquidistu tantiaquido mibitedictsēquida yanondac? Padenquoio. <sup>37</sup> Nuquin Papan chiaid chuībanquidquoio nebi, mibi quenuc, Nuquin Papan tantiamiacpaden Pabadon chuībanquin dada uaid nec, mibitedi quepec. <sup>38</sup> Aden mimbiantianubi, Pabadon dada uaosh, quenquoio utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

<sup>39</sup> Adembidi chuinu. Adembi tantiata. Nuquin Papan chuīpampid comapenen tantiaquin chuībante bunquiota. Aden chuībanquid mibi icnuc utsi onquiacmaidēn onquequin chuīnuesho, Ai, cata. <sup>40</sup> Adecbidi,

Nuquin Papan Mayanën tantiamiac chuibanuequid dadpen icnuc utsibo bédamboen tantiamenuequin abentsēcshun-abentsēcshunquien chuibanta.

## 15

### *Esuquidistu uincuenaid*

<sup>1</sup> Adembidi chiembique. Tantia. Matses icsaquid icsho cuidnushe quiash abided ciudadec Esuquidistu unēsaid ěmbi chuibansho tantias, Ai, abimbo iquec. Aid tantiembi, mibi quiampondac. Aden tantiadonec chieshenquio yec mibitedi tabadec. <sup>2</sup> Aden, Aid tantiabenu, qesho Nuquin Papan mibitedi bédambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bédambo icmebanacmaid nec. Adecbidi, ambi yuednu cacmaidquio adquid nec.

<sup>3</sup> Utsin ěbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided ciudadec Esuquidistu unēsapanēdash. <sup>4</sup> Unēsacsho shěcuě nacnenaiděn nauedshun bĕtashacsho daĕdec ushtanquin ambi chiahmpicpaden Nuquin Papan uincuen uapanēdash. <sup>5</sup> Aden uincueniac choquin, Uincuenobi, quequin Petedo Esuquidistun ismepanēdash. Adshumbic adembidi abĕd 12ted icquido ismeoapanēdash. <sup>6</sup> Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsi-utsiec padenquio iquec. <sup>7</sup> Aden aidtedi ismeshumbic aton utsi Santiacotsen Esuquidistun ismeoapanēdash. Adshumbic, ambi ěbi chuibeneta caidtedi ismeoapanēdash. <sup>8</sup> Aden aido ismequin nainshun yuecshun ěbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. <sup>9</sup> Abi tantiaquid mĕyanquin cuesunemequidquio icboedi abi tantiaquid yanacsho Esuquidistun, ěbi chuibeneta, cainquioctiadquidĕmbi adquid icta caid nebi. <sup>10</sup> Esuquidistu tantiaquid yansho isun ěbi chieshaid cuidentquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmiosi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. Ěĕmbentsĕquidambi chuibenedio? Aton Mayan Nuquin Papan meniac aidbĕd icquin chuibeniombi. <sup>11</sup> Adembidi, ěbi yacpadquidon Esuquidistu chuibanac utsitsen abi tantiaquido yampondash.

### *Matses unēsash uincuenaid*

<sup>12</sup> Adec Esuquidistu unēsash uincuenondash, quequin chuinubi ěmitsipaden tantiec uincuenta nibĕdec quec utsi-utsiec onquepec? <sup>13</sup> Uincuenta nibĕdnuc Esuquidistu uincuenenquio ictsempanēdash. <sup>14</sup> Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. <sup>15</sup> Nuquin Papan naid chuibanquidtedi muaquidquio icoatsiandac. Aden tantienquiocquin ěbi yacpadquidon chuibanendac. Unēsash uincuentequid nibĕdnuc ěbitedishun Nuquin Papan Esuquidistu uincuen uapanēdash quequin chiaid abipenquio ictsiandac. Unēsash uincuenta nibĕdnuc Nuquin Papan uincuenaid nibĕdtsiandac. <sup>16</sup> Unēsash uincuenta nibĕdnuc Esuquidistu uincuentiapimbo ictsempanēdash. <sup>17</sup> Aid uincuenambo

icnuc matses icsaquid icsho cuidnushe quiash abided cuidadquid Esuquidistu nec, cainquid mimbi ictsiandac. Matses icsaquid icsho cuidnushe quiash cuidadquid nibēdtsiandac. <sup>18</sup> Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempañdash. <sup>19</sup> Nidaidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

<sup>20</sup> Ēmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemaiid abi yacno puduedmequin ambi uincuemetequid dadpen iquendac, quequin chiaid abimbo iquec. <sup>21</sup> Unēstequid bēyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. <sup>22</sup> Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. <sup>23</sup> Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. <sup>24</sup> Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimbocnoc. Aido ambi nebudac bimboecquido iquendac. <sup>25</sup> Abi chieshēnquido utsitedibēd chuiquid icquin abi chieshēntiapimbocquid aido Esuquidistun icmebanendac. <sup>26</sup> Adoshombic ēnquimbi unēstequid nibēdquidquio Esuquidistun icmeoaindac. <sup>27</sup> Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. <sup>28</sup> Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

<sup>29</sup> Unēsash uincuentequid nibēdnuc, ¿atotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? <sup>30</sup> Adecbidi unēsash uincuentequid nibēdnuc ēbi unēs uate utsibo comapenec buncuededsho isun ¿atotsieshun, Uincuentequid iquec, quequin ēbi yacpadquidon chuibampec? <sup>31</sup> Unēsash uincuentequid iquec, quequin tantiembi. Aden tantiaquin Esuquidistu, Nuquin Icbo, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquiocquin Esuquidistu unēsash uincuenta iquec, quequin chuibenec nebi. Aden badiadquidēn-badiadquidēnquien chuibanubi ēbi unēs uate utsibo bunec. <sup>32</sup> Uincuentequid nibēdnuc, ¿atotsi quenuequini Epeso yacnoshon, Uincuenta iquec, quequin chuibanasho mēyanaqui chieshenquio yec dayacquio tsadpe? quetsiabi. Adecbidi uincuenta nibēdnuc: “Unēsash nibēdquiec iquebi, quequin nua peshun aquembi,” quetsiabi. <sup>33</sup> Aden tantienquio iquembi. Adembidi tantienda. “Uincuenta nibēdec quequidbēd capuenda aidēn tantiacpadec icmane quiash.” <sup>34</sup> Adquidpadquid icquin mimbi icsamboen tantiaid ēnquin Nuquin Papan chiaidquio tantiaata. Esuquidistu tantiec mibēd iccuedquid utsi-utsiec, Nuquin Papa nadatiambocquin uincuemianquidquido nec, quequin tantiesa nec. ¿Adquid mibēdi icnuc Nuquin Papan bēdambo icmiaido mibitedida icpe? Padenquio.

*Uincuemequin dada chuca meniaid*

<sup>35</sup> ¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queoapec. <sup>36</sup> Adquidën icsamboen tantieque. Chuinu. Tanti. Mimbi tiedën chococaid tauibëd ëshë chococatequid napi dëyuctequidpadpenquoio iquec. <sup>37</sup> Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. <sup>38</sup> Nuquin Papan tantiampicpadec aton dada yanec. <sup>39</sup> Abipadquidpenquoio ambi uaidtedi iquec. Abipadquidquoio matsestedi iquec. Abipadquidquoio nidaidën capuquidtedi iquec. Abipadquidquoio podochoquidtedi icoaic. Abipadquidquoio acten icquidtedi icoaic. <sup>40</sup> Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. <sup>41</sup> Badiadën ushë comapenquiechënquenubi inchëshën ushë dauebudquio chënquec. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquec chënquetequid utsi-utsiecbidi iquec.

<sup>42</sup> Aidtedi ënëdendac. Adecbidi tishac matses unësascho chococac nami chodquec. Adec nami chodquian Nuquin Papan tantiacpadec uincuentequidën dada chuca chodquesa nendac. <sup>43</sup> Tishac icsaquid matses iquec. Adsho uincuemequin ambi icsaisa icmiaid nendac. Nidaidënshun tishac chonoadec uimabudquid matses nec. Yuecash unësascho uincuemiac uimabudenquiocquin nabanendac. <sup>44</sup> Nidaidënshun tishac daicsambo yanash unësascho uincuemequin dada chuca icmetequid nendac. Nidaidënshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidënshun tishac matsesën tantiacpadquid icboedi abuc buanac anocquidën tantiacpadquid iquendac. <sup>45</sup> Adembidi Nuquin Papan chuiquin dada uamiampid nad iquec: “Bëyuc matses Adan caid nacen-shun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. <sup>46</sup> Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. <sup>47</sup> Bëyuc matses uanu, queshun nidaid putu bedshun nacenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. <sup>48</sup> Nidaid putu bedshun bëyuc matses nacen-shun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aidë iquendac. <sup>49</sup> Adecbidi bëyuc matses isadac bimboecquid nidaidën tabadquidtedi nec. Nuquin Papan abucshun chomiaid isadac bimboecquid abëd icquido iquendac.

<sup>50</sup> Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

<sup>51</sup> Nuquin Papan chienquiocpampid chuinu. Tanti. Abi tantiaquid unëabicquidbëdta ënden abi tantiaquid tsusedpabo dada chuca Nuquin Papan menendac. <sup>52</sup> Ambi namiaidën abucshun shoncanubi ëshë badedquoio bëbedquiabimboecnuc badedquoio unësesambo Nuquin Papan abi tantiaquido icmendac. <sup>53</sup> Chodquetequid icboedi chodquesa yanendac.



Unēstequid ichoedi unēsesa yanendac. <sup>54</sup> “Adquid icmiac unēstequid nibēdquidendac.

<sup>55</sup> Ad icnuc ¿mitsishunquio unēstequid istuidpec? Adembidi, ¿mitsishunquio unēsmetequid istuidpec?”

<sup>56</sup> Icsaquid unēstequid nec. Nuquin Papan nadomboen nata quequin chiaid niacquid icash unēstequid matses yanac. <sup>57</sup> Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaisa cuidquin nuqui bēdambo icmebanec. Adoac abi yacnoēsh icsaisa unēsesambo nuqui iquendac. Aden Nuquin Papan naindac, quequin, Bēdambocquid mibi nec, Papa, quequin nuqui chuidedchuidedendac.

<sup>58</sup> Adembidi chuinu. Tantiata. Adenuidi tantiaquin utsi uaqin utsin chuisho tantienquio yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ēbi icmendac, quequin tantiaquin.

## 16

### *Utsibo menenun piucquid bedbanaid*

<sup>1</sup> Nuquin Papan bēdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadasia caid yacnocquido Esuquidistu tantiaquido ěmbi chuibanacpadomboen mimbitsen nabanta. Naden Cadasia yacnocquido chiombi.

<sup>2</sup> Abentsēcshun-abentsēcshunquien mimbi bedaid musucbudcuenshun dominco ushēn mimbi musucacted dayun uata. Aton na daēdpactsēc icquidēn daēdpactsēc dayun uanubi mitsana dadpen icquidēn dadpen dayun uata. Aden musucbudcuenshun mimbi dayun uaid icnuc ēbi choacsho isash, ¿Tedtsimbi menepeba? quenquio mibitedi iquendac.

<sup>3</sup> Ēbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, Ēmbi isaïdo neque. Yuedta, quequin dada uashun aïdo menembi ma buanueshun. Aden ěmbi meniac buanquin utsibo ismetuidpec. <sup>4</sup> Adecbidi ambo nidtiadquio iquebi, ēbi quenuc mimbi menenun buantan caido ěbēdi nidendac.

### *Utsi-utsien chuibanaid*

<sup>5</sup> Nidaid Masedonia caid yacno Esuquidistu tantiec iccuededquid utsi-utsiec yacno isedbēquimbi mibi isbētsenembi. <sup>6</sup> Aden isedbēequi mibi isedash tabadebi. Iquenoanquid chonobi mibēd tabadtsiabi. ¿Aïd ěnēdan nidnu, qesho, adabi utsi yacno mimbi nidmepatsia? <sup>7</sup> Nēbi mibēdi yuec tabadtiapimbo iquebi, quiash mibi yacno nidenquio iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. <sup>8</sup> Nēbi padenquio iquebi. Epeso yacnocquidobēd iquebi. Nuquin Papan abipadquid aton Mayan matses meniaïd ushē tantiate choan nēuēshquio nidebi. <sup>9</sup> Nēmbo Nuquin Papan chiaïd tantianu quequid dadpen iquec. Adsho comapenen Esuquidistu chuibanec nebi ma tantianpanueshun. Aden chuibanasho tantiauidash utsibo ēbi chieshēnquido nēmbo iquec.

<sup>10</sup> Mibi yacno ēbi nidenquio icnubi Timoteyo mibi yacno nideque. Aïd bēdamboen ista. Pabado yacpadquiocquid Nuquin Papan namiaïdquibidi Timoteyo nec, quec chieshesa icta. <sup>11</sup> Nuquin Papan namiaïdquibidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Aï, nidec nid. Mibi nidsho isash unēsquio

iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

<sup>12</sup> Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëdtan istanta, quequin Apodos comapenen chiombi. Adoac, Nëbi Codinto yacno nidte bunenquoio iquebi, quiosh aid. Yuecash Codinto yacno nidec bëdambo ictsiash, quiash yuecash aidi mibi yacno nidendac.

<sup>13</sup> Icsamane quequin chieshenquiocquin Nuquin Papan chiaid tantiadoneta. Esuquidistu tantiabenuido yanta. Adecbidi, natiatequid icnuc chieshtoenquoio yec dayacquio yec tabadteneta. <sup>14</sup> Adec tabadquin utsi bëdamboen tantiaquin nabanta.

<sup>15</sup> Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. <sup>16</sup> Aidon namiaido icta. Adembidi, comapenen nashumbanquidtedishun namiaido icta. <sup>17</sup> Codinto yacno Esuquidistu tantiec iccuedquidtedi ëbëdi ictiapimbocnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. <sup>18</sup> Mibitedi chuibanquin aidon unësquiocquidi bëdambo icmioshi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

*Esuquidistu tantiaquidon mibitedi tantiaquin chuibanaid*

<sup>19</sup> Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiombi. Adembidi, Aquidan aton chido Pidisidabëdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. <sup>20</sup> Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

<sup>21</sup> Ëmbi chuibanac ëmbi chiaid utsin dada uashumboed nec. Nëshun bedanquin dënnainquin dada uaimbique. Tantia.

<sup>22</sup> Nuquin Icho tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquoio Esuquidistu chopashun, quec tsadebi.

<sup>23</sup> Ëbi icsaquid icsho cuidenquiocquin Nuquin Icho Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

<sup>24</sup> Esuquidistun shubun icquido nuquibi icsho ëmbi bëdamboen isaido mibitedi nec.

Padi aitede dada uaombique. Isec onquecuededta.

## CODINTO YACNOCQUIDON ISTE 2

<sup>1</sup> Pabado nebi. Nuquin Papa bunacpadomboen Esuquidistun, Ĕbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

<sup>2</sup> Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

### *Bědambo icmianquidquio Nuquin Papa*

<sup>3</sup> Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. <sup>4</sup> Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. <sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. <sup>6</sup> Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. <sup>7</sup> Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

<sup>8</sup> Nidaid Asia caid yacnoshon ěbi natiamboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. <sup>9</sup> Uněs uatiad, utsibo qesho tantias, Ĕbibi měnchiquidtiapimbocquimbi matses uněsacsho uincuemequiděn ěbi měnchictsiash, quequin tantiec tsadobi. <sup>10</sup> Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. <sup>11</sup> Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasahun mimbi Pabado měnchiccoc. Mibi bědamboquid nec, Papa, quequin ma dadpenshun ambi naid chuipanuna.

### *Něbi mibi yacno nidenquio iquebi, quiaid*

<sup>12</sup> Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiechidi mibědi tabadobi. Matsesěn tantiamiacpadpenquio yec tabadobi. <sup>13</sup> Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. <sup>14</sup> Ĕběd Pabado bědamboec tabadosh, quequin tantiec

bëdambo iquebi, quec utsi-utsiec. Adecbidi, Codinto yacnocquido utsi-utsiec bëdamboec tabadosh, quequin utsibon chuisho tantiash bëdambo iquebi. Esuquidistu choanuc adqueiqui Codinto yacnocquido tabadpashun, quec tsadebi.

<sup>15</sup> Aden ëbi bëdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bëdambo iquebi, quepashun, caimbi mibi. <sup>16</sup> Mibi isbidanec nidaid Masedonia caid yacno nidashic padpiden mibi isbëtsenec choaibi. Aden isbëtsenembi, quesho tantiashun nidaid Udeya caid yacno mimbi ëbi nidmetsiac, quequin mibi chiombi. <sup>17</sup> ¿Uquëducshun, Nidenquoio iquebi, quequin muaquindambi chuidio? Adenquiocquin chiombi.

<sup>18</sup> Ambi chiacpadomboen nabanquidquoio Nuquin Papa nec. Aid chuinu. Tantia. Abimbo chuiquidquoio yec utsi yantiapimbo iquec. Adquidquoio icquin ambi, Esuquidistu chuibeneta, caidquoio yec adomboen chuiquid nebi. Utsi uain chuinu, quesa nebi. <sup>19</sup> Ambi chiacpadomboen nabanquidquoio Nuquin Papan Madombo, ëmbi chuibeniaid, Esuquidistu nec. Aidi Sidasën chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquoio yec utsi yantiapimbo iquec. Abi chuibenequidquoio adquidbidi nec. <sup>20</sup> Con Madon naden naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquoio Esuquidistu nec, quequin tantiaquin ambi naid ëbipadquidon chuibanec. Aden chuibanac abi tantiaquidquoio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. <sup>21</sup> Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. <sup>22</sup> Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Èbëd tabadquid aido nendac, quequin tantiamenuen Nuquin Papan aton Mayan meniac ma aidëmbi nuqui bëdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquoio iccobi. <sup>24</sup> Èmbi Esuquidistu chuibanac abi tantiaquid dadpen iquec. Aidon icbopenquoio nebi. Aidon icbopenquibidi Esuquidistu chuibanquid utsibo nec. Esuquidistu tantiec bëdambo iquebi ma quenu, quequin chuibenequidquoio nebi. Esuquidistu tantiaquid nebi, abimbo quequin aid tantesa uainquoio mimbi iquendac.

## 2

<sup>1</sup> Aden tantiaquin comapenen chuiquin unësquoio icmenushe quec mibi yacno nidenquoio iquebi caombi. <sup>2</sup> Mibi unësquoio ëmbi icmiac ¿tsuntsin ëbi bëdambo icmepatsiash? ¿Èmbi icsambo icmeboedënda ëbi bëdambo icmepadac? Padenquoio. <sup>3</sup> Aden tantiaquin mimbi iste dada uaombi ma ëbi bëdambo icmequid unësquoio icmetiapimbo iquebi, queshun. Bëdambo iquebi, quequin ëbi tantiec adquiobidi mibi icoatsiac, quequin tantiombi. <sup>4</sup> Unësquoio yec shubiquimbi mibi dada uashun, Meneta, caondambi. Unësquoio icmenu, quenquiocquin mibi comapenen tantiaquin dada uaondambi.

*Abi icsaboed bëpiscudnueshun yued quiaid*

<sup>5</sup> Anocquidën ëbi unësquio icmedenequimbi adembidi comapenquiec unësquio mibi icmeoaosh. Aidi mibi chiondambi. <sup>6</sup> Aidi mibi dadpen-shun cacumiac abi icsaid ënosh quec. <sup>7</sup> Adoacsho abi icsaid bëpiscudshun aidi yuedoaquin bëdambo icme. Yuedenquio yac natiamianquiec unëstiadquio yantsiash. <sup>8</sup> Nuquibi iccuednuna, quequin aid tantiaquin yued caimbi. <sup>9</sup> ¿Ëmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. <sup>10</sup> Aden ëmbi dada uacpaden mimbi cacumiac abi icsaid ënsho isun abi icsaid nibëdacobimboec bëpiscudshun yued. Adsho tantiaquin adomboembidi naimbi. Aidbëdi abentsëc yacimboecquido yanosh, quesho tantiaquin abi icsaid bëpiscudebi Esuquidistun tantianubi. <sup>11</sup> Nuqui chieshënquidën Satanasën aidi icsamenushe queshun abi icsaid ëmboed yuedta. Yuedenda, Satanasën quequin tantiamiac onquesho tantienda.

*Nuquin Papan con Mayan meniaid adquid ëbëdi tabadtequid nec, quiaid*

<sup>12</sup> Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash. <sup>13</sup> Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

<sup>14</sup> Bëdambocquid mibi nec, Papa. Mimbi Esuquidistu tantiaquid ëbi yapadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoc tabadquidon shëdec. Adembidi, Esuquidistu ëbi yapadquidon chuibenesho uano-uanoc tabadquidon tantiec. <sup>15-16</sup> Esuquidistu chuibanac noadte bëdan danoshquiaid shëdacobimboen utsibon tantiec. Adembidi, Esuquidistun ëbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aitedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi <sup>17</sup> piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yapadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

### 3

<sup>1</sup> ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio. <sup>2</sup> Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudtiapimboen Nuquin Icbon tantiamioishi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabedec utsibon. <sup>3</sup> ¿Abi tantiaquid icsho

isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquio. Esuquidistu tantiasho isun unēstiapimbocquid aton Mayan abipadquidquio mibitedi meniondash.

<sup>4</sup> Nuquin Papan tantiacpadomben Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aitedi nec, quequin tantiembi. <sup>5</sup> Ēmbibi tantiacpaden chuibanesa nebi. Nuquin Papan tantiamicpaden chuibanquid nebi, quequin tantiembi. <sup>6</sup> Ēmbibi Esuquidistu chuitiapimbo icsho Nuquin Papan Mayanēn tantiamic Esuquidistu chuibenequidquio nebi. Ambi, Nadomboen nata, quequin dada uamiampicpadomben chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibdēdi matses tabadtiaximbo iquec. Aton Mayan meniaidbēd tabadtequid nec.

*Abi tantiaquido bēdambo icmetequid aton Mayan*

<sup>7</sup> Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiaximbo iquec, quequin dada uampid meniac abi chēnquiacpadec Moisesēn bētantiante comapenec bēchomauanquiec chēnqueboedi macuēsh budec bēdiambo chēnquesho isadaidbon bēstiapimbo icpampic. <sup>8</sup> Nēbi Esuquidistu tantiaquid bēdambo icmetequid aton Mayan abipadquid meniaid ēnēdenquiocquidquio nec. <sup>9</sup> Ēmbi nadomboen nata quequin chiaid niacquid ēbēdi tabadtiaximbo iquec, quequin dada uaid Nuquin Papan meniac buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimbocnoc tabadmendac. <sup>10</sup> Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniampid ēnēdabimboecquid nendac. <sup>11</sup> Ai, nadomboen nata quequin chiaid Moisesēn bedshun meniaid ēnēdtequid icnubi bēdambo icmiantequid Nuquin Papan chomiaid icsaisa ēnēdtiapimbo iquec.

<sup>12</sup> Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenequid nebi. <sup>13</sup> Moises Nuquin Papabēd onquec bēchomauanquiecboedi auēshquio nidec ushmaushmactšēcquio yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. <sup>14</sup> Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdabimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamaido nendac. <sup>15</sup> Nadomboen nata quequin dada uaid Moises menepampid isec onquec pamumēdabimboecquid isadaidbo utsi-utsiec iquec. <sup>16</sup> Esuquidistu tantiaquid icsho Nuquin Papan Mayanēn paucquin tantiamaid nendac. <sup>17</sup> Nuquin Icbo icsaisa icquin ēnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. <sup>18</sup> Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquio bi icsaisa icquin abipadquid nuqui meniac aton Mayanēn adquid nuqui icmebanec.

## 4

*Nuquin Papan nadatiambocquin nadenequin Esuquidistu chuibenemid*

<sup>1</sup> Aden Nuquin Papan nuqui tantiaquin, Esuquidistu chuibanta, caidquo icquin chieshenquiocquin aidi chuibanec nuqui nec. <sup>2</sup> Icsash ompodquid ichoedi nëbi muesa icquin Nuquin Papan chiaid utsi uainquo yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. <sup>3</sup> Esuquidistu chuibansho utsinutsinquent bēdamboen tantiatipimbo iquec. Adquid Nuquin Papabēd tabadtiapimbocquid nec. <sup>4</sup> Nuquin Papapadquid Esuquidistu tantiaquid icnushe qeshun icsamianuequidēn Satanasēn pamunacbimboen utsi utsien tantiamenquo iquec. <sup>5</sup> Ēmbibi naid chiesa nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. <sup>6</sup> Abitedi uanuna, qeshun, “Inchēshquo ichoedi uēshēmo yanquiota,” capampic Nuquin Papan. Adomboembidi Nuquin Papan chiaid pamumēdabimboen tantienquiocchoedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

<sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenecquid icmiondashi. <sup>8</sup> Aden chuibansho mēyanaqui abi chuibenec nebi. Padpidenpadpidemboen natiamiaqui, ¿Atotsimbi napeba? qesho Nuquin Papan dayacquo icmedenebi. <sup>9</sup> Ēbi chieshēnquid dadpen icnubi ēbi bēdambo icmequid aidi iquec. Comapenen cuestanec, Unēsec, qeshun nianaqui abi Esuquidistu chuibenembi. <sup>10</sup> Esuquidistu mēyanquin unēs uacpaden mēyanquin unēs uatsen-unēs uatsenshobi dayacquo icmedenioshi. Adoacsho uincuenaidēn dayacquo icmedeniaid nec, quequin utsibon isbededebi. <sup>11</sup> Adembi Esuquidistu chuibansho unēs uatsiashi, quequin chuibenec nebi. Aid chuibansho unēs uatsenaqui abipadquid unēsesa yanebi, quec bēdamboec tabadebi. <sup>12</sup> Aden tantiaquin aid chuibanac abi tantiaquid yanash aidbēdi tabadec unēsesa mibitedi yanendac. <sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. <sup>14</sup> Aden tantiaquin Nuquin Papan Esuquidistu uincuemiacpaden aidbēdi tabadmenuen mibitedibēdtabi ēbēd icquidtedi uincuemendac, quequin chiembi. <sup>15</sup> Aid tantiaquid ma mibi icpanueshun chuibansho mēyanaid nebi. Mēyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bēdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquo iquebi. Tsusio budquimbi badiadquidēn-badiadquidēnquien Esuquidistu tantiadonequidquo yanebi. <sup>17</sup> Natiamiantequid ēnēdendac. Natiamiaid yashic Nuquin Papa yacno tabadec bēdamboeshē iquendabi. Esuquidistupadquid icsaisa yec unēsesa yanash ēnēdtiapimbo iquendabi. <sup>18</sup> Aden tantiec, Ēbi natiamiaid iquec, quiashic, Nuquin Papabēd tabadendabi, quequin comapenen tantiec tsadebi. Ēmbi isaidtedi ēnēdendac. Nuquin Papa yacnocquid ēmbi isacmaidtedibēd ēnēdtemaid iquendabi.

## 5

*Nuquin Papabēd tabadte iquendac quiaid*

<sup>1</sup> Con nami shēnibudash unēsash nibēdnuc Nuquin Papabēd tabadec nami chuca uaid iquendabi. Nami chuca uaid ēnēdtemaid matsesēn nacnenacmaid nec, quequin tantiemi. <sup>2</sup> U abucquio nidabi yec uēshquequid nebi. Adquiocsho nami chuca uaid ēnden meniondac, Cuishon, quetsiabi. <sup>3</sup> Aden meniac ēbibimboec isadsho isendac, quec tsadebi. <sup>4</sup> Nami chodquequid icnuc uēshquec nuqui tabadec. Nami chuca uaid chodquesa menepashuni mabi unēsesa icpanu quec nuqui tabadec. <sup>5</sup> Con Mado Esuquidistu tantiaquid ēbēd abuc tabadmenuen ēbipadquid unēsesa icmenu, quequin Nuquin Papan aton Mayan menetequid nuqui nec.

<sup>6</sup> Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobēd tabadendabi, quequin nuqui tantiec. <sup>7</sup> Aton Mayan meniac nuqui isacmaid Esuquidistu cainec nuqui tabadec. Ēmbi isaid ēmbi caintemaid nec. <sup>8</sup> Aden aid cainsho nami chodquesa badedquio menepashuni. Aden meniac Nuquin Icbobēd iquendabi, quequin nuqui tantiec. <sup>9</sup> Aden tantiec nidaidēn tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiemi. <sup>10</sup> Adembidi abi tantiaquidtedishun naid ambi chuibante ushē chonoc Nuquin Icbon chuibanendac, quequin tantiemi. Utsi-utsien, Mimbi bēdamboen nabanoc, quequin chuibanendac abitedishun naid cuidquin.

*Ma utsibotsen abi tantiaquid icpanu quequin chuibanaid*

<sup>11</sup> Aden ambi tantiacpaden nabansho, Bēdamboen mimbi nabanoc, Nuquin Icbon ēbi caindac, quequin tantiaquin ma utsibotsen Esuquidistu tantiapanesun mibi chuibenec nebi. Aid tantiaquin nabanc bēdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. <sup>12</sup> Aden tantiaquin, Mibi bēdambo iquec, ēbi camenuen mibi dada uashunenquio iquemi. Ēbi chienquiocquin, Bēdamboec tabadquin ismiacimboecquidēn ēbi icsamboen chuisho aido chuita, quequin mibi dada uashunemi. <sup>13</sup> Aido, Pabaton tantiate icsabudosh quec. Adembidi, Nuquin Papan chiacpadomboen ēmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu queshun aid chuibenec nebi utsibon chuibenenuiocnobi. <sup>14</sup> Chian anēdēnquequid icsambocquid nēsianushe quiash matses icsaid bedshunash abided ciudadec icsaisa Esuquidistu unēsspanēdash, quequin ma utsibon tantiapanesun chuibenec nebi. <sup>15</sup> Ma ēmbi naid chiac ēbi tantiaquido ma ēbēdi icpanu, quiash unēsash uincuempanēdash Esuquidistu.

<sup>16</sup> Adec unēsash Esuquidistu uincuempanēdash, quequin matses unēsash uincuenta iquec, quequin abi tantiaquidon tantiec. Ēnden, matsesquio Esus nec, quiondaidi nēbi, Nuquin Papan Chomiaid yec matses tantiec unēsash uincuempanēdash, quequin tantiemi. <sup>17</sup> Abi tantiaquid ambi tantiamiaid nec. Ēnden matsesēn tantiacpadquiec icboedi Esuquidistu tantiacpadquiec bēdamboec tabadec abi tantiaquidquio. <sup>18-19</sup> Nuquin Papan ēndenquimboshē tantiampicpaden



Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquo utsibon tantiapanu qeshun ambi naid nuqui chuibenec. <sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Èbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. <sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

## 6

<sup>1</sup> Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta. <sup>2</sup> Nuquin Papan chiampid chuinu. Tantia.

“Mibi bëdambo icmete ushë chonoc cuënsho tantiombi. Tantiesa icboedi nëid ushënquoio mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquoio ambi aton bacuë icmete ushë nendac.

### *Pabado natiamiaid*

<sup>3</sup> Icsamboec tabadquimbi Pabadon Esuquidistu chuibancho, Tantiatiapibi, utsibo quetiapimbocon bëdamboec tabadec nebi. <sup>4</sup> Nuquin Papan chuimiaid yec nadec tabadebi: Chieshenquoio yec dayacquiocquin ambi chiaid chuibenec bëdamboec tabadec nebi. Natiamiaid yec adequi tabadebi. <sup>5</sup> Utsin cuesaqui adequi bëdamboec tabadebi. Quënën nauedaqui adequi bëdamboec tabadebi. Nuquin Papan chiaid ëmbi chuibanac cuesnanubi padenquoio yec bëdamboec tabadebi. Natia chonoadbudequi adequi bëdamboec tabadebi. Utsi tantiaquin nabanec natia ushcasequi adequi bëdamboec tabadebi. Bunquiec bëdamboec tabadebi. <sup>6</sup> Icsainquoio yec bëdamboec tabadebi. Nuquin Papan chiaid tantesa uainquoio yec bëdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanën tantiamiaid yec bëdamboec tabadebi. Muainquiocquin utsi abimbo tantiec adecbidi tabadebi. <sup>7</sup> Abimbo chuibanec tabadebi. Nuquin Papan nadatiambocquin nac adequi bëdamboec tabadebi. Nuquin Papan chiapadomboen nabanec nebi ma utsibon abi icsaid ëmpanueshun. <sup>8</sup> Èbi chiec: Pabado bëdambo iquec, quenubi adequi tabadebi. Utsin ëbi chuioaic: Pabado icsambo iquec, quenubi adequi bëdamboec tabadebi. Èbi icsamboen chuinubi adequi bëdamboec tabadebi. Èbi bëdamboen chuinubi adequi bëdamboec tabadebi. Muaquid nec, quenubi abimbo chuiquid nebi. <sup>9</sup> Èbi isquidëmbi, Èmbi isacmaid Pabado nec, caqui ëmbi chuibancho tantiaboedo nec caimbi. Èbi unës uate bunubi abi chuibanec capucuenebi. Mëyanaqui unësabi yec nidebi. <sup>10</sup> Unësquoio icmiaqui Esuquidistu tantiec bëdambo iquebi. Con na nibëdsho isun adembidi Esuquidistu chuibanec nebi ma Esuquidistu tantiec utsibo bëdambo icpanueshun. Con na nibëdsho isash Nuquin Papan bacuë yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ëbi natiaboedtedi mibi chuibanombi. Mibi comapenen tantiaquin ëmbi nabanaid mibi chuibanombi. <sup>12</sup> Mibi tantiaquiquin chuibanquid ëbi icnubi ëbi tantiaquin chienquo mimbi iquec. <sup>13</sup> Pabadon con bacuëbo caido nebi, quequin mimbi naid mimbi tantiaidbëdta ompoenquiocquin ëbi chuiban, caimbi mibi.

*Esuquidistu tantiesabëdtambi icsain nainda quiaid*

<sup>14</sup> Esuquidistu tantiesabëdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, ques a ton papa. ¿Nuquin Papan bëdambo icmiaidënda ambi chiaid niacquidbëdtan nabampadic? ¿Nuquin Papan Mayanën tantiamiaidënda Icho chieshënuquidbëdtambi chieshëmpadic? <sup>15</sup> ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo. <sup>16</sup> ¿Nuquin Papan ambi uaidbimboecnuc matsesën nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ëbëd icquidbëd iquendabi;

Aidbëdi capuebi;

Aton papa nebi;

Con matses adquido nec,

<sup>17</sup> Con matses icquin ëbi tantiesan ëmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ëbëd iquec cho caindambi.

<sup>18</sup> Adquidon papa iquendabi;

Adquid ëmbi con madobëd con champi caid iquendac, quec Nuquin Papa.” Abi tantiaquido nadatiambocquidën aden chiec.

## 7

<sup>1</sup> Naden nanuna, quequin Nuquin Papan chiac nuqui naid icsated-ibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

*Unësquo icboedi mimbi naid tantiash bëdamboshë iquebi quiaid*

<sup>2</sup> Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. <sup>3</sup> Pabado tantienquo yec icsaobi mibi camenuen nëid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unësequi mibi bëshuntiapimbo iquendabi. <sup>4</sup> Mimbi chiacpadpenquicoedëmbi naosh, quequin choquidën chioshi. Aden chuisho tantiashun, Nuquin Papan chiacpaden nabanquidquo nec, quequin mibi chiec nebi. Unësquo icboedi mimbi naid tantiash bëdamboshë iquebi. Utsin natiamiaid icshobi bëdambo iquebi, mimbi ëbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenuquo iccobi. <sup>6</sup> Unësquo icsho ëbi tantiaquin Nuquin Papan Tito padpiden chomiosh ëbi bëdambo icmeoanuen. <sup>7</sup> Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquo icquin,

Codinto yacnocquidon mimbi chiacpaden nabanosh, quequin Titon chioshi. Aden chiac bédamboshë yanobi ad yenquoio icboedi.

<sup>8</sup> Mimbi dada uaid isash Codinto yacnocquido unësquio iccosh, qesho tantiash, Icsambo icchitobi, quenquoio iquebi. Aden dada uaic icsambo iccobi, quetiapimbo yequi mibi unësquio yacpadequi unësquio iccobi. Yuec mibi ad yenquoio iccoc. <sup>9</sup> Adecbidi nëbi bédambo iquebi. Ęmbi mibi unësquio icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unësquio icmequin mibi icsabudmiambo iccombi. Unësquio icmiaqui mibi bédambo yanoc. <sup>10</sup> Unësquio icmiac, Nuquin Papan chiaid niaccombi, quiash unësquio icquin mibi icsaid mimbi ënac. Adsho isun Nuquin Papan ënëdtiapimbo noc aidbéd mibi icmendac. Aden unësquio icmiaqui, Bédambo iquebi, mibi quendac. Adecbidi mibi icsacpadeq icsainquoio mibi icpendac. Padnuen Nuquin Papan chiacpaden niacquin ënesa abi natiamiaiduidi tantiec Nuquin Papa yacno puduedtiapimbo iquendac. <sup>11</sup> Padnuen mibi unësquio icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuihoc. Nuquin Papan cuidnushe quequin mibi icsaid mimbi ënoc. Adembidi, Ębi padpiden bédamboen is, quequin Nuquin Papa mimbi chioc. Icsashun chienquoiochoedëmbi nëbi cuembo bédamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. <sup>12</sup> Icsaquad ambi icsa uanaidbédtabi chuinen mibitedi dada uainquoio iccombi. Abentsëc icsash abitedi unësquio iquec. Adquiecbidi ëbi unësquio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin <sup>13</sup> Ęmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaidbidi niosh. Ębi yuedenquoioctsiash queboedi niosh. Yuedoshi, Tito qesho tantiash bédamboshë iquebi. <sup>14</sup> Mibi nidmembi, Tito, qeshun, Ębi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantiash, Abimbo chiombi, quepobi. Ęmbi mibi muainquiocquin chuibanacpadeq adquiobidi mibi nabanec tabadaid abimbo iccosh. Adomboembidi Titon mibi isbanosh. <sup>15</sup> Ębitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenuiocquin mimbi nabanoc, quec Tito. <sup>16</sup> Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bédambo yec tsadebi.

## 8

### *Aton na nibëdquid icsho aton na dadpen icquid menequid*

<sup>1</sup> Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nëbi bédamboen nabanec tabadaid chuinu. Tanta. <sup>2</sup> Natiamiaqui bédambo iquebi quec aido tabadec. Adeq tabadquin Esuquidistu tantiaquid utsibo tantiaquin menenequin aton na daëdpactsëc musucshun dayun uaosh. <sup>3</sup> Ęmbi, Meneta, cainquiocnobi aton na bedtequid naimbudtsëcquien menenequin bedbanosh. <sup>4</sup> Esuquidistu tantiaquid utsibo, nidaid Udeya caid yacnocquido, aton

na nibëdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. <sup>5</sup> Mitsana daëdpactsëc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. <sup>6</sup> Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi. <sup>7</sup> Naden naquid Codinto yacnocquido nec, quequin mibi tantiambi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

<sup>8</sup> Meneta, quenquio iquebi. Natiamaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. <sup>9</sup> Nuquin Icho Esuquidistu abuc tabadec abitedishun Icho ichoedi nuquitsen abuc abëdi tabadmenuec matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

<sup>10</sup> Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. <sup>11</sup> ¿Aden nanuna, qeshun mimbi chiacted ënquinda bedshun dayun uao? Padenquiocquin adota. <sup>12</sup> Mitsana daëdpactsëc icnuc daëdpactsëc musucshun menesho isash, Dadpen meneta, quenquio Nuquin Papa iquec.

<sup>13</sup> Aton na nibëdquid icsho, Natiacquin meneta, quenquio iquebi. Aton na nibëdquid icsho aton na dadpen icquidën menec. <sup>14</sup> Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. <sup>15</sup> Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpenshun aited-aitedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meni-aitedi bëdambo yampicpadec aton na dadpen icquidbëdi ambi meniaido bëdambo yampec.

### *Tito Codinto yacno nidte*

<sup>16</sup> Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. <sup>17</sup> ¿Codinto yacno tsutsi nidpatsiash? quequin ëmbi chiac, Ëbibi nidebi, quiosh Tito. <sup>18</sup> Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdambocquid nec. <sup>19</sup> Nidaid Masedonia caid yacnocquidon, Esuquidistu

tantiec iccuededquidon ëmbi dayun uaid Pabadobëdtan buanec nid caid-bidi Titobëd nidquid nec. <sup>20</sup> Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. <sup>21</sup> Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

<sup>22</sup> Tsyuec nidebi, quequin utsibobëdta Tido mibi yacno nidmembi. Ëmbi nata cac bëdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. <sup>23</sup> Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. <sup>24</sup> Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantianpanuna.

## 9

<sup>1</sup> Ënden Esuquidistu tantiaquid utsibo tantiaquin nashunta quequin ëmbi chiac, <sup>2</sup> Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menenuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoaposh. <sup>3</sup> Aden aidon chuisho tantiashun nuqui con utsi caido mibi yacno nidmembi mimbi chiondacadpaden bedbanambo icnushe qeshun. <sup>4</sup> Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bëpiutsiabi. Adquiecbidi mibi icoaic. <sup>5</sup> Adquo icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiaacted bedbanquin dayun uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unëshquio icquin menetsiash. Aden tantiaquin menenda.

*Nuquin Papan na dadpen bedmiaidën aton na nibëdquid menequid*

<sup>6</sup> Nuquin Papan chiaid chuinu. Adembi tantiata. Tied icbon daëdpactsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec. <sup>7</sup> Adquibidi aton na icquid iqueque. Tantia. Chuinu. Nëidted menenuequin ambi chiaacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiaacted meniaash, Bëdambo iquebi, quetiapimbocquin menec. <sup>8</sup> Mitsana menete bunquin mimbi chiaacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. <sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. <sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembi, Nuquin Papa bëdamboshë iquec, quequin aidon chuibanendac. <sup>13</sup> Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. <sup>14</sup> Adquidquo nec, quequin utsibon mibi chiec. Mimbi tantiamiacpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. <sup>15</sup> Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chiec.

## 10

*Ëmbi dada uacpaden mibi yacno choshon adomboembidi nabanembi quiaid*

<sup>1</sup> Comapenec chushquenuiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdadbimboecquin comapenen Pabaddon chushcainquo iquec. Utsi yacno nidshun dada uaquin comapenen chushcaic, quiosh. Mibi chiec adosh. <sup>2</sup> Adsho tantiash mibi yacno choash tabadquin chushcante bunenquo icquimbi, Ambibi tantiacpaden nabanquid Pabado nec, quequido bëdamboen chuibanembi. <sup>3</sup> Esuquidistu tantiaquid yanshun icsaquidën tantiacpaden nabanesa nebi. <sup>4</sup> Mibi yacno choshon matsesën tantiacpadpenquiocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. <sup>5</sup> Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, queshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdadbimboe yaid ëmenu quequin Nuquin Papan chiaid ëmbi chuibanubi abi pamumëdadbimboe yaid padpidec pausudtiapimboenoc pauchanshun ambi tantiacpaden Nuquin Papan pausunendac ma ambi chiacpadomboen namenuequin. <sup>6</sup> Aden chuibanshun

Nuquin Papan chiacpadomboen utsin-utsinquin abi icsaid ënabichso isun comapenen cuidendambi.

<sup>7</sup> Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi qesho tantiash, Muec nec, quetiapimbo iquec. <sup>8</sup> Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. <sup>9</sup> Adquid nebi, quequin, Dacuëdampambocquid Pabado nec camenuen dada uainquo iquembi. <sup>10</sup> Mibi aden dacuëdmenu, quenquo icnubi ëmbi dada uaondaaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabado dada uaic. Nëmbo choshon ambi dada uaqin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istseccombi. Tantiatiapimbocnoc chuibanondash, quequin aidon ëbi chiec. <sup>11</sup> Aden ëbi chiec onquequidën bëdamboen tantiata. Chuinu. Ëmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Ëbi chuibeneta, caid nebi, quepecta ëbi chieshënquido iquec? ¿Adenda Esuquidistun, Ëbi chuibeneta, caidënquo utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquo yec muaquin chuiquidpadquid nebi, quepectabi ique? Padenquo iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. <sup>13</sup> Ëbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. <sup>14</sup> Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. <sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquo iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esuquidistu tantiadonequidquo yampashun, quec mibi tantiec tsadebi. <sup>16</sup> Esuquidistu ëmbi chuiban-chuibanac aid tantiadonequieq mibitedi tabadsho isash Esuquidistu utsin chuibanacmanombo chuibanoaic nidendabi caombi. <sup>17</sup> Aden Esuquidistu chuibanac, Ëbibi bëdambo ictiapimbocquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. <sup>18</sup> Bëdamboen nabanombi, abibi qesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquo nec.

## 11

*Pabado muesa icnubi muaquido*

<sup>1</sup> Nēbi ěmbi dada uaid isash, tantiesa onquiacbimboen mamēmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Nēid bedash ěmbi abia dada uaondaic isec mibi onquiacpadec nēbi nēid mimbi iste dada uaid isec onqueta. <sup>2</sup> Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiacbimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque. <sup>3</sup> ěmbi chuibanac Esuquidistu tantiauidquimbi nisi bēdambo isadac bimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. <sup>4</sup> Adec ěbi tsadnubi Codinto yacno choshon utsin Esuquidistu ěmbi chuiboed utsi uain chuisho badedquio tantiec aidon. Adembidi, Mayan utsi iquec, quesho tantiash, ěbi mene, quec mibi. Adembidi, Mibi bēdambo icmequid Esus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuiboed utsi uain chuisho tantiec, quesho tantiash Esuquidistu tantesa uatsiash, quec tsadebi. <sup>5</sup> Esuquidistun ěbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bēdamboenshē utsibon chuibanapaden Pabadon chuibanenquio iquec, quesho tantiash, Icsamboen chiombi, quetiapimbo iquebi. <sup>6</sup> Utsibon bēdamboenshē chiacpadec Pabado onquenquio iquec, mibi quenuc Esuquidistun, ěbi chuibeneta, quequin ambia tantiaquidēn tantiamiacpadomboen mibitedi chuibanombi bēdamboen tantiaquin.

<sup>7</sup> ¿Codinto yacnocquido ma Esuquidistun bēdambo icmepanueshun chuibanequi, Bec cho, quenquio yectabi icsape? <sup>8</sup> Mibi Esuquidistu chuibanu quiash Esuquidistu tantiec iccuededquid utsibon na ampiac bimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. <sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoēsh choquidēmbini meniondash. Aden ěnden, Bec cho, mibi cainquio iccondacpadec nēbi adquiecbidi tsadebi. <sup>10</sup> Esuquidistun chuimiai quio nebi. Adquid icquin adquid nebi quequin chiembi mibēdi nidaid Acaya caid yacnocquid utsitedi, Padi. Aden chienda, quetiapimbo cnoc. <sup>11</sup> ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. <sup>12</sup> Aden mibi tantiaquin, Bec cho, cainquiocquin Esuquidistu chuibenec nebi mimbi bēdamboenshē chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ěbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. <sup>14</sup> Aido tantiamequin ismequid Satanas nec. Nuquin Papan abi yacnoshon uaid mayan bēda aibēdi tabadquido icsaisa yacpadquid nebi, quequin abipenquiocnoc chuiquin ismequin tantiamiac <sup>15</sup> adquiecbidi ambi namiaidtedi bēdamboquid bimboec capucdedec. Cuidte ushē chonoc aido icsaid Nuquin Papan comapenen cuidquin chiendac.



*Pabadon abi mëyanaid chuibanaid*

<sup>16</sup> Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, <sup>17</sup> Chuita, Nuquin Icbon cainquiocnobi. <sup>18</sup> Abi icaid utsin-utsinquin chuibanec, quequin tantiaquin adomboembidi ëbi icaid chuibanuna. <sup>19</sup> Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. <sup>20</sup> Ambembi chiacbimboec, Yuanu, qesho tantiash icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuntsin mibi adquid icmiosh? quenquiocquin aidën chiacpaden nabanec mimbi. Aton yuabimboecnuc mibi mëyanahui, Min yuapenquio nebi, quenquio iquec mibi. <sup>21</sup> Nuquin Papan yua icta cac, Padi, quetsiash, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tantia. <sup>22</sup> ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Èbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Èbi Abadauanën tsyuecquid nebi, caimbi. <sup>23</sup> ¿Esuquidistu chuibanquid nebi, quepecta aido iquec? Èbibi Esuquidistun ëbi chuibeneta caidquio nebi. Esuquidistu chuibanquid ëbi yapadquid utsi nibëdec. ¿Mibi mamënshumenuequindambi aden chuipadi? Padenquio. ¿Èbi yapadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. <sup>24</sup> Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestonioshi. <sup>25</sup> Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidaadec mentoadan abentsëc ushec cano cuëshë bedash mentoadmane quiaish noadpondabi. <sup>26</sup> Adecbidi quenenenquio yec capucuenquin Esuquidistu chuibeniombi. Adece utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capucueniobi. <sup>27</sup> Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquio yaqui adembidi chuibudombi.

28 Ĕmbi chuiboed Esuquidistu tantiabenabicquido icpec, quequin capucuenequin chuibeniombi. Utsi yacno nidshun, Ĕmbi chuiboedo bēpiscudnushe qeshun mibitedi chuiquin dada uaombi. 29 Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, qesho tantiash unēsquoio yec, Nēbimbobi icsamianquid comapenen cuidta, Papa, quec tsadebi.

30 Aided ēbi icaid icnuc chieshenquoio yec ēbi dayacquio yaid chuibanombi. Nēbi ēbi cuenondaaid chuinu. Tantia. 31 Abia Yampidēn, Nuquin Icho Esuquidistun Papan nabanaid ēnenquiocquin chuitequidquoio iquec. Aidēn nabanaid chuibanec muesa Pabado nec, quequin ēbi cuenondaaid Nuquin Papan tantiec. 32 Ĕbi cuenondaaid nad icpondashe. Chuinu. Tantiata. Damasco yacnocquido ancanquidēn Adetas cuēmēdquidēn Pabado Damasco yacnoēsh puduensho bedta quequin shubu dadpen daquēnē uaid dapa shēcuētedi sondado ēctabēdmepondash. 33 Adec daquēnē uaid shēcuē cuēmanquoio sondado tabadnubi bednushe qeshun abuc daquēnē uaid iste shēcuēnshun tsitsan dapa antsadunshun daquēnē uaid cachoc budmepondashi. Budmiac ancanquidēn bedadtiapimbo yec cuempondabi.

## 12

### *Nuquin Papan Pabado ismiaid*

1 Ĕbi icaid chuibanquin ēmbi dada uaid isbanash, Esuquidistun ēbi chuibeneta caidquoio Pabado nec, quequin Codinto yacnocquidon tantiatiasash, quequin adobamboedtedi chuibanquin dada uaombi. Ĕbi icaid chuibanquin ēmbi dada uaid isash, Abi natiamiaid dadpen icpec, quetsiasash, quenquiocquin dada uaombi. Adembidi Nuquin Papan ēbentsēqui ismiondaaid chuinu. Tantia. Nad iccondashe. 2 Ĕndenquimbo seta 14ted matamequin Nuquin Papan bēdamboshē yacno indopondashi. Intacchobi abuc indopondashi, quetiapimbo iquebi. Tantienuquoio iquembi. Adecbidi ēmbi tantiateuidi indoac, quetiapimbo icoaibi. Tsaudi, tantienquoio iquembi. Nuquin Papambien tantiec. 3 Abuc bēdamboshē yacno indopondashi, quequin abimbo chiembi. 4 Abucshun utsi chuitemaidquoio tantiapondambi. Ĕmbi tantiondaaid chuitiapimbo icpebi. ¿Mitsipadentsimbi ēmbi abucshun tantiaboed con onqueten chuipatsiaba? 5 Bēdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bēdambocquid nebi, quetiapimbo iquebi. 6 Abuc nidshun ēmbi isondaaid chuibanquin dada uaid isash, Bēdambocquid Pabado nec, quequin tantianushe qeshun padenquoio iquembi. Ĕbi bēdamboec tabadsho isash, Pabado bēdamboec tabadec, qesho tantiash bēdambo ictsiabi. Adecbidi chuibanquoio tantiash, Abimbo chuiquidquoio Pabado nec, qesho tantiash adecbidi bēdambo ictsiabi.

### *Satanasēn natiamiaid*

7 Bēdambocquid yansho Nuquin Papan abuc indoshon ismiondashi, quequin Pabado chuinushe qeshun Satanasēn chomiaidēn ēbi natiameded-natiamededsho isash, Chēn, quenquoio Nuquin Papa iquec. Satanasēn chomiaidēn natiamiac pinchuquēn siadaid namin nidaēdaid chictiapimbo yachimboec con dada bēdanenquoio iquec.

8 Adec con dada bēdantiapimbo icnubi, Ēbi natiamequid cueme, Icho, quequin chiondambi. Adshumbic, padpiden. Adshumbic padpiden adomboebidi chuided-chuidedondambi. 9 Adoaquien, Padī. Bēdamboequid icmenuequin naid nec. Mibi dayacquio icmequid con Mayan mibēdi iquec, quequin Nuquin Icbon chiondashi. Adoaqui, Bēdanambo icsho Nuquin Icbon ēbi dayacquio icmec quequin tantiec bēdambo iquebi, quec tsadebi. 10 Aden tantiec con dada icsambo icnubi Esuquidistu chuibenec capuebi. Ēbi icsamboen chuiquin mamēnshunaqui adecbidi Esuquidistu chuibenec capuebi. Utsin natiamaqui adquiecbidi Esuquidistu chuibenec capuebi. Utsin mēyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ēbi dayacquio icmiac tsadiapimboquin chuibenec capuebi.

*Esuquidistu tantiabemenuen chuibanombi quiaid*

11 Ēbi yacpadquid utsi nibēdec, quequin chienquioctiadquidi niobi. Esuquidistu chuibanquid utsibon chiaid tantiatequidquio iquec, qeshun mibēd icquidon ēbi icsamboen chiosh qesho tantiashun Pabado Esuquidistu chuibenecquid nec, quenquio utsibo iccosh, qesho tantiashun ēbi icaid chuibanquin dada uaombi. Bēdamboen tantiabimboen chuibanquid dadpen iquec. Aidon icsactsēcquio isadtsec, quequin ēbi chiec onquenubi Esuquidistu chuibenecquidquio nebi. 12 Natiamaqui chieshenquiocquin Esuquidistu ěmbi chuibancho mibitedishun tantiapondac. Adembidi nadatiambocquin ěmbi nabansho mibitedishun isbededpondac. Adosho isun Esuquidistun ēbi chuibeneta caidquio Pabado nec, quequin chuitiadquidēmbi padenquio mimbi icpondac. 13 ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibēdi tabadec bunec, Bec cho, quenquio iccondabi. ¿Bec cho, qeshoda ēbi bēdamboen mimbi tantiatsemponda? 14 Ēnden mibēdi tabadondabi. Yuecash padpidec mibēdi tabadoapondabi. Nēbi padpidec mibi yacno nidendabi. Mibēdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibēdi tabadquin chuibanendambi. Aton bacuēbo tantiaquin amēn anibēdtan ambia tantiaquid icquin tied uaic adembidi shubu uaic bacuēmpibon nabantiapimbo icnubi. 15 Adquibidi mibitedi tantiec Esuquidistubēd icquido yampec quec chonoadec tsusiobudquimbi chuibenendambi. ¿Ēmbi mibitedi comapenen tantiasho isunda mimbi ēbi tantienquio yampe? 16 Bec, cho, quenquio yec mibēdi tabadondabi. Adsho isash, ¿Piacquid bedenquio icpecta Pabado tabadash? Muaquin chuiquin bedpash icnui, quec mibi. 17 ¿Mitsipadentsimbi bedpa? ¿Ēmbi mibi yacno nidmiaidonda muaquin chuiquin mitsana bedpash? Padenquio. 18 Titobēdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbēdi abentsēc yacimboen tantiaquidquio nebi. Aduidequi tabadquid ēbi daēdi nebi. 19 ¿Pabado ampesa nec mibi camenuendambi dada uaquin chuibampo? Padenquio. Esuquidistu tantiaquid icquin mibi aid tantiabemenuen chuibanombi. Ēmbi chuibanaid abimbo iquec, quequin Nuquin Papan tantiec. 20 Mibi yacno choash ēbēdi abentsēc yacimboen tantienquio icnushe qeshun dada uaimbi. Comapenec chushcanansho istuidmane

qeshun adembidi mimbi iste dada uaimbi. Mitsana nibēdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bēdambo icquid ēbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuēdcuededsho tantiamane qeshun adembidi dada uaimbi. <sup>21</sup> Ai, mibi yacno choashun adquid icsho isun, Ēmbi Esuquidistu chuibanaiido nec, quequin Nuquin Papa chuitiapimbo yec natiaic bēpiuac bimboec tsadmane qeshun dada uaimbi. Icsadenequidēn abi icsaid ēnabi icsho isash aido unēsac bimboecquid nec, quiash unēsquo icmane qeshun dada uaimbi. Aidon naid utsin istemaিদquo nec. Ambibi ambi chudtemaid chudted-chudtedec icsambo yequi, Bēdambocquid nebi, quec muacuededec.

## 13

### *Icsaid ēnesa chuiquin cuidendambi quiaid*

<sup>1</sup> Mibi yacno daēdec puduedashic padpidec puduedendabi. Choshon, Icsadenequid iquec, quequin daēdshun-daēdshunquien chuisho tantien-dambi. Abentsēcshun: Icsaquid iquec, quequin chuisho tantiatiapimbo iquendabi. <sup>2</sup> Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ēnta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobēdta comapenen chuiquin cuidembi, quequin chiondambi utsitedishun tantianubi. <sup>3</sup> Esuquidistun tantiamiacpaden Pabadon dada uaid nec, quequin ¿mitsipadentsimbi tantiapē? quequid comapenec onquequin chuibanembique. Tantiapiota, caimbi. Esuquidistun nadatiambocquin nacpaden ēmbi nasho mibitedishun ispondac. Aidēn tantiamiac padpidec puduedshun adomboembidi mibi ismeoaimbi. <sup>4</sup> Aidi matsesash nadatiapenquo icquidbimboecsho isun cuesten dectampanēdash. Adoacsho Nuquin Papan uincuemiāc unēsesa yanquiopanēdash. Aid tantiaquidquo icquimbi ēmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidēmbi ēbēdi icquin icsadenequid comapenen chuiquin naquidbidi ēbi icmeoaindac.

<sup>5</sup> Esuquidistu tantiaquid nebi, qeshun ¿mitsipadentsimbi aid tantiapē? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niacniacombi, qeshun Esuquidistu ēbēd ictiapimbo iquec, quequin tantiatata. Aid mibēd icnuc ambi chiaid niac-niaquenquo mimbi iquendac. <sup>6</sup> Adecbidi, Pabado Esuquidistun ēbi chuibeneta caidta neque. Isnu, quequidēn ēbi nabanec tabadsho isun, Pabadon abimbo chiosh, capashuni mimbi. <sup>7</sup> Aden tantiaquin Codinto yacnocquido bēdamboen tabadmeta, Papa, quequin chuided-chuidedembi. ¿Mibi bēdamboec tabadsho isash, Pabadon chuibanaiido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ēbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin utsibon chuisho tantiatiaidquo iquebi. <sup>8</sup> Nuquin Papan chiaid abimbo iquec, quequin ambi chiaidquo chuibanquidquibidi

nebi. Ambi chiaid utsi uain chiesā nebi. <sup>9</sup> Mibi bēdamboec tabadsho isash bēdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. <sup>10</sup> Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibēdsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. <sup>11</sup> Nēbi ēnquin dada uaimbi. Icsaisa icnu quec Nuquin Papan chiacpadec bēdamboec tabadta. Ēmbi dada uain chiaid isquin adobanta. Abentsēc yacbinboen tantiaquin nabanec tabadteneta. Adec tabadsho isash tantianquidquo utsibēd bēdamboec tabadquidquo Nuquin Papa mibēdi iquendac. Aidēnquo mibi adquidquibidi icmendac. <sup>12</sup> Ēbi isec cho cananta. <sup>13</sup> Mibi tantiec tabadebi, quec nēmbō tabadquido Nuquin Papan bēdambo icmebanaido. <sup>14</sup> Nuquin Icbo Esuquidistun bēdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ēbēd iquec, quequin tantiaquiota. Padi. Aidedi dada uaimbi.

## CADASIA YACNOCQUIDON ISTE

### *Pabadon tauamboen chiaid*

<sup>1</sup> Pabado nebi. Esus chuibenecquidquio nebi. Matsesën: —Adquid icta —¿caidtabi nedi? Padenquio. Esuquidistun: —Ëbi chuibeneta —caidquio nebi. Aid uincuemenëdaid Nuquin Papantsen: —Con mado Esus chuibeneta —caidquio nebi. <sup>2</sup> Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësqüio iquec. Adembidi tantiec nëmbo icquido Esus tantiaquidtedi: —Unësqüio iquec —quiosh. <sup>3</sup> Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. <sup>4</sup> Matses bëdambo icmequid Esus nec. —Ëbi tantiesabo tabadachimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquio icnuec abided ciudadec Esus unëspac caondash. <sup>5</sup> Aidën Papa tantiaquin: —Nuquin Papa bëdamboshë iquec —canuna ënenquio icquin.

### *Esusuidi tantienquio yanaid*

<sup>6</sup> —Esus tantienquio yanosh —quequin mimbi naid chuisho tantiasho shubitiadquio iccobi. ¿Ëbi chonobida badedquio Esus tantienquio yano? Nuquin Papan tantiamiac abided ciudadec unësaïd Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquio yano? Utsibon icsamboen chiaquin mimbi Esus tantienquio yanac. <sup>7</sup> ¿Aidon chiaïdta bëdambo icpec? Aidon chiaïd ma Nuquin Papan chiaïdpenquio neyoc. Esusquio chienquio icquin muaquin chuisho tantiashun: —Abimboen cachitec —queshun mimbi Esus tantienquio yampac. <sup>8</sup> —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaïd abimbo chienquio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiasho aidotsen: —Cuidpashun —quiobi. <sup>9</sup> Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaïd Esusquio chienquio icsho: —Nuquin Papan cuidpashun —caimbi mibi muauaquin chuiquido. <sup>10</sup> —¿Matsesën: “Mibi bëdambo iquec,” mabi canu —quequindambi aden chuibampadi? Padenquio. Nuquin Papan chiacpadomboen mambi natiadquio yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

### *Esusën chiaïdquio chiec nebi, quiaïd*

<sup>11</sup> Tantia, con utsibo. Mibitedi chuinu. —Esus tantiasho Nuquin Papan matses bëdamboen isbentsiasho —quequin ëmbi chuiboed amben chiaïdpenquio nec. <sup>12</sup> Matsesën chiabi Esuquidistun tantiamiac ambi chiaïdquio chuibanombi.

<sup>13</sup> Tantia. Aden Esusën ëbi tantiamiondaid miibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshënquin cuesun secatiadquo icpadenebi. Ëmbi adodened ëmbi chuisho mimbi tantiondac. <sup>14</sup> Nuquin Papa tantiatadquo icquin con matsesën chiaid abitedimbo natiadquo ictenebi. Ëbëdta tishaidon caniabon bëdiactsëc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshëndenembi. <sup>15</sup> Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin <sup>16</sup> Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi. <sup>17</sup> Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquo yec nidaid utsi Adabia caid yacno matses nibëdacno badedquo nidtanondabi. Adashic yuec-yuecpambo ictanec auëshquo choec shubu dadpen icquid Damasco caid yacnobidi choaondabi.

<sup>18</sup> Adashic ambo nidash seta abentsëc chotsecnuc matametanece Edusaden yacno Petedo isec nidtanondabi. Adec nidash 15tedec ushec aidbëd tabadondabi. <sup>19</sup> Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. <sup>20</sup> Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

<sup>21</sup> Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquo nidshun nidaid utsi Sidisia caid yacno istanondambi. <sup>22</sup> Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi. <sup>23</sup> Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquo icnëdaidëmbi Esus tantiabenshun Esusquo chuibeniosh —quequin ëmbi naid chuishouidi tantiapac caondash. <sup>24</sup> Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

## 2

### *Edusaden yacno nidoaid*

<sup>1</sup> Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titotsen buanondambi. <sup>2</sup> Adec Nuquin Papan tantiamiacpadec ambo nidshun Esus tantiaquido chuiquid dapabo caiduidtsëqui cho-chomeshun ëmbi naboed chuibanondambi. —Ëmbi chiabi yac aidon: “Muequi neque. Pabadon chuisho tantienda,” canushe —queshun naden chiondambi. —Nuquin matsespenquo isadaidpembo matses utsibo Esusquo chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiembi —quepondash aido. <sup>3</sup> Ëbëd icquid Tito caid isadaidpembo icshobi: —Shui dëbidi

dēteshune —cainquo iccondash chuiquid dapabon abi utsibon: — Adotiad —canubī. <sup>4</sup> Adec: —Shui dēbidien dēteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin con tsusedpan chiaid niacsho tantianu —quiash ēbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash —quepondash. <sup>5</sup> Adec aido: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chiec —quequin aidēn chiacpadomboen nainquo iccondambi. —Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquio tantianu —qeshun nainquo iccondambi.

<sup>6</sup> Aden Esus tantiaquido chuiquid dapa caidon Esus tantiaquidēn natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquo iccondashi. ¿Esusbēd icnēdaidēn: —Moisesēn chiaidtsen nameta —cactambi nametsemponda? Padenquo ictsenondambi. ¿Atotsi Nuquin Papan aido capec? —Esusbēd iccondaquido neque. Bēdamboen isnu —¿capenda iquec? Padenquo. <sup>7</sup> Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusēn naid chuibeniac. Nuquin Papan chiacpadomboembidi Petedon nuquin matses isadaidbo Esusēn naid chuibeniosh. Petedon nacpadomboen mimbi bēdamboen nac —capondashi. <sup>8</sup> —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac <sup>9</sup> —qeshun bēdamboen ispondashi. —Adembidi nanuna. Mimbi isadaidpembo Esusēn naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquo mibi nec —qeshun chuiquid dapabon Bednabebēdta mēdimbampondashi. Nēidic Petedo. Nēidic Acobo. Nēidic Uan. Aidtedishun chuiquid dapabo icquin adondashi. <sup>10</sup> Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

### *Antioquiya yacnoshon Petedo chushcaid*

<sup>11</sup> Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquo icsashobimbi bēisquioquin chushcapondac. <sup>12</sup> Abēdtan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquo codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. <sup>13</sup> Adsho isash anocquido isadaidbotsen abēdtan Esus tantiaquido matses utsibobēd tabadenquo yec cuēshēdpondash. Adsho isash ēbēd icquid Bednabetsen adecbidi



cuëshēdec icsapondash. <sup>14</sup> Adec icsaquin Esusēn chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aidbēdi mibi bēdamboec tabadoc. Aidon piaid pec bēdamboec tabadboedi nēbi aidbēd mibi cuëshēdoc. Adsho isash mimbi nianaido: “Petedon matses isadaidbo tabadac bimboec tabadshouidien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiamēque. Tantia. ¿Atotsiequin mimbi naoque? —capondambi Petedo chushcain.

### *Nuquin Papan bēdamboen iste chiaid*

<sup>15</sup> Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. <sup>16</sup> Adquid icquin: “Moisesēn chiaiduidi naquin Nuquin Papa bēdamboen ismemb,” quenededi nēbi nuqui utsien chiec. “‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

<sup>17</sup> Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. <sup>18</sup> “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismemb,” qeshun abi bēdamboen ismequidquio Esus tantienuquo yequini icsambo icchitotsiac. <sup>19</sup> Con tsusedpa Moisesēn chiactedi natiadquio ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ěnondambi. Nēbini Esus tantiec Nuquin Papan chiacpadec tabadec. <sup>20</sup> “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quenededi Esus tantiec adenquio yanondabi. Nēbi ěmbi tantiaidquio nainquio yec Esuquidistubēdi cuëshēdenquio yec bēdamboec tabadebi. “Ěbi tantiec ěbi cuidmenquio icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. <sup>21</sup> “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec.

Adquid Nuquin Papan chiaid niaquesa icnuc: “Matses cuidmenquio icnuc ebided cuidadec unēsnu,” queboedi Esus padenquio ictsempanēdash —capondambi Petedo chuiquin.

### 3

#### *Nuquin Papan aton Mayan tabadmiaid*

<sup>1</sup> Tantia. —Cadasia yacnocquido piushbimboecquin tantienquio yanosh —quequin chuisho tantiasun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasun Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique? <sup>2</sup> Mimbi tantiaid ēbi chui. Tantanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ēmbi chiondaid Esusquio mimbi tantiabensho isashien mibēd tabadanondash. <sup>3</sup> ¿Pabiate shēcuē choquidida mibi nendac? Tantia. ¿Atotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquec. <sup>4</sup> ¿Aden Nuquin Papan aton Mayan mibēdi tabadmiaid icquimbida Esus tantienquio yano? <sup>5</sup> Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ēmbi chiondaidquio Esusquio tantiasun Nuquin Papan aton Mayan mibēdi tabadmec.

#### *Nuquin Papa tantiaquidquio Abadauan chiaid*

<sup>6</sup> ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —quesun Nuquin Papan bēdamboen isbempampic. <sup>7</sup> Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiasun Nuquin Papan bēdamboen isendac ambi Abadauan ispampicpadomboen. <sup>8</sup> —Esus tantiaquido iquendac —quequin naden Nuquin Papan Abadauan chuiampic ēndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasun bēdambo icmendambi,” quequin Nuquin Papan chiaid con tsusedpan dada uapampic. <sup>9</sup> Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiasun Nuquin Papan nuquitsen bēdamboen isec.

<sup>10</sup> Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiectedi nainquio icsho Nuquin Papan cuidendac,” quepampic. <sup>11</sup> —Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidquidquio icsho bēdamboen istiapimbo icquin Nuquin Papan naden

chuiquin dada uamepampic. “Nuquin Papa ambi chiacpadomboen naquidquo nec,” quequin abi tantiec tabadquidien Nuquin Papan bēdamboen isec,” quequin dada uamepampic. <sup>12</sup> ¿Ēmbemi Moisesēn chiactedimbo nanuequidta Nuquin Papambo tantiec tabadpec? Padenquo. “Moisesēn chiactedi naquid Nuquin Papabēd tabadendac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

<sup>13</sup> Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquo icnu —quiash abided ciudadec unēspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. <sup>14</sup> Adec matses utsi-utsien abi tantiaquido cuidmenquo icnuec abided ciudadec Esus unēspac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

*Abadauamba chuishun Moisesēn Nuquin Papan chiaid*

<sup>15</sup> Tantia, con utsibo. Mibitedi chuinu. Min matsesēn nadoquid. —Naden naindami —quequin dada uashun: —“Abimbo chiaidquo nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid icquin <sup>16</sup> Nuquin Papan: —Nadomboen naindami —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. <sup>17</sup> ¿Ada tantie? Ēndenquimboshē Nuquin Papan Abadauan chuīquin: —Min tsyuecquidēn matses bēdambo icmendac —capampic. Adshumbic yuecquido ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. <sup>18</sup> ¿—Ēmbi chiaid ēmbi Moises dada uamiacpadomboen nashouidi mibi bēdamboen isembi —queshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ēndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

<sup>19</sup> ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuīuampampic.

Adoac Moisesën aton matses Nuquin Papan chiaid chuibampampic. <sup>20</sup> Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

*Matses abi icsaid tantiamete chiaid*

<sup>21</sup> Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —queshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. <sup>22</sup> —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacimboec abembi bēdambo ictiapimboen ichtitec,” quequin ma matsesën tantianu —queshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

<sup>23</sup> Esus choabi icnuc nadquo matses icpanēdash. Moisesën chi-acpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. <sup>24</sup> Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bēdamboen isec icsais-abimboecnuc —nuqui quendac. <sup>25</sup> Aden tantiec: —Isadaidbo tsusedpan chiatedi nashouidi Nuquin Papan matses bēdamboen istiasish —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

*Nuquin Papan con mado con champi caido*

<sup>26</sup> Aden Esus tantiasho Nuquin Papan: —Con mado mibi nec. Con champi mibi nec —nuqui capec. <sup>27</sup> Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec. <sup>28</sup> Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. <sup>29</sup> Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

## 4

*Yuabimboecquid isadaidbo yaid*

<sup>1</sup> Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. <sup>2</sup> Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. <sup>3</sup> Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquio icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash. <sup>4</sup> Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanëdash. <sup>5</sup> Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abided ciudadec Esus unëzac caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

<sup>6</sup> Adec: —Con bacuëbo nec —qeshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papa nuqui chianec. <sup>7</sup> Esus tantiabi Moisesën dada uapampiduidi namenuequido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bëdambo icmec ambi Abadauan chiampicpadomboembi.

*¿Utsin yuameteda bumpe? quiaid*

<sup>8</sup> Tantia. Nëbi matses utsibo mibi chuioanu. Ënden Nuquin Papambo tantiesa icquin matses uaquidpenquiobi utsi mimbi tantiapanëdac. Papa quequin mimbi tantianëdaidën yuabo yec mëtaniacimboecquido mibi icpanëdac. <sup>9</sup> Nëbi Nuquin Papa mimbi tantiabenondac. ¿Mimbembida adonda? Padenquio. Aidëmbi mibi tantiamepanëdash. Aidën tantiamiamombo icquin ¿atotsiequin aid tantienquio yanoai? ¿Moisesën dada uapampiduidi namenuequido tanshoda Nuquin Papan mibi bëdamboen ispec? Padenquio. Adquid mëtaniacimboecquid nec. ¿Mëtaniacimboecquid icoatiadquioda ique? <sup>10</sup> Aden Nuquin Papa tantienquio icquin mimbi icsamboen chiec. —Aid badiadën adenda. Aid inçhëshën ushën adenda. Aid setambi adenuidtsëqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bëdamboen iste danquin mimbi icsamboen chiec. <sup>11</sup> Mibi caic: —Adosh —quesho tantiash shubitiadquio iquebi. —¿Ëmbi chiondaidonda Esus tantienquio yampash? —quequin tantiac mibi unësquio iquec.

<sup>12</sup> Con utsibobimboecquido mibi neque. Tantia. Mibitedi chuinu. Isadaidpemo yec mibi: —Moisesën chiampiduidi nanu —quenquio yacimboec yanondabi. —Ëmbembi Moisesën chiampid naquin Nuquin Papa bëdamboen ismembu —quedenedi ënëdondabi. Nëbi Esusuidi tanti-aquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquoio iccondac. <sup>13</sup> Mibi yacno tauamboec choshon daic-sabudtsëcshumbi mibi Esusën naid chuibanondambi. <sup>14</sup> Istiapicpambo yec daic-sabudacshobi mimbi ëbi cacumenquoio iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choacximboecnuc mibi cuishonquiondac. Nuquin Icho Esuquidistu choacximboecnubidi mibi adondac. <sup>15</sup> —Min ëshë chicshun ëbi mène —ëmbi cac mimbi ëbi menetsenondac. Aden ëbi mimbi tantiaquiondac. Adondaïdi ¿atotsi quiash chieshcueno? <sup>16</sup> ¿Nëid abimbo chuiquindambi mibi chieshëmpe? Padenquoio iquemi. ¿Aden chuisho mimbidabi chieshëmpe?

<sup>17</sup> Ista. Esus chienquoio icquidon ambi chiacpadomboen mibi name-tiadquoio iqueque. ¿Mibi tantiaquioquin bëdamboen namenuenda mibi chuipec? Padenquoio. Ëbi chieshëmenuembien ambi chiacpadomboen mibi nametiadquoio icchitec. Mibi abibi tantiamenuen naic. <sup>18</sup> Embien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ëmbi chiaidquoio tantiabenon-dac. Ëbëd icquimbi Esus bëdamboen tantiaboedombi ëbi nidtsëcnubi mimbi badedi utsi tantiac. <sup>19</sup> Aden mimbi naid tantiac mibi unësquoio iquec. Anin bacuë tantiacximboen mibi tantiaquimbi. —Esusbimboec icpashun. Aid tantiec ambi chiacpadec bëdamboec tabadpashun —quequin mibi tantiembi. <sup>20</sup> Mibëd icquin bëisquoioquin mibi chuitsiambi. Mibëd iquenquoio icquimbi mibi bëisquoioquin chiacximboen dada uaquin mibi naden chiemi. —¿Atotsieshun Esus tantienquoio yanoao? —caimbi.

*Abadauanën mado daëd chiaid*

<sup>21</sup> ¿—Moisesën chiacpadomboenuidi naquin Nuquin Papa bëdamboen ismembi —quequido icquinda mimbi Moisesën chiampid bëdamboen tantieque? Tantia. Mibi chuinu. <sup>22</sup> Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquoio aton chidon tishaid abentsëcbidi icpampic. <sup>23</sup> Abadauanën chudac badedquoio bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquoio icmiac aton mado tishpampic. <sup>24-25</sup> Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquoio yec Moisesën chiaiduidi tantiate bunquieç. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. <sup>26</sup> Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquoio iquendac. <sup>27</sup> Nuquin Papan ambi chiaid dada uamepampicpadec Esus tantiaquido dadpenquoio iquendac. Naden dada uamepampic. “Tantia, chido. Naido icsho mibi chuinu. Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”  
quequin ambi chiaid Nuquin Papan dada uamepampic.

<sup>28</sup> Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. <sup>29</sup> Ènden Nuquin Papan naidopenquio icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. <sup>30</sup> Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquio caidmequin bëdamboen tabadmemb. Yuaidën madoembi padenquio iquendac,” quequin Nuquin Papan Abadauan chiaid dada uapampic Moisesën. <sup>31</sup> Sada caidën mado Isac caidpadquid yuapenquio nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquio tantiaquid yec: —Èmbembi Moisesën chiactedi naquin Nuquin Papa bëdamboen ismemb —quenquio icnuna.

## 5

### *Esus tantiasho Nuquin Papan bëdamboen iste chiaid*

<sup>1</sup> Aden: —Esusënuidtsëqui Nuquin Papa ëbi bëdamboen ismec —matses camenuc abided cuidadec Esus unëspac caondashe. Aidquio tantiata. Muaquidën: —Moisesën chiampicpaden nasho Nuquin Papan nuqui bëdamboen istiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

<sup>2</sup> Mimbi isondaid Pabado nebique. Tantia. Mibitedi chuinu. Moisesën chiactedi naquid Nuquin Papan bëdamboen iste danquin Esus tantienquio yanec muaquidën chiacpadec shui dëbid dëteshuniadacsho isun Esusën Nuquin Papa mibi bëdamboen ismetiapimbo ictsiashe. Adenda. <sup>3</sup> Aden Moisesën chiaid abentsëc natsëcshun aidën chiaid utsitedi nainquio icsho Nuquin Papan mibi bëdamboen istiapimbo ictsiashe. Moisesën dada uapampiduidi namenuequido tanenda. <sup>4</sup> Aido Esus tantiesabo nec. Aden abi bëdamboec ismianquid Esus tantienquio icsho Nuquin Papan aido bëdamboen istiapimbo iquec. <sup>5</sup> Esus tantiaquidoen Nuquin Papan Mayanën tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bëdamboen isquin Nuquin Papan: “Mibi bëdambo iquec,” nuqui caindac —quequin nuqui tantiec. <sup>6</sup> Shui dëbid dëteshuniaidën Esus tantiasho Nuquin Papan bëdamboen isec. Adembidi shui dëbid dëtiacmaidontsen Esus tantiasho Nuquin Papan bëdamboen isoaic. Aden Esus tantiabenash: —Ambi chiacpadomboen Nuquin Papan matses tantiaquid ëbi icmendac —quequin aden utsibo

tantiasho isun Nuquin Papan: —Adquid con Mado tantiaquid nec —caindac.

<sup>7</sup> —Bednu —quequin nadancacimboen aiduidtsëqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe? <sup>8</sup> ¿Nuquin Papan nacta Esus tantienquo yano? Padenquo. Ma aidëmbi mibi Esus tantiametiadquo yoc. <sup>9</sup> Muaquido tantienda. Nadquo aid iquec. Tosho bedquid abentsëcshun bedmebanac abitedi toshoquecuededec. Adembidi muaquid abentsëcshun chiac matses dadpeshun abimbo tantienquo yantsiashe. Muaid tantienda. <sup>10</sup> —Nuquin Icbo Esusën tantiamiac ëmbi chiapadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

<sup>11</sup> —“Con tsusedpan chiapaden shui dëbid dëteshuniaiduidtsëqui Nuquin Papan bëdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquo ictsenoshi. Esus chienquo icsho ëbi chieshënenquo ictsenosh. Abi tantiaquid cuidmenquo icnuec abided ciudadec unësaid Esusuidi chuisho mabi chieshëmpaboc. <sup>12</sup> Mibi muaquin chuiquido Moisesën dada uapampiduidi namenuquido caic: —Auëshquo cuemepashun —caimbi.

### *Esus tantiaquido bëdamboec tabadte chiaid*

<sup>13</sup> —Ëbi cuidmenquo icnuec abided ciudadec unësaid Esusquo tantiasho Nuquin Papan ëbi bëdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquieci nashunanta. <sup>14</sup> Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bëdamboen tantiaquiota,” quequin Nuquin Papan ambi chiaid Moises dada uamepampic. <sup>15</sup> —Opa penantiadpambo yacimboec nëishnanash chushcananosh —quiosh mibi caic. Aden naic mibi icsacuededeque. Esus tantienquo mimbi yaneque. Bëdamboec tabadta.

### *Nuquin Papan Mayanën bëdamboen tabadmete*

<sup>16</sup> Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquo ictsiac. <sup>17</sup> Nuqui icsate bunaid naiqui Nuquin Papan Mayanën tantiamiacpadec bëdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsiac. <sup>18</sup> Nuquin Papan Mayanën tantiamiacpadomboen tantiec: —Esusënuidtsëqui Nuquin Papa ëbi bëdamboen ismec —queshun: —Moisesën chiatedimbo naquin ëmbimbo Nuquin Papa bëdamboen ismembi —quequin tantienquo nuqui iquec.

<sup>19</sup> Nadquo icsateuidi bunquid matses iqueque. Tantia. Chuinu. Nëidic aton chidopenquo chudquido. Nëidic aton bënëpenquo chudmequido. Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamete bunquido. <sup>20</sup> Nëidic Nuquin Papan chi-aid niac-niacquin ambi matsesbimboecnuc nacnenaidi papa caquido.



Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmënec chushcananquido. Nëidic cud-asquido. Nëidic nëshëmënquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatiapimbo iquebi. Ëmbentsëqui bëdamboen chiemi —quequido. <sup>21</sup> Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquio icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadtiapimbo iquec. Aden mibi chuibanondambi ënden.

<sup>22</sup> Padnuen Nuquin Papan Mayanën namiaid yec nadquiec tabadquid. Nuquin Papabëdta matses tantiaquiec tabadquid. Esus tantiec cuishon-quec tabadquid. —Nuquin Papan ëbi bëdamboen isec —quec bëdambo yec dacuëdenquio yec tabadquid. Utsibon chieshënaqui chieshëmënenquio yec tabadquid. Nëishëmënenquio yec tabadquid. Bëdamboen isquin utsibo nashunec tabadquid. Muainquio yec tabadquid Nuquin Papan namiaid. <sup>23</sup> —Con naidi naimbi. Ëbiuidtsëqui bëdambo iquec —quenquio icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquio yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. —Icsamboec tabadenda —quequin icsamboec tabadquid chuipampic. Nuquin Papan Mayanën tantiamiacpadec tabadquin aden chuipampid nuqui niaquenquio iquec. <sup>24</sup> Adoenquio icquin cuesten dectanac abided ciudadec unësaid Èsus tantiaquin nuqui icsate bunaid ënquin nuqui mëmuntsiac. <sup>25</sup> Aden icsamboen nainquio yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

<sup>26</sup> —Ëbiuidtsëqui bëdambo iquec —quenda. Adenquio yec nuqui chuiquid dëniacte bunenquio yec bëdamboec tabadnuna. —Ëbi bunacpaden ëbi namianenquien ichhitec. Utsien namechitec —quec chieshëmënec tabadenda. Nëishnanenquio yec bëdamboec tabadnuna.

## 6

### *Esus tantiaquido bëdamboec isnante chiaid*

<sup>1</sup> ¿Nuquin Papan Mayanën tantiamiacpadomboen bëdamboen tantiaquidta ipcec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishhec ëbitsen icsamane —queshun nëishenquio icquin aden chuiquid yendac. Abibi datantiadec: —Icsaquid nebi. Esus bëdamboen tantienquio yec adecbidi icsatsiabi —quequin tantiec: —Bëdamboec tabadta —quequid yendac. <sup>2</sup> Adec bëdamboec isnanec: —Bëdamboec tabadnuna —quec chuinanquiota. Adecbidi nashunanquiota. Aden naquín Nuquin Icho Esuquidistun chiacpadomboen mimbi natsiac.

<sup>3</sup> Utsien: —Utsibëd onquetiapimbo iquebi. Ëbiuidtsëqui bëdambo iquebi —quec abibi muauadquid icsambo iquec. <sup>4</sup> Adenquio yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Ûsitedi icsambo icnubi

ëbiuidtsëqui bēdambo iquebi —quenda. <sup>5</sup> ¿Mimbi utsibon naid chuiban-shoda Nuquin Papan: —Mibi bēdambo iquec —capatsiash? Padenquoio. Mimbi bēdamboen naid isun: —Mibi bēdambo iquec —catsiash.

<sup>6</sup> Esus tantiaquidon nadoquid yendac. Nuquin Papan chiaid abi chuibanquid nashunquid yendac. <sup>7</sup> Piacbo sequidbimboec matses iquec. Tantienuquo icquidēn icbompin uestsaidi siac canienquoio ictsias. Padnuen tantiaquidēn ēshē bēdaidquoio siac bēdamboec canitsias. Tantienuquo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenquoio ictsias —quec muaic tabadenda. Ambi chiacpadomboen mibi cuidendac. <sup>8</sup> Ambi chiaid niac-niaquec abi icsate bunaiduidi naquid cuidendac. Nuquin Papan Mayanēn tantiamiacpadomboen naquidien bēdamboec tabadec unēsash Nuquin Papa yacno tabadendac. <sup>9</sup> Ēmbi aden chuisho tantiash bēdamboec tabadta. Bēdamboec tabadec chieshtoenquoio icsho isun ambi tantiacpadēn Nuquin Papan abēdi nuqui tabadmendac. <sup>10</sup> Adec bēdamboec tabadquin utsibo bēdamboen isquin nashununa. Aden ut-sibo bēdiactsēc tantiec Esus tantiaquido yec tantiananguiec nashunanquionona. —Shubu abentsēquēn tabadquidobimboec Esus tantiaquido iquec —queshun adonona.

### *Pabadon ēnquimbi chiaid*

<sup>11</sup> Is. Nua-nua icnuc dada uaquin ēmbimbo ēnquimbi dada uanu. <sup>12</sup> Muaquin chuiquidon mibi con tsusedpan chiacpadomboenuidi name-tiadquoio iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquoio iqueque. —Esusuidi chuisho con matsesēn chieshēnquin cuidnushe. Moisesēn chiacpadomboen namenu —quequin mibi shui dēbid dēteshunemetiadquoio icchitec. Aido muasho tantienda. <sup>13</sup> Aden mibi: —Adota —caquidombi Moisesēn chiacdedi nainquien icchitec. Adquid yec: —Is. Bēdambo iquebique. Ēmbi chiacpadomboen nēidon naosh —quenuembien mibi shui dēbid dēteshunemetiadquoio icchitec. Aidon chiacpadomboen nainda. <sup>14</sup> Ēbien adtiapimbo iquec. Esus tantiesabimboec: —Ēbibi bēdambo iquebi —quetiapimbo iquebi. Esusuidtsëqui bēdambo iquec. Abi tantiaquid cuidmenquoio icnuec abided ciudadec unēsac caondash cuesten dectanac. —Aidquoio tantiec bēdambo iquebi —caimbi. Aden Esus tantiec: —Ēmbimbo Moisesēn chiacdedi naquin Nuquin Papa bēdamboen ismembi —quec ēnēdondabi. Adecbidi Esus tantiec ēbi bunaid ēnash icsate bunenquoio iquebi. <sup>15</sup> —Moisesēn chiacdedi naquiduidi Nuquin Papan bēdamboen istsias —quetiapimbo iquebi. Shui dēbid dēteshunaidēmbi Esus tantienquoio icsho Nuquin Papan cuidtsias. Adembidi shui dēbid dētiacmaidēn Esus tantienquoio icshobidi cuidtsias. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. <sup>16</sup> Ēmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquoio nec —caindac.

<sup>17</sup> —Abimbo chienquien icchitec —ëbi cainda. Esusën chiaidquio chiombi. Aidquio tantiaquin ambi chiacpadomboen nabanta. Ęmbi Esusën chiacpadomboen nasho isun chieshënquin cuesaniondashi. Cuesondaid bish abi iquec. <sup>18</sup> Tanta, con utsibo. Mibi Nuquin Papa chianembi naden. —Mimbi nabocpadomboen con Ębo Esuquidistubëdtan Cadasia yacnocquido bëdamboen ista, Papa—quequin Nuquin Papa chianembi. Padi. Aidedi chuiquin dada uaombi.

## EPESO YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun, Èbi chuibeneta, caid nebi. Adquidquio icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedta.

<sup>2</sup> Aden Nuquin Papan bédambocquid icmenu caidombo icquin ma Nuquin Papan Nuquin Icbo Esuquidistubédtan ènenquiocquin èbi bédamboen isec, quequin mibitedishun tantiapashun. Adembidi, Nuquin Papan bédambo icmenu caido yec abéd iquebi, quequin tantiapashun mibitedishun.

*Nuquin Papan abéd abuc bédamboec tabadacpadquiocnoc icmiaid*

<sup>3</sup> Edoen, Nuquin Papa, Nuquin Icbo Esuquidistun Papa bédambocquid nec. Esuquidistu adquidquibidi neoaic. Aid tantiaquid icsho abéd abuc bédamboec tabadacpadquidquio nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec.

<sup>4</sup> Nidaid abubédta uabicquin aidènquiocquidtedi uabicquin, Nèdtedquio Esuquidistu tantiaquido icsho èmbi cuèmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin <sup>5</sup> abi bunacpadomboen Nuquin Papan, Esuquidistu tantiaquido con bacuèbo icmendambi, quiampicpadomboen nèbi adobanec. <sup>6</sup> Esuquidistu tantiaquid nuqui icsho abéd icquid nuqui icmenuen Nuquin Papan abi yacpadquidquio icmebanec. Adoac, Bédambocquid mibi nec, Papa, quequin Nuquin Papa nuqui chuidenec. <sup>7</sup> Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unès uapanédash. Adosho isash, Nèbi Esuquidistu tantiaquid èmbi bédamboen isaidquio nec. Mibi cuidenquio yec mibi icsaid bèpiscudobi, quec Nuquin Papa. <sup>8</sup> Naden nanuna, quequin ambi tantiampicpadomboen aton bacuè icmebanac abéd icquido nuqui nec. <sup>9</sup> Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquio icpampid nèbi ambi cuèmbanaido Nuquin Papan tantiamebanec. <sup>10</sup> Adoaid iquec con mado abun icquido nidaid yacnocquidobéd chuiquid abentsèqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

<sup>11</sup> Esuquidistu tantiaquid icsho isun ambi tantiampicpadomboen, Con bacuè icmiaido nec, quequin Nuquin Papan cuèmbanaido <sup>12</sup> abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna. <sup>13</sup> Mibi icsaid bedshunash abided ciudadec Esuquidistu unèsapanédash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. <sup>14</sup> Aidèmbi mibi bédambo icmiac Nuquin Papabéd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

*Nuquin Papa chiec onquianiaid*

<sup>15</sup> ¿Bëdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abëd icte bunanec iccuededec, quequin chuisho tantiapombi. <sup>16</sup> Aden tantiashun mibitedi bëpiscudenquiocquin badiadquidën-badiadquidënquien naden Nuquin Papa chian-chianembi. <sup>17</sup> Esuquidistun Papa, icsaisambo, tantiaquidquio mibi cadoque. Mibi bëdamboen tantiaquid yapadquiocnoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. <sup>18</sup> Adecbidi, Abuc ëbëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiapanuna, Papa. <sup>19</sup> Aden tantiamiac Nuquin Papan nadatiambocquin nabanquin Esus unësacsho uincuemënëdapaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdambocquid icmebanec, quequin ma Epeso yacnocquidon tantiaquiopanuna, Papa. <sup>20</sup> Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. <sup>21</sup> Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimboconoc. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. <sup>22</sup> Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. <sup>23</sup> Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yapadquio ictequid yec abentsëc yacimboec abëdi nuqui tabadendac.

## 2

### *Nuquin Papan Esuquidistubëd icmiaido*

<sup>1</sup> Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. <sup>2</sup> Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanasën yuaido mibi iccondac. Aidën Nuquin Papan chiaid niacacpadomboen mibitedishun niachededpondac. <sup>3</sup> Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. <sup>4</sup> Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. <sup>5</sup> Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abëd

icquido Nuquin Papan nuquitedi icmiac. <sup>6</sup> Esuquidistu nuqui ic-said bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēda ambi indoachimboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec. <sup>7</sup> Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubēd icquido nuqui icmec. Ma adquid icsho isash utsibo, Nuquin Papan naid nec, ma quepanuna. <sup>8</sup> Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ēmbibi tantiembi, quetiapimbo nuqui icnubi, Mibi tantiamiombique. Ēbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec. <sup>9</sup> Icsaquido icquin bēdamboen naic nuqui icsaid cuidatiapimbo nuqui iquec. Bēdamboen naic cuidadpebi, quiash abi icsaquid yequi, Bēdambocquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanēdash. <sup>10</sup> Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibot-sen nuqui tantiaquin ma nashumpanueshun.

*Esuquidistubēd abentsēc yacimbocquido*

<sup>11</sup> Nuquin Papan, Cuidnu, quenquiocquin comapenen tantiamiaidquio mibitedi icquin mibi ėnden tabadaid tantiaata. Shui dēbid dētemesa isadaidpembo nec, quequin isadaidbon shui dēbid dētemequidon mibi cuēnondash. Nuquin Papan matsesquio nebi, quequin shui dēbid dētemequidquio isadaidbo nec. <sup>12</sup> Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ēbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abēdi ėnēdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. <sup>13</sup> Adec aid tantiesa yec icsaquid yec, Nuquin Papa yacno puduednu, quetiapimbocboedi, Matses icsaid bedshunash abided cuidadec Esuquidistu unēsapanēdash, quequin tantiaquid icsho aidēnquio abi yacno yuedendac. Nēbi aid tantiaquid yec abi tantiaquid utsibobēd abēdi tabadacimbocesho Nuquin Papan nuqui bēdamboen isec.

<sup>14</sup> Isadaidpembo isash isadaidbo, Ēbēd icquidpenquio nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ėbi icsaid bedshunash Esuquidistu unēsapanēdash, quequin isadaidbo utsin-utsinquent tantiec. Adembidi isadaidpembo utsin-utsinquent aid tantiec. Adec aid tantiaquid yanash datamēncuenenquio yec matses abentsēc yacimbocquido yanac. <sup>15</sup> Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimbocnobi Esuquidistun uesquin nabampanēdash icsainquiocquin. Adec tabadquin naimbudsho icsaquidimbocnuc unēs uapanēdash. Aden unēsmesho isec Nuquin

Papa, Padi. Chèn, quenquoio icpanèdash. Èbi yacno isadaidbo isadaidpembobèdtabi con madon yuedendac, quiash chèn quenquoio icpanèdash. Datamèncueneboedi aido Esuquidistu tantiaquid yanash datamènenquoio yanac. <sup>16</sup> Naden nata, quequin chiaidtedi nuqui natiapimbocnoc nuqui icsaid bedshunash Esuquidistu unèspanèdash, quequin tantiaquido isadaidbobèdi isadaidpembo yanac. Ambi tantiaid Esuquidistu yanash datamèncueneboedi adec datamènu quetiapimbo yanec Esuquidistun shubun icquido yanoaic. <sup>17</sup> Matsestedi bédamboen iste Nuquin Papa bunec quequin ambi chuibeniacpadec abided matses icsaid bedshunash unèsquin isadaidbo isadaidpembobèdta Nuquin Papan bédamboen isaido icmepanèdash. <sup>18</sup> Adoac nèid isadaidbo nec. Nèidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidèn tantiamiac, Mimbi èbi tantiec, quec Nuquin Papa chiec Esuquidistu tantiaquidombo onquedenec.

<sup>19</sup> Aden chiec onquec ambi yuedtiapimbo icboedi nèbi Esuquidistu tantiaquido yanash Nuquin Papan shubun ènden icnèdaidobèd tabadtequid mibitedi iquec. <sup>20</sup> Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquoio isadeque. Chuinu. Tantia. Esuquidistu abia yampid abi yacno yuedanquidquoio yec abia nitsinaid cuate nidquidbimboecquid nec. Nuquin Papan chiaid chuibampampidobèd Esuquidistun èbi chuibeneta caido shubu nitsinaidbimboecquid neoaic. <sup>21</sup> Aided abia icquid icnuc isadaidbobèd isadaidpembo Esuquidistu tantiaquid dadpen yansho Icbon tabècshun tanebanaidbimboecquido neoaic. Abi tabadte Icbopadquid icsaisa yampec. <sup>22</sup> Mibi Epeso yacnocquido Esuquidistu tantiaquid utsibobèd Nuquin Papan Mayan meniaid yec Nuquin Papa tabadtebidi mibi nendac.

### 3

#### *Isadaidpembo Esuquidistu chuibenequid Pabado*

<sup>1</sup> Isadaidpembobèdi ma Nuquin Papa tabadte icnu quequin Esuquidistu chuibenesho quènèn nauedaaid icquin aidèn chiacpadomboen mibi chuibanquidquoio nebi. <sup>2</sup> Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. <sup>3</sup> Èbi yacno yuedanquid Esuquidistu iquec, quequin Nuquin Papan tantiamiacpaden ènden dada uaqin mibi chiondambi. <sup>4</sup> Èmbi dada uaondaaid bédamboen isec onquequin Nuquin Papan èbia Esuquidistu tantiamiacpaden mimbi tantiapec. <sup>5</sup> Èndenquoio Nuquin Papan Esuquidistu nidmimbi, quequin chienquiocpampidèmbi nèbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidèmbi aton Mayanèn tantiamiac. <sup>6</sup> Ambi nèbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobèd Nuquin Papa yacno ènèdenquoio yec tabadtequido nendac.

<sup>7</sup> Nuquin Papan, Cuidnu, quenquiocquin nadatiambocquin èbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquoio nebi. <sup>8</sup> Esuquidistu tantiacbicquid utsi bèdiactèsèc icsaquid icnubi comapenec icsaquidquoio icsho Nuquin

Papan Esuquidistu tantiaquid icmeshun Esus bédambo yaidbédtabi abéd tabadte bédaidquio tantiamequiopardashi. Adembidi ambi, Esuquidistu chuiheneta, caidquio nebi. Adquid icquimbi Esuquidistun matses bédamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidtedi matsesën bédamboen tantiatiapimbo icoapec. <sup>9</sup> Èbédambi abitedi uampidquio Esuquidistu aid tantiaquido èbi yacno yuedquid iquendac, quequin Nuquin Papan tantiamenquiochoedi nèbi matses tantiamenuen Esuquidistu chuiheneta caidquio nebi. <sup>10</sup> Aden èbipadquidon Esuquidistu chuiheniac icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubéd abentséc yacimboecquid abipadquid ambi tantiampicpadomboen icmebanec. Aden icmebancho isun abi yacno tabadquin namequidon tantienquiochoedèmbi nèbi tantierendac. Nuquin Papan, Yuecshun naden nanuna, quequin ambi bédamboen tantiampicpadomboen nabanac nèbi abéd icquid dadpen iquec, quequin Nuquin Papan abi yacnoshon uaidon tantiec. <sup>11</sup> Matses bédambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmepanédash. <sup>12</sup> Aton mado Esuquidistu èbi icsaid bedshunash unèsash uincuenash Nuquin Papan dayunquio iquec, quequin tantiec dacuèdenquio yec Nuquin Papa chiec nuqui onquec. <sup>13</sup> Adecbidi, Esuquidistu chuihenesho bedshun Pabado quènèn nauedac, quequin tantiec chieshenquioquon Esuquidistu tantiatia, Epeso yacnocquido mibi caimbi. Èmbi chuibanac Esuquidistu tantiaquid yansho Nuquin Papan abèdi tabadmenuequin Nuquin Papan ambi, Bédambocquid icmenu, caid mibitedi neque. Chieshenda. Adembidi Pabado chiac èbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

*Epeso yacnocquido tantiec Nuquin Papa chiec Pabado onquiaid*

<sup>14-15</sup> Nuquin Papan isadaidpembo Esuquidistu chuiheneta cac, chuihenesho quènèn nauedaid icquin èmbi chiac Esuquidistu tantiaquid isadaidbobéd isadaidpembo Nuquin Papan matses yanash aton shubun icquido nec. Nuquin Papan cuèmbanaido nec, quequin tantiec danèshèn sebudash aid naden chiec onquebi. <sup>16</sup> Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. <sup>17</sup> Aden pausunac ma aido Esuquidistu tantiadonequidompo icpanuna. Aido mimbi tantiamiac ènèdenquio yec utsibéd tantiananec tabadquid ma Epeso yacnocquido icpanuna. <sup>18</sup> Aden pausunac, Èbi utsibobèdta comapenen tantiaquid Esuquidistu nec. Ambi bèyuc matses uaid tantiaquinc, aidèn tsyuecquid ènden icpampido tantiaquinc, nèbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanédash, quequin ma Epeso yacnocquidon tantiappanuna, Papa. Adembidi abuc bédamboshè yacno icboedèmbi matses icsaid bedshunacsho Nuquin Papan cuidpanédash, quequin ma Epeso yacnocquidon tantiaquiopanuna, Papa. <sup>19</sup> Aden tantiaquidquio yec Esuquidistu unèsnédash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmebampanuna.



<sup>20</sup> Nadquid Nuquin Papan ëbi icmetsiash, quequin nuqui tantiati-apimbocnobi nadatiambocquin nabanquin ambi tantiacpadomboen abi yacpadquidquo nuqui icmebanendac. <sup>21</sup> Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen ademebidi chuiopanuna. Ma nuquin tsyuecquidon tsyuecquidontsen ademebidi chuiopanuna. Ambi uaid utsitedi naimëdec, quenubi ma adomboebidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

## 4

### *Abentsëc yacbimboecquido Esuquidistu tantiaquido*

<sup>1</sup> Nuquin Papan isadaidpembo Esuquidistu chuibeneta cac chuibenesho bedshun quënën nauedaaid icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquieci tabadteneta. <sup>2</sup> Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. <sup>3</sup> Nuquin Papan Mayanën abi utsibëd bëdamboec tabadaid tantiamiacpadquieci Esuquidistu tantiaquid utsibobëd bëdamboec tabadteneta. <sup>4</sup> Esuquidistu tantiaquidtedi abentsëc yacbimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimi caintequid abentsëcquiobi iquec. <sup>5</sup> Abentsëcquiobi mibitedishun con Icho caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yacbimboecquid nec. <sup>6</sup> Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

<sup>7</sup> Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. <sup>8</sup> Ëndenquio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquio indoac, Ëbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,”

quequin ënden chiampid nec. <sup>9</sup> “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidënsnun chidon tishpanëdash. <sup>10</sup> Aid nidaidënsnun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec.

<sup>11</sup> Aden aid menebanac aidënsnunquio Esuquidistu tantiaquido utsi-utsien

nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abëd iccuededquido isbanquin chuiquin tantiamequid icmebanoaic. <sup>12</sup> Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmebanac <sup>13</sup> ma shubu dapan icquid dadpen yanec abentsëc yac bimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

<sup>14</sup> Ambi pausunaidquio icquin abimbo chiac bimboen utsibon chuisho tantiabenicquidën badedquio tantiacpaden tantienquio nuqui iquendac. <sup>15</sup> Tantaranec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yac bimboecquid nuqui yanendac. <sup>16</sup> Ëbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yac bimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantiananquiec abi tantiaquidtedi Esuquidistupadquidquio abëdi abentsëc yac bimboecquid yanendac.

*Esuquidistun nua pausunacpadquiec tabadteniaid*

<sup>17</sup> Esuquidistubëd abentsëc yac bimboecquid abi tantiaquidtedi iquendac, quiash, aidpadquid icnu, quec ënden icsamboec tabadnëdacpadquiec tabadenda caimbi mibi. Esuquidistun ëbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. <sup>18</sup> Pashuac bimboen tantienquio iquec. Nuquin Papabëd tabadte iquec, utsibo qesho tantiesa yec, Tantiatiapibi, quepec aido. <sup>19</sup> Icsaquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadecec tabadec. Adecec icsasho utsin istemaid nec. <sup>20</sup> Adpenquio Esuquidistun tantiamequin pausunaid iquec. <sup>21</sup> Esuquidistu chuibancho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiaashun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. <sup>22</sup> Adoac mibi tantianëdacpadecec tabadoainda. Mibi ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. <sup>23</sup> Mibi icsate bunaid ënta. <sup>24</sup> Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacpadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. <sup>25</sup> Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta. <sup>26</sup> Nëishhec icsainda. Nëishash abi ushëmbi bëdanta. <sup>27</sup> Satanasën yuanushe quiash badedquio bëdanta. <sup>28</sup> Ampequid icboedi Esuquidistu tantiaquid yanshun ampanda. Adquid icboedi chonoadquin mitsana bedshun utsin na nibëdsho isun menequid icta.

<sup>29</sup> Icsaquid onquiac bimboec onquenda. Utsi tantiaquin bëdambocquid icmenuequin chiecc onqueta ma Nuquin Papan aidtsen bëdambo

icmepanu quiash. <sup>30</sup> Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. <sup>31</sup> Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. <sup>32</sup> Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

## 5

<sup>1</sup> Nuquin Papan bacuëbo yec <sup>2</sup> tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

<sup>3</sup> Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Ëbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. <sup>4</sup> Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. <sup>5</sup> Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquiec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquiec. Aden nabanquid Nuquin Papabëd Esuquidistu con icbo nec, quetiapimbo icoaic. <sup>6</sup> Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. <sup>7</sup> Adquidbëd icsainda.

<sup>8</sup> Ënden Esuquidistu tantiesa icquin inchëshquiocnoc isacbimboen tantienquio icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacbimboen tantiaquiota. Aden tantiec Nuquin Papan bacuëbo yec Nuquin Papan tantiamicpadquiec bëdamboec tabadteneta. <sup>9</sup> Esuquidistun ambi tantiacpadomboen pausunac abi yacpadquiec nuqui bëdamboec tabadtenendac. Adembidi aid yacpadomboen abimbo chuidenequid icta. <sup>10</sup> ¿Nadec tabadshodabi Nuquin Papan bëdamboen isteiashe? Tanu, quequin adomboen nabanec tabadteneta. <sup>11</sup> Utsibëd icsainda. Utsi icsadenenubi mibi bëdamboec tabadtenesho isun abi icsaid utsin ëmpec. <sup>12</sup> Icaquidën ompoquin naid chuitemaid nec. <sup>13</sup> Adquidën Esuquidistu tantiaquid bëdamboec tabadtenesho isun, Icsambocquid nebi, queshun Esuquidistu tantiabempec. <sup>14</sup> Bëdamboec tabadquin ismedeniac icsambochoedëmbi bëdamboen tantiabentsiash. Esuquidistu tantiaquido chuiquin dada uaid nad iqueque. Tanta. Chuinu.

“Unësacbimboen tantienquiochoedi isucunshun tantiabnacbimboec bëdamboec tabadta.

Adquid icsho Esuquidistun mibi nua pausunendac.”

<sup>15</sup> Adec bēdamboec tabadnuec Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. <sup>16</sup> Icsaquid dadpen iqueque. Aidpadquid iquenda. Esuquidistun pausunaid mibitedi bēdamboec tabadtenesho isec ma Esuquidistu tantiesā icboedi abi tantiaquid yampanuna. <sup>17</sup> Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. <sup>18</sup> Icsachitomane quequin nua paēmboquid aquenda. Aden aquec icsaindac. Icsate bunenquiocquin Nuquin Papan Mayanēn tantiamiacpadomboen nua pausunaid icquin bēdamboen nabanta.

<sup>19</sup> Adec icsate bunenquiocquin Esuquidistu tantiaquid utsibobēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta.

<sup>20</sup> Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

*Utsi tantiaquin nashunta quiaid*

<sup>21</sup> Esuquidistu con icbo nec, quequin ambi chiaid niacmane qeshun utsi tantiaquin nashunta.

<sup>22</sup> Adembidi Esuquidistun chiacpadomboen dadan inaidēn min bēnēn chiacpadomboen nabanta. <sup>23</sup> Adembidi abi tantiaquidtedi chuiquidquo Esuquidistu nec. Abi yacno indoshon ēnēdenquo yec icsainquiocnoc tabadmendac. Adembidi aton chido chuiquidbidi aton bēnē nec. <sup>24</sup> Esuquidistun chiacpadomboen abi tantiaquidon nabanacpadomboen aton bēnēn chiaid naquidquo aton chido neoaic.

<sup>25</sup> Esuquidistu abuc tabadboedi abi abuc bēdamboec tabadtequid tantienquo yec unēs uanushe quenquo yec matses tantiec nidaidēnshun tishaid yec matses icsaid bedshunash abided cuidadec unēsapanēdash. Abuc ēbēdi abentsēc yacimboecnuc tabadmenu, quec unēsapanēdash.

<sup>26</sup> Adecbidi, Ēbi tantiaquido icsaisa icmenu, quish abided cuidadec unēsapanēdash. <sup>27</sup> Adecbidi, icsaid nibēdquid bēdaidquo abi tantiaquido icmeshun Nuquin Papa yacno yuedshun, Ēmbi yuedboed min shubun ictequid nendac, quequin ismembī, quec Esus unēsapanēdash.

<sup>28</sup> Adomboembidi chido inquidēn abibi tantiadacpadomboen ma con chido tantiaquin, Bēdamboquid icmenu, quequin nashundeniash ma aidbēdi bēdamboquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbēdi abentsēc yacimboecquid neoaic. <sup>29</sup> Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimbōen <sup>30</sup> dadan abēd icquid aton chido icsho aidi tantiaquin nashunquid. Dadaba uashun aidēn shictodobi chicshun chido uapampic. Adoshon dadan nami aton canitebēdta chido uashun daēd uac abentsēc yacimboec aid daēdi yanac. <sup>31</sup> Nuquin Papan ēnden dada uampid nad iqueque. Tania. Chuinu. “Aidbēd icnu, qeshun bedash aton papa aton titabēdta nianacimbōec daēdash aton chidobēdi abentsēc yacimboec tabadtenec.” <sup>32</sup> Adec dada aton chidobēd daēdash abentsēc yacimboecnuc ambi icmiampicpadec Esuquidistu

tantiaquido aton shubun icquido abentsëc yachimboec tabadendac, quequin chiec. <sup>33</sup> Nëbi adomboembidi chido inquid ambi inaidbëdta chuioaimbique. Tantiata. Mibibi tantiadacpadomboen min chido bëdamboen tantiata dadan. Con bënë ëbi chuiquid nec, quequin aidën chiaid tantiata chidon.

## 6

### *Bacuëbobëdta bacuëchoquid tantiamequin chuibanaid*

<sup>1</sup> Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. <sup>2</sup> Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tantia. Chuinu: “Ëbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: <sup>3</sup> “Amën anibëdtan chiacpadomboen naquid Nuquin Papan bëdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

<sup>4</sup> Amën anibëdtan con bacuëbo chieshmemane qeshun bëdamboen chuiquin tantiamequin isme. Adembidi, aido pemeshun acme. Adembidi, Ëmbi chiacpadomboen ma nabampanueshun Nuquin Icbon chiaid tantiamenu, quequin adobanta.

### *Utsin yuaido yuaquidobidi tantiamequin chuibanaid*

<sup>5</sup> Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. <sup>6</sup> Min icbon chuishun isnuc ambi chiacpadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidën chiacpadomboen nanuna, quequin nidaidënshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. <sup>7</sup> Min Icho Esuquidistun aton Papan chiacpadomboen chieshenquiocquin nacpadomboen nidaidënshun min icbon chiacpadomboen chieshenquiocquin nabanta. <sup>8</sup> Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

<sup>9</sup> Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nëdic yua icsho daëdpactsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

### *Satanas cuemetequid dasiuidaid*

<sup>10</sup> Nuquin Icho nadatiambocquin nabanquid iquec, quiash aidënquio nua pausunaid icta. <sup>11</sup> Satanacacumetequid dasiuiu, quiash, Nuquin Papa mibi nua pausunesho, Ai, cata Satanasën mua uaquin bedchitoshe qeshun. <sup>12</sup> Matses isadacpadpenquio nami intacbëd isadesa Satanabëd icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanac

nec. Nuquin Papan uaid tantiash bēdambo mibi iquendac, quequin muaquin aidon chiec. <sup>13</sup> Aden muaquin chuiquid aitedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushē chonoc Satanash mibi icsamenuec choacsho bēcuniacimboen cacumec abi mibi nidtoash Esuquidistu tantiaquid yec nidendac. <sup>14</sup> Aid cacumec abi nidquid icnuec Nuquin Papan abimbo chiaidquio nacnēshēdaccimboec tabadteneta. Adembidi, Nuquin Papan abi bēdamboec tabadtequid shictoncacimboec tabadteneoata. Adec tabadec abi nidtoash mibi nidendac. <sup>15</sup> Adecbidi, Esuquidistu tantiaquid ēbēd icquid iquendac, quequin Nuquin Papan tantiamequin pausunaidēn tapucudacimboen adomboembidi chuibenequin Satanash cacumec nidacimboec abi mibi nidendac. <sup>16</sup> Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidēnquio dēcatemēnquiash abi mibi nidendac. Aden Nuquin Papan tantiamequin pausunaidēnquio dēcatemēnquiash Satanashēn abi tantiamenuequin pian sedo-sedoacimboen pausuntemaid yec abi mibi nidendac. <sup>17</sup> Adecbidi, Esuquidistu tantiaquid ēmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacimboec tantiec tabadteneta. Aden pausunac tabadquin Satanash, Esuquidistu mibi bedec choenquio iquendac, queshe cacumiash abi nidquin mimbi ēnenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanēn tantiamiaidquio icquin mimbi chuisho tantiash Satanash cuenendac. <sup>18</sup> Adecbidi, Nuquin Papan chiaid aton Mayanēn tantiamiaid icquin utsibo tantiaquin badedbadedquiec Nuquin Papa chiec onqueta. Satanashēn icsamenushē quiaish Esuquidistu tantiaquid utsibo Nuquin Papa chiec onquedeneta.

<sup>19</sup> Ēbitsen tantiaquin Nuquin Papa chuiuoata. Dacuēdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ēbitsen chuiuo. <sup>20</sup> Esuquidistun chuibeneta caid icquin abi chuibenesho mētaneshun quēnēn nauedaid nebi. Adoaid ēbi icnuc mimbi tantiacpaden chuibanquid Pabado icme, Papa, quequin chuiuoata.

### *Ēnquin chiaid*

<sup>21</sup> Nēbi ēbēd icquid chiembique. Tantia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiiaidquio aidi nec. <sup>22</sup> Mibi yacno puduedshun ēmbi naidtedi ēbi tabadaidbēdta mibi chuibanendac. Ēbi mimbi chuisho tantiash, Bēdambo iquebi, quependac Epeso yacnocquido, quequin Tiquico mibi yacno nidmembi.

<sup>23</sup> Mibēd icquido Esuquidistu tantiaquid utsibobēd ma bēdamboec tabadpanuna caimbi mibitedi. Esuquidistun Nuquin Papabēdtan abi tantiamiantequidbēdta utsi tantiatequid pausunaid ma icpanuna caimbi mibitedi. <sup>24</sup> Ēnenquiocquin Nuquin Icho tantiaquidtedi ma abipadquid icpanuna.

## PIDIPOS YACNOCQUIDON ISTE

### *Pabadon tauamboen chiaid*

<sup>1</sup> Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. <sup>2</sup>—Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

### *Pabadon Nuquin Papa chianiaid*

<sup>3</sup> Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. <sup>4</sup> Aden mibi tantiaquin Nuquin Papa chiec bëdambo yec cuishonquebi. <sup>5</sup> Ënden ëmbi chuibanac Esus tantiabənquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. <sup>6</sup> Nuquin Papan tantiamiac mimbi Esus tantiabənondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. <sup>7</sup> —Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondami. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi. <sup>8</sup> Esusën matses tantiacpadomboen mibi tantiac unësquo iquec. Mibi istiadquo iquebi. Ëbi adsho tantiash Nuquin Papatšen: —Abimbo caic —quendac. <sup>9</sup> Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. <sup>10</sup> Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. <sup>11</sup> Adec con Icbo Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

### *Utsibon Esus chuibeniaid*

<sup>12</sup> Quënën nauedac ëmbi Esus chuibenetiapimbo icnubi utsibon chuibeniac utsin-utsinquin Esus tantiabənac caosh. <sup>13</sup> Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanansho Pabado

quënën nauedac —quequin tantiec. Aidon chiac nēmbo icquido utsitedishun adembidi tantiec. <sup>14</sup> Quënën nauedaqui dacuēdenquoio iquebi. Ēbi adquoio icnuc: —Pabadon nacpadomboen dacuēdenquoio icquin Esusën naid chuibanembi —quepac caosh Esus tantiaquido dadpen. Adshun dacuēdboedombi dacuēdenquoio yanquin Nuquin Papan chiaidquoio chuibeniac caosh.

<sup>15-16</sup> Aidon ēbi bēdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ěmbiquien nanu —quequin ēbi bēdamboen tantiaquin Esusën naid chuibeniac caosh. Utsibombien ēbi chieshēnquimbi Esusën naid chuibeniac caosh. —Quënën tsadunac ma Pabado mēyadbudchitono. <sup>17</sup> Aidën chuibantiapimbo icnuc ěmbiquien nanu. Aden ěmbentsēqui chuibanac dadpenshun tantiashun: “Mibi bēdambo iquec,” ēbi catsiash —quequin Esusquoio tantienquoio icquimbi Esusën naid chuibenec. <sup>18</sup> —Ēbi chieshēnec —¿quiashtabi nēishpe? Padenquoio. —Ēbi chieshēnquidon ēbi bēdamboen tantiaquidobēdtambi Esusën naid chuibanac matses utisibo utsi-utsiec Esus tantiaquido yanec —quiasht bēdambo yec cuishonquebi. Adecbidi cuishonquebi: <sup>19</sup> —Pidipos yacnocquidon Nuquin Papa ēbi chianiac caosh —quiash. —Mēyadsho Pabado chieshtomenda, Papa. Abi quënën nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquoio iquendabi. Adembidi aidën nac quënën tsadenquoio iquendabi. <sup>20</sup> Ēmbi naondacpadomboen dacuēdenquoio icquin Esusën naid chuibantiadquoio iquebi. Chieshtoti-apimbo iquebi. —Ma utsibon: “Esuquidistu bēdambo iquec,” canu —quiasht aduidequi iquebi unēsabi yec. Utsin: —Cuesunechitono —caqui adecbidi chieshtoenquoio ictsiabi.

<sup>21</sup> Unēsabi Esuquidistu tantiec bēdambo iquebi. Unēsash Esusbēd tabadequic bēdamboshē ictsiabi. <sup>22</sup> ¿Mitsipadtebi bumpeba? ¿Unēstedabi bumpeba? ¿Unēsenuoio yec tsadtedabi bumpe? Unēsabi icquin ěmbi Esusën naid chuibanac utsibon Esus tantiabentsiash. <sup>23</sup> Nuquin Papa yacno nidash Esus isec bēdamboshē ictsiabi. Esus iste bunquiebi. <sup>24</sup> Aden tantiequi: —Unēsabi yec Pidipos yacnocquido Esus tantiaquido Esus bēdamboen tantiamec ano nidtsiabi —quequin tantiec unēstiapimbo icoaibi. <sup>25</sup> Unēsabi yec mibi yacno nidoatsiabi. Aden tantiec: —Nuquin Papan nēbi ēbi unēs uamenquoio iquec —queoaibi. Mibēd tabadquin Esusën naid bēdamboen chuibantsiambi. Adoac bēdiactsēc Esus tantiatsēchoedombi Esus tantiaquiec mibi bēdambo ictsiac. <sup>26</sup> Ēbi choacsho isash: —Pabado padpidec chomequid Esus bēdamboshē iquec —mibi quetsiac. Adec mibi cuishonquetsiac.

### *Chieshtoenda, quequin Pabadon chiaid*

<sup>27</sup> Ēbi ano nidtiapimbo icnuc Esusën chiacpadec chieshtoenquoio yec bēdamboec tabadta. Quënën ēbi nauedboedën puduemiac mibi yacno nidshun mibi bēdamboec tabadsho isash: —Pidipos yacnocquidon ěmbi chiacpaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquoio icquin Esus tantiec cuēshēdenquoio yec Pidipos yacnocquido bēdamboec tabadosh. <sup>28</sup> Esus chieshēnquidon: “Esusën naid chienda. Cueschitomane,” caqui dacuēdenquoio icquin Esusën naid adembi chuibanosh —quequin mimbi naid chuisho tantiash bēdambo ictsiabi. Adec cuesambo yec nuqui:



—Nuquin Papan icmiacpadec dacuēdenquo iquebi. Ēbi dacuēdenquo icmequidēn ambi chiacpadomboen ēbi chieshēnquido unēsacsho icsambo icquido cuidacno nidmendac. Ambi chiacpadec Esus tantiaquid yec unēsashini Nuquin Papa yacno tabadendac —quequin nuqui tantiat-siac. <sup>29</sup> —Con Mado Esus tantiasho utsibon chieshēntsindac —quequin Nuquin Papan tantiacpadomboen utsibon mibi chieshēnendac. <sup>30</sup> Ēbi nacpadomboen mibi chieshēnoaic. Mimbi isnuc ēbi chieshēnondash. Adembidi ēbi chieshēnoaic nēbi. Nēid dada uaid isquin: —Pabado pad-piden chieshēnoac —quequin mimbi tantiendac.

## 2

### *Utsi tantiec tabadta, quiaid*

<sup>1</sup> Tanta, con utsibo. Mibitedi chuinu. ¿Mitsipadquo Esus tantiaquido icpec? Esuquidistu tantiaquiec dayacquo yachimboec iquec. Adecbidi Esusēn tantiaido yec bēdambo icquido nec. Adecbidi Nuquin Papan aton Mayan abēd icmequin bēdamboec tabadquid icmiaidobidi nendac. Adoaido matses tantiaquidombo nec. <sup>2</sup> —Adquidbidi nebi —quec adquiecbidi bēdamboec tantianancuededta. Ēbi cuishoncamenuc adta. Abitedi: —Esusēn chiacpadomboen nanuna —quecuededec chieshēnanenquo yec bēdamboec tabadta. <sup>3</sup> Nadec onquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashuntiadquo iquebi —quec bēdamboec tabadta. <sup>4</sup> Mimbi tantiacpadomboenuidi nainquo icquin utsin tantiacpadomboentsen nata. Mitsanauidi tantienquo icquin utsibo nashuntetsen tantiata.

<sup>5</sup> Esuquidistun nacpadomboen naic mibi bēdamboshē ictsiaic. Aidēn chieshtoenquo icquin Nuquin Papan chiacpadomboenuidi napanēdash.

<sup>6</sup> Aton Papa Nuquin Papapadquidquo yec Esus abitedishun Icbombo neapanēdash.

Aton Papabēd yec bēdamboshē ichoedi: —Padi icnuna. Nuquibi namec bēdambo iquebi —quenquo yec Nuquin Papan chiacpadomboen naic auēshquo chopanēdash.

<sup>7</sup> Adec aton Papan yuabimboecquid yanash ambi chiacpadec matsespanēdash chidon tishac.

<sup>8</sup> Adashic matses yec aton Papan chiacpadequi abided cuidadec unēspac caondash.

Matses icsamboshē icquido cuidacimboen cuesten dectanquin ic-saisambobi Esus unēs uapac caondash.

<sup>9</sup> Aden ambi chiacpadomboenuidi Esusēn nasho isun Nuquin Papan uincuemeshun abi yacno chomeoashun abēdi Esus tabadmeapanēdash.

Aden abitedishun Icbombo icmeoapanēdash.

<sup>10-11</sup> —“Nuquin Icbombo Esuquidistu bēdamboshē iquec,” ma abitedi quenu —qeshun aden Nuquin Papan abitedishun Icbombo Esus icmeoapanēdash.

—Ēmbi ēbi yacnoshon uaido mayan bēdabo yec nidaidēn tabadquido matses yec unēsacsho uincuemiaido yec quequido: “Nuquin Icho Esuquidistu bēdamboshē iquec. Abi abitedishun Icho icmeoaquid

Nuquin Papatsen bédamboshë iquec,” ma quenu —queshun adopanëdash.

*Utsibo Esus tantiamete chiaid*

<sup>12</sup> Mibi tantiaquiembique. Tantia, con utsibo. Mibitedi chuinu. Esusën nacpadomboen mimbitsen bédamboen nata. Ëbi mibëd icnuc mimbi nadeniondacadomboen ëbi nibëdnuc adembidi bédamboen nata. —Nuquin Papa dacuëdampambo icquidën chiaid niacmane —quiash ambi chiacpadomboen naic aibëdi tabadnush bédamboec tabadta. <sup>13</sup> —Ma bédamboec tabadnu —quequin Nuquin Papan ambi chiacpadec tabadte bumequin nuqui bédamboen tabadmeque. Bédamboec tabadta.

<sup>14</sup> Adec bédamboec tabadec chushcananenda. Adecbidi: —Bédamboen nanuna —cac chieshec tabadenda. <sup>15</sup> —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bédamboec tabad. Matses dadpenquio icsamboshë icnubi adequi bédamboec tabad. Adec bédamboec tabadquin icsambo icquido mimbi Esus bédamboen tantiametsiac paposhquiabimboecnuc. <sup>16</sup> Mimbi adoac utsin: —Esus tantiasho Nuquin Papan ëbi bédamboen isec. Nëbi bédambo yanec unësashini aibëd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidën padpidec chote ushën bédambo ictsiabi. —Ëmbi chuibanondaido Pidipos yacnocquido ambi Esus tantiamiaidobëd choeque. Is —quec bédambo ictsiabi. <sup>17</sup> —“Bédambo mibi iquec,” Nuquin Papan mabi canu —queshun Esus tantiaquin mimbi bédamboen nac. Utsibo nashunquin Esusën naid chieshtoengquio icquin mimbi chuibanac. Mimbi adoaid chuisho tantiashun: —Mibi unës uanu —caquini bédambo ictsiac. —Aido bédambo iquec —queshun mibi tantiec bédambo yec cuishonquetsiabi. <sup>18</sup> Ëbi unës uaid chuisho tantiash adecbidi bédambo icta. —Esus tantiec chieshtotiapimbo icsho Pabado unës uac —quiash bédambo icta.

*Pabadon Timoteyo chiaid*

<sup>19</sup> Con madobimboecquid ëbëd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bédambo ictsiabi. <sup>20</sup> Timoteyopadquid utsi nibëdec. Aid abentsëcshumbi ëmbi nacpadomboen mibi tantiaquiec. <sup>21</sup> Utsibombien aton nauidtsëqui tantiaquin Esuquidistun chiacpadomboen natiapimbo iquec. <sup>22</sup> —Timoteyon bédamboen naondash —quequin mimbi tantiec. Mimbi tantianubi ëbëdtan Esusën naid chuibanondash con mado icbobimboecquin. Aid bédambo iquec. <sup>23</sup> Adquid icsho mibi yacno: —Istan —catiadquido iquebi. Ëbi quënën nauedquido ëbi caic: —Unës uanu —quesho tantiabono. Tantiashun: —Ëbi quënën nauedquidon chiaid Pidipos yacnocquido chuitan, Timoteyo —catsiandambi. <sup>24</sup> Ëbitsen nëbi mibi yacno nidtiadquido iquebi. Ëbi caic Nuquin Icbo: —Ma nidnu —quenuc anobi nidtsiabi.

*Epapadodito chiaid*

<sup>25</sup> Epapadodito con buchibimboecquid mimbi: —Pabado nashuntan —cac Pidipos yacnuësh chonëdaid nëmbo iquec. Utsibon chieshënuubi dacuëdenquio icquin ëbëdtan Esusën naid chuibanondash. Adondaidi nëbi: —Mibi iccondacno tabadec nid, buchi —caombi. <sup>26</sup> Aid mibi

tantiec unēsquoio yec tsadposh. —Ēbi unēstsemboed con matses chuinuec Pidipos yacno nidaccosh —quiash mibi ismete bunquieci shubiantiadtsēcquoio tsadposh. Adsho isun: —Min shubuno nidec nid —caombi. <sup>27</sup> Adec unēstsenquiondash. Adshobien Nuquin Papan bēdamboen isquin bēdamepondash. Ēbitsen bēdambo icmenuen Nuquin Papan adopondash. Epapadodito unēsquoio icnuc ēbi shubiec tsadsho isash: —Aid unēsan unēsquoio icnuc Pabado mēyadnushe —queshun Nuquin Papan Epapadodito bēdamepondash. <sup>28</sup> Adoacsho mibi yacno aid badēdquoio nidmetiadquoio iquebi. Aidbēd iquec mibi bēdambo ictsiac. Mibi yacno nidsho isash ēbitsen bēdambo ictsiabi. <sup>29</sup> Epapadodito nidacsho bēdamboen ista cuishonquequin. —Nuquin Icbon mibi bēdamiac. Aid bēdambo iquec. Mibitsen bēdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bēdamboen ista. <sup>30</sup> Esuquidistun chiacpadomboen naic ēbēdi tabadec Epapadodito chondash. Chieshēmēnquido dadpen icnubi ēbi nashunec tabadec daicsabudash unēstsenondash. Chotiapimbo icquin mimbi: —Pabado nashunān —cac choash nibēdantsenondashe. Mibi yacno nidacsho bēdamboen ista.

### 3

#### *Esusuidtsēqui tantiasho Nuquin Papan bēdamboen isaid*

<sup>1</sup> Nuquin Icho Esus tantiec cuishonquenuna. Aduidequi icac bēdambo ictsiash. Tantia, con utsibo. —Tantienquoio yanushe —quequin ēmbi chiondaid dada uaquin padpiden mibi chuioanu. <sup>2</sup> Muaquidon chuisho tantienda. Aidon: —Shui dēbid dēteshun secaidoudi Nuquin Papan bēdamboen istsiash —quequin chuisho tantienda. Aden chiec icsa uanquidombo neque. Uimanēmēnquidoen nechitec. <sup>3</sup> —Shui dēbid dēteshun secaid nec —¿queshunda Nuquin Papan nuqui bēdamboen ispec? Padenquoio. Aidon Esus tantienuquoio icsho bēdamboen isenuquoio icquin aton Mado Esus tantiaquidoen Nuquin Papan bēdamboen isec. Aton Mayanēn tantiamiac: —Nuquin Icho Esuquidistu bēdamboshē iquec. Abided cuidadec unēsaid tantiasho Nuquin Papan nuqui bēdamboen isec. Ēmbembi naquin Nuquin Papa bēdamboen ismetiapimbo iquebi —quequin nuqui tantiec. <sup>4</sup> Matsesēn tsusedpan chiaiduidi tantiasho Nuquin Papan bēdamboen iste icnuc nadtsiabi. —Tsusedpan chiaid utisibon daēdpectsēc nanuc ēmbimbo naquin dadpenquoio nabanombi. Aden ēmbimbo dadpenquoio nasho Nuquin Papan ēbi bēdamboen isec. Adembidi isadaidbombo icsho ēbi bēdamboen isoaic —quetsiabi. Nēbi adtiapimbo iquebi. <sup>5</sup> Isadaidbo nebi. Isadaidbon chidon tishacsho sietetedec ushun Moisesēn chiampicpadomboen shui dēbid dēteshunenēdaidquoio nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidēn onqueten onquequid nebi. Moisesēn chiampid namequidquoio padiseyobo caid niondabi. <sup>6</sup> Adquid icquin icsambo icquido danquin Esus tantiaquido cuesun secatiadquoio iccondabi. Nuquin Papan chiacpadomboen natiadquoio iquequi adondabi. Moisesēn chiampiduidi nate bunquiondabi.

<sup>7</sup> Adquid icquin Esus tantiabi: —Ēmbimbo naic bēdamboshē iquebi —quequin icsamboen tantiapondambi. Adondaiddi Esus tantiabenash: —Ēmbimbo naiquini icsambo iccoc. <sup>8</sup> Nēbi con Icbombo Esuquidistu tantiec

bëdambo iquebi —quequin tantiabenondambi. Aiduidtsëqui tantiatiadquo icquin icsa secacimboen ëmbimbo naid ënondambi. <sup>9</sup> Esus tanti-ate bunqueibi. Adquid yec: —Moisesën chiampicpadomboen ëmbimbo naiquini bëdambo iquec —quetiapimbo yanashic nadondabi. —Nuquin Papanbien aton Mado Esuquidistu tantiasho bëdamboen isquin ëbi bëdamboen tabadmec —quequin tantiabenondambi. <sup>10</sup> Aden tantiabenshun Esusuidtsëqui comapenen tantiatiadquo iquebi. —Comapenen tantaquin Nuquin Papan uincuemiaid icquin Esusën bëdamboen tabadmetsiashi —quec Esus tanti-ate bunqueibi. —Nuquin Papan chiacpadomboenuidi nasho mëyanac Esus unësac caondash. Adembidi Nuquin Papan namiacpadomboen nasho mëyanac chieshtotiapimbo ictsiabi. <sup>11</sup> Unësambo icsho Esusën bëdamboen tabadmetsiashi. Unësacsho Nuquin Papan uincuemetsiashi —quec adec Esus tanti-ate bunqueibi.

*Nuquin Papan chiacpadomboenuidi nate bunaid*

<sup>12</sup> Tanta, con utsibo. Mibitedi chuinu. —Nuquin Papan chiaid niaquesambo nebi —¿quectabi ique? Padenquo. Adquo ictiadquidi adquo yenquieni icchitec. —Bëdamboshë icmenuen Esuquidistun yuapondashi —quequin tantiec bëdamboshë icte bunqueibi. <sup>13</sup> Adec bëdambo yanabi yec: —Ëmbi naboed naic bëdamboshë iquebi —quenquo icquin Esusquo tantaquin ambi chiacpadomboen natiadquo iquebi. <sup>14</sup> —Bednu —quequin bedteuidtsëqui tantiec titinquiabimboen Esusquo tantaquiec ambi chiacpadquiec bëdambo ictiadquo iquebi. —Adec tabadec unësacsho Nuquin Papan abi yacno ëbi tabadmec —quec bëdambo icte bunqueibi.

<sup>15</sup> Nuquin Papan chiacpadomboen natiadquo icquin ëmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquo icquin abentse-abentsen naindambi —quesho Nuquin Papan ambi tantiaid bëdamboen tantiametsiash. <sup>16</sup> Nëbi nuqui icbocpadquiec tantianquiec bëdamboec tabadnuna.

<sup>17</sup> Ëbi yacpadquiec bëdamboec tabadta. Ëmbi chiacpadomboen utsibon nasho isun adomboembidi bëdamboen nata. <sup>18</sup> Ëmbi chuideniondapadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided ciudadec cuesten dectamëdaid Esus tantaquid nebi —quetsëchoedi icsamboec tabadec. Adquido Esus tantaquidpenquo nec. <sup>19</sup> Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquo icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. <sup>20</sup> Padnuen Nuquin Papan bëdamboen isaido yec aibëd tabadtequido nuqui nec. Abi yacno buanec abucüesh Nuquin Icho Esuquidistu chosho isnuec nuqui tabadec. <sup>21</sup> Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquo nuqui iquendac. Abitedishun Icombo icquin ambi chiacpadomboen abitedi namequidquo icquin aden nuquin dada chuca uaindac.

## 4

*Esus tantiec cuishonquiaid*

<sup>1</sup> Ëmbi aden chuisho tantiash Nuquin Ibon chiaid niaquenquo yec bëdamboec tabadta. Mibi tantaquin mibi istiadquo iquebi. Mibi caic: —Ëmbi chuibanondaido Esus tantiabenash bëdambo ictiadquo iccondash

—quec bēdambo iquebique. Adquieci chieshtoenquo icquin Esus tantieci bēdamboeci tabadta.

<sup>2</sup> Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiaquido yec: —Ai, Nuquin Icho Esusēn tantiacpadomboembien natiad —quec tabadta. <sup>3</sup> Tantia, buchi. Ēbēdtan Esus chuibanondaic sho mibitsen chuinu. Aid chido daēd chuiquin: —Bēdamboeci isnanta —cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibontsen. Adquidotedi Nuquin Papan: —Esusbēdta ēbi tantiaquido mibi neque. Ēbēd tabadec cho —caindac.

<sup>4</sup> —Nuquin Icho Esus tantiaquieci cuishonquenuna —caimbi. Esus tantiaquieci cuishonquenuna. <sup>5</sup> —Ma utsibo: “Esus tantiaquido chieshēmēnenquo yec bēdambo iquec,” ma quenu —quiash bēdamboeci tabadnuna. Nēbi Nuquin Icho Esus choeque.

<sup>6</sup> Adecbidi chishpiquieci tabadenda. —¿Atotsimbi napeba? ¿Atotsimbi pepeba? ¿Nēbida con matses unēspeba? —quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. —Ēbi nashunquin utsibotsen nashunta, Papa. Aden nashuneci mibi bēdambo iquec, Papa —quequin Nuquin Papa chuinuna. <sup>7</sup> Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: —¿Mitsipadeci dacuēdenquo yampash? —quetsiash. Nuquitsen: —¿Mitsipadequini bēdambo yampo? —quetsiac. Adeci: —Nuquin Papan ēbi nashunquidquido nec —quequin Nuquin Papa chianequin Esus tantiaquieci nuqui dacuēdenquo yec bēdamboeci tabadtsiac.

*Bēdamboshē iquec, caiduidi tantiata, quiaid*

<sup>8</sup> Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Tsutsi bēdamboeci tabadquid icpec? Adquidtsen tantiata. Aden: —Bēdambo iquec —caidtedi tantiata. <sup>9</sup> Adembidi ēmbi chuisho mimbi tantiondac. Aden ēmbi chiondaic tantiaquin ēmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

*Pidipos yacnocquidon bēmiaid*

<sup>10</sup> Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoaid bēacsho bedombi. —Nuquin Ichon tantiacpadomboen padpiden Pidipos yacnocquidon ēbi ma menenequin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ēnden bēmetiadquidi tsundan bētiambo icnuc mibi nepanēdac. <sup>11</sup> —Con na nibēdeque. Beccho —¿quectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. <sup>12</sup> Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. <sup>13</sup> ¿Ēbenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomboen naimbi. <sup>14</sup> Adnuc: —“Mēyadeci,” quiosh —queshun mimbi ēbi ma menenequin bēmiaid bēdambo iquec.

<sup>15</sup> Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquo iccondashi. Adnubi tabamboen menequin mimbiuidtsēqui ēbi meniondac. Esus tantiabentsēcshun

mimbi adondac. <sup>16</sup> Adoaquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —qeshun mimbi piucquid bēmiaccondac. Yuectaneshun adem-bidi. Adshumbic padpiden. <sup>17</sup> —Mimbi bēmiaid bēdambo iqueque. Utsi beccho —¿quequindambi aden chuipe? Padenquio. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. <sup>18</sup> Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. <sup>19</sup> Abitedishunquio Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquio nec. ¿Ada mitsana nibēdnuc mēyadacimboec tabadpe? Adec mēyadsho isun Nuquin Papan mitsana icmendac. Unēsquio icsho aidēmbi mibi bēdambo icmendac. Adecbidi: —Chieshtotiadquio icchitebi —qesho Nuquin Papan nac mibi chieshtoenquio iquendac. —Aid nibēdnuc unēsebi —mimbi caid Nuquin Papan icmendac. <sup>20</sup> Ēbi adsho tantiashun: —Bēdamboshē mibi iquec, Papa —quequin Nuquin Papa chuinuna ēnenquio icquin.

*Pabadon ēnquimbi chiaid*

<sup>21</sup> Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. <sup>22</sup> Adembidi nēmbō Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec. <sup>23</sup> Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

## CODOSAS YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun ëbi chuiheneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. <sup>2</sup> Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

### *Nuquin Papa chuidoniaid*

<sup>3-4</sup> Nuquin Papa, Nuquin Icho Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. <sup>5</sup> Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuihanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. <sup>6</sup> Ëbi icsaid cuidtiadtsëcquio Nuquin Papa icnubi utsibon Esuquidistu chuihanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquec tabadquidon Esuquidistu tantiashun adomboembidi ismebanoaic. <sup>7</sup> Epapadasën Esuquidistu chuihanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. <sup>8</sup> Adquid yec mibi yacno nidshun chuihanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioishi.

<sup>9</sup> Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantieme, Papa, quequin chian-chianembi. <sup>10</sup> Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuc bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantidonequido yanendac, Papa. <sup>11</sup> Adembidi mimbi dayacquio icmenu caid Codosas yacnocquido iquec natiatequid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa.

<sup>12</sup> Mimbi bēdamboquid icmebanac icsaquid nibēdacno mibi tantiaquid utsibobēd mibēdi tabadendabi, Papa, quequin tantiec, Bēdambo iquebi, quec ma Codosas yacnocquido mibi chiec onquepanuna, Papa.

<sup>13</sup> Ēnden adquidpenquo yec Satanasēn yuaido yec, Nuquin Papa tantianu, quesu nuqui iccondac. Aidēn yuaido icsho Nuquin Papan nuqui mēnchicpondash. Aden nuqui mēnchicquin abi cudasaidquo aton Madombo Esuquidistu icsaisapadquid nuqui icmenuequin aidi Nuquin Papan nuqui tantiampondash. <sup>14</sup> Abipadquid icmenuec matses icsaid bedshunash abided ciudadec unēspaneḍdash. Adoacsho Esuquidistu tantiaquid icsho cuidenquo yec mibi icsaid bēpiscudendabi, quequin Nuquin Papan tantiampicpadquiequi bēpiscudendac.

*Abia yampidquo iquec abitedishun icbombo Esuquidistu nec quiaid*

<sup>15</sup> Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabēdtsēqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. <sup>16</sup> Nidaid abubēdtabi uashun aidēnquiocquidtedi uanu quequin ambi uaido nec. Matsesēn isaidtedi matsesēn isacmaidtedibēd Esuquidistun uampidquo nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. <sup>17</sup> Esuquidistu abia yampidquo iquec. Aidēmbi, Ēmbi uabanaido namebanu, quequin ambi chiacpadomboen namebanec. <sup>18</sup> Nidaid utsi-utsiec yacnocquido abi tantiec iccuededquidtedi chuiquidquo Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unēspaneḍdash. Adsho Nuquin Papan abia uincuemeshun abi tantiaquidtedi chuiquid abentsēcquiobi abipadquid icmepaneḍdash. <sup>19</sup> Utsi abipadquid ictiapimbo iquec. Aidēn nabanacpaden natiapimbo utsi iquec. Ēbipadquidquo con mado nec, quiash, Bēdambo iquebi, quec Nuquin Papa tsadec. <sup>20</sup> Aton Papapadquid icquin aton Papan tantiapadomboen tantiaquid Esuquidistu nec. Adquid yec matses icsaid bedshunash ēbided ciudadec unēspebi, abi quiampicpaden matsesēn cuesten dectanac unēspaneḍdash. Adoacsho isun ambi bēdamboen istiapimbochoedi Esuquidistu tantiaquid yansho isun aidtedi Nuquin Papan bēdamboen isec.

<sup>21</sup> Ēnden Nuquin Papan matsespenquo mibitedi iccondac. Icsamboen tantiec icsaquid yec Nuquin Papa chieshēnquido mibitedi iccondac. <sup>22</sup> Adquid icboedi, Ēbi yacno yuednu queshun Esuquidistu tantiaquidotedi cuidenquo yec abi icsaid bēpiscudquin Esuquidistu icsaisapadquiocnoc aido isembi, quec Nuquin Papa tsadec. <sup>23</sup> Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ēnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

*Esuquidistu tantiadoneta, quequin Pabadon chuibanaid*

<sup>24</sup> Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampaneḍdash. Adomboembidi Esuquidistu chuibansho mēyamposhi. Adoaqui, Cuishon, quebi. Ēnden abi tantiaquid yanacsho isun, Ēbi



chuiheneta, quequin chuishumbic, Ĕbi chuibansho mibi mëyante dadpen iquendac, quequin Esuquidistun chuioapondashi. Aden aidën chiondacadpen mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc. <sup>25</sup> Ai, Nuquin Papan, Esuquidistu ambi naidbëdta chuibeneta, caidquio nebi. Abi chuiquidquio nebi. <sup>26</sup> Nuquin Papan ambi tantiampicpaden chienquiochoed nëbi aid tantiamiac Esuquidistu tantiaquido yanec. <sup>27</sup> Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

<sup>28</sup> Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun. <sup>29</sup> Badiadquidën badiadquidënquien aton Mayanën nadatiambocquien nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

## 2

<sup>1</sup> Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. <sup>2-3</sup> Esuquidistu tantiadonequido ma yampanueshun dayacquiocquin chuibenec nebi. Abentsëc yacbimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bëdamboen tantiapanuna. Adembidi, abimbo chiacbimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. <sup>4</sup> Comapenen tantiaquid icquin, Utsi tantia, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. <sup>5</sup> Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

*Esuquidistu tantiaquid iquec utsin chiacpaden naic abuc nidendabi, quequin tantienda.*

<sup>6</sup> Adecbidi Esuquidistu tantiaquid yec abëd icquido iquec, Aidi con Icho nec, quec ambi chiacpadquiec tabadteneta. <sup>7</sup> Adec tabadquin cuëte tapun uquëducquiocquidën cuëte uidënash canidoacbimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin baded-badedquien Esuquidistu chuidoneta. <sup>8</sup> Adembidi aid tantiadonequid icquin aid tantiesan ëndenquio ambembi chiec onquiampicpaden nëbi icquidën

adomboembidi chuisho Nuquin Papan chiacpadomboen chiesa nec, quequin tantiaquiota.

<sup>9</sup> Matsesash Nuquin Papapadquidquiobidi Esuquidistu icpanëdash. <sup>10</sup> Esuquidistubëd icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibëd icquid Esuquidistu nec. <sup>11</sup> Aidën, Èbëd icquid nec, quequin mimbi tantiaid icsa cuête cuidi pateshuniacimboen mibi èmebanec. Chështen tiacimboen nainquiocquin bëdamboen tantiamequin aton Mayanën mibi icsaid èmendac. <sup>12</sup> Adembidi Esuquidistu unësacsho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuemënëdacimboecnuc icsaisa icmenu, quequin acten mentotanquin mibitedi cadobampondash.

<sup>13</sup> Ènden Nuquin Papan matsespenquio icquin mimbi tantiaid icsa icnuc unësacimboec icquin Nuquin Papan ènden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobëd icquido nec, quec Nuquin Papa nuqui icsaidtedi bëpiscudac. <sup>14</sup> Ènden, Matses icsaid bëpiscudnu, quenquiocquin, èmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanëdash. Adquid icshobi icsaquidbimboecnuc matsesën unës uaquin cuesten dectanac matses icsaidtedi bedshunash abibi cuidadec unësapanëdash. Aid unëso isun, Matses icsaid cuidosh, quequin abi tantiaquidquio icsaid ambi naden nata quequin dada uamiaid ucacimboen tantiec bëpiscudtenec Nuquin Papa. <sup>15</sup> Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unësash uincuenquin Nuquin Papan chiaid niacquido mayan icsabo dëniacquec Esuquidistu abitedi chuiquid yampanëdash. Aden dëniacshun, Nèidtedi èbi tantiaquido chuiquid ictiapimbo iquec, quequin bedshun mëtaneshun buanacimboen Nuquin Papa Esuquidistun ismepanëdash.

<sup>16</sup> Aden chuiquid utsitedi dëniacquid Esuquidistu nec, quequin tantiash, Nadquid peshun nadquid utsi acsho Nuquin Papan èbi bëdamboen isec, quenda. Adembidi, Nèid ushëmbi abi tantiec iccuededsho isun Nuquin Papan èbi bëdamboen isec, quenda. Adembidi, ushë chuca choaid usudsho isec cuëdësho Nuquin Papan èbi bëdamboen isendac, quequin tantienda. Esuquidistuidi tantiaquidquio icsho Nuquin Papan èbi bëdamboen isec, quequin tantiata. <sup>17</sup> Matses icsaquid yec ambi naidënquio abembi bëdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Èmbi bëdamboen isaidquio matses bëdambo icmequid choendac, quequin tantiaquin ambi naden nata quequin chiaidba Moises menepampic. <sup>18</sup> Esuquidistun bëdambo icmiaid nebi, queshun utsi icsamboen chiec onquesho tantienda. Ambibi chiec onquesho tantiashun Esuquidistu tantesa uaindac. Adquidbëd Esuquidistu ictiapimbo iquendac. Adquidën, Mibi chuiquidpenquio nebi, queshumbic ambia tantiaquidbimboecquin ambi tantiaid Nuquin Papan uaid mayan bëda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tantiã, quequin ambembi chiec onquesho tantienda. <sup>19</sup> Adquidën Esuquidistu abi tantiaquidon icbombo nec, quequin tantienquio iquec.

Adecbidi Nuquin Papan tantiacpadquiec Esuquidistu tantiaquid dadpen yanash aton utsibobëd tantiananec nashunanec aton icbopadquid yanec, quequin tantiesa adquid nendac.

<sup>20</sup> Tantianu. Ĕbi chui. ĤAtotsi quiash Esuquidistu tantiaquid yanash ěbi icsaid cuidnuec Esuquidistuded unĕsash uincuenacimboec bĕdamboec tabadebi, qeshumbic, <sup>21</sup> Nĕid bedtemaid nec. Aid bedsho mayanĕn mibi cuidendac, quequin utsi chuisho mimbi tantiape? Adembidi Ĥatotsieshun mimbi tantiaid icsa unĕsacsho chococabi yachimboen, Nĕid petemaid nec. Aid pesho mibi cuidendac, qesho mimbi tantiape? Aden Esuquidistu tantienquo icquidĕmbimboen, Nĕid mishtemaid nec. Aid misho mibi cuidendac, qesho mimbi tantiapēc. <sup>22</sup> Nadquid petemaid nec. Nadquid mishtemaid nec, quequin matsesĕn ambibi chuiquin tantiamete nec. Ambi petemaidbĕdi ambi mishtemaid ĕnĕdendac. <sup>23</sup> Matsesĕn bĕdamboen tantiacimboen chiaid aidtedi nec. Nĕid ĕmbi tantiaid nec, qeshun aid bĕdamboen ismenuen naden nanuna, quequin matsesĕn chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuequin comapen adquidĕn chuibanec. Adecbidi, Damĕyamĕdsho ĕmbi tantiaidĕn ěbi bĕdamboen istsiash, quequin ambibi tantiash damĕyamĕdec. Adec damĕyamĕ-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

### 3

#### *Bĕdamboec tabadaid chiaid*

<sup>1</sup> Esuquidistu tantiaquid yec abia uincuemenĕdac abuc nidash Nuquin Papa yacno icsate bunquid nibĕdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bĕdambo iquec, quequin abĕd icte bunquin Esuquidistu tantiadonec tabadta. <sup>2</sup> Abuc abĕdi ěbi icnuc aton na con na iquendac, quequin tantiaquin nidaidĕnshun bednu, quequinuidi tantienda. <sup>3</sup> Esuquidistu unĕsaid tantiaquin aidbĕdtabi mibi icsaid chococashunacimboec icsatiapimbo yec nidaidĕn tabadta. Adecbidi Esuquidistu uincuenash abuc Nuquin Papa yacno nidash, Ĕbi tantiaquidtedi bĕdaidquo iquec. Aido ěbi cudasaidquo nec, quequin aidĕn dayun uaid nuqui nec. <sup>4</sup> Aidĕn padpidec choshon abi yacno buanac abipadquidquo bĕdaidquo nuqui iquendac.

<sup>5</sup> Adec abi yacnoĕsh abĕdi bĕdaidquo iquendabi, quequin mibi icsaidtedi cuesun secacimboen ĕmbanta. Ĕmbi inacmaid chudnu, quenquiocquin ĕnta dadan. Adembidi, Ĕbi inesa chudmenu, quenquiocquin ĕnta chidon. Adembidi, Chudnu, quequinuidi tantiaid ĕnta dadan. Adembidi, Chudmenu, quequinuidi tantiaid ĕnta chidon. Adembidi mibi bunaid icsatedi ĕnta. Adembidi aton na daĕdpactsĕc icquidĕmba ma bednu, quenquiocquin, Ĕmbia bednu, quequin tantiaid ĕnta. Aden ĕnshun, aton na daĕdpactsĕc icquidĕmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesĕn ambibi nacnenaid tantiacimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. <sup>6</sup> Abi bunaid icsabĕdta ambi tantiaid icsa ĕnesa icsho matsesĕn naid chuibante ushĕ choan adquidtedi Nuquin Papan comapen cuidendac. <sup>7</sup> Adquid ichoedi <sup>8</sup> nĕbi adenquiocquin ĕnash bĕdamboec

tabadteneta. Adecbidi comapenec nëishboedi adenda. Adecbidi, cuesantiaquido yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. <sup>9</sup> Adecbidi, mua uanamboedi ënëdta. Adquid icboedëmbi icsactsëcquid niacimboen mibi icsaid ënta. <sup>10</sup> Min tantiate chuca uacimboec-nuc abi tantiadonequidquio icnuequin mibi tantiamequid tantiadeditadeta. <sup>11</sup> Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembo nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

<sup>12</sup> Aden Nuquin Papan cuënaido yec ambi bëdambocquid icmebanaidobi abi cudasaido yec ambi tantiamiaid nebi, quiash bëdambocquid isadacimboec nadeç tabadteneta. Utsibo natiamiaid icsho isun bëdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bëdamboen chuiban. Tantesa uasho isun ismeded-ismededta. <sup>13</sup> Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquio yec bëpiscudta. Nuquin Papa ëbi icsaid cuidenquio yec bëpiscudosh, quec adta. <sup>14</sup> Adec tabadtenec tantiananta. Adec tantiananec Esuquidistubëd abentsëc yacimboec icsaisa mibitedi yanendac.

<sup>15</sup> Adec Esuquidistubëd abentsëc yacimboecnuc icmiaid nebi, quequin tantiec bëdamboec tabadtenenu, quec mibitedi tabadteneta. Adec tabadtenequin, Mibi bëdambo iquec, Papa, quequin chuideneta. <sup>16</sup> Nuquin Papan Esuquidistu tantiadonemiaido icta. Adquido yec abi tantiaquid utsibobëd Esuquidistu chuinanec, Bëdamboec tabadta, quec adquiecbidi tabadec ismenanta. Aden naic chuiquid dapa Dabidën dada uampid sadmo caidbëdta cuëdënte utsi Nuquin Papan mibi bëdambo icmiaidbëdtabi ambi naid utsi chiec cuëdëncuededta. <sup>17</sup> Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bëdambo iquebi, Papa, quequin Nuquin Papa chuideneta.

#### *Aton shubun icquidbëd tabadaid*

<sup>18</sup> Bëdamboec tabadnu, queshun nadota. Chidon min bënëen chiacpadomboen nabanta. Esuquidistu tantiaquid icquin adobanta.

<sup>19</sup> Chido inquidën, Con bënëbëd tabadec bëdambo iquebi, camenuen yuacimboecquin aid chuiquin min chido namenda. Mibibi tantiaquiduidi min chido namenda.

<sup>20</sup> Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

<sup>21</sup> Anibëdtan min bacuëbo namenuc comapenen cuëdquin chiesh-menda.

<sup>22</sup> Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icho, Esuquidistu tantiaquid nebi, qeshun adobanta. <sup>23</sup> Con Icho Esuquidistu nashunu, quiacbimboen mibi yuaquidën chiacpadomboen chieshenquiocquin bëdamboen nabanta. <sup>24</sup> Con Icho Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidënshun abi nashunquid mibi neque. Adobanta. <sup>25</sup> Min icbon chiacpadomboen nata. Abi chieshënuqid icbon cuidendac. Adem bidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshënuqid menenquiocquin comapenen cuidendac. Adenuidi tantiaquin cuidendac.

## 4

<sup>1</sup> Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

### *Chuibanaid utsi*

<sup>2</sup> Esuquidistu tantiaquid utsibo natiatequidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. <sup>3</sup> Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. <sup>4</sup> Pabado utsin onqueten onqesho cuembo chuime, Papa, ma aidontsen tantiapanu, quequin Nuquin Papa chuideneta. <sup>5</sup> Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta. <sup>6</sup> ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacbimboecnuc Esuquidistu mimbi tantiaid utsibo chuita ma aidon tantiapanu qeshun.

### *Abëd icquid chuibanaid*

<sup>7</sup> Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquio icsho ëmbi con utsi caid nec. Aidi Nuquin Icho nashunquid neoaic. <sup>8</sup> Èbëd icquid utsibo naic tabadaid mibitedi tantiamenuequin aidi mibi yacno nidmimbi. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquiochoedi cuishon queta. <sup>9</sup> Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

<sup>10</sup> Nëbi mibi yacno nidesa chuinu. Tantiata. Adistadico ëbëd icnuec abembi quënën nauedadondaaid nec. Aidëmbi, Codosas yacnocquido

tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. <sup>11</sup> Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbëdtambi Esuquidistu chuibanquin ëbi bëdambo icmequido neoaic. <sup>12</sup> Epapadas mibi yacnoshon tishaid Esuquidistu chuibanquidquo nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuequid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidënquiec Nuquin Papa chiec onquec Epapadas. <sup>13</sup> Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quiash mibitedi chiec onquedenec. <sup>14</sup> Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

<sup>15</sup> Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. <sup>16</sup> Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid isec onquequin mibëd iccuededquido tantiaméoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqueshun mibëd iccuededquido tantiaméoata.

<sup>17</sup> Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

<sup>18</sup> Mibitedi tantiaquin ëmbibi nëid dada uaombique. Èbi tantiec nidtiapimbo yec Pabado quënën tsadeque. Aid puduemetata, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aidtedi dada uaombi.

## TESADONICA YACNOCQUIDON ISTE 1

### *Pabadon tauamboen chiaid*

<sup>1</sup> Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icho Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

### *Tesadonica yacnocquidon Esus tantiaid*

<sup>2</sup> Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. <sup>3</sup> “Aidon Esus tantiaquin ambi chiapadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. <sup>4</sup> Con utsibobimboecquido mibi neque. Tanta. Mibitedi chuinu. Mibi tantiaquin ambi tantiapadomboen Nuquin Papan mibi Esus tantiamenēdash naden. <sup>5</sup> Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiapadomboen: —Abimbo caic —qeshun mimbi Esus tantiabenondac. Adembidi Esus tantiamenuec Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. <sup>6</sup> Aden Nuquin Papan Esus tantiamiaido yec ēbi Nuquin Icho yappadec chieshtoenquo icsho isash mibitsen chieshtoenquo iccondac. Ěmbi Nuquin Papan chiaid chuibanac Nuquin Papan Mayanēn namiapadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. <sup>7</sup> Adec mibi bēdamboec tabadaid chuisho tantiash min nidaidēn icquido Masedonia yacnocquido Esus tantiaquido mibi yapadquiec tabadtiadquo icpac caosh. Adembidi tantiash nēid nidaid Acaya caid yacno tabadquidotsen adtiadquo icpac caosh. <sup>8</sup> ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aid mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nēmbo icquido mimbi naid chienquo iccombi. <sup>9</sup> Mimbi naid naden chuisho tantiombi. —Pabado chedon Esus chuibansho tantiash: “Nuquin Papapadquid utsi nibēdec,” qeshun Nuquin Papabēdta Esus tantiabenac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiapadomboen natiadquo yanac caosh —quequin chioshi. <sup>10</sup> Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ěbi cuidmenquo icnuec abided cuidadec unēsascho Nuquin Papan uincuemiaid Esus choec,” qeshun aid istiadquo iquec —quequin mimbi naid chioshi.

## 2

*Pabadon bēdamboen chuibanondaid*

<sup>1</sup> Mibi yacnoshon tauamboen ěmbi chuibanac Esus tantiaquid yanshun mimbisen utsibo Esus chuibanondac. <sup>2</sup> Shubu dadpen icquid Pidipos caid yacnoshon quĕnĕn nauedac ěbi mĕyadec tsadboedi puduemeshun nidmiac mibi yacno nidshun Esusĕn naid mibi chuibanondambi. Utsibo dadpenshun chieshĕnubi Nuquin Papan namiacpadomboen cuesambo icquin mibi Esus chuibanondambi. <sup>3</sup> ĴĔmbi naidquio namenuendambi adodionda? Padenquio. ĴĔbi tantiamenuendambi chuibandionda? Mambi padenquio iccondac. ĴAmbembi chiaidtambi mibi chuibandionda? <sup>4</sup> Mambi mibi abimbo chuibampondac. Matsesĕn naidtedi tantiaquidĕnquio Nuquin Papan: —Aidĕn abimbo chuibantsiashe. Con Mado Ĕsusĕn naid chuibenequid icmenu —caidquio nebi. Adquid yec matses: —Mibi bēdambo iquec —cameteuidi bunenquio iquebi. Nuquin Papa: —Mibi bēdambo iquec —camenuembimbi ambi chiacpadomboen naic. <sup>5</sup> Ĕmbi tantiacpadomboen mibi namenuc: —Mibi bēdambo iquec —quenquio iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. <sup>6</sup> Ĵ—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusĕn naid tantiamenuembimbi bēdamboen chuibanondac.

<sup>7</sup> —Ĕbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin Ĵancabudquindambi mibi chuibandionda? Mambi padenquio iccondac. Anin bacuĕ nĕishmenquio icquin bēdamboen namiacbimboembimbi nĕishmenquio icquin mibi chuibanondac. <sup>8</sup> Mibi tantiaquioquin chieshtoenquio icquin Esusĕn naid chuibanec yuec mibĕd tabadondabi. Aden naic tabadec bēdambo iccondabi. <sup>9</sup> ĴAda tantie, con utsibo? Aden Esusĕn naid chuibanquin nidaidĕn capuquid yua bitsibi tuscaquin shubumpi nacnendeniondambi. Mibi caic: —Ĕbi menianiac aton piucquid naimĕdnushe —quiash con piucquid bednuec chonoadteniondabi. Mimbi isnubi adondabi.

<sup>10</sup> Mibĕd yec Nuquin Papan chiaid niaquenquio yec bēdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanĕdashi. <sup>11</sup> Amĕn aton mado: —Naden na —quequin nĕishmenquio icquin chiacbimboen mibi abentseabentsen bēdamboen chuibanquin <sup>12</sup> mibi bēdambo icmepondambi. —Nuquin Papan: “Icsatiapimbo icquid icmequin ěbĕdi tabadmendambi,” quequin Esus tantiamiaido mibi nec. Adquid Nuquin Papan chiacpadec bēdamboec tabadquid neque. Ambi chiaid niaquenquio yec bēdamboec tabadnuna —mibitedi cadeniondambi.

<sup>13</sup> Aden Nuquin Papan chiaidquio chuibanac: —ĴAmbembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantiash Esus tantiaquido yanash aidquibidi chuisho tantiash mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabadmequid yec mibi bēdamboshĕ iquec, Papa —quequin Nuquin Papa chianembi. <sup>14</sup> Nidaid Udeya caid yacnocquido yacpadquiec chieshtoenquio icquin mimbi Esus tantiec. Udeya



yacnoshon Esus tantiaquido aton matses isadaidbon cuestiadquio icquin chieshēnac chieshtoenquio iccondash. Adomboebidi aid matses mibi yacno tabadquin chieshēnac mibi chieshtoenquio iccondac. <sup>15</sup> Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unēs uapac caondash. Adomboebidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin <sup>16</sup> isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bēdamboen isquin mibi cuidenquio iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquio icquin niac-niacsho Nuquin Papan aido cuidquendac.

### *Pabado istante bunaid*

<sup>17</sup> ¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquio icnuc mibi instantiadquio iccondabi. <sup>18</sup> Adec: —Padpiden istanu —quesho Satanasēn nac padenquio iccondabi. Padpidec: —Nidnu —quesho adembidi. Padpidec: —Nidnu —quesho Satanasēn nachbidi padenquio iccondabi. Nēbi adecbidi mibi instantiadquio iquebi. <sup>19</sup> Nuquin Icho Esuquidistu choan aibbēd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabonndaido neque —capatsia? Mibibimbi caic. <sup>20</sup> —Esus tantiec bēdamboec tabadosh —quesho tantiasho mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ëbi tantiabonndash —ëbi caindac Nuquin Icbon.

## 3

### *Istan, quequin Timoteyo chiaid*

<sup>1</sup> Aden mibi tantiec: —“¿Mitsipadec tabadpec?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbēd icquid utsi Sidbano chuiquin: —Timoteyo nidan nuquuidtsēqui icnuna —caondambi. <sup>2</sup> Ëmbi: —Nid —caondaaid Timoteyo Esus tantiaquid yec nuquin utsi nec. Ëbēdtan Esus chuibenequidquio nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquio yec nadquiec tabadquid nendac,” quequin bēdamboec tabadquin ismetan, Timoteyo. <sup>3</sup> Aton matsesēn comapenen chieshēnac chieshtoshon Esus tantienquio yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. <sup>4</sup> Aden mibēd icquin chuideniondambi. Adsho ëmbi chiacpadomboen nuqui chieshēnondash. <sup>5</sup> —“Ëbi nidan chieshēnac ¿adecbidida Tesadonica yacnocquido chieshtoenquio icpatsishba?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquio yanushe. Istan. ¿Ada ëmbi Esus chuibanondaaido bēdamboec tabadeque? —caondambi Timoteyo chuiquin.

### *Timoteyon chuituidaaid*

<sup>6</sup> Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. <sup>7</sup> Timoteyon chuiboed tantiash bēdambo yanobi. Nēmbo icquidon chieshēnac shubiantiadtsēcquo iccobi. Adboedi mibi caic: —Chieshtoenquo icquin Esus tantiosh —quesho tantiash bēdambo yanobi. <sup>8</sup> Mimbi aden naid tantiash dayacquio yac bimboec iquebi. <sup>9</sup> Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. <sup>10</sup> Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

<sup>11</sup> —Nuquin Icho Esusbēdtan Nuquin Papan nēbimbobi ambo nidmepashuni —caimbi. <sup>12</sup> Adec mibēd ictiadquo icquin Nuquin Papa mibi chianembi. —Ēmbi aido tantiaquiacpadomboen utsibobēd tantianameta, Papa. Bēdiactsēc tantianantsēchoedobi comapenec tantianamequiota, Papa. Adembidi utsibotsen bēdamboen ismeta. <sup>13</sup> Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

## 4

### *Chidobēd bēdamboec tabadte chiaid*

<sup>1</sup> Tanta, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacadquiec tabadta. Nuquin Icho Esus tantiaquiec adta. —Bēdamboec tabadosh —quesho tantiashun: —Adquiequi tabadta —caimbi mibi. <sup>2</sup> Nuquin Icho Esusēn namiac aidēn chiaidquo mibi chuibanondambique. Aid tantiaquiec bēdamboec tabadta. <sup>3</sup> Nuquin Papan tantiamiacpadquiec tabadquidēn nadoquid yendac. Utsin chido chudenquo icquin aton chidouidtsēqui chudquid yendac. Adembidi chidon dada utsi chudmenquo icquin aton bēnēuidtsēqui chudmequid yendac. <sup>4</sup> Adec Nuquin Papan chiaid niaquenquo yec abi bunaid mēmunc dada ambi inaidquo aton chidouidtsēqui chudec aidbēd bēdamboec tabadsho: —Bēdambo iquec —catsiash Nuquin Papan. <sup>5</sup> Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bēnēpenquo chudmendac. Adec tabadenda. <sup>6</sup> Bēnē nidan aton chido abentsēqui uequid istuidshun chudenda. Adoquid Nuquin Papan cuidendac ěmbi chiondacadomboen. <sup>7</sup> —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquo. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. <sup>8</sup> Aden chuiquin aton Mayan nuqui menequidēn Nuquin

Papan chiaid chiec nebi. Aden ěmbi chuiboed niacquin Nuquin Papan chiaidquio mimbi niactsiac.

*Adecbidi tantiananquiota, quequin chiaid*

<sup>9</sup>—Bĕdamboec tantiananta —quequin padpiden chienquio iquemi. Nuquin Papan tantiamiac Esus tantiaquido yec mibi tantiananec. <sup>10</sup>Min nidaid Masedonia caidĕn tabadquido Esus tantiaquido utsibotedi mimbi tantiec. Mibi yacpadquiecbidi tantiananquioquin utsibotsen tantiaquiota. <sup>11</sup>Ĕmbi chiondacadquieci chieshĕmĕnenquio yec bĕdamboec tabadta. Utsi icsaiduidi chienquio yec bĕdamboec tabad. Chieshenquio yec dayacquio yec chonoada. <sup>12</sup>Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bĕdamboec tabadec —quetsiash.

*Esusĕn abi yacno abi tantiaquido buante chiaid*

<sup>13</sup>Tantia, con utsibo. —“Esusĕn abi tantiaquido uincuemendac,” quequin chuisho mimbi tantiabi icnushe —qeshun mibi bĕdamboen chuinu. Esus tantiesabo: —Ĕmbi tantiaidquio padpidec isadenquio iquec —quec yuecquio shubiabimboec shubienda. —Ĕbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusĕn uincuemete mibi chuinu. <sup>14</sup>—Unĕs uaqui Esus uincuenacpadecbidi nuquitsen uincuenendac. Esus tantiaquido unĕsacsho uincuemeshun Nuquin Papan abi yacno aton Mado Esus buamendac —quequin nuqui tantiec. <sup>15</sup>Tantia. Nuquin Icho Esusĕn chiaidquio mibi chuinu. Nuquin Icho Esus nidaidĕn padpidec chonoc aid istuidec Esus tantiaquido unĕsabi icquido abia nidenquio iquendac. <sup>16</sup>Padenquio icnubien Nuquin Papa yacnuĕsh choec Nuquin Icho Esusba nua cuĕdtuidendac. Adnubien Nuquin Papan abi yacnoshon uaido mayan bĕdabo chuiquid dapatsen nua cuĕdtuidoaindac. Adnubien Nuquin Papan chiapadomboen utsin nua shoncatuidendac. Adnubien Esusĕn abi tantiaquido unĕsaidotedi abia aton dada chuca uaquin uincuemendac. <sup>17</sup>Adoquien aidobĕdi Esus tantiaquido unĕsabi icquido tsidadash aidotedi abuctoendac Nuquin Papabĕd tabadec nidec. Abitedi abuctoquimbi abi bĕquedec Esus chosho istuidendac. Adash Esusbĕd Nuquin Papa yacno nidash anobi nuqui quenendac. <sup>18</sup>Ĕbi adsho tantiashun nadota. Aton matses unĕsaid tantiec shubiquido bĕdambo icmenuen ěmbi chuiboed chuita.

## 5

*Esus chote chiaid*

<sup>1</sup>Tantia, con utsibo. Mibi chuinu. —Nĕidtedec ushash Esus padpidec choec —quequin chuitiapimbo iquebi. Adembidi: —Nĕidted seta matamiash choec —quequin dada uatiapimbo iquebi. Tantienuio iquemi. Naden mibi chiondambi. <sup>2</sup>—“Nĕid inchĕshĕmbi ampequid choec,” quequin tantiatiapimbo yacnimboec: “Aid ushĕn Nuquin Icho choec,” quequin tantiatiapimbo icnuc Esus choaindac —quequin mibi chiondambi. <sup>3</sup>Esus tantienuio yequi matses dadpen: —Cuesnanenquio yec nuqui bĕdamboec tabadec —qeshobien ambi: —Ĕbi cuidendac —cacmaidĕnquio padpidec choshon cuidquindac. ¿Mitsipadquio chido

bacuë usunquid icpec? —Aid ushënquio tishembi —quequin tanti-  
 atiapimbo yequi badedquio nëncuenec. Adecbidi ambi: —Choec —  
 cacmaid Esus badedquio chosho abi tantiesabon cuenëntiapimbo iquen-  
 dac. <sup>4</sup> ¿Esus chonoda nuqui dacuëdpe? ¿Esus tantiesaboda nuqui nedi?  
 Esus tantiaquidoen nuqui nec. Adquid yec: —Nëbien Esus chochitec  
 —quec bëdamboec nuqui tabadnubi Esus chonoc nuqui dacuëdenquio  
 iquendac. <sup>5</sup> ¿Pacuënëdacimboecquidoda nuqui nedi? Padenquio. Pabiate  
 paposhquiacimboecnuc Esus bëdamboen tantiamiaido yec bëdamboec  
 tabadquido ma nuqui neyoc. Adecbidi bëdamboec tabadnuna. <sup>6</sup> Ushquin  
 pabiaten tantienquio yacimboen utsibon Nuquin Icbo Esus tantien-  
 quio iquec. Adec tabadenquio icnuna. —Esus tantienquio icmane  
 —qeshun nuqui icsate bunaid nainquio icquin mëmununa. Nuquin  
 Icbo chosho istiadquio yec bëdamboec tabadnuna. <sup>7</sup> Esus tantiesaboen  
 inchëshën ushquin tantienquio yacimboec iquec. Adquiecbidi tanti-  
 adenuen acte paëmbo icquid acquido nec. <sup>8</sup> Adquidpenquio yec Esus  
 tantiaquido yec bëdamboec tabadnuna. Nuqui icsate bunaid nainquio  
 icquin mëmununa. Sondado: —Shocosh tsasimbo icquid shictonquenu.  
 Sicsenushe —quiacimboec icnuna. Satanasën Esus tantiamenquio  
 icnushe. Esus tantiaquioquin matsesetsen tantiaquionona. Adecbidi  
 sondado: —Masenushe. Shocosh tsasimbo icquid mauete mauenu —  
 quiacimboecbidi icnuna. Satanasën icsamboen tantiamequin chiesh-  
 tomenushe. —Esus tantiasho cuidenquio icquin Nuquin Papan abi  
 yacno ëbi tabadmendac —quequin bëdamboen tantianuna. <sup>9</sup> ¿Cuidnuenda  
 Nuquin Papan nuqui Esus tantiamediac? Padenquio. Abëdi tabad-  
 menuen Nuquin Icbo Esuquidistu nuqui tantiamiac. <sup>10</sup> Aidi abi tan-  
 tiaquid cuidmenquio icnuec abided cuidadec unësac caondash. Aidën  
 padpidec choshon abi tantiaquidotedi buanshun abëdi tabadmendac.  
 Unësaid uincuemiaidobëdta unësabi icquidotedi adoendac. <sup>11</sup> Èbi adsho  
 tantiashun mimbi nabocpadomboembidi Esus tantiec bëdambo icnuec  
 ëmbi chuiboed chuinanquiota. Adecbidi bëdamboec tabadec: —Adequi  
 tabadnuna —cananta.

*Bëdamboec tabadte Pabodon chiaid*

<sup>12</sup> Esus mibi chuibanquido bëdamboen ista. —Nuquin Icbon chiac-  
 padomboen chieshtoenquio icquin nuqui chuiquidën nuqui bëdamboen  
 chuibanec —quequin aido bëdamboen tantiata. Mibi nashunquidombo  
 neque. Aidon: —Nuquin Papan chiaid niaquenquio yec bëdamboec  
 tabadnuna —quequin chuisho bëdamboen tantiata. <sup>13</sup> —Nuquin Pa-  
 pan chiaid bëdamboen tantiaquidombo nec —quequin bëdamboen ista.  
 Adec chieshëmënenquio yec bëdamboec tabadta. <sup>14</sup> Mibëd icquido  
 naden chuiban. Chieshquid icsho: —Mibitsen chonoadta —cata.  
 Dacuëdsho: —Dacuëdenda —cata. Esus bëdiactsëc tantiatsëcsho bëdamboen  
 chuiquin Esus tantiamequiota. Dada padishquio icsho nashunta. Aden  
 nëishenquio icquin abitedi bëdamboen ista. <sup>15</sup> Utsin chieshënac cuidnanen-  
 quio yec bëdamboec tabadta. Mibëdtan Esus tantiaquidobëd bëdamboec  
 isnanquin utsibotsen bëdamboen ista.

<sup>16</sup> Aden Esus tantiec ënëdenquio yec cuishonquianeta. <sup>17</sup> Adembidi  
 Nuquin Papa chianequin: —Èmbi chiacpadomboen ëbi nashunquin  
 utsibotsen nashunta, Papa, —quequin chianeta. <sup>18</sup> ¿Mimbi chiacpadom-  
 boen Nuquin Papan nasho isunuidida mimbi: —Nuquin Papa bëdambo  
 iquec —cape? Nadoac bëdambo ictsias. Bëdamboec tabadquin: —Mibi

bëdamboshë iquec, Papa, —cac bëdambo ictsiash. Daicsabudshumbic adembidi nac bëdambo ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. <sup>19</sup> Nuquin Papan Mayanën Nuquin Papan chiaid tantiamiac pamumëdabimboec tabadenda. <sup>20</sup> Aden Nuquin Papan Mayanën tantiamiac utsibontsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —quesho mamëshunenda. <sup>21</sup> Adenquo icquin: —¿Nuquin Papan chiaidquibida chuibaneque? Tantiabono —cata. Aden tantiashun Nuquin Papan chiaidquo isbanta. Aden isbanquin abimbo chuisho tantiashun: —Ai, Nuquin Papan chiaidquo chiec —queshun aidën chuisho bëdamboen tantiata. <sup>22</sup> Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —queshun aidën chuisho tantienda. Aidën chiacpadomboen nainda.

<sup>23</sup> Mibi Nuquin Papa chianembi. —Matses bëdambo icmequid icquin mimbi chiacpadomboen aido name, Papa. Mimbi chiaidquo bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icbo Esusën: “Aido bëdambo iquec,” catsiash, Papa —quequin Nuquin Papa chianembi mibi. <sup>24</sup> Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquo iquendac. <sup>25</sup> Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. <sup>26</sup> Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. <sup>27</sup> Nuquin Icbon tantiacpaden chuiquin dada uaombique. Ëmbi dada uaboed nëid isquin ambocquido Esus tantiaquidotedi chuiban. <sup>28</sup> —Nuquin Icbo Esuquidistun bëdamboen ispashun —quequin mibi tantiembi. Padi. Aidtedi dada uaombi.

## TESADONICA YACNOCQUIDON ISTE 2

### *Pabadon tauamboen chiaid*

<sup>1-2</sup> Pabado nebi. Tesadonica yacnocquido Nuquin Papabēdta Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

### *Nuquin Papan Esusbēdtan matses cuidte chiaid*

<sup>3</sup> —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēcboedombi nēbi Esus tantiabededosh,” quiosh, Papa. “Adecbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. <sup>4</sup> Mimbī aden bēdamboen naid Esus tantiaquido utsibo chuibeniombi. —Dadpenshun chieshēnaqui chieshtoenquio icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

<sup>5</sup> Adec chieshtoenquio icquid icquin nuqui naden tantiec. —Ēbi chieshtomenquio icquid abitedishun naid tantiaquidquio nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquio icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. <sup>6</sup> Nuqui chieshēnquidon naidtsen tantiaquid icquin Nuquin Papan aido cuidendac. <sup>7</sup> Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icho Esusēn adoendac. <sup>8</sup> —Icsaisambo yec matses cuidquid nebi —quequin tantiamenuēc bēchamauanquiec choshon Nuquin Papa tantiesabo cuidendac. —“Nuquin Icho Esus tantiasho Nuquin Papan mibi bēdamboen istsiash,” quequin chuisho tantiatiapimbo iquebi —quequin abi tantienquio icsho Esusēn cuidendac. <sup>9</sup> Cacumiacbimboen abi yacno puduedmenquio icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bēdamboshē isadsho isec tabadtiaimbo iquendac. <sup>10</sup> Aden ambi icsaido cuidte ushēmbi Esus chosho abi tantiaquido: —Ēbi cuidmenquio icnuec abided cuidadaid Nuquin Icho bēdamboshē iquec —quequin aton Icho isec tabadendac. Ēmbi Esus chuibanac aid tantiabondaido icquin mimbitsen Esus chosho isendac.

<sup>11</sup> —Aidbēdtambi Esus isendambi —quequin mibi Nuquin Papa chianembi naden. —Mimbī Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquio iquebi,” quesho ambi chiacpadomboen namē, Papa. Comapenen tantiaquidquio mibi neque. Adota, Papa. <sup>12</sup> Aden mimbī con Icho Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec.

Aton Icbo Esuquidistubèd Nuquin Papa bèdamboshè iquec,” quependac utsibo, Papa —quequin Nuquin Papa chianembi mibi tantiaquin.

## 2

### *Icsamboshè icquidba chote chiaid*

<sup>1</sup> Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icbo Esus ènden choac —quesho tantia<sup>2</sup>sh <sup>2</sup> dacuèdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanèn tantiamiacpadomboen chuinu. Nuquin Icbo Esus ènden choac —quec muapash. Ambembi chiaidien chuichitash. —Naden Pabadon chiaid iquec —quequin èmbi dada uaidbimboecquid isquimbien chuichitash. <sup>3</sup> Adec muaid tantia<sup>2</sup>sh: —Abimboen cachitosh —quenda. ¿Nuquin Icbobada chopadic? Padenquo. Utsibain choendac. —Nuquin Papa caidèn chiaid tantiatiapimbo iquebi —quec matses icsamboec tabadnubien Nuquin Papa chieshènquidquo icsamboshè icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba choabi icnuc Esus choenquo iquendac. Icsamboshè icquidbain choendac. <sup>4</sup> Aid chuiquid dapa yanashic Nuquin Papa dèniacte bunquiec Nuquin Papa tabadte shubu uashunaidèn puduedshun: —“Comapenen tantiaquin èbi nashunquidquo nec,” quequin mimbi Nuquin Papa caid nibèdeque. Èbiuidtsèqui tantiaata —caindac matses abitedi chuiquin.

<sup>5</sup> Aden mibi chuideniondambi. ¿Tantienquioda ique? <sup>6</sup> Nuquin Papan tantiacpadènquo chomenuen uidènuac icsamboshè icquid nèbi choenquo iquec. Nuquin Papan tantiacpadènquo choendac. Èmbi chiondacadquid abi chomenquo icquid mimbi tantiec. <sup>7</sup> Nèbi isadenquo icquidèn Satanasèn namiac matsesèn Nuquin Papan chiaid niacniacbededec. Padnuen icsamboshè icquid choabi iquec. Aid chomenquo icquid nidabi icnubi icsamboshè icquid chuiquid dapa yantiapimbo iquendac. Abi chomenquo icquid nidmiambien <sup>8</sup> icsamboshè icquid matses chuiquid dapa iquendac. Adnubien Nuquin Icbo Esusèn: —Èbien matsesèn Icbombo nec —quequin matses abitedi tantiamenuac choshon icsamboshè icquid: —Unèsta —caquinuidtsèqui unès uashunendac.

<sup>9</sup> Adec Esus choabi icnuc icsamboshè icquid chuiquid dapa yanendac. Adquid yanshumbic Satanasèn tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nebique. Istac —quequin ambembi chiaid tantiamenuen aden nadatiambo icquin nabanquin ismendac. <sup>10</sup> Adec icsauidequi tabadquid yec comapenec muasho tantia<sup>2</sup>sh: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidèn Nuquin Papa yacno tabadte abimbo chuisho pamumèdabimboen tantiatiapimbo icquin ambembi chiaiduidtsèqui tantierendac. <sup>11</sup> Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapanuna —quequin namiac: —Mue nec —quequin tantienquo iquendac. Utsi muasho tantia<sup>2</sup>sh badedi: —Abimbo chiec —quetsiash tantienquo yec. <sup>12</sup> Aden ambi chiaidquo tantiatiapimbo icquin aid niac-niaquec icsauteuidi bunsho Nuquin Papan cuidquendac.

*Nuquin Papan tantiamiaid*

<sup>13</sup> Nuquin Icbon mibi tantiaquiec. Ëndenquimboshë matses uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquio tantias Esus tantiec mibi bëdamboec tabadcuenondac. —Adquibidi iccosh —quesho tantias Esus Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. <sup>14</sup> Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bëdamboshë icmenuen aden Nuquin Papan mibi Esus tantiamiac. <sup>15</sup> Ëbi adsho tantias Esus Nuquin Papan chiaidquio chieshtoenquio icquin Esus tantiaata. Ëmbi mibi bëisquin chiondaidbëdta ëmbi dada uaqin abimbo chiondaid bëpiscudenda.

<sup>16</sup> Nuquin Icho Esuquidistubëdtan Nuquin Papan nuqui tantiaquin bëdamboen isec. Adembidi: —Nuquin Papa yacno Esusbëd iquendabi —quequin tantiamequin dayacquio yacnimboecnu nuqui icmec. <sup>17</sup> Adquid icsho chianembi naden. —Tesadonica yacnocquido chieshtomenquio icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

**3***Nuquin Papa ëbi chianeta, quiaid*

<sup>1</sup> Tanta, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquio Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondacpadomboen utsibon dadpenshun Esus tantiabentsias, Papa. <sup>2</sup> Aden Esus chuibansho isun Esus tantiesabo chieshëmënuquidon: “Pabado cueschitono,” casho cuesmenda, Papa —quequin Nuquin Papa ëbi chianeta. <sup>3</sup> Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquio yanushe —queshun nuqui chieshtomenquio icquin Satanas nuqui yuametiapimbo iquendac. <sup>4</sup> —Aden Nuquin Icbon bëdambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. <sup>5</sup> Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

*Esus tantiaquido uspuenquio icquid*

<sup>6</sup> Tanta, con utsibo. Nuquin Icho Esuquidistun: —Ëbi chuibeneta —caidquio icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aibëd chieshec tabadenda. <sup>7</sup> —“Ëbëd iquec Pabado dayacquio iccondacpadquiec chieshenquio yequien tabadtia,” quiosh —quiosh mibi caic. Abimbo mimbi cac. Mibëd yec dayacquio iccondabi. Chieshenquio yec chonoadteniondabi. <sup>8</sup> Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na



naimëdnushe —quiash con piucquid bednuec chonoadteniondabi. <sup>9</sup> — Esus tantiaquidon abi chuibanquid menenquio icquid —¿quectabi ique? Padenquio. Esusën naid chuibanquid ambi chuibanaidon meniaquien bëdambo icsiash. —Chieshenquio icquin ëmbi nacnensho isun ma adem-bidi Tesadonica yacnocquidontsen nanu —quiashini chonoadteniondac. <sup>10</sup> Mibëd tabadquin naden chiondambi. —Aton na nacnenenquio yec chieshuidequi icsho pemenquio icquid —quequin chiondambi.

<sup>11</sup> Mibi caic: —Utsi-utsiec chieshuidequi tabadosh. Utsi icsaiduidquio chiec tabadosh —quetuidosh. <sup>12</sup> Uspun tantia. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta. <sup>13</sup> Nuquin Papan chiacpadomboen naic chieshtoenda. Chieshtoenquio icquin bëdamboen-uidi nata. <sup>14</sup> Nëid dada uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abëduidi iquenda. <sup>15</sup> Aid chieshënenquio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bëdamboequien tabadtiad —quequin chuita.

*Pabadon ënquin chiaid*

<sup>16</sup> Mibi tantiaquin Nuquin Papa chianembi naden. —Bëdambo icmi-anquidquio icquin Con Icbonquio ma aido dacuëdenquio icquid icmepanuna, Papa. Aidobëd ma Esus tëshëdenquio icpanuna, Papa —quequin Nuquin Papa chianembi. <sup>17</sup> —Ista. Ëmbimbo dada uaid nëid neque —quequin ëmbi nëidtedpactsëc dada uaid isun: —Pabadon chiaidquio nec —quequin mimbi tantiendac. <sup>18</sup> —Nuquin Icho Esuquidistun bëdamboen ispashun —caimbi mibi. Padi. Aidedi dada uaombi.

## TIMOTEYON ISTE 1

### *Tauamboen chiaid*

<sup>1</sup> Pabado nebi. Nuquin Papa yacno yuedanquidën Esuquidistun: — Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. <sup>2</sup> Ëmbi chiondac Esus tantiabenash con mado icbobimboecquid mibi neque. Mimbis iste nëid dada uanu. Mibi tantiec: —Nuquin Papan aton Mado Nuquin Icbo Esuquidistubëdtan con mado bédamboen isquin bédambo icmepashun —quiobi.

### *Chiaid utsi chienda, quequin chiaid*

<sup>3</sup> Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactsusuaquin Nuquin Papan chiaid chienda —cata. <sup>4</sup> Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquidouditsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. <sup>5</sup> Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. <sup>6</sup> Mimbis aden chiapadomboen nainquio icquidoen Nuquin Papan chiaid bédamboen tantienquio yec abembi onquec. <sup>7</sup> Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuec aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

<sup>8</sup> —“Naden nata,” quequin Nuquin Papan chiaid Moisesën dada uamepampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —queshun aid abimbo chiac bédambo ictsias. <sup>9</sup> ¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënshunquido. Nëidic anibi cuesunquido. Nëidic amëbi cuesunquido. Nëidic cuesunianquido. <sup>10</sup> Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido.

Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. <sup>11</sup> Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

*Nuquin Icbon Pabado bëdamboen isbenaid*

<sup>12</sup> Tantia, mado. Mibi chuinu. Nuquin Icho Esuquidistun: —Pabodon ëbi bëdamboen chuibantsiash —quequin tantiashun: —Ëbi chuibenequid icta, Pabado —qeshun ëbi bëdamboen namec. Adoaid icquin: —Ëbi namequid yec mibi bëdamboshë iquec, Icho —quequin Nuquin Icho Esus chianemi. <sup>13</sup> Ënden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshënquin cuesun secate bunondabi. —Aton Mado Esus tantiasho Nuquin Papan ëbi bëdamboen istsiash —quenquio icquin adopondambi. Adshobini: —Pabodon abimbo tantiabi iquec —qeshun Nuquin Icbon cuidenquio icpanëdash. <sup>14</sup> Adec icsambo icquid icsho Nuquin Icbon tantiamiac: —Abi tantiasho ëbi bëdamboen isbentsiash —quequin Esusquio tantiabenondambi. Esus tantiaquin matsesens tantiaquiemi.

<sup>15</sup> Tantia, mado. Naden chiaid bëdambo iqueque. —Icsambo icboedën abi tantiasho cuidmenquio icnuec Esus matsesac caondash —quequin chiaid bëdambo iquec. Ëbibic icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi. <sup>16</sup> Adec ëbi yuec icsambo icsho Nuquin Icho Esusën baded cuidenquio icquin abibi tantiamequin bëdamboen isbempondashi. —Pabado bëdamboen isaid chiac utsibo: “Pabado icsambo icboedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësacsho ëbi yacno tabadmendambi —qeshun abi tantiamequin Esusën bëdamboen isbempondashi. <sup>17</sup> Aden tantiaquin nadoemi. —Nuquin Papa ambiuidtsëqui abitedi namequid yec abitedishun Icbombo nec. Unëstiapimbo icquid nec. Isadenquio icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bëdamboshë iquec, Papa,” capashun ënenquio icquin —caimbi.

*Matsesën mibi chiondacadombota, quiaid*

<sup>18</sup> Mibi con mado icbobimboecquid neque. Ëmbi chiacpadomboen Nuquin Papan chiaidquio chuibanta, mado. Ënden mibi Esus chuibanquid yanabi icnuc Nuquin Papan oncamiac nuquibëdtan Esus tantiaguidën mimbi chuibante chuipondash. —Esus bëdamboen chuibanquin Timoteyon Esus tantiaquido bëdamboen namendac —quequin mimbi chuibante chuipondash. Aidën chiacpadomboen chieshtoenquio icquin Nuquin Papan chiaidquio chuibanta. <sup>19</sup> Aden Nuquin Papan chiaid niaquenquio icquin Esus tantiaquiec bëdamboec tabadta. Utsiboen adenquio iquec. Icsamboec tabadquin Nuquin Papan chiaidquio niac-niacquin Esus tantienquio yanosh. <sup>20</sup> Adecandedo caidbëdtan Imenyo caidën aden Esus tantienquio yanosh. Aid daëdshun Nuquin Papa muaquid icsamboen chuisho nadopombi. —Adquid Satanasën natiambo icmepashun —qeshun: —Esus tantiaquido cho-choacno

choenda —capombi. —“Nuquin Papa muauachitombi. Icsambo icchitebi,” quequin ma tantianu —queshun adopombi.

## 2

### *Nuquin Papa bēdamboen chianete chiaid*

<sup>1</sup> Tanta. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēda mibi bēdamboen tantiaequin bēdamboen ista, Papa. Matses nashunquidquo yec mibi bēdamboshē iquec, Papa —quequin Nuquin Papa chianenuna.

<sup>2</sup> Adembidi Nuquin Papa chuiquin: —Chuiquid dapambo pedesidente caidtedibēda chuiquid dapa utsibotedi bēdamboen tantiameta, Papa. Adoac aidon bēdamboen namiac cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. <sup>3</sup> —Con matses Esus tantiameta, Papa —quequin nuqui

aden chianesho tantiaash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmecuid.

<sup>4</sup> Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiaashun abided cuidadec unēsaid ma tantiapanu —quec Nuquin Papa. <sup>5</sup> Nuquin Papan chiaidquo tantiaashun nuqui naden tantiec. —Nuquin Papa matses uaquid abentsēqui

icnuc abipadquid utsi nibēdquiec. Abēd icboedi matsesun: “Nuquin Papapadquid icquin aid tantiamecuid nebi,” quequin aton Madon matses chuipanēdash. Adecbidi aton Papa matses bēdamboen ismecuid yampanēdash Esus. Aid abentsēqui Nuquin Papa bēdamboen ismecuid nec. <sup>6</sup> Abi tantiaquid cuidmenquo icnuec abided cuidadec unēspac caondash —quequin chiaidquo nuqui tantiec. Nēbien Nuquin Papan tantiacpadomboen matsesēn aden chiaidquo chuiben-chuibenec.

<sup>7</sup> Adomboembidi Esus chuibenecuidquo nebi. —Matses utsibo isadaidpembo ěbi chuibeneta —Esusēn caondaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi.

Abimbo caimbi. Adquid nebi.

### *Esus tantiec cuēdēnacnoshon nate chiaid*

<sup>8</sup> Tanta. Dadatedi chuinu. Cuēdēnacno puduedshun Nuquin Papa chuinuec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad. <sup>9</sup> Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidachimboec dasiuidta. Chido chishpidabimboec dasiuidenda. —Mabi isnu

—quenquo yec Esusquo tantianuec Esus tantiaquido cuēdēnacno puduedta. <sup>10</sup> —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

<sup>11</sup> Esus tantiaquido cuēdēnacnoshon dadan Nuquin Papan chiaid chuibansho tantiaquid chidon. —Aidēn chiacpadomboen natiapimbo iquebi —quequin tantienquo yec bēdamboen tantiec otacquo tabadquid chido. <sup>12</sup> Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otaacquien tabadquid chido —caimbi. <sup>13</sup> Dada Adan caidba Nuquin Papan matses uapampic. Adshumbic aton chido Eba caidtsen. <sup>14</sup> Aden dadabēda chido nacnecnasho isumbien Satanasēn: —Icsamequin tanu —queshun muauac

icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. <sup>15</sup> Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiapadomboen natiadquio icquin matses tantiaquid nendac. Nuquin Papan chiaid niaquenquio icquid nendac. Aton bēnēuidtsēqui chudmequid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

### 3

#### *Esus chuibanquid chiaid*

<sup>1</sup> Tanta. Utsitsen mibi chuinu. —Esus chuibanquid ictiadquio iquebi —quesho: —Bēdamboen nate mibi bunec —cata. <sup>2</sup> —Nuquin Papan chiaid chuibanquid nadquien ictiad —quequin anocquido chuita. —Bēdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsēc inquid nendac. Abi bunaid ēnshun mēmnuquidquio nendac. —Bēdamboen tantiaquidquio nec —utsibon caidquio nendac. Isedanquido bēdamboen isquid Nuquin Papan chiaid chuibanquidēn. Nuquin Papan chiaid bēdamboen tantiamequin chuibanquid nendac. <sup>3</sup> Tantiadenuen acte paëmbo icquid aquenquio icquid nendac. Badedquio nēishenquio icquid nendac. Uimanēmēnenquio icquid nendac. Chushcananteuidi bunenquio icquid Nuquin Papan chiaid chuibanquid. Piucquid bedteuidi bunenquio icquid nendac. <sup>4</sup> Aidēn chiapadomboen aton chidon aton bacuëbobēdtan naquid. Chieshenquio icquin aton papan chiapadomboen naquid aton bacuëbon. <sup>5</sup> ¿Ambi chiapadomboen aton chidobēdta aton bacuëbo bēdamboen namenquio icquinda Esus tantiaquido bēdamboen namepatsiash? Padenquio ictsiash. <sup>6</sup> Ēnden Esus tantiabenondaaid chuiquin: —Ēbi chuibanquid icta. Ēbi bēdamboen chuiquin ēbi bēdamboen nameta —Esus tantiaquidon cac bēdambo ictsiash. Nēbimbo Esus tantiabenquid aden chienda. Chuibanquid icmiac adquidēn Nuquin Papan chiaid badedquio niactsiashe. Satanashimboec: —Ēbiuidtsēqui bēdamboshē iquebi —quetsiashe. Adquid: —Ēbi chuibanquid icta —cainda. <sup>7</sup> Ēnden Esus tantiabenondaaid mibi chuibanquid icmenun Esus tantiesabon: —Bēdambo icquid nec —casha tantiaata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamēnshuntsiash. Adquid Satanasēn badedi yuatsiashe. —Icsambo icquid nec —caid: —Ēbi chuibanquid icta —cainda.

#### *Esus tantiaquido nashunquid chiaid*

<sup>8</sup> Tanta. Esus tantiaquido nashunquidtsen chuinu. —Nuqui chuibanquidēn chiapadomboen ēbitedi nashunquid icta —quequin nadquid chuita. Utsibon: —Bēdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidēn. Piucquid bunquin ampenquio icquid nendac. <sup>9</sup> Nuquin Papan chiaid bēdamboen tantiaquinc Esus tantiaquinc caic bēdamboec tabadquid Esus tantiaquido nashunquid. Adquid bēdambo ictsiash. <sup>10</sup> Esus tantiaquido nashunquid icmenun: —¿Bēdambo icquidida nēid nec? —quequin chuimiactsiabo: —Ai, bēdambo icquid nec —abitedi quesho tantiasun: —Esus tantiaquido nashunquid icta —cac bēdambo

ictsiash. <sup>11</sup> Adquidën chido: —Bëdambo icquid nec —utsibon caidquio nendac. Utsi icsaiduidi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash. <sup>12</sup> Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. <sup>13</sup> Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

<sup>14</sup> Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —queshun nëid dada uaic nebi. <sup>15</sup> Èbi mibi yacno badedquio nidabi icnuc: —“Esus tantiaquidon nadoquid,” quequin Pabodon chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. <sup>16</sup> Èndenquio abi bëdamboen ismequid ambi tantiamiabi icnëdaidi nëbi Nuquin Papan tantiamiaid Esus bëdamboshë iquec.

Aid Nuquin Papan matsesmepanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqui uincuenaid yec Nuquin Papan abi yacnoshon uaido mayan bëdabon isaidquio Esus nec.

Abi chuibenequidën nidaid utsi-utsiec yacno nidshun chuibeniac utsin-utsinquien Esus tantiabenac caosh.

Aidquiobi Nuquin Papan abuc nidmeshun abëdi tabadmeoapanëdash.

## 4

### *Utsibon icsamboen chiaid*

<sup>1</sup> Tantia, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantiashun Esus tantienquio yanendac —quequin Nuquin Papan Mayanën abimbo tantiamioshi. <sup>2</sup> Aden muaquidon: —Abimbo caïmbi —quequin bëdambo icquid damianquien aden muaquin chiendac. —Nuquin Papan cuidnushe —quequin tantienquio iquendac. <sup>3</sup> Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bëdambo icnubi. ¿Atotsi quequin Nuquin Papan pete uapampic? —Èmbi chiaidquio bëdamboen tantiashun Esus tantiaquidon: “Nuquin Papan pete uaid bëdambo iquec,” quequin ma penu —quequin Nuquin Papan pete uampic. <sup>4-5</sup> Aidën pete uaidtedi bëdamboshë iquec. —Èmbi pete uaid bëdambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bëdambo iquec, Papa —queshun pete isuidenquio icquin penuna.

*Esus chuibanquid icquin bëdamboen nata, quiaid*

<sup>6</sup> Esus tantiaquido ěmbi chuibocpadomboen chuibanquin mimbi bĕdamboen natsiac, mado. Bacuĕtsĕcsĥo min matsesĕn Nuquin Papan chiaidquio mibi chuibanĕdash. Aidĕn chiaid tantiaquid icquin Esusĕn chiacpadomboen nate bunquin ěmbi chiacpadomboen mimbi chuibantsiac. <sup>7</sup> Con tsusedpabon ambembi chiampidbĕdta nĕbi matsesĕn adembidi ambembi chiaid tantienda. Nuquin Papan chiaidquio niactiapimbo yec bĕdambo icte bunquiota. <sup>8</sup> Aton dada uidĕnquio icmenuec titinquetanequid nuquin matses nec. Esus tantiaquido bĕdambo icnuec ĵmitsipadquio icpec? Nuquin Papa tantiaquiec ambi chiaid niaquenquio yec bĕdamboec tabadquid nec. Adquid unĕsash Nuquin Papa yacno nidash bĕdamboĥĕ icquid iquendac. <sup>9</sup> Ĕbi adsho tantiash: —Abimboen caic —queta. <sup>10</sup> Adec: —Abi yacno abĕdi tabadendabi —quequin Nuquin Papan chiacpadomboen ĕnenquio icquin nanuna. —Esus tantiaquid unĕsacĥo cuidenquio icquin unĕstiapimbo icquidĕn Nuquin Papan abĕdi tabadmendac —quec chieshtoenquio yec bĕdamboec tabadnuna.

<sup>11</sup> Ĕmbi chuiboed chuibanta, mado. —Nuquin Papan chiacpadomboen nanuna —quequin chuibanta. <sup>12</sup> Mibi nĕbi caniaid neque. Bĕdamboec tabadta, mado. Ĕnden caniaidĕn: —Nĕbi caniaid icquin Nuquin Papan chiaid mimbi tantienquio iquec —canushe. Bĕdamboec tabadta. —Esus tantiaquido utsibotsen ma ĕbi yacpadec bĕdamboec tabadnu —quiash adta. Bĕdamboen chuibanquinc matses tantiaquinc Esus tantiaquinc Nuquin Papan chiaid niaquenquio icquinc caic bĕdamboec tabadta.

<sup>13</sup> Ĕbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bĕdamboec tabadnuna —quequin Nuquin Papan chiaid isbanquin matses chuibanta. Aden bĕdamboen tantiameta. <sup>14</sup> Ĕnden mibi mamishquin chiondaid ĵada tantie? Ĕnden Esus tantiaquido icquin tsusio dapabon mibi mamishbedondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bĕdamboen chuibanquid Timoteyo iquendac —quequin chuipondash. Chieshtoenquio yec adquid icta, mado. <sup>15</sup> Ĕmbi dada uaquin chuibodtedi isbanshun ĕnenquio icquin ěmbi chiacpadomboen bĕdamboen nabanta, mado. —Ĕmbi adosĥo isun ma ěmbi chuibanaidon: “Nuquin Papan chiaid chuibanquidquio yanosh,” ma ĕbi canu —qeshun bĕdamboen chuibanta, mado. <sup>16</sup> —Nuquin Papan chiaid niacmane —quec mibibi bĕdamboec tantiadta, mado. —ĵAdabi bĕdamboec tabadpeba? ĵAdambi Nuquin Papan chiaidquio muainquio icquin chuibampoba? —quec mibibi tantiadta. Bĕdamboec tabadquin Nuquin Papan chiaidquio ĕnenquio icquin chuibanta. Aden Nuquin Papan chiacpadomboen naic aidbĕd mibi tabadendac. Mimbi chuibanaidobidi adoaindac.

## 5

### *Esus chuibanquidĕn bĕdamboen chuite*

<sup>1</sup> Nuquin Papan chiaid chuibanquid icquin dada ĕnden caniaid chushcainda, mado. —Esus tantiaquidĕn nadoquid yendac —quequin bĕdamboen chui: —Con pabimboecquid nec —quequin. Nĕbi caniquid: —Con utsibimboecquid nec —quequin adembidi bĕdamboen chuiban, mado. <sup>2</sup> —Con tabimboecquid nec —qeshun macho bĕdamboen

chuiban. Chido machobudabi icquidtedi chibibimboecnuc isquin: — Nēid chudtiadquo icchitebi —quenquo icquin Nuquin Papan chiaidquo chuibanta, mado.

*Chido niantembo chiaid*

<sup>3</sup> Tantia, mado. Esus tantiaquidon abēdtan Esus tantiaquid icsho niante nashunte chuinu. Niante aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. <sup>4</sup> ¿Ada nianten tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundened neque. Nēid nashunu —queshun nashuntsiash. Aden ambi chiapadomboen nasho isash: —Bēdamboen naic —quetsiash Nuquin Papa. <sup>5</sup> Padnuc aton matses nibēdquidēnquo nianten Nuquin Papa chianequid: —Nuquin Papan ēbi nashuntsiash —queshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niante icsho abēdtan Esus tantiaquidon nashunquid. <sup>6</sup> Niante utsimbien ambi tantiaiduidi naic. Petebēdta acteuidi tantiaquin abi bunaiduidi naic. Adquidēn unēsacimbocquin Nuquin Papa tantienquo iquec. Adquid Esus tantiaquidon nashunquid icquid. <sup>7</sup> Ēmbi aden niante nashunte chuiboed Esus tantiaquido utsibotsen chuita, mado. —Aton matses nibēdquid niante nashunenquo icsho: “Esus tantiaquido icsambo iquec,” utsibon canushe —queshun chuita. <sup>8</sup> Aton shubun icquidotsen Esus tantiaquidon nashunquid. Abēd icquido menenquo yec pemenquo yec quec nashumēnenquo icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquo icquid icsamboshē iquec.

<sup>9</sup> —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquo 60ted matamec machobudaidquo. Aton bēnēuidtsēqui chudmedenedquo. <sup>10</sup> —Matses nashunquid nec —utsibon caid. Bacuē bēdamboen caniuadened machon. Isedanquido bēdamboen isquid. Esus tantiaquido nashundenedquid. Matses daicsabudacsho nashunquid. Adec bēdamboec tabadquid: —Esus tantiaquido nashunquid icta —cata.

<sup>11-12</sup> Utsi niante machobudabi icquid: —Adquid icta —cainda. — Esusuidtsēqui tantiaquin abi tantiaquido nashunembi —queboedēmbi dada bunquin ambi chuiboedi niachidansho isun utsibon: —Icsambo icquid nec —catsiashe. <sup>13</sup> Adquid shubu utsin shubu utsinquien isedbenisedbenec uspumbo yanash onqueteuidtsēqui buntsiash. Utsibo ic-saiduidi chuibeneguidquo ictsiash. <sup>14</sup> —Adquid niante machobudabi icquid dadan bedac bēdambo ictsiash —caimbi. Adoac bacuē tishoatsiash. Adshun codocaquinc sicaquinc daēdcaquinc catsiash. Adec bēdamboec tabadsho: —Icsambo icquid nec —Esus tantiesabon catiapimbo ictsiash. <sup>15</sup> Adquid niante machobudabi icquidēn utsin-utsinquien Esus tantienquo yanshun Satanasēn tantiamiacpadomboen nac caosh. <sup>16</sup> Niantebēd icquid utsi ¿ada Esus tantiaquid chido icpec? Aidēmbi niante nashunac bēdambo ictsiash. —Ēmbi nēid nashumbanuc niante utsi aton matses nibēdquidquo Esus tantiaquido utsibon nashuntsiash —queshun abēd icquidēn nashunac bēdambo ictsiash.



*Esus tantiaquido chuibanquid chiaid*

<sup>17</sup> Tantia, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —qeshun menequid. <sup>18</sup> Adembidi chuiquin Nuquin Papan ambi chiaid dada uamepampic. “ ‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

<sup>19</sup> Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tantiata. <sup>20</sup> Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpeshun tantianubi adota. —Aden chuisho tantiash dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenquio icnu —qeshun chushcata. <sup>21</sup> Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isegue. Ëmbi chuibocpadomboen nata. Min matsesën mimbi tantiaidëncuioibi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquio neque. Chushcainquio iquembï —cainda.

<sup>22</sup> Nuquin Papan chiaid chuibanquid icmenuen nuqui naondapadomboen badedquio mamishenda. Ambi naid yuen isquioshon ambi chiaid yuen tantiaquioshon: —Bëdambo icquid nec —quequioshon nata. —Esus chuibanquid icta —mimbi badedquio caboedën Nuquin Papan chiaid badedquio niacsho isash: —Ambi: “Adquid icta,” caidbëd Timoteyo icsamboshë iquec —utsibo quenushe. —Ëbëdtan chuibanquid icta —badedquio cainda. <sup>23</sup> —Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidi acashien mibi niaque. Actequid utsi paëmbo icquid pistëc ac ma pucu bëdanuequin. <sup>24</sup> Tantia. Mibi padpiden chuinu. —Ëbëdtan namembi —canuen matsesën naid bëdamboen tantiata. Utsi aton matses ismec icsasho: —Icsambo icquid nec —badedi catsiash aton matsesën. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. <sup>25</sup> Utsien ismequin bëdamboen nasho: —Bëdambo icquid nec —badedi catsiash aton matsesën. Utsimbic ismenquio icquin bëdamboen nabansho: —Bëdambo icquid nec —quequin badedquio tantienquio icquin yuecshun istuidshun adembidi tantiatsiash. Ëbi adsho tantiashun: —Nuquin Papan chiaid chuibanquid icta —badedquio cainda.

**6***Matses yuaido chiaid*

<sup>1</sup> Matses yuabo Esus tantiaquido icsho naden chuita. —Min icbo Esus tantiesa icsho bēdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita. <sup>2</sup> Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiacpadomboen natiapimbo iquebi,” cainda. “Ēbipadquid icsho aid tantiaquin con icbon chiacpadomboen nanu,” quequin min icbo bēdamboen nashunta —quequin yuabo chuita. Ēmbi chuihoedtedi Esus tantiaquido chuiban. —Adota —quequin chuibanta, mado.

*Piucquid bunquin utsibon ambembi chiaid*

<sup>3</sup> Mimi: —Nuquin Papan chiaid niaquenquo yec bēdamboec tabadnuna —quequin Nuquin Icbon chiaidquo chuisho: —Aden chuisho tantiatipimbo iquebi —quequin ambembi chiaid chuiquid icsambo iquec. Adquidēn chuisho tantienda, mado. <sup>4</sup> Aden icsamboen tantiaquidēn: —Ēmbi chiaiduidtsēqui bēdambo iquec —quequin icsamboen chuibanendac. —Mimbi icsamboen chuīnuc Ēmbimbo bēdamboen chiec —quec chushcanantiadquo iquendac. Abembi onqueteuidi bunendac. Adquid yuec onquesho tantias: —Utsi onquetiapimbo icnuc abentsēqui onquebudec —quec utsibo nēishendac. Adquidbēd chushcananec muauananc icsamboec tantiasunanendac. <sup>5</sup> Pabiātē shēcuē nibēdaccimboen Nuquin Papan chiaidquo bēdamboen tantienquo yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiadquo iquendac.

<sup>6</sup> Nuquien Nuquin Papa tantiaquiec bēdamboec tabadec nuquin na dadpen bedte bunenquo yec bēdambo ictsiac. <sup>7</sup> Tishac chucactsēcnuc nuquin na nibēdpanēdash. Adembi unēsquin nuquin na nuqui buantiapimbo iquec. <sup>8</sup> Nuquin pete dashcutēbēd icnuc utsi bunenquo yec bēdambo nuqui ictsiac. <sup>9</sup> Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquo bednuen mēmunenquo icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unēsash icsambo icquido cuidacno nidendac. <sup>10</sup> Adec piucquid natiambo bunquido aid bednuec baded-badedquiec icsadenendac. Adquido: —Esus tantiembi —queboedobi padenquo yanash: —Esus tantienquo yanchitombi —quec natiaic tabadendac.

*Bēdamboec tabad, quiaid*

<sup>11</sup> Mibi Nuquin Papa tantiaquidquo neque. Piucquid bedteuidi bunenquo yec bēdamboec tabadte bunquiota, mado. Nuquin Papan chiaid niaquenquo yec chieshtoenquo icquin Esus tantiata. Matsesentantiec nēishēmēnenquo yec bēdamboec tabadta. <sup>12</sup> Utsibon chieshēnaqui chieshtoenquo icquin Esus tantiaquiec bēdambo icta. Unēsash Nuquin Papabēd tabadnuec adta. —Con Mado Esus tantiaquiec unēsacsho ēbēdi tabadmendambi —queshun Nuquin Papan Esus tantiamiac mimi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimi tantiamiondaque. Adembi aid tantiaquiec bēdamboec tabadta. <sup>13</sup> Abitedi uampidēn Nuquin Papan nuqui isequē. —Adquid nebi —quequin ancanquid dapa Ponso Pidato chiec dacuēdenquo icnēdaidēn Nuquin Icbo Esuquidistuntsen

nuqui isequē. <sup>14</sup> Esus tantiaquin chieshtoenquo icquin aidēn naidquo chuibanta. Nuquin Icho Esuquidistu choabi icnuc ěmbi chuiboed ni-aquenquo yec bēdamboec tabadta. —Esus tantiaquido icsambo iquec —utsibo quetiapimbo icnuc adta. <sup>15</sup> Nuquin Papan tantiacpadēnquo aid ushēmbi Esuquidistu nidaidēn padpidec choendac. ¿Esus chomequid mitsipadquo icpec? Icsaisambo yec bēdamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquo chuiquid utsin dēniactiapimbo iquendac. <sup>16</sup> Aid abentsēqui unēstiapimbo icquid nec. Bēchamauanquiecscho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icho yec mibi bēdamboshē iquec, Papa —quequin Nuquin Papa chianenuna ěnenquo icquin.

*Aton na dadpen dayun uaquido chiaid*

<sup>17</sup> Aton na dadpen dayun uaquido naden chuita, mado. —“Con na dadpenquioshē icnuc ěbiuidtsēqui bēdambo iquebi,” quenda. Nibēdantiapimbo icquid danquin mimbi dayun uaiduidtsēqui tantienda. Nuquin Papan tantiaquiota. Aidēmbi matses bēdambo icmenuen aton na bedmec —cata. <sup>18</sup> Adquidobidi chuiquin: —Bēdamboec tabadquin utsibo nashumbanquiota. Adembidi cudasenquo icquin mitsana utsibo menianeta. <sup>19</sup> “Mimbi bēdamboen naoque. ěbēdi tabadmequin mibi bēdambo icmendambi,” Nuquin Papa camenuen adota. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

*Pabadon ěnquin chiaid*

<sup>20</sup> ěmbi chuiboedquiobidi adembidi bēdamboen chuibanta, mado. Nuquin Papan chiaid chienquo yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda. <sup>21</sup> Aden icsamboen chuisho tantiaashun: —Abimbo caic —quequin utsin-utsinquien Esus tantienquo yanondashe. Adquido tantienda. Chieshtoenquo icquin Esusquo chuibanta. —Nuquin Papan con mado bēdamboen ispashun —quequin mibi tantiembi. Padi. Aidtedi chuiquin dada uaombi.

## TIMOTEYON ISTE 2

### *Tauamboen Timoteyo chiaid*

<sup>1</sup> Pabado nebi. Nuquin Papan tantiacpadomboen Esuquidistun: —Ëbi chuibeneta —caidquoio nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac —quequin Esus chuibenequidquoio nebi. <sup>2</sup> Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icho Esuquidistubēdtan bēdamboen isquin bēdambo icmepashun —quequin mibi tantiemi.

### *Chieshtoenquo icquin Esus chuiban, quiaid*

<sup>3</sup> Con tsusedpabon nacpadomboen Nuquin Papauidi tantiaquin ambi chiacpadomboen natiadquoio iquebi. Adquid icquin Nuquin Papa mibi chianemi. —Mibi tantiaquid Timoteyo bēdambo iquec, Papa. Adquoio icmec mibi bēdamboshē iquec. Adquiouidi icmeta, Papa —quequin Nuquin Papa chianemi. <sup>4</sup> —Ëbi nidnu —quesho tantias mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. <sup>5</sup> Naden mibi tantiemi. —Aton chichi Doida caidēn ani Eunisebēdtan aid daēdshumba Esus tantiabenquiacpadomboen Timoteyontsen nēbi Esus tantiaquiec —quequin mibi tantiemi. <sup>6</sup> Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondami. Adoac aton Mayan mibēd tabadmiac. Adoaid icquin dacuēdenquoio icquin Esus chuibanta, mado. <sup>7</sup> ¿Nuquin Papan aton Mayan nuquibēd icmiacta nuqui natia dacuēdpe? Padenquoio. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquoio icquin mēmunquidquoio icnuc nuqui bēdambo icmec.

<sup>8</sup> —Adoaid nebi —queshun dacuēdenquoio icquin Nuquin Icho Esus chuibanta. Adembidi dacuēdenquoio icquin: —Pabado tantiaquiemi —cata. —Quēnēn nauedtsaid Pabado tantiatipi —quenda. Utsibon cuestiadquoio icquin chieshēnaqui Nuquin Papan namiacpadec chieshtoenquoio icquin Esus chuibanuna. <sup>9</sup> Nuquin Papan: —Bēdamboec tabadquid icmequin con Mado Esus tantiamemi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempondash? Padenquoio. Ëndenquimboshē nidaidbēdta matses uabi Nuquin Papan: —Ëmbi chiaid niac-niaquec icsambo ichoedēmbi con Mado Esus tantias mibi cuidenquoio iquendambi —quequin ambi chuipampicpadomboen nuqui Esus tantiamiac. <sup>10</sup> Aden ambi chuipampid tantiamiabi icshumbic nēbi Esuquidistu matsesmeshun matses tantiamiac. Adoac: —Abi tantiaquid unēsacsho icsaido cuidacno nidmenquoio icquin unēstiapimbo icquid icmequin Nuquin Papa yacno abēdi Esuquidistun tabadmendac —quequin nuqui tantiec. <sup>11</sup> Aden tantiaquin Esus chuibenequidquoio nebi. —Ëbi chuibeneta —Esusēn caondaaid yec Nuquin Papabēdta Esus tantiamequidquoio nebi. <sup>12</sup> Aden

chuibeneshobini chieshënquin quënën nauedondash. Adoalui chieshtotiapimbo icquin Esus tantiembi. —Ëmbi tantiaidquio comapenen tantiaquin nabanquidquio Esus nec. Adquid icquin: “Ëbi tantienquio yanushe,” qeshun abi tantiamequin ëbi chieshtomenquio iquendac. Nidaidën choabi icquin Esusën ëbi chieshtoenuio icquid icmendac —quec dacuëdenquio iquebi. <sup>13</sup> Tantia, mado. Mibi chuinu. Ëmbi abimbo chiondaidquio chuiban: —Nuquin Papan chiaidquio nec —qeshun. Esuquidistu tantiaquinc matses tantiaquinc caquin adenuidi chuibanta, mado. <sup>14</sup> Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquio chuiquin Esus chuibanta, mado.

### *Onesipodo chiaid*

<sup>15</sup> Ëmbi: —Cho —cac choenuio icboed mimbi tantiac, mado. Nidaid utsi Asia caid yacnocquido dadpen adac choenuio iccosh. Edemoqenes caid choenuio iccosh. Adecbidi Piquedo caid chedo. <sup>16</sup> Onesipodo caidën nëbi bëdamboen isposhi. Ëbi quënën nauedacsho dacuëdenquio icquin isuan-isuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi. <sup>17</sup> Aidëmbi nëmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibëmbenequin istuidpondashi. <sup>18</sup> Mimbi isnubi Epeso yacnoshon aidëmbidi baded-badedquien nashundeniondashi. Adsho tantiashun: —Nidaidën padpidec choshon Nuquin Icbon Onesipodo bëdamboen is-pashun —caimbi.

## 2

### *Chieshtoenquio icquin chuiban, quiaid*

<sup>1</sup> Chieshtoenquio icquin Esus chuibanta, mado. —Esuquidistun ëbi bëdamboen isec. Aidën bëdambo icmiac dayacquio icquin naimbi —qeshun chieshtoenquio icquin Esus chuibanta. <sup>2</sup> Matses dadpenshun tantianuc ëmbi chuibancho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuia. —Nëidën chieshtoenquio icquin Esus chuibantsiash —qeshun: —Mimbisen chuiban —cata, mado. <sup>3</sup> Sondado bëdambo icquidën nacimboen chieshtoenquio icquin bëdamboen nabanuna. Matsesën chieshënubi Esuquidistun chiacpadomboenuidi nanuna chieshtoenquio icquin. <sup>4</sup> Sondadon: —Mibi bëdambo iquec —camenuen aton chuiquid dapan chiacpadomboenuidi naquid. Ambi tantiaid nainquio icquinc utsibon chiacpadomboen nainquio icquinc caquin aton chuiquid dapan chiacpadomboenuidi naquidquio sondado nec. Adomboembidi Nuquin Icbon chiacpadomboenuidi nanuna, mado. <sup>5</sup> Ma nuquin matses titinquequidquio. ¿Mitsipadquio icpec? Aton uidën tanec aton matsesën chiaction abia titinquec chosho: —Bëdamboec titinquiosh —qeshun mauete menequid. Ambi chiaction titinquabi icsho mauete menenuio icquid. Adembidi: —Mimbi bëdamboen naoc —Nuquin Icbon camenuen ambi chiacpadomboen chieshtoenquio icquin nabanuna, mado. <sup>6</sup> Ma nuquin matses tied uaquidquio. ¿Mitsipadquio icpec? Chonoaidquidënuio dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus

chuiiban-chuibanuna ënenquoio icquin. Adoac utsibon Esus tantiabentsiash. <sup>7</sup> Aden ëmbi chuiboed tantiata. Adsho Nuquin Icbon mibi bëdamboen tantiametsiash.

*Esuquidistu tantiata, quiaid*

<sup>8</sup> Utsibon chieshënnubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincuemenëdaidquoio yec abi iquec. Aidquoio tantiaquïota. Aid chuibenëquidquoio nebi. <sup>9</sup> Aden chuisho chieshënnquin bedshun icsambo icquid uidën uacimboen shocosh nacenaidën mëtanïac mëyadebi. ¿Ëbi aden uidën uacimboenda Nuquin Papan chiaid uidën uapadic? Padenquoio. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. <sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquoio icquin abëdi tabadmendac —quec chieshtoenquoio iccobi quënën nauedondaid yequi. <sup>11</sup> Naden abimbo chiaidquoio tantiash chieshtoenquoio iccobi.

—Abi bunaid ënshun Nuquin Icbon chiacpadomboen naquid chieshëmënnquidën unës uacsho Nuquin Icbon abi yacno abëdi tabadmendac.

<sup>12</sup> Utsibon chieshënaqui chieshtoenquoio icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

<sup>13</sup> Aden abi tantiesabon ambi chiaid niac-niacsho isun Nuquin Icho Esusën ambi chiacpadomboen naquidquoio icquin icsaïdo cuidendac.

Adembidi ambi chiacpadomboen abi tantiaquido bëdambo icmendac —quequin chiaid tantiashun ambi chiacpadomboen naquin Esusën naid chuibanuna chieshtoenquoio icquin.

*Nuquin Papan chiaid isbanta, quiaid*

<sup>14</sup> Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquoio chienquoio yec ambembi chiaid chiec mibi chushcananqueque. Adenda. Adec chushcanansho tantiash matses icsambo yaneque. Padi —cata, mado. <sup>15</sup> —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan isnu —queshun adota. Ambi chiaid bëdamboen isbanshun chieshtoenquoio icquin Nuquin Papan chiaidquoio chuibanta, mado. <sup>16</sup> Ambembi chiaid chuiquidobëd onquec tabadenda. Adec onquequido icsambo icboedi buëdanquec Nuquin Papan chiaid niac-niaquec icsamboshë yaneque. <sup>17</sup> Tosho bedacbimboec adquidën chiaid tantiaquido dadpen yaneque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. <sup>18</sup> Aidon Nuquin Papan chiaidquoio chienquoio icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincuemenquoio iquendac —quequin muaquin chuisho tantiashun utsibon Nuquin Icbon chiaid tantienquoio yanac. <sup>19</sup> Aidon Esus tantiabien icchitash. Nuquin Papan Esus tantiamiac ënenquoio icquin Esus tantiatsempanëdash. Padnuc Esus tantiaquidombo dadpen

iquec. Adquido chuiquin ambi dada uamepampicpadomboen: “Ĕbi tantiaquidombo nec,’ quequin Nuquin Icbon tantiec.” Adnuc Esus tantiaquidēn: —Con Icho Esus nec —qeshun ambi icsamboen naid ēnendac.

<sup>20</sup> Esus tantiaquido nadquio iquec. Shubu dapan tsitsan tabēcaid tabadacimboecquid nec. Tsitsan abentse-abentsec icsactsēcquio icnubi utsi-utsiec bēdambo iquec. Icsactsēcquidēn icsa secanun sandoquid yendac. Bēdambo icquidēn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ēnabi: —Esus tantianu —quetsēcquid iquec. <sup>21</sup> Esus tantiaquidquio ictiadquio yec: —Muaid chuisho tantiatipimbo icquin nēbi Nuquin Icbon chiapadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.

<sup>22</sup> Caniabon mēmunenquio icquin abi bunacpadomboen naquid tanenda, mado. Adenquio yec bēdamboec tabadte bunquiota. Nuquin Papan chiaid niacte bunenquio yec: —Nuquin Icho Esus nec —quequidobēdtan chieshtoenquio icquin Esus tantiata. Matsetsen tantiec bēdamboec isanec bēdamboec tabadta. <sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidēn chuisho tantiash matses chushcananondashe. Aidēn chiac chienda. <sup>24</sup> Nuquin Papan chiaid chuibanquid chushcananenquio icquid nendac. Chieshēmēnenquio icquin aton matses bēdamboen isquid nendac. Adembidi nēishēnenquio icquin Nuquin Papan chiaid tantiamequid nendac. Utsibon chieshēnaqui chieshēnanenquio icquid nendac. <sup>25</sup> Esus tantiesabon: —Mimbi Nuquin Papan chiaid chuisho tantiatipimbo iquebi —cac ademi nēishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Īcsamboen naombi,” quequin ma Esus tantiesan tantiabenu —quequin aden chuibanendac. <sup>26</sup> —Aden Nuquin Papan ambi chiaidquio tantiamiac Esus tantienquio icboedēmbi Esus tantiabenshun abi yuaquidēn Satanasēn namiaid ēnendac. Aden Nuquin Papan chiapadomboen naindac —qeshun chieshtoenquio icquin Nuquin Papan chiaidquio chuibanendac abi chuibanquidēn.

### 3

#### *Icsambo icquido iquendac, quiaid*

<sup>1</sup> Tanta, mado. Mibi chuinu. Esus padpidec choabi icnuc matses dadpenquioshē icsamboshē iquendac. <sup>2</sup> Nadquido iquendac. Nēidic utsi tantiatipimbo yec abiuidsēqui datantiadquido. Nēidic piucquid bedte comapenec bunquidombo. Nēidic: —Is. Ĕmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquio icquido. Nēidic Nuquin Papan chiaid niac-niacquidombo. <sup>3</sup> Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquio icquido. Nēidic cuesanquido. Nēidic bēdambo icquid chieshēnquido. <sup>4</sup> Nēidic bēdambo icquid damianquiashic cuesunanquido. Nēidic bēdamboen tantienquio yec badedi icsa uanquido. Nēidic: —Ĕbiuidtsēqui bēdambo iquec —quec abibi tantiadquido. Nēidic ambi

naiduidi bunquin Nuquin Papa tantiesabo. <sup>5</sup> Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

<sup>6</sup> Adquidon mibi yacnoshon shubu utsin shubu utsinquin isben-isbenac caosh. Adash chidoidquio icnubi shubun puduedshun ambembi chiaid chuibanac caosh. Aden chuisho tantiaashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieq tabadac caosh aid chidobo. <sup>7</sup> Aden icsambo icquidēn ambembi chuidenesho tantianeshun Nuquin Papan chiaidquio tantiatiapimbo icpac caosh aid chidobo. <sup>8-9</sup> Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiaashun aidon: —Mue nec. Ēmbimbo comapenen tantiaquin ismenu —queboedombi bēdiactśc tantiaquin nacnenuidpampic. Adsho isun: —Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiaashun matses dadpen-shun: —Muequi nec —capendac.

*Nuquin Papan chiaid isbanec bēdamboec tabadte*

<sup>10</sup> Ēbien muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenuio icquin adembi chuibeniondambi. <sup>11</sup> Ēmbi aden chuibancho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquio bedshun cuēnoten se-sequin unēs uatsempondash. Adsho Nuquin Icbon nac unēsenquio iccondabi. <sup>12</sup> Ēbipadquido Esus tantiaquidotedi bēdamboec tabadtiadquio icsho adembidi utsibon comapenen chieshēnendac. <sup>13</sup> Padnuen chieshēmēnquidobēd bēdambo icquid damianquieq muaquido bēdiactśc icsambo icboedi mauuananquieq buēdanquieq icsamboshē yanendac.

<sup>14</sup> Mibi adquidpenquio nec, mado. —Ēmbi isonaidon bēdambo icquidon abimbo chuibanondashi —quec Nuquin Papan chiaid niaquenquio yec bēdamboec tabadta, mado. <sup>15</sup> Ēnden bacuēmpi icquin Nuquin Papan chiaidquio min matsesēn chuibancho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabēdac. Aden Nuquin Papan bēdamboen iste tantiametembo Nuquin Papan chiaid nendac. <sup>16</sup> Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdambohē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icšainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. <sup>17</sup> Nuquin Papan: —Ēmbi chiaidquio tantiaashun Esus tantiaquinc matses



nashunquinc caic Esus tantiaquido ma bédamboec tabadnu —quequin ambi chiaidquido dada uamepampic.

## 4

### *Nuquin Papan chiaid chuisho tantienquio yaid*

<sup>1</sup> Nuquin Papabédtan Esuquidistun mibi iseqe. Bédamboen nata. Esusèn nídaidèn padpidec choshon abitedishun Ícbombo icquin unésaido uincuemiaido unésabi icquidobédta chiendac. —Néid ébi tantiaquid ébédi tabadmembí. Néid ébi tantiesa cuidembí —quequin chiendac. <sup>2</sup> Aidèn chiacpadomboen naquin Nuquin Papan chiaidquio chuibanta, mado. Matsesèn tantiatiadquio icnuc adota. Tantiatiapimbo icnubi adembi chuibanta. Esus tantiaquido icsasho isun: —Ésus tantiaquido ade-sambo neque. Bédamboembien natiad —quequin nëishëmënenquio icquin chuita, mado. Utsibo bédamboec tabadsho: —Mibi bédamboec tabadoç. Aduidequi tabadta —quequin chieshtoenquio icquin chuita. Bédiactśc tantiatścquido: —Esus tantiaquidon nadoquid —quequin chuibanta, mado. <sup>3</sup> —Yuecshun Nuquin Papan chiaidquio matses dadpenshun tantiatiapimbo iquendac —qeshun nata, mado. Aden tantiatiapimbo icquidèn Nuquin Papan chiaidpenquio chuisho tantiash: —Mimbi ébi bunaidquio chuisho tantianu. Ébi chiec cho —quequin muaquid utsitsien abi yacno puduedmendac. <sup>4</sup> Pamumédacimboecquin Nuquin Papan chiaid tantienquio icquin tsusedpabon ambembi chiampiduidi tantiendac. <sup>5</sup> Aidèn nacpadomboen nainda, mado. Nuquin Papan chiaidquio bédamboen tantiaquid yec bédamboec tabadta. Adsho utsibon chieshënaqui chieshtoenquio icquin Esusquio tantiata, mado. Adem-bidi Nuquin Papan bédamboen iste Esus tantiesabo chuibanta. —Esus chuibanquidèn nadoquid —caidtedi nabanta, mado.

<sup>6</sup> —Ébi unës uan ëmbi nacpadomboen: “Adota,” mibi caquid nibédtsiash —qeshun mibi aden chiec nebi. Nébi Nuquin Papan tantiacpadèn chieshëmënnquidon ébi unës uaic. <sup>7</sup> Utsibon chieshënubi ënenquio icquin Esusèn naid chuibeniombi. —Ébi bunaid bednu —quec comapenec titinquiacimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nëbi unës uaic. <sup>8</sup> Unës uacshobini matsesèn naid abitedimbo tantiaquidèn Nuquin Icbon: —Ébi tantiaquin ëmbi chiacpadomboenuidi naic mibi bédambo iccoque. Nuquin Papa yacno ébédi tabadmequin mibi bédamboshë ic-mendambi —caindac. Abi chote ushën choshon aden Nuquin Icbon ébi chiendac. Adembidi abi chosho iste bunquidotedi abi tantiaquido Nuquin Icbon abédi tabadmendac.

### *Timoteyo: Cho, caid*

<sup>9</sup> Nëbimbobi ébi isec cho, mado. <sup>10</sup> Utsibo nidanebon ëbentsëqui tsade-bique. Demas caid aton na bedteuidi bunec ébi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon <sup>11</sup> Ducas abentsëqui ëbéd iquec. Madcos bedbëtsenec cho, mado. Ébédtan aidëmbi nëshunquio Esus chuibantsi-ashe. <sup>12</sup> Tiquico caid Epeso yacno mibi yacno nidmiombi. <sup>13</sup> Shubu dadpen icquid Todoas caid yacno Cadpo cuëmëdquidèn shubun con na niamëdaccondashe. Con dashcute ëmbi dada uaidbédta bedbëtsenec

cho, mado. —Abitedi buantiapimbo iquebi —queshun nëish yua bitsi nacnenaid dada uaiduidtsëqui bëta.

<sup>14</sup> Shocosh nacnenquidën Adecandedo caidën comapenen chieshëndashi. Aid Nuquin Papan cuidendac, mado. <sup>15</sup> Nuquin Papan chiaid ëmbi chuisho tantiatipimbo icquin icsamboen chuishunondashibique. Choquin aid isenda: —Ëbitsen icsamboen chuishunushe —queshun. <sup>16</sup> Ënden tauamboen bedshun: —Quënën nauednu —cac cuidte chuiquid dapa ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpenshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —queshun ëbëd icboedo: —Chiec cho —caqui choenquo iccondash. Aden ëbi cacuidondaido tantiaquin: —Nuquin Papan aido cuidenquo icpashun —caimbi. <sup>17</sup> Nuquin Icbombini nianenquo iccondash. —Isadaidpembo matses utsibo ma ëmbi naid chuibenenu —quequin cuesambo icmepondashi. Adondaic icshobini chieshëmënquidon: —Cuesnu —cabededpondash. Nuquin Icbon nac aid matsesën unës uainquo icpondashi. <sup>18</sup> Padpiden chieshëmënquidon ëbi caic: —Ma mëyanac chieshtoshon Esus tantienquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —queshun: —“Nuquin Icho bëdamboshë iquec,” canuna ënenquo icquin —caimbi.

<sup>19</sup> Mibi yacnocquido: —Mibi caic: “Unësquo iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aitedi aden chuiban. <sup>20</sup> Mimi isondaic Edasto caid shubu dadpen icquid Codinto yacno tëshëndondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi. <sup>21</sup> Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquo iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aitedi adosh. <sup>22</sup> —Nuquin Icho Esusën abëd icquin con mado bëdamboen ispashun —quequin mibi tantiembi. Padi. Aitedi chuiquin dada uaombi, mado.

## TITON ISTE

<sup>1</sup> Pabado nebi. Nuquin Papan chiacpaden chuibenequid nebi. Adem-bidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquio ma icpanuna. Adquid iquec ma bēdamboec tabadpanuna. <sup>2</sup> Muesa Nuquin Papa nec. Adquid icquin, Ēmbi ěnden chiampicpadomboen ěnenquiocquin Esuquidistu tantiaquido ěbēdi tabadendac, quequin ma aidon tantia-panueshun adomboen chiaid chuiquidquio Esuquidistun icmiondashi. <sup>3</sup> Ambi tantiampicpadēn ambi chuipampid Esuquidistu tantiamenu-quin aidēn chuibeneta caid nebi.

<sup>4</sup> Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ěmbi tantiac-paden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ěbi icsaid cuidenquio yec Nuquin Papa bēpiscudac, quequin ma ěnenquiocquin mimbi tantia-panuna. Adecbidi Nuquin Papabēd tabadendabi, quequin tantia-panuna, Tito.

### *Quideta yacno nidshun Titon natequid*

<sup>5</sup> Ēmbi nauidboed mimbi naimenu, quequin mibi Quideta yacno ni-anombi ma mimbi ambi tantiaid icsa chiac ma Quideta yacnocquidon ěmpanuna. Adembidi, shubu dadpen icquid uano-uanoecquid yacno nidshun ěmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquiduidquio chuita, Tito. <sup>6</sup> Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquio ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēdta aton titan chiaid chieshenquiocquin nabantiad. <sup>7</sup> Aidi ut-sibēd bēdamboec tabadquin, Nuquibi nanuna, qeshun utsibēd onquen-quiocquin ambibi tantiacpadomboenuidi nabanesa ictiad. Adecbidi badedquio nēishesa ictiad. Adecbidi paēmboecquid nua aquesa ictiad. Adecbidi cuesnante bunesa ictiad. Adecbidi muaquin bēdesa ictiad. <sup>8</sup> Adecbidi Esuquidistu tantiaquid utsibo yuedquid ictiad. Adecbidi utsibobēd bēdamboec tabadte bunquid ictiad. Adecbidi utsi bēdamboec tabadsho tantia-ash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, qeshun naisa ictiad. Adecbidi, Naden naic bēdamboecquid yantsiabi, qeshun adomboen naquidquio ictiad. Adecbidi abimbo chuiquidquio ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Pa-pan chiacpadomboen nabanquid ictiad. Adquid nec, quequin utsibon chuisho tantia-ashun adquid Esuquidistu tantiaquid utsibo isbanquin bēdamboen tabadmequin chuiquidquio icta, quequin chuita, Tito. <sup>9</sup> Aden utsibo isbanquin bēdamboen tabadmenuequin chuiquid icta, cashun nēid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantia-ash ma utsibo bēdamboec tabad-panuna. Adembidi Nuquin Papan chiaid chuca uaquidēn chuiban-sho

Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuoata, Tito.

<sup>10</sup> Quidetabo nad iqueque. Chuinu. Tantia. Abi chuiquidën chiacpaden naisa Quidetabo dadpen iquec. Abimbo chiosh, camenuquin abimbo chiacbimboec aido onquec. Dadpenshun isadaidbon nacpadomboen nanuequin, Shui dëbid dëtemeta, quequin Quidetabon chiec. <sup>11</sup> Adquidon shubu utsin-utsingieci puduedshun ambi tantiaid icsa chuibanac utsin-utsingien tantiaish cuëshëdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bëdamboen chuibanquin ambi muaquin chiaid ëmeta, Tito. <sup>12</sup> Quidetabon matses ënden icnëdaid abentsëcshun naden aton matses chuipanëdash. “Quidetabo muaic chuinanquidombo nec. Aben icquid yuatemaïdbimboec uimanëmëncquido nec. Chonoadenquiocquin nua peshun nua actenequido neoaic,” quequin Quidetabo ënden icnëdaïdën chuipanëdash. <sup>13</sup> Abimbo chuiquidëncquido aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. <sup>14</sup> Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquidën chiacbimboen niacquidon chuisho ma tantiesa icpanuna. <sup>15</sup> Nuquin Papan Esuquidistu tantiamiaïdën icbon chiaid bëdamboen isoaic. Adomboembidi ambi uabanaïd isec. Adash abitedi bëdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nëid mishtemaïd nec. Nëid utsi petemaïd nec. Nëid utsi actemaïd nec, quequin chuibanquidën chiaid tantiec. Aden tantiec aton tantiate icsabudec, Icsaobi, quequin tantienquio iquec. <sup>16</sup> Nuquin Papa tantiembi, queshumbic Nuquin Papan chiacpadomboen niacquin tantiesa nebi, quiacbimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquid adquid neoaic. Naid bëda natiapimbo icquid neoaic, Tito.

## 2

### *Esuquidistu tantiec iccuedequido tantiametequid*

<sup>1</sup> Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiamet. <sup>2</sup> Mimbi paëmbocquid nua aquenquio icteniaccpadomboen Esuquidistu tantiaquid tsusiobo chuibanquin tantiamet. Adembidi, Mibi bëdamboquid nec, utsibo camenu, quec bëdamboec tabadtenequin tsusiobo ismequin tantiamet. Adembidi, Naden naic icsatsiabi, queshun mimbi nainquio yacpadomboen mimbi bëdamboen tantiaid aido chuibanquin tantiamet. Adembidi, Naden naic bëdamboquid yantsiabi, queshun adomboembidi naquid nebi, quequin tsusiobo chuibanquin tantiamet. Adembidi mimbia Esuquidistu tantiadoniaccpadomboen pausunaïd icquin ma adquiobidi tsusiobotsen yampanueshun tantiamequin chuibanta. Adembidi, Esuquidistu tantiec utsibobëd tantiananec mibi tabadteniaccpadomboen chuibanquin tantiamet. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudacpadomboen chuiquin tantiamet, Tito.

<sup>3</sup> Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdamboequid icmiaid nebi, quec bëdamboec mibi tabadteniactadomboen tantiamequin chuioa. Adembidi, utsi icsamboen chuiquid iquenda, quequin chuibanquin tantiaméoa. Adembidi, mimbi paëmbocquid nua aquenquio yacpadomboen chuiquin tantiaméoa. Mimbi bëdamboen nabanaid nëbi machocuenaido ismequin tantiamé, quequin ënden machoaido chui, Tito. <sup>4</sup> Aden chiac ënden machoaidon aton bënë aton bacuëbo chedobëd abi tabadaid tantiamenuequin nëbi machocuenaido bëdamboen ismepec. <sup>5</sup> Adembidi aidën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiaméoapec. Adembidi, Mibi inesa chudmenquio yec tabadta, quequin ënden machoaidon nëbi machocuenaido chuiquin tantiaméoapec. Adembidi, aton shubun tabadquin ambi nabanacpadomboen ismequin aidon nëbi machocuenaido tantiaméoapec. Adembidi, utsibo bëdamboen tantiaquin ambi nashunacpadomboen ismequin ënden machoaidon nëbi machocuenaido tantiaméoaic. Adembidi, aton bënë chiactadomboen nabanquin nëbi machocuenaido ismequin tantiaméoaic. Aden ënden machoaidon abi ismiactadomboen nëbi machocuenaidon naic tabadsho isash, Nuquin Papan chiactadomboen naic tabadec chidobo, quequin utsibon ispec.

<sup>6</sup> Adembidi, caniabo chuibanquin tantiamé, Tito. Naden naic icsatsiabi, quequin nainquio iquembi, quequin mimbi bëdamboen tantiacpadomboen caniabo tantiamequin chuioa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiamequin chuioa. <sup>7</sup> Bëdamboec tabadaid tantiamequin ismenu, quec mibibi bëdamboec tabadteneta. Mibibi icsainquicquin ismequin tantiamé. Adembidi mamënenquicquin bëdamboen chuiquin tantiamé. <sup>8</sup> Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesá mibi chieshëquid mibi icsamboen chuitiapimbo yec tabadendac.

<sup>9</sup> Adembidi yuabo chuiquin, Bëdambo iquebi, min icbo camenuequin ambi chiaidtedi chieshenquicquin nabanta, quequin tantiaméta, Tito. <sup>10</sup> Adembidi, min icbon na ampenquicquin bëdamboen dayun uaquin nashunquin min icbo isméta, quequin yuabo tantiamé. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboshë yanac. Con yua bëdambo icmequidën chiaid tantianu, quendac icbo.

<sup>11</sup> Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. <sup>12</sup> Aden chomiactadidën tabadquin utsibo tantiaquin Nuquin Papan chiactadomboen naquin ismiactadomboembidi naic bëdamboec tabadquid. Nuquin Papan bëdamboen tantiamiac bëdamboen tantiasho, Aidën bëdambo icmiaid icquin naden naic bëdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiamé, Tito. <sup>13</sup> Nuquin Papapadquid con Icbo Esuquidistu choaic, quequin caimbudec bëdamboec tabadébi, quequin chuiquin tantiaméoa. <sup>14</sup> Nuqui cainaid: Ëmbi con utsibo caid

ëbipadquid iquendac, quiash nuqui icsaid bedshunash abided cuidadec unëspanëdash. Adacsho aid tantiaquidquio yec bëdamboec tabadquid nec, quequin chuiquin tantiamé, Tito. <sup>15</sup> Èmbi chuiboedtedi chuibanquin tantiamé. Mimbía tantiaquid icquin, Èmbi chiacpadomboen nabanec tabadteneta, quequin Quidetabo chuióata. Mimbí chiacpadomboen nainquiocsho isun cuembo chuióata. Adecbidi, utsibon mibi icsamboen chuitiapimboen bëdamboec tabadteneta.

### 3

#### *Utsi tantiaquin nabantequid*

<sup>1</sup> Esuquidistu tantiaquidtedi bëpiscudmenquiocnuequin naden chuibanta, Tito. Min tsusiobon bëdamboen chiaid naquimbi adembidi mibi chuiquid utsibon bëdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui. <sup>2</sup> Adembidi, Utsi muaquin chienda, quequin chuióata. Adecbidi, Utsibobëd tantiananec bëdamboec tabad, quequin chuióa. Adembidi, Mimbí naiduidi tantienquiocquin nabanta, quequin chuióa.

<sup>3</sup> Ènden Esuquidistu tantiesá nuqui iccondac. Adquid icquin Nuquin Papan chiacpadomboen nainquío nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobëd icsamboec nuqui cuidnampondac. Adembidi, utsin bëdamboen isaid icsho isash nuqui nëishpondac. Adecbidi utsibobëd nëishash nuqui chushcanampondac. <sup>4</sup> Adquid nuqui icnuc matses tantiec abëd icquid icmenuec nuqui icsaid bedshunash abided cuidadec Esuquidistu chopanëdash. <sup>5-6</sup> Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bëdamboen nasho abi yacno tabadmendac, quenquío yec nuqui tabadec. Aidënquío nuqui icsate bunaid tantiamequioquin nuqui èmec. <sup>7</sup> Adec aton Mayan nuquibëd icsho isun, Bëdamboquid nec. Aidtedi ëbëdi tabadendac, quequin Nuquin Papan tantiec. <sup>8</sup> Èmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bëdamboec tabadpanuna. Èmbi chiacpadomboen Esuquidistu tantiaquidtedishun nadenec utsibobëd bëdamboec tabadquid nec, quequin chuita.

<sup>9</sup> Adec tabadec min tsusedpabo chiec utsibëd nëishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinëdaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita. <sup>10</sup> Adec onquequin Esuquidistu tantiaquido cuëshëdmenuequin chuibanquid icsho bëdamboen tantiamenuequin chuiban. Aden chiaqui niacbidanquin adomboembidi aidën chuióasho tantiasun aidi comapenen chuibanquin tantiaméoa. Aden chiaqui padpiden niacbidanquin adomboembidi chuióasho tantiasun cacumeta, Tito. <sup>11</sup> Adquid ambi icsamboen tantiacpadecuidi tabadquid neque. Adota. Mimbí chiaqui adecuidi tabadquid Nuquin Papa yacno nidiapimbo yec abibi cuidadtequid nendac.

#### *Utsibo chuiquin chiaid*

<sup>12</sup> Nēbi utsibo chuinu. Tantia. Adtemas Tiquico chedo ëbēdi iquec. Abentsēqui Quideta yacno nidmembi. Aid mibi yacno choambien mīmibi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi. <sup>13</sup> Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, quesho aton na nibēdsho isun menequin bēdamboen nidme. <sup>14</sup> Peshun acnu, quequin Esuquidistu tantiaquidēn chonoadquin nabanquid. Utsi nashunquīn adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

<sup>15</sup> Mibi tantiec tabadebi, quequin Tito chuita, ëbēd icquidon cacpadomboen dada uaimbi. Adembidi mibēd icquido Esuquidistu tanti-aquido tantiec ëbēd icquido tabadoaic.

Esuquidistun, Bēdambo iquebi, camiaido ma mibitedi icpanuna. Padi. Aiteded chiombi, Tito.

## PIDEMONËN ISTE

<sup>1</sup> Pabado nebi. Esuquidistun ëbi chuibeneta cac chuibansho quënën nauedaid nebi. Èbëdi Timoteyo iquec. Aidi Esuquidistu tantiaquid icsho nuqui con utsi caid nec.

Èbi yuedquid Esuquidistu chuibanquidquio mibi neque. Èmbi dada uaid isec onqueta, Pidemon. <sup>2</sup> Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiabimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Èmbi dada uaid bedash isec onquequin aido chuioata, Pidemon. <sup>3</sup> Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

### *Nuquin Papa chiec onquiaid*

<sup>4-5</sup> Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiaquid, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. <sup>6</sup> Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

<sup>7</sup> Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiaquid bëdambo iquebi, Pidemon.

### *Onesimo tantiaquin chuidoniaid*

<sup>8</sup> Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. <sup>9</sup> Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. <sup>10</sup> Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. <sup>11</sup> Ènden min yua icquin mimbi chiacpadomboen mibi nashunenquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

<sup>12</sup> Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. <sup>13</sup> Esuquidistu chuibansho quënën nauedshun tataniac caputiapimbocsho mimbi ëbi



nashuntiapimbo iquec. Adec mibi nashumëntiapimboconobi Onesimom-bini nashunosh, qeshun nidmetiapimbocquimbi mibi yacno nid-membi. <sup>14</sup> Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. <sup>15</sup> Yuecash cuëshëdenquo yec Pidemombëd Onesimo tabadoaindac, quequin Nuquin Papan tantiondacpadquiec mibi yacnoësh cuenëdaid mibi yacno nidash Onesimo tabadtsiash. <sup>16</sup> Onesimo min yua iccondaaid Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

<sup>17</sup> Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. <sup>18</sup> Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi. <sup>19</sup> Aidedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. <sup>20</sup> ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. <sup>21</sup> Ëmbi chiactedi daëd uaquin mimbi natsiac, quequin tantiec tsadebi, Pidemon.

<sup>22</sup> Nëidtsen chuinu. Tantia. Ëmbi tantienquiocnoc Pabado chonoshe qeshun abi ushondaaid nacenueshun nacenata, Pidemon. Mibi ëbi tantiec Nuquin Papa chiec onquiapadomboen badedquo Nuquin Papan mibëd icmepashuni.

*Utsibo chuinu quiaid*

<sup>23</sup> Esuquidistu tantiaquid utsibo ëbëdi iquec. Aidon chiaid chuinu. Tantia. Epapadas, abembi ëbëd icnuec quënën nauedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. <sup>24</sup> Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

<sup>25</sup> Nuquin Icho Esuquidistun mibitedi bëdambocquid icmebanacpadquiec ma tabadoapanuna, Pidemon.

Padi. Aided dada uaombique. Isec onqueta.

## EBEDEYON ISADAIDBON ISTE

*Abi yacnoshon ambi uaidon Icbombo Esuquidistu nendac*

<sup>1</sup> Ēndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. <sup>2</sup> Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubēdta uashun aidēnquiocquidtedi aton Papabēdtan uabanampidquio aton Madombo nec. <sup>3</sup> Aidi, aton Papa bēdaidquio yampidpadquidquiobidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ēmbi bēdamboquid icmebanaido matses nendac, quequin tantiashic abuc nidoash Nuquin Papabēd tabadoapanēdash aidquiobi. <sup>4</sup> Ad icnuc ambi abi yacnoshon uaido abipadquid nibēdec. Aidon con Icbombo caidquio nec. <sup>5</sup> ¿Ambi abi yacnoshon uaid mayan bēda isec:

“Con mado mibi nec.

Ēbi min papa nendac, quepecta Nuquin Papa iquec? Padenquio.

Adecbidi:

¿Nēidēn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

<sup>6</sup> Abēd Abiambo Yampidi nidaidēn tabadash choasho isun Nuquin Papan ismequin:

“Nēid con Madombo Abentsēqui nec. Aidquio tantiec con Icbo nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

<sup>7</sup> Ambi abi yacnoshon uaido mayan bēdabo naden Nuquin Papan chiec:

“Ēmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

<sup>8</sup> Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ēnenquiocquin ēbēdtan Chuiquid Abentsēcquio mibi iquendac.

Adecbidi namequid bēdaidquio mibi iquendac.

<sup>9</sup> Ēbipadquid iquec bēdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ēbi yacpadquidquio Icbo Abentsēcquiobi mibi nec. Mibēd icquido adquid nibēdec.

Mibi abentsēqui adquidquio iquec. Adquid iquec, Bēdambo iquebi, quec mibi cuishon quendac.”

10 Adembidi Nuquin Papan naden aton Mado chuioaic,  
 “Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

11-12 Aidtedi ēnēdendac.

Mibien nibēdantiapimbo yec abi tabadendac.

Aidtedi dashcute shēnibudaid niacbibomboen chuca uaindac.

Mibien Abiambo Yampid yec abi ēnēdesa mibi iquendac.

13 Nēbi cainec ēbēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bēda aden chuipampidta nepadic? Padenquio. Esuquidistu aden chuipampic. 14 Ambi abi yacnoshon uaido mayan bēdabo Nuquin Papan, Ēbēd tabadtequidombo nashunta, caido nec.

## 2

*Ambi chiaid tantiesa icchitomane, qeshun tantiadonequiota caid*

1 Adec abitedishun Icbombo aton Mado icnuc ambi chiaid chieshēnchitomane qeshun tantiadonequiec tabadnuna.

2 Ēndenquimboshē ambi, Naden nata, quequin chiaid ambi abi yacnoshon uaido mayan bēdabo chuimiapadomboenuidi naisa icsho isun Nuquin Papan cuidpampic. ¿Aden ēndenquimboshē ambi chiaid chieshēnquid ambi cuidpampicpaden 3 nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ēbi yacno Yuedanquid nebi, quequin aton Madonquio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien, 4 Ēmbi chiaidquio chuibanoapec, quequin ismenuequin aton Mayanēn Nuquin Papabēd icquidēn tantiamēbanacpadomboen nadatiambocquin utsi-utsien bēdamēbanquinc, mayan icsa dapuduedmequinc, unēsaid uincuemequinc caquin adquidēn-adquidēnquien nabededpanēdash.

*Matses icnu quiash Esuquidistu matsespanēdash*

5 Adembidi chuinu. Tantiata. Abi yacno Esuquidistu tantiaquido choash tabadsho isun, Nēido ēbi yacnoshon ēmbi uaido mayan bēdabo mibi chuiquid nec, quenquio Nuquin Papa iquendac. 6 Ēndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Ēbi chui, Papa. ¿Atotsieshun matses mimbi uaid pistsēcquio icsho mimbi comapenen tantiatequid aido icpec? Papa.

Adembidi, ¿Atotsieshun Adanēn tsyuecquido mimbi nashumpe? Papa.

7 Nēbi chuitan mimbi cac mibi yacnoshon uaid mayan bēdan adomboembidi chuioac matsesēn nabanec.

Yuecquiocshon mibipadquid matses mimbi icmendac.

8 Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nēbi abitedishun icbo matses mimbi icmiambo iquiec. 9 Utsien Nuquin Papapadquidquio yequi matsesun Nuquin Papan tantiamiacpaden ambi abi yacnoshon uaido

mayan bédabon chiac nabamboedi nēbi aton Papabéd tsadec abitedishun Icbombo yanac. Aidi Nuquin Papan chiacpadomboen nanuec nidaidēnshun tishac matsesash matses tantiec matses icsaid bedshunash abided cuidadec unēsash abitedishun Icbombo yampanēdash.

<sup>10</sup> Nuquin Papa abitedi uaquidquio icnuc ambi tantiacpadec iquec. Adquid icquin ambi, Matses icsaisa icmeshun con bacuē icmembali, quequin tantiacpaden ēbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanēdash. Aidi matses yec natiamianquiequi icsaisa yec unēsash uincuenash bēyucanec abi yacno dectatonepanēdash ma Nuquin Papan, Matses con bacuē icmembali, quequin tantiaido ēbi tsibanec dectatonepanu quiash. <sup>11</sup> Matses bédambo icmequid Esuquidistun Papa ambi bédambo icmebantequidon Papabidi nendac. Aton Papa Abentsēqui icnuc Esuquidistu Nuquin Papa yacno choash, Con utsibo nec, quependac <sup>12</sup> aton Papa chiec:

“Mibi chuiquin con utsibo tantiamenu, Papa.

Aidobéd tabadquimbi mibi chuinu. Tantia, Papa, quependac.”

<sup>13</sup> Adembidi chuioaic:

“Mibi tantiaquin mimbi chiampicpadomboen nabanash choaobi, Papa. Ēbi tsibantequid mimbi bédaidquio icmiaidquio bēc choaobi, quequin mibi chiendambi, Papa,”

quequin matsesabi yec abuc tabadquid Esuquidistun chuipampic.

<sup>14</sup> Matses namibéd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash <sup>15</sup> ma mayan icsan ambi dacuēdmiaido ambi yuaido icboedi matses ěmbi mēnchictequid ma icpanuna. <sup>16</sup> Ēmbi uaido mayan bédabo unēstequid icsho mēnchicnu, quenquio yec matsesash Esuquidistu unēspanēdash. Abadauanēn tsyuecquido mēnchicnu, quiash matsespanēdash. <sup>17</sup> Aden ambi chiacpaden nanuec matsespadquid yampanēdash. Adec matsesash matses nēnacpadquiec nēmpañēdash. Abi bundoacpadquiec bundopanēdash. Abi natiacpadquiec natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēspanēdash matses Nuquin Papan bédamboen istequid icmenuc. Adecbidi, Matses icsaisa yanabi yec chuibanec Nuquin Papabéd onquetiapimbo iquec, quec matses chuibanec Nuquin Papabéd aidi onquec. <sup>18</sup> Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquio icmec cho, cac badedquio choquin chieshesa nuqui icmendac.

### 3

*Abi yacno yuedanquidquio icquin Moises dēniacquid Esuquidistu*

<sup>1</sup> Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ěbéd onquequid dapa icoata caid Esuquidistu nec, quequin aidquio tantiaquionona.

<sup>2</sup> Nuquin Papan chiacpadomboen chieshenquiocquin naquido Nuquin

Papan shubun icquido abi tantiaquido iquendac, quequin Moisesën chuided-chuidedampicpaden Esuquidistun adomboembidi chuibampañédash. <sup>3</sup> Aidi Nuambo Yampid yec, Èbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. <sup>4</sup> Nèidted con shubun èbèdi tabadendac, quequid shubu icho nec. Aden Nuquin Papan chiacpadomboen aton shubun icquido bédambocquid icmequid Esuquidistu nec. <sup>5</sup> Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. <sup>6</sup> Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepañédash. Aidèn shubun icquid nebi, qeshun chieshenquiocquin cainquidquio aton shubun icquidquio nuqui nendac.

### *Chieshenda*

<sup>7</sup> Aton shubun tabadnuequid naden Nuquin Papan Mayanën ambi chiaid mibi bédamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

<sup>8</sup> Equipito yacnoësh cuète nibèdacno capuquin tsusedpabon,

¿Nuquibèdida Nuquin Papa iqueque? Tantiabono, qeshun ambi chiaid chieshëmpampicpaden chieshënenda.

<sup>9</sup> Cuète nibèdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan èbi cuidpeba?

Isbono, quiacpadquiec tsusedpabo icsamboec tabadpampic.

<sup>10</sup> Adec tabadsho isash nëishpondabi.

Èmbi chiaid chieshënec ambibi tantiacpadequi icsadenepampic.

<sup>11</sup> Adquid icsho isun chushcain: Èmbi abitedi uabanquin nainash èbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

<sup>12</sup> Abiambo Yampid Nuquin Papa abi iquec, quequin tantiash cuëshèdchitomane qeshun tantiadonequiota. <sup>13</sup> Nuquin Papan

chiacpadquiec tabadnuna, quec badiadquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiocpanuna. <sup>14</sup> Esusbèd icquid nebi,

quiondacaden tantiadenequin caimbudec aton matses yec Esus yacno nidanetequidquio mibi nendac. <sup>15</sup> Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uainda.”

<sup>16</sup> ¿Tsuentsin Nuquin Papan chiaid tantiashun chieshëmpampic? ¿Equipito yacnoshon bëyucanquin Moisesën buanaido Nuquin Papan

chiaid tantiash chieshquido yanenquioda icpampic? <sup>17</sup> ¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuète nibèdacnoësh icsaquidtedi unësbudnenquioda icpampic?

<sup>18</sup> ¿Abitedi uabanquin nainash èbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshënuquid Nuquin Papan chienquioda icpampic? <sup>19</sup> Ai, tsusedpabon Nuquin Papan chiaid tantiash,

Bédambo iqueque. Adonona, queboedombi, Nuqui nabocpadomboen

nanuna, quequin ambi chiaid chieshënsho Nuquin Papan abi yacno puduedmetiapimbo icpampic.

## 4

### *Ëbi yacno puduedash ëbëd tabadtequid quiaid*

<sup>1</sup> Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaique. Abi yacno abëdi ictiapimbo icchitomane quequin Esuquidistu tantiadonequionona.

<sup>2</sup> Ëbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantias, Nuquin Papan chiaid abimbo iquec, quiash tantienquo yanash, Aid cainu, quetiapimbo tsusedpabo utsi-utsiec yampampic. <sup>3</sup> Ambi chiaid tantiaquidomboen nëbi aidbëdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenash tabadpampic. <sup>4</sup> Abi tabadaid chuiquin Nuquin Papan naden dada uamiampique. Tanta: “Seistedec ushquin abitedi uabanash badiad utsin ënash tabadpobi.” <sup>5</sup> Ashumbic nadentsen dada uamiampic:

“Ëbi ënash tabadacno ëmbi chiaid chieshënquido chotiapimbo iquendac,” quequin chuipampic.

<sup>6</sup> Aden chuimiatic ëndenquimboshë ambi chiaid tantiesa icquin niacniacquec Nuquin Papabëd tabadtiapimbo icpampid icnubi ambi chiacpadomboen naquin caimpampidobëd nëbi nidaid utsi-utsiec icquido Nuquin Papabëd tabadtequid nendac. <sup>7</sup> Ambi tantiacpadën Nuquin Papan chuimiapaden Dabid padon:

“Icsachitomane queshun Nuquin Papan chiaid tantiaquiota,”

quequin dada uapampic. <sup>8</sup> Chuiquid dapa Dabid tishamboecnoc Equipito yacnoësh nidaid Canan yacno abi chuiquid dapa Osuebëd isadaidbo chochopampic. Capuec ënëdash nidaid Canan yacno cho-choash isadaidbo ënëdenquo yec tabadte icnuc, Ëbi yacno ënëdenquo yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquo ictsenampic. <sup>9</sup> Aden Dabid pado chuimiatic tantias abi tantiadonequidombo Nuquin Papabëd tabadquido nendac. <sup>10</sup> Aden uabanquin nainash Nuquin Papa tabadacpadecec ambi bëdambo icmenuequin tantiactedi nabanquin nainash aidbëdi tabadendac. <sup>11</sup> Nuquin Papabëd tabadnuequin ambi tantiacpadecec icnuen nainu, queshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadecec icmane queshun adonona.

<sup>12</sup> Nuquin Papan chiaid ambia chuipampidquido abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isacimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimi tantiaid icsa nëid icnubi mimi tantiaid utsi bëdambo iquec. Adecbidi, mibi bunaid icsa nëid icnubi mibi

bunaid utsi bēdambo iquec, quequin tantiamebanshun mimbi tantiaid icsa mibi bunaid icsabēdtabi ěnta, quequin Nuquin Papan chiaidēnquo mibi tantiamendac. <sup>13</sup> Abitedi isquidquo Nuquin Papa nec. Adquid icquin matses ompodtiapimbo noc isendac. Adembidi, Ęmbi chiacpadomboenda matsesēn nabanoshe. Tiantianu, qeshun, abi yacno tabadnuequin cainquido bēisquioquin ambi nabanaidtedi chuimendac.

*Matses chuibanec Nuquin Papabēd onquequid dapa Esuquidistu*

<sup>14</sup> Adec Nuquin Papa abitedi isquidquo icnubi icsambocquid icquin ambembī matsesēn aid chuitiapimbocho isun abi tantiaquido chuibanec Nuquin Papabēd onquequid dapa ěnden abi yacno dectatonēdaid Esuquidistu nec. Aidi Nuquin Papan Madombo nec, quequin tantiaia yanchitomane qeshun aidquo tantiaquionona. <sup>15</sup> Matses chuibanec Nuquin Papabēd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquo Esuquidistun icpanēdash. <sup>16</sup> Adquid nuqui chuibanec Nuquin Papabēd onquequid dapa iquec, quequin tantiec dacuēdenquo yec abi yacno ěnden Esuquidistubēd puduedquidēmbimboen Nuquin Papa ěmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanēdash, quequin tantiec mibi icsaid bēpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanēn mibi chieshmenquiocquin dayacquio icmendac.

## 5

<sup>1</sup> Ęndenquimbo Nuquin Papan, Min matses chuibanec ěbēd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidēn capuquid yua cuesunedenequin taudenepampic. Adembidi, Mibi bēdambo iquec, Papa, quequin ismequin, Nēid menenu, cac Nuquin Papan naden nata cain chiacpadomboen naquin aton matsesēn bēaido cuesuneshun taudenepampic. <sup>2</sup> Aton matses chuibanec Nuquin Papabēd onquequid dapan aton matses icsasho isun, Con matsesbēdi icsaquid nebi, quequin <sup>3</sup> nidaidēn capuquid yua utsi-utsien cuesunedenepampic.

<sup>4</sup> Aidi, Con matses chuibanec Nuquin Papabēd onquequid dapa icnu, quenquo icpampic. Nuquin Papambi, Min matses chuibanec ěbēd onquequid dapa icta, caid nepampic. Min matses chuibanec ěbēd onquequid dapa icta, Nuquin Papan abia caid Adon cuēmēdquid icpampic. Aidi unēsān abi tsibanquid-abi tsibanquidquien Nuquin Papan, Min matses chuibanec ěbēd onquequid dapa icta, caid icpampic. <sup>5</sup> Adembidi Nuquin Papan, Matses chuibanec ěbēd onquequid dapa icta, caid Esuquidistu iquec. Ębibidi adquid icnu, quenquo Esuquidistu icpanēdash. Aton Papambien:

“Mibi con Madombo neque.

Con shubun icquido mimbi icmiaido chuibanec ěbēd onquequid dapa icta,”

capampic aton Papan Esuquidistu chuiquin. Adembidi Esuquidistu chuioaquin aton Papanquo:

“Matsesash icsaisa yec min utsibo icsaid bedshunash cuidadec unēsash uincuenash matses chuibanec ěbēd onquequid dapa icta,”

capampic. <sup>6</sup> Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.  
Adquid yec ënëdenquioctequidquio mibi nendac.”

<sup>7</sup> Adec, Con Pan chiampicpadquid icnu, quiash matsesacscho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquio icmepanëdash. <sup>8</sup> Nuquin Papan Madombo iquequi matsesacscho mëyanac Nuquin Papan chiacpadomboen tantiabempanëdash. <sup>9</sup> Aden tantiabenash matses icsaid bedshunash abided cuidadash Nuquin Papa yacno Yuedanquid yanquiopanëdash. <sup>10</sup> Adoacscho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

*Nuquin Papan chiaid ënden tantiaboedi tantiesa yanenda*

<sup>11</sup> Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidtedi chuitiadquiocquin mibi eme uacscho çmitsipadomboentsimbi chuibanquin mibi tantiamepe? <sup>12</sup> Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec. <sup>13</sup> Shuma chishquid bacuëmpi, Bëdamboen nata, quequin chiaid tantiesa nec. <sup>14</sup> Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenguidquio yanshun adomboen nabandenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

## 6

<sup>1</sup> Aden Esus chuiquin abia tantiamiaid bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquio icta. <sup>2</sup> Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bëdamboec tabadteneta. <sup>3</sup> Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. <sup>4</sup> Aden Esuquidistu tantiasho isun aton Mayan Nuquin Papan meniaid ichoedi <sup>5</sup> Nuquin Papan chiacpadomboen nadatiambocquin nabamboed, <sup>6</sup> Esus matsesquio yec icsamboquid nepanëdash, quiash, Esus cuesten dectan, quequidbimboecquid icscho Nuquin Papan aid isendac. Aidën oncain Esus mamënsnunec. Aden Esus tantienquio yanacscho bëdamboen tantiamenuen chuiquin, Icsaobique. Èbi icsaid ënu, cametiapimbo Nuquin Papan iquendac.



<sup>7</sup> Baded-badedquiec ue sequequin nidaid pachi uaidën tiedën caniq-uid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. <sup>8</sup> Echobëd cana shëta chedo ëshë idash dadpen yanushe queshun nêdëncatequid nendac. Adecbidi icsamboen chiaid tantiaquid uquë nësiatequid nendac.

<sup>9</sup> Aden mibi chuiquimbi, Nuquin Papan nësiatemaïd mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. <sup>10</sup> Adoac abi tantiaquid utsibo tantiaquin mimbi nashundeniaïd Nuquin Papan bëpiscudenquiocquin tantiec. <sup>11</sup> Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. <sup>12</sup> Aden nabanec chieshenquiocquin Nuquin Papan chiaïd tantiaquioquin tsusedpabomba caimbudec unësash Nuquin Papa yacno puduedampicpadec Esuquidistu tantiaquioquin ënenquiocquin caimbud-equi ma Nuquin Papa yacno puduedpanuna.

*Naden nanu quec Nuquin Papa muatiapimbo iquec*

<sup>13</sup> Ëndenquimboshë Abadauan bëdamboec tabadsho isun ambia tanti-aquidquio abi yampidquibidi icquin, Ëmbibi tantiacpadomboen nana. Abimbo caimbi, quequin Nuquin Papan naden chuiampic: <sup>14</sup> “Mimbi tishmiaïdën tsyuecquido dadpen iquendac, queshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuiampic. <sup>15</sup> Aden chuisho tantiashun caimbudquin tishtiapimbocquidëmbi Abadauanën chidon aton mado tishpampic.

<sup>16</sup> Abimbo caimbi, quequin abitedi tantiaquidënquio Nuquin Papan chiaç utsi, Muenec, quetiapimbo iquendac. <sup>17</sup> Adembidi, Ëbi yacno tabadte iquendac, quequin ënden yampidën Nuquin Papan chiaïd chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. <sup>18</sup> Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ëbi yacno tabadte iquec, quequin chiaïd chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. <sup>19</sup> Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec. <sup>20</sup> Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuec puduedash Medquisedecpadquid yampanëdash.

## 7

*Medquisedec matses chuibanec Nuquin Papabëd onquequid dapa*

<sup>1</sup> Medquisedec nad icpampic, Saden yacnocquido chuiquid dapa nepampic. Ambi Saden cain cuënaïdi yuecshun Edusaden cain cuënoapampic. Aidbidi Nuquin Papan, Matses chuibanec ëbëd onquequid dapa icta, caïd nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bëdamboen isaidquio mibi nec, quequin Medquisedequën Abadauan chuiampic. <sup>2</sup> Adsho tantiash, Nuquin Papan con mado bedmiaïd nebi, quequin ambi cuesuneboedën na ambi bedboed musuctanquin

abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnoquido chuiquid dapa icquin bëdamboen tabadmequid icsho Medquisedec cuëmpampic. <sup>3</sup> Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

<sup>4</sup> Aidi ëbi chuibanec Nuquin Papabëd onquequid dapa nec, quequin ismequin ambi bedaïd aton na musuctanquin Abadauanën Medquisedec menepampic. <sup>5</sup> Yuecquiocshon Nuquin Papan: Min matses chuibanec ëbëd onquequid dapa icta, caïd mibi icquin min utsibon aton na musucaïd bedshunta, quequin Debi chuiampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquio aton na musucaïd bedquid icpampic. <sup>6</sup> Medquisedequëmbien tsyuecquidpenquio icquimbi Debin tsusedpa Abadauanën na musucaïd bedshun, Nuquin Papan bëdamboen isaidquio mibi nec, quequin Abadauan chuiampic. <sup>7</sup> Bëdambo mibi icmenu, quequin Nuquin Papan chiaïd ambia chuiquid Medquisedec icpampic. <sup>8</sup> Yuecshun ambia chuibanec Nuquin Papabëd onquequid dapapadquiocquin aton matsesën na musucaïd bedquid Debi unëspampic. Adechidi aton tsyuecquido unëspampic. Padnuen Abadauanën na musucaïd bedquid Medquisedec unësesa yampampic. <sup>9</sup> Adquid icsho Debin buchisio Abadauan caïdën, Con tsyuecquid dadpen iguendac, quequin tantiaquin, Con na musucshun menenu, queshun Medquisedec menepampic. <sup>10</sup> Aton tsyuecquid tishambocnobi Debin buchisio Abadauan caïdën Medquisedec bëqueduidshun menepampic.

#### *Medquisedec yampidpadquid Esuquidistu*

<sup>11</sup> Abadauanën tsyuecquido Debipadquidon Nuquin Papan nadomboen nata quequin chiaïd nadenequin aton matses bëdamboquid icmian Medquisedecpadquid choenquio ictsempampic. <sup>12</sup> Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaïd nadenepampic. Nëbi Nuquin Papan chiaïd utsi naquid Medquisedecpadquid Esuquidistu nec. <sup>13</sup> Aidpadquid icquin Nuquin Papa nidaidën tabadte shubu uashunaidën pudedshun nambocpanëdash. <sup>14</sup> Aton tita Uda cuëmëdquidën tsyuecquid icnuc matsesash Udan tsyuecquid Nuquin Icho Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaïduidi chiec Moises, Udan tsyuecquid Debipadquid nec, quenquio icpampic. <sup>15</sup> Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaïd utsi iguendac, quequin nuqui tantiec. <sup>16</sup> Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquio Esuquidistu yampanëdash. Matsesash icsaisa yec unësash uincuempanëdash. Adec uincuenquid yec unëstiapimbo iquec matses chuibanec Nuquin Papabëd

onquequid dapa yanquiopanēdash. <sup>17</sup> Aid chuiquin Nuquin Papan nadopampic:

“Ēenquiocquin matses chuibanec Nuquin Papabēd onquequid dapa Medquisedecpadquid mibi nendac,”  
quequin chuiampic.

<sup>18</sup> Aden chiambien matses chuibanec Nuquin Papabēd onquequid dapa Debipadquid Nuquin Papa nidaidēn tabadte shubu uashunaidēn puduedshun ēnden nadomboen nata cain chiacpadomboen nadenequin aton matses icsaisa icmetiapimbo icpampic. <sup>19</sup> Adoaid Nuquin Papa yacno puduedtemaid matses icpampic. Nēbien bēyucanec puduedash Nuquin Papa yacno abi tantiaquido chuibanec Nuquin Papabēd onquec tabadec, quequin abi yacno yuedte caimbudec nidaidēn Nuquin Papabēd tabadacimboec nuqui tabadec.

<sup>20</sup> Abimbo caimbi. ¿Matses chuibanec Nuquin Papabēd onquenu quec puduedquid ēnēdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouidtsēqui chuiampic. Debi unēsan aton tsyuecquid aton matses chuibanec Nuquin Papabēd onquequid dapa icpampic. <sup>21</sup> Nēbi Nuquin Papan aton Madombo caic:

“Icbo icquin matses chuibanec ēbi chiec puduedoata, mado, quequin abimbo chiemi.

Aden chuiquin chuca uainquio iquembi.

Ēendenquio yampid yec ēbi yacno utsi puduedmenush ēbi chiec puduedash ēnēdenquio yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanēdash.

<sup>22</sup> Adquid yec matses icsaid bedshunash abided cuidadash abi tantiaquido yuedec bēyucanquid Esuquidistu nec. Debibēd aton tsyuecquid adecbidi adquid ictiapimbo iquec.

<sup>23</sup> Debi adecbidi aton tsyuecquido unēstequidquio iquec yuen chuibanec Nuquin Papabēd onquequid dapa ictiapimbo iquec.

<sup>24</sup> Esusien abi yacno chuibanec bēyucanec puduedash ēnēdenquio yec Nuquin Papabēd onquequid dapa nendac. Adquid utsi nibēdendac.

<sup>25</sup> Adec Nuquin Papa yacno ēnēdenquio yec tabadquin abi tantiaquido chuibanec aton Papabēd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

<sup>26</sup> Adec aidi abi yacno yuedanquid, icsa nibēdquid, icsa uatiapimbocquid, icsa nibēdquiec yacno tabadquid yec abi tantiaquido chuibanec Nuquin Papabēd onquequid dapa yampanēdash.

<sup>27</sup> Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidēn capuquid yua cunesunenu, quenquio icpanēdash Esuquidistu. Matses icsaid bedshunash abided unēsapanēdash padpidec unēsenuquo icnush. <sup>28</sup> Debibēdi abipadquid icsaquid icsho, Min matses chuibanec Nuquin Papabēd onquequid dapa aid icmeta, Nuquin Papan cac Moisesēn Debi adquid icmepampic. Nēbi Medquisedecpadquidien Bēdambocquid icpampid ēbēd onquec ēbi yacno Puduedquid Abentsēcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

## 8

*Matses chuibanec Nuquin Papabēd onquec abi yacno puduedquid*

1-2 Adec Esuquidistu abi tantiaquido chuibanec Nuquin Papabéd onquequid dapa Nuquin Papa tabadacnombobi puduedoash aton Papa Abiambo Yampidbédquio onquec tabadec. Debipadquidoen aton matses chuibanec nidaidèshun Nuquin Papa tabadte shubu uashunaidèn puduedash auèshquio Nuquin Papabéd onquepanédash.

3 Con matseshèdi icsaposh icmanendac, queshun aid shubun puduednu queshun umanucshun nidaidèn capuquid yua aidon cuesunepampic. Adembidi Nuquin Papa tantiaquin menenuequin aton matsesèn bè-bèaid bedshun nadenepampic. Esusien Nuquin Papa yacno puduedoanush, Èbi icsaid èbibi cuidadnu, quenquio yec matses icsaid bedshunash abided cuidadpanédash. 4 Aidi unèsabi yec nidaidèn tabadnuc Moisesèn chiacpadec Debipadquid matses chuibanec Nuquin Papa chiec onquequid icpanédash. Adquid icnuc nidaidènuèsh matses chuibanec Nuquin Papabéd onquequid dapa ictiapimbo Esuquidistu icpanédash. 5 Nidaidèn tabadquin Nuquin Papa tabadte shubu uashunaidèn puduedshun Debipadquidèn nashumpampic. Èndenquimbo Nuquin Papan shubu naden icchitec, quequin abi tabadte shubu uanu, quesho tantiashun: “Macuèsh yacnoshon chuibocpadomboen shubu uame,” Nuquin Papan cac Moisesèn chuiopampic. Aden chiac Nuquin Papa tabadte shubu uashumpampic. 6 Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabéd onquec puduedpanédash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabéd onquec abi yacnombo yuedanquid ictiapimbo icpampic. Esuquidistuen Nuquin Papabéd abia yampid bèyucanec abi yacnombo nidoash abi tantiaquido chuibanec Nuquin Papabéd onquequid yec yuedanquidquio nec.

7 Èndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempanédash. 8 Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash èmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

9 Aidèn tsusedpabo Equipito yacnoshon bèyucamequin

èmbi chiacpadpenquiocnoc chiaid utsi iquendac.

Èmbi abia naden nata cain chiaid Isadaidbon chieshènsho

utsibon natiacquin mèyansho isun isadaidbo mènchicambocondambi.

10 Ènden chiaid adquio icnuc:

Nèbi èbéd tabadmetequid chiaid nendac, quequin isadaidbo chiemi.

Èmbi nadomboen nata cain chiaid isadaidbo pausunendambi tantiate bunquionoc.

Aden tantiamiash aton Papa iquendabi.

Adecbidi adquidquio con matses iquendac.

11 Adoaid Nuquin Papa tantiaquid icta, quesa iquendac.

Abitedi èbi tantiaquidquio iquendac.

Nèidtedishun èbi tantiendac:

Nèidic, bacuèbo; nèidic, caniabo; nèidic, tsusiobo aidtedshun.

12 Aido icsaidtedi padpiden tantienquio yec bèpiscudendabi,”

quequin Nuquin Papan chiaid utsi nendac. <sup>13</sup> Chiaid utsi nec, quequin ėnden abia nadomboen nata cain chiaid ėnėdendac.

## 9

### *Nuquin Papa tabadte shubu uashunaidĕn puduedshun naid*

<sup>1</sup> Nuquin Papan ambi, Ĕbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ėbi tabadte shubu uashun cacpadomboen abi nidaidĕn tabadte shubu uashumpampic. <sup>2</sup> Nuquin Papa tabadte shubu uashunaid nitsinaid anquĕnĕ uaid daĕd icpampic. Baded-badedquiec puduedte anquĕnĕ uaidĕn tabote dectantebĕd pan sante cueste nacnenaid icpampic. Icsaisa anquĕnĕ uaid nec caid niosh. <sup>3</sup> Aid nuntambidi bitsipambocquid daĕdcashun dectanĕdaid shĕcuĕ anquĕnĕ uaid dayun uequid Isaisa Bĕdaidquio cain chianiaidquio niosh. <sup>4</sup> Aid nuntan bĕdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonĕn cueste tiaid dĕyucaid icoapampic. Aid sauedaid utsi cuĕnote pada uashun Nuquin Papan nadomboen nata quequin dada uaid icpampic. <sup>5</sup> Aid sauedte matincash tabadquid ambi abi yacnoshon uaid mayan bĕdambocquidbimboecnuc nacnenaid daĕd icpampic. Aid daĕd Nuquin Papa icsaisambo bĕchomauanquiec nac-nacquio ismiantequid icpampic. Nidaidĕn capuquid cuesunaidĕn intac dasecaid isun Nuquin Papan matses cuidenquioctsiash, quequin aidĕn podon dĕcatequin dectanaid diadpampic. Aid Icsaisa Bĕdaidquio anquĕnĕ uaid sanaidtedi chiombi.

<sup>6</sup> Aden shubu uashun aidĕn icquidtedi nambanash icsaisa anquĕnĕ uaidĕn baded-badedquiec puduedquidon Nuquin Papan Moises chiacpadomboen uesquin nabampampic. <sup>7</sup> Padnuen Isaisa Bĕdaidquio anquĕnĕ uaidĕn setan-setanquiec matses chuibanec Nuquin Papabĕd onquequid dapa puduedpampic. Baded-badedquiec puduedtemaid aid nec. Ĕmbi con matsesbĕdtan Nuquin Papan chiaid niacposh icmanendac, quequin nidaidĕn capuquid yua cuesuneshun intac bedshun buanec nuntan bitsipambocnoc daĕdcashun dectanĕdaid shĕcuĕ anquĕnĕ uaid dayun uequid Icsaisa Bĕdaidquio caidĕn puduedquid abentsĕqui nepanĕdash. Unĕsaidĕn intac buanenquio yec puduedtemaid aid anquĕnĕ uaid nec. <sup>8</sup> Adec aid anquĕnĕ uaidĕn puduedquid isadaidbo abentsĕqui icnubi Nuquin Papa yacno aton matses puduedte nibĕdec, quequin Nuquin Papan Mayanĕn tantiamete nendac. <sup>9</sup> Adembidi, baded-badedquien nidaidĕn capuquid yua cuesunedenec, Ĕbibi bĕdamboquid nec, quetiapimbo icpampic. Adembidi aton matses icsaisa icmetiapimbo icoapampic. <sup>10</sup> Adecbidi, Nĕidic petequid nec. Nĕidic actequid nec. Nĕid nanush mĕpamĕdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanĕn nuqui tantiamec.

### *Esuquidistu abided unĕsec intac chiuidaid*

<sup>11</sup> Ambi chiaid utsi tantiamenuec ambi uacmaid yec abipadquid Esuquidistu Nuquin Papabĕd tabadboedi nidaidĕn budash matsesash icsaisa yec matses icsaid bedshunash abided ciudadec unĕsash Nuquin Papa yacno matses chuibanec aton Papabĕd onquequin chuiquid dapa

iquec abi yacno Yuedanquid yampanēdash. <sup>12</sup> Nidaidēn capuquid yua cuesuneshun intac bedshun buanec Nuquin Papa yacno puduedenquio Esuquidistu icpanēdash. Aidi abia yampidi icsaisa matses icsaid bedshunash abided ciudadec unēsacsho cudan siac aton intac chiuidash Nuquin Papa yacnombo puduedoapanēdash. <sup>13</sup> Aidi matses icsaid bedshunash abided ciudadabicnuc nidaidēnshun natemaid nasho matses cuēshēdmepanēdash. Adoac utsibēd ictiapimbocsho isun nidaidēn capuquid yua cuesuneshun aidēn intachēdta sisapuc daēd uashun daseccac icsaisa icmiabi yequi aton shubun puduedoapanēdash. <sup>14</sup> Abia abēd yampid unēsesa aton Mayambēd iquec Esuquidistu icsaisambo yec, Matses icsaid bedshunash ēbided ciudadebi, Papa, quianec unēsacsho siac aton intac chiuidacsho isun uincuemiaidēn nuqui pauquec ma Nuquin Papan chiacpadomboen nate bunquidquio nuqui icpanueshun. <sup>15</sup> Adoaidi Nuquin Papan chiaid utsi chuiquin tantiamequid Esuquidistu icpanēdash. Ēnden matses yampid icsaidbēdtabi nēbi matses icsaid bedshunash abided ciudadec unēsapanēdash ēbi tantiaquido ēbēdi tabadmenu quiash.

<sup>16</sup> Adnubien abi unēste tantiec, Ēbi unēsan Ēmbi chiacpadomboen con na abitedi menebanta, matses quepec. Aden chuiquid unēsō isun ambi chiacpadomboen menebanec. <sup>17</sup> Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsān aidēn na icboedi utsin na yanec. <sup>18</sup> Adembidi ambi nadomboen nata cain chiaid Moises menequin, Ēmbi chiaidtedi nadenesho isun Ēmbi chiacnombo mibi buanembi, quequin Nuquin Papan chuipampic. Aden menequin chiac Moisesēn nadopampic. <sup>19</sup> Nuquin Papan chuibocpaden chuishun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampampic: <sup>20</sup> “Nēid Nuquin Papan chuibocpaden mimbi natequidquio nec,” quequin ismequin Moisesēmba abitedi daseccabampampic. <sup>21</sup> Adoshombic Nuquin Papa tabadte shubu uashunaidbēdta aidēn tabēcaidtedi daseccabampampic. <sup>22</sup> Cuesuniaidēn intac dasecatequid nec. Shubu chedo cuesuniaidēn intaquēn daseccabicquid mishtemaid nec. Adecbidi cuesuniaidēn intac chiuidenquiocnoc matses icsaid Nuquin Papa bēpiscudenquio iquendac.

<sup>23</sup> Nuquin Papa yacnombo puduednush icsaisa unēsēndac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puduedpampic. <sup>24</sup> Esuquidistu matses icsaid bedshunash abided ciudadec unēsash nidaidēnshun Nuquin Papa tabadtebimboecnuc shubu uashunaid yacno puduedenquio icpanēdash. Abi tabadacnombo abi tantiaquido chuibanec aton Papabēd onquec puduedash abi tabadec. <sup>25</sup> Ambo puduedash, Matses icsaid bedshunash ēbided padpidec ciudadnu, quenquio yec tabadec. Nidaidēnshun setan-setanquien Nuquin Papa tabadte shubu uashunaidēn puduedquin aton intacpenquio bedshun daseccadenec. <sup>26</sup> Matses icsaid bedshunash abided ciudadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquio iquec matsesash abi unēste ushēnquiobi matses icsaid bedshunash abided ciudadpanēdash nēid nidaid naimēdbudte anoentsēqui icnuc.

<sup>27</sup> Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. <sup>28</sup> Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choindac.

## 10

### *Abided cuidadec unëste abentsëquënciobi*

<sup>1</sup> Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinec bëyucanec Nuquin Papa yacnoësh yuedanquidquo choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. <sup>2</sup> Aidënquo daseccaquin matses icsaisa icmiac nidaidën capuquid yua padpiden cuesunenquo ictsempampic. Adecbidi, Icsambocquid nebi, quenquo matses ictsiandac. <sup>3</sup> Aton matses isaisa icmetiapimbocquin setan-setanquien nidaidën capuquid yuaded cuesunepanëdash. <sup>4</sup> Adshun yuan intac bedshun daseccaidën matses icsaisa icmetiapimbo iquec.

<sup>5</sup> Adoquien Esuquidistu nidaidënshun tishac caniach onquec: “Nidaidën capuquid yua cuesunenubi ëmbi chiacpadomboen matsesën natiapimbo iquec queshun yua cuesunete bunenquo mibi iquec, Papa.

Matsesën tishtequid mimbi icmiaidquo nebi, Papa.

<sup>6</sup> Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

<sup>7</sup> Adsho isun mimbi chuiquin dada uamiampicpadomboen naimbi, Papa.”

<sup>8</sup> Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuc <sup>9</sup> mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. <sup>10</sup> Aden Nuquin Papa bunacpadomboen nash unëstiapimbo yanshun abi unëste ushënquo abi tantiaquid paucpanëdash.

<sup>11</sup> Aden matses icsaid paucpec, quetiapimbo noc badiadquiën badiadquidëncien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac.

<sup>12</sup> Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. <sup>13</sup> Ambobi tabadquimbi abi chieshënciobi ambi chiacpadomboen naquidquo icmete ushë cainec. <sup>14</sup> Abided unëste ushënquo abi tantiaquid ambi icsaisa icmiac abëd cuëshëdesambo yampanëdash.

<sup>15</sup> Adembidi Nuquin Papan Mayanën Nuquin Papan chiaid utsi naden chiec:

<sup>16</sup> “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ěmbi chiacpadomboen nate bunquidquo icmendambi, quec Icho.”

<sup>17</sup> Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquo yec bĕpiscudendabi, queoaic Icho,”

quequin chuipanĕdash aton Mayanĕn. <sup>18</sup> Adec abi icsaid bĕpiscudash nidaidĕn capuquid yua cuesuneta quenquo Nuquin Papa iquec.

*Nuquin Papa yacno puduedte cainta*

<sup>19</sup> Adoaidi Esuquidistu unĕsacsho isun cudan siac aton intac chiuidan, Ambi paucaid nebi, quec dacuĕdenquo yec Nuquin Papan shubu icsaisa caid yacnombo puduedte ushĕ nuqui cainendac. <sup>20</sup> Matsesash abided cuidadec unĕsash Nuquin Papa yacno puduedoash tabadquid Esuquidistu nec. <sup>21</sup> Ambo nidash Nuquin Papabĕd onquequin aton shubun icquido nuqui Esuquidistun chuibanubi, <sup>22</sup> Ambi paucaid ambi dapanacimboecquidbidi nebi, quequin tantiaquin abi yacno choacimboben nidaidĕnshun Nuquin Papa chiec onquec tabadnuna. <sup>23</sup> Nuquin Papa ambi chiacpadomboen naquidquo nec, quequin abi tantiaquid yec abi yacno puduedebi, quequin caimbudnuna. <sup>24</sup> Aden tantiaquin abi tantiaquid utsibobĕd tantiananec bĕdamboec tabadquin nashununa. <sup>25</sup> Aden nabanec abi tantiaquid utsibobĕd iccuededtiapimbo iquebi, utsi-utsiec quiacpadec adenquo icnuna. Adec iccuededec, Nuquin Papan chiacpadquiec bĕdamboec tabadnuna, quec chuinanta. Niacquid dadpen icsho isash, Matsesĕn naid chuibanquin cuidte ushĕ badedquo choec, quiaish baded-badedquiec chuinanta bĕdamboec tabadte bunec.

<sup>26</sup> Ĕbi icsaid bedshunash abided cuidadec Esuquidistu unĕspanĕdash, quequin tantiaish icsaded-icsadedquid iquec, Adquidquo Esus nec, que-  
tiapimbo iquec. <sup>27</sup> Aid cuidte ushĕ chonoc nĕishun comapenen chush-  
caindac Nuquin Papan abi chieshĕnquido nibĕdamequin. <sup>28</sup> Nadomboen  
nata cain Moisesĕn chiaid niacsho isun daĕdshun chiac niacquid  
unĕsmiampic. <sup>29</sup> Nuquin Papan abia naden nata cain chiaid ni-  
actenequid adomboen cuidnushe quiaish ĕbi icsaid bedshunash abided  
cuidadec Esuquidistu unĕspanĕdash, queboedi, Ĕmbi tantiaboed Nuquin  
Papan Madopenquo matsesquo ĕbipadquid icsacsho cuesuniac, que-  
quin chieshĕnsho ĕcomapenen Nuquin Papan cuidenquioda icpadic?  
Adquid Nuquin Papan Mayanĕn bĕdambocquid icmenu quequin chiaid  
chieshĕnquid nec. <sup>30</sup> Nuquin Papan: “Ĕmbimbo ĕmbi chiaid chieshĕnquid  
cuidendambi,” quequin chiaid nec, quequin nuqui tantiec. Adembidi:  
“Abi tantiaquid icboedĕmbi tantienquo yansho cuidquidquo Nuquin  
Icho iquendac. <sup>31</sup> Abi cuidantequid dacuĕdampambo iquec,” quequin  
Nuquin Papan chiaid nec.

<sup>32</sup> Esuquidistu tantiaquid yanash mibi bĕdamboec tabadondacpaden  
tantiamec chuinandeneta. Esuquidistu tantiabnacchuca icsho  
chieshĕmĕnquidon mĕyanaqui, Esuquidistu tantiaquid nebi, quec  
dayacquo yec bĕdamboec mibi tabadteniondac. <sup>33</sup> Dadpen tabadnubi,  
ĕmbi tantiaid Esus nec, qesho mibi utsibon mamĕnshunondash.  
Adembidi aidon natiambocquin mĕyanac. Adomboembidi Esuquidistu  
tantiaquid utsi mĕyansho isun, Aidbĕd icquid nebi, quequin ismequin  
mimbi nashundenpondac. <sup>34</sup> Esuquidistu tantiaquid utsi quĕnĕn  
nauedaid icsho isash abĕdi tabadacimboec natiamianquiec unĕsquo



yec mibi tabadpondac. Adecbidi mibi chieshënquidën mitsana bedacsho isash Nuquin Papan ëbi metetequid ampetiapimbo iquec, quequin tantiec, Bëdambo iquebi, quec mibi tabadpondac.

<sup>35</sup> Adoaidi Nuquin Papan bacuë yec bëdambo iquebi, quiaash dacuëdenquo yec bëdamboen nabanec mibi ënden dayacquo iccondacpadquiec adquiecbidi tabadteneta. Adquid Nuquin Papa yacno puduedquid nendac. <sup>36</sup> Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. <sup>37</sup> Nuquin Papan chiaid nadquo iquec:

“Chiata. Nëbien mimbi cainaid mibi mënchictequid choendac.

<sup>38</sup> Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. <sup>39</sup> Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

## 11

*Nad iquendac, quequin tantiaquin cainquid*

<sup>1</sup> Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacimboen ëmbi tantiaid nec, quec tabadquidquo nebi. <sup>2</sup> Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

<sup>3</sup> Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmëbampampiba? quenquo nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

<sup>4</sup> Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquo icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquo abi iquec.

<sup>5</sup> Adnubien adecbidi abi tantiaquidquo Enoc icsho isun Nuquin Papan buanac unësesa icpampic. Bëdamboequid nec, quequin Nuquin Papan buanacsho nibënquin Enoc istuidambocpampic. <sup>6</sup> Abi tantiesa icsho isashien, Ëmbi bëdamboen isaidquo nec, quetiapimbo Nuquin Papa iquec, quequin tantiaash aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquo nec.

<sup>7</sup> Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Èbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquo aidquo icpampic.

<sup>8</sup> Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. <sup>9</sup> Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquo yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. <sup>10</sup> Nuquin Papa yacno ambi tantiapmpicpadomboen shubu uaidën tabadendabi, quequin cainec quenenenquo yec nidaidën Abadauan tabadtenepampic.

<sup>11</sup> Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. <sup>12</sup> Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

<sup>13</sup> Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenesh tabadenquo yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. <sup>14</sup> Nuquin Papa tantiaquid yec Nuquin Papabëd tabadendabi, quiash nidaidën quenenenquo yec aidtedi tabadpampic. <sup>15</sup> Ëbi tishondacnombo tantiec unësqüo iquebique. Ambo nidoaibi, quiash nidtsempampic. <sup>16</sup> Adenquo yec, Nuquin Papa yacno tabadendabi, qesho tantiash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

<sup>17-18</sup> Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. <sup>19</sup> Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

<sup>20</sup> Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

<sup>21</sup> Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

<sup>22</sup> Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitedi: Aid nidaid yacno nidnu, qeshun con canite buanta, quequin chuiopampic Osen.

<sup>23</sup> Adnubien adembidi Nuquin Papan bēdambo icmiaid con mado nec, quequin tantiaquin aton mado Moises tishun aton titan aton papabēdtambi ompopampic. Equipito yacnocquid ancanquidēn: Isadaidbon chidon dada bacuē tisho cuesuneta, quequin chiaid niacquin dacuēdenquioquin aton mado adopampic.

<sup>24</sup> Adnubien adembidi Nuquin Papa tantiec Moises caniacsho, Ancanquidēn champin mado mibi nec, caqui chieshēnec, Aidēn madopenquo nebi, queoapampic. <sup>25</sup> Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobēdtabi ancanquidēn mēyanaid iquendabi, quianec Moises cuēshēdpampic. <sup>26</sup> Yuecshun Nuquin Papa yacno yuedac bēdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesēn cainpampic. <sup>27</sup> Adembidi tantiaquin, Equipito yacnoēsh ēbi nidsho isash nēishun ancanquidēn con matses nidmenquo icpec, quenquo yec Nuquin Papa isacimboec Moises tabadtenepampic. <sup>28</sup> Yuecash Equipito yacno choashun adembidi tantiaquin, Bēyuec tishaid unēsmetequid ēmbi ēbi yacnoshon uaid mayan bēda ēmbi budmiaid min shubu datamenuen ēmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidēn capuquid yua cuesuneshun shēcuē cuēmano abiuc daēdi abuchēdta intaquēn ēcnoshcashun nami shuishun pan bidisquesabēdta pepampic. Adoacsho isun Nuquin Papan budmiaidēn datampampic.

<sup>29</sup> Adnubien adembidi Nuquin Papa tantiec Equipito yacnoēsh puduanec nidquin Acte Piu potec nidquid podqued nibēdboedi tanunquioquidēn uesadmiaidēn isadaidbon potepampic. Aden isadaidbon potenubi abēdtambi potenuc abi chieshēnquido Equipito yacnocquido acte chomiaidēn mentoadbudnepampic.

<sup>30</sup> Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuēscaïn tambanec dacuenadtanec shubu dadpen daquēnē uain tsai uaid sec uebudpampic.

<sup>31</sup> Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ēmbi yuedac ēbēd icquido cuesunenquiopec, qeshun dadpen chudmequidēn, Daba caidēn, isadaidbo aton shubun yuedquin ompopampic. Adoac nidoash aton matses utsibobēd abia choquido choash Dababēd icquido cuesunianenquiocpampic Nuquin Papa tantienquo yec chiesho Daban matses utsibo cuesunequimbi.

<sup>32</sup> Adecbidi Nuquin Papa tantiaquid dadpen icpampic. Nēidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. <sup>33</sup> Aido utsin-utsinqien: Abi ancaidobēdtabi ancanquid Nuquin Papa tantiesa nec, qeshun cuesunepampic. Adembidi, Mibi bēdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, qeshun bēdi nibēdquid deon caid tabadacno buanshun nebudpampic. Adosho

isun piantiapimbocon Nuquin Papan quiuëccac deonën penquiocpampic. <sup>34</sup> Utsin-utsinquin adembidi Nuquin Papa tantiaquid icsho, Nêdëncashun tainu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpimbochoedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. <sup>35</sup> Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededsëcquien cunesuniaqui, Nuquin Papan chiaid tantesa uainquio yec Nuquin Papa yacno nidebi, quiaish unësmpampic. <sup>36</sup> Utsi-utsien shoosh bucun mëtaneshun quënën nauedacsho isun mamëshunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic. <sup>37</sup> Adembidi utsitsen cuënoten seshunepampic. Adembidi utsitsen sënten nacsëshunepampic. Adembidi utsitsen nidaidën capuquid bitsi nacnaid dasiuidpampic. Aton na nibëdnubi mëyanaqui Nuquin Papa tantiaquidquo yec aitedi tabadpampic. <sup>38</sup> Nuquin Papa chieshënquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

<sup>39</sup> Aitedishun, Ëbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aitedi unësbudnepampic. <sup>40</sup> Aitedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

## 12

### *Aton bacuë Nuquin Papan dayacmenuequin namiaid*

<sup>1</sup> Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. <sup>2</sup> Esuquidistu, abitedishun icbombo abia yampidquo ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ëbi yacno matses yuednu, quiaish aton Papabëd tabadteneboedi matsesash icsambocquidbimboecnuc cuesten dectanac chieshenquio yec unësacsho uincuen uaid yanash aton Papabëdi Icbombo iquec. Aidquo tantiec isacbimboec nidaidën nuquibi tabadnuna. <sup>3</sup> Abi chieshënquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquio icpanuna.

<sup>4</sup> Ëbi icsaid padpiden nainquio icnu, qeshumbi natiatequid icnuc mimbi ënambo iccoc. <sup>5</sup> ¿Con bacuë cain Nuquin Papan mibi dayacquo icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquo icmenuequin chiaid cacuidenda. Adecbidi ambi natiamianquiopec camiaid icash chieshenda.

<sup>6</sup> Ambi matiamianquiopec camiaid dayacquo icmenuequin nametequid con bacuëbo nec.”  
quequin Nuquin Papan chiampid nec.

<sup>7</sup> Natiateguid mibi dayacquo icmetequid nendac. ¿Ëbi cudasaidquo con mado dayacquo icmenuequin namebanesa nebi, quecta aton papa icpadic? Padenquo. Ambi: Con bacuë nec, caid natiateguid icnuc, Dayacquo icmenu, quequin ancaquin chono uaic. <sup>8</sup> Natiateguid icnuc ambi dayacquo icmenu quequin namiaidpenquo yec, ambi, Con bacuë nec, caidpenquo mibi nec. <sup>9</sup> Ënden dayacquo icmenu quequin mibi ancaquidën mibi tishmequidën chiacpadomboen natiateguid icnuc naquidquo mibi icpondac. Nëbi Nuquin Papan dayacquo icmenu quequin chiacpadomboen natiateguid icnuc naquidquo icnuna abëdi tabadnuen. <sup>10</sup> Abi tishmequidën ambibi tantiapaden dayacquo icmenu quequin aton bacuë yuen nametiapimbo iquec unësendac. Paden nuen Nuquin Papan abipadquid icsaisa icmenu quequin natiaquionoc nuqui namendac. <sup>11</sup> Adoac nuqui natiaquiec tabadec. Adoaidi yuecash nuqui bëdamboec tabadendac. Adecbidi natiateguid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaguidquo yec natiateguid dacuëdënesa nuqui yanec.

<sup>12</sup> Aden tantiec dayacquo ictiapimbocboedi: Abipadquid iquendabi, quiash dayacquo yec tabadta. <sup>13</sup> Adenuidi naic tabadquin utsibo isme ma dayacquo ictiapimbocquin niaquec cuëshëdte bumboedi bëdambo yampanuna.

<sup>14</sup> Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Ichobëd tabadtiapimbocquid nendac. <sup>15</sup> Nuquin Papan bëdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban. <sup>16</sup> ¿Ada aton chidopenquo chudquid icpec? Adecbidi, ¿Ada adembidi aton bënëpenquo chudmequid icpec? quequin isnuequin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe queshun ¿ada Nuquin Papan bëdamboen tantiaid chieshënquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unësnun tsusio icquin con pan bëdamboen tantiaid chuisho mimbi tantiaata, quequin aton papan bëdambo icmenu quequin chiaid chieshquin Esaun tantienquiocpampic. <sup>17</sup> Yuecshun, Aton utsi Acobo aton papan chuibanosh, quesho tantiash shubiquin, Mimbi bëdamboen tantiaid ëbitsen chui, papa, cac chuitiapimbocquidëmbi, Ënden nibëdquiocnoc uesquin min utsi chiombi, quequin Esau chuipampic aton papan.

<sup>18</sup> Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuësh Sinai caid yacno choshon aidon isbenampid nëid iquec: natia nëdënquedote; utsibic, inchëshacimboec isadquid; utsibic, cunquequid dapabimboec isadquid; <sup>19</sup> utsibic, shocosh shoncaten shoncacimboec onquenuc pabiate paëmboshë icpampic. Adec onquesho tantiashun, Papa, mibi onquesho tantiac dacuëdampambo iqueque. Mibi chuitequid Moises icme, capampic. <sup>20</sup> Adec macuësh yacnombo icquin: “Ëmbi nadatiambocquin uabanaid ismenubi macuësh yacno anoentsëqui choenda. Adecbidi mat-ses adecbidi nidaidën capuquid. Anoentsëqui choquid cuënoten setequid nendac,” quequin chuipampic Nuquin Papan. <sup>21</sup> Aden Nuquin Pa-

pan nadatiambocquin uabansho isash: “Dacuëdampambo iquec, quiash, Dacuëdebi,” queoapampic Moisesetsen uëdëquec.

<sup>22</sup> Mibien dacuëdenquoio yec Macuësh Sion cashumbic Edusaden Chuca Bëdamboquid caid Nuquin Papa ënëdesambo tabadacno choacimboec mibi tabadec caimbi. Aid nuntan Nuquin Papan abi yacnoshon ambi uaid mayan bëdabo tambantiapimbo yec dadpenquioshë tabadec. Aido, ëmbi nashunaidtedi, Esus tantiaquid chotequid iquec, quiash bëdambo iquebi, quec cuëdëndonec tabadendac. <sup>23</sup> Abi tantiaquidtedi Nuquin Papan bacuë icho yacpadquiec aton shubu abentsëquënuëshi Icbobëd onquec ënden mibi taëpoc. Aidi mimbi naid cuidquid ambi chiacpadomboen nadenequid mibi unësesa icsaisabidi icmequid Nuquin Papa nec. Aidbëd ënden tabadacimboec abëdi onquec mibi taëpoc. <sup>24</sup> Abëd icquin Nuquin Papan ambi ënden chiaid ëmeshun ambi nëbi chuioaid, mibi chuibanec aton Papabëd onquec bëyucanec yuedanquid Esuquidistubëd ënden mibi onquepoc. Mibi icsaid bedshunash abided cuidadec unëso isun cudan siac intac chiuidnëdaid tantiec aidbëdi mibi onquepoc. Abedën nidaidën capuquid yua cuesuniampicpadquidën intac chiuidec unësaid tantiec Icbobëd mibi onquetiapimbo iquec.

<sup>25</sup> Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ënden chiaid chuiquid tantiate bunesa cuidpampic. ¿Adembidi ambi nëbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? <sup>26</sup> Ènden Macuësh Sinai yacno Nuquin Papan chiacnoshonquoio nidaid ishcampampic. Nëbien: “Padpidemboen nidaidbëdta abu ënëdmenuen ishconoaindambi,” quec Nuquin Papa. <sup>27</sup> Aden chuiquin ambi uaidtedi ënëdmenuen padpidemboen ishconoaindac abi yacno choaidtedi icsaisa icmiaido yec ënëdtiapimbo iccuedednuc.

<sup>28</sup> Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimboecnoc Nuquin Papan nadatiambocquin nabanaid tantiec cuëdëndonec tabadta. <sup>29</sup> Nadatiambocquid Icsaisabidi icquin aidëmbi, Esuquidistu tantiaata, quequin nëbi chiaid tantiesa chian anëdënquequid nësecaindac.

## 13

### *Nadomboen nata cain chiaid*

<sup>1</sup> Esuquidistu tantiaquid yec aid tantiaquidtedi con utsibo nec, quiash tantiananec nashunanta. <sup>2</sup> Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquoio Esus tantiaquid chosho yuedta. <sup>3</sup> Adembidi quënën nauedaid iquec utsi iste buntsiabi, queshun quënën nauedaid istan-istanta. Adecbidi buntsiabi, queshun menetanmenetanta. Adembidi utsin mëyanaid tantiec shubioata.

<sup>4</sup> Adec tabadec con chidopenquoio chudnu quesa iquec chido utsi isuidquid icta. Adesa icsho Nuquin Papan mibi cuidendac. <sup>5</sup> Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adec tabadquid Nuquin Papan ënden dada uamiampid naden chieci: “Mibëdi iquebi.

Nianenquiocquin mibi dayun uanuna.”

<sup>6</sup> Adsho tantiaash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënquid dacuëdënenquio iquëmbi,”

nuqui quendac. <sup>7</sup> Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bëdamboec tabadpanëdash. Aido tanec bëdamboec tabadoata. <sup>8</sup> Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

<sup>9</sup> Adquid Esus icnuc Nuquin Papa chieshënquidën chuisho tantiesha icta. Aidën naden chiec, Nëid petequid icnubi nëid utsi petemaid nec, quequin chiec. Mimbi piaidën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bëdambo icmiaidquio nendac. <sup>10</sup> Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquio matses Nuquin Papabëd tabadmetiapimbo iquec. Adem-bidi aidënquio nuqui icsaisa icmetiapimbo iquec.

<sup>11</sup> Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedacimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic. <sup>12</sup> Adembidi matses tabadenquio yacno Esus buanshun dectanac unësacsho siac aton intac chididiepanëdash nuqui icsaisa icmenuc. <sup>13</sup> Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquio yec tabadta. <sup>14</sup> Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

<sup>15</sup> Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. <sup>16</sup> Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

<sup>17</sup> Ambia Esus tantiashun chuiquidon chiacpaden nabanta. Nuquin Papan, Ebi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquio.

<sup>18</sup> Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. <sup>19</sup> Adembidi ëbi tantiaquin Nuquin Papa chuidoneta. Mimbi adonoc badedquio mibëd iquendabi.

<sup>20</sup> Adembidi utsibëd bëdamboen tabadmequid Nuquin Papan aton Mado matsesacsho utsibon unës uashun siacsho isun uincuemiac bëyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanëdash. <sup>21</sup> Adquid Esus

icmeshun ambi tantiacpadomboen ma Nuquin Papan mibi icmepanuna. Adoac, Ĕbi puduedmenuen Nuquin Papan naid nec, quequin Ĕnenquiocquin chuiquid ma icpanuna.

<sup>22</sup> Mibi tantiamenuen Ĕmbi dada uaqin chiaid daĕdpactsĕcquio icsho bĕdamboen isec onquequin tantiadoneta.

<sup>23</sup> Nĕbi utsi chiembique. Tantia. Timoteyo quĕnĕn nauedboedi nĕbi puduemiac aid badedquio nĕmbo choan aidbĕdi mibi yacno nidendabi.

<sup>24</sup> Mibĕd icquid Esus tantiaquid utsibobĕdta mibi chuiquidtedi tantiec tsadebi quequin Pabadon dada uaosh, quequin chuita. Adechidi ĕbitsen tsadebi quequin chuioata, queoapec nĕuĕsh Itadia yacno tabadquido.

<sup>25</sup> Nuquin Papan bĕdambo icmiaid ma mibitedi icpanuna. Padi. Aidedi dada uaombi.



## SANTIACON DADA UAID

<sup>1</sup> Santiacon nebi. Nuquin Papan namiaidquio, Nuquin Icho Esuquidistun namiaidquibidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

### *Natiametequid*

<sup>2</sup> Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. <sup>3</sup> Adaid icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquio icmec, quequin tantiec adecbidi tabadoata. <sup>4</sup> Aden tantiec tabadsho isun bédamboec tabadte uesquin tantiabenquidquio mibi icmendac ma Esuquidistupadquid yampanueshun.

<sup>5</sup> Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. <sup>6</sup> Ëbi tantieme, queboedi, ëbi tantiamenquiocpec quequin tantienda. Ëbi tantiemepec queboedi padenquio yanec cuëshêdec capuidequi yampec. <sup>7</sup> Adquid Nuquin Icho pausuntiapimbo icpec. <sup>8</sup> Adquid, Nuquin Papan ëbi tantieme, queboedi capuidequi icquidbimboec icpec.

<sup>9</sup> Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiata. Nuquin Papan bacuë nebi. Abëdi cuëshêdenquio yec tabadebi, quequin aiduidtsëqui tantiec tabadteneta. <sup>10</sup> Aton na dadpen icquidombien aton na bëdiactsec tantiaquin naden tantiendac: Con na nëdic chodquec; utsibic chiuidec. Adecbidi con nami shëribudequi Nuquin Papan bacuë nebi. Abëdi cuëshêdenquio yec tabadebi quequin tantiec tabadta. <sup>11</sup> Tanunquiocquidën tiedën caniquid unësec podò tididiquec. Bëdambochoedi nibêdquiec. Adquiecbidi icho aton nabi bedbanequi aton nami shëribudequi unësec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

<sup>12</sup> Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bédambo icmiaid nendac. Adquiecbidi, Ëmbi chiaid niaquenquio yec mibi tabadsho isembi. Èbêd icquid mibi neque. Pudued. Nëuëshquio mibi unëstiapimbo iquec, quendac Nuquin Papa. <sup>13</sup> Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. <sup>14</sup> Nidaidën tabadquidien icsate bunec abibi icsaic. Adecbidi ambibi tantiacpadec icsaoaic. <sup>15</sup> Icsamane quequin tantienquio yec unësacsho abi yacno puduedmenquiocquin Nuquin Papan uquë nësecaindac adquid.

<sup>16</sup> Utsibo, Nuquin Papan chiaid chieshënesa nebi, quec mibibi mua uadenda. <sup>17</sup> Nuquin Papan pausunaid bédambouidi iquec. Utsi uaquin namiantiapimbo iquec. Adenuidi namec. Adquiouidi Nuquin Papa iquec. <sup>18</sup> Ëmbi chiaid tantiaquidquio icsho con bacuë nec, caimbi,

quequin Nuquin Papan tantiampampic. Aden tantiaquin Nuquin Papan abi chuidonequidquo aton Mado Esus nidaidën budmepadeneq. Adec budash nidaidën capusho isash abëd ichoedo abi tantiaquido nuquitedi nec. Adquid icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquo dadpen yampanuna.

*Nuquin Papan chiaid tantiaquin nabanta quiaid*

<sup>19</sup> Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienquiocquin aid badedquio chienda. Adecbidi badedquio nëishenda. <sup>20</sup> Badedquio nëishquidën Nuquin Papan chiacpadquieq bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec. <sup>21</sup> Bëdamboec tabadesa icquin mimbi icsamboen tantiacpaden naid ënquiota. Aden ënu quiash, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshëdenquio yec abëdi mibi iquendac.

<sup>22</sup> Nuquin Papan chiaid tantiashun nainquio yequi Nuquin Papan chiaid bëdambo iquec, quec mibibi mua uadenda. Nuquin Papan chiaid tantiabocpadomboen nabanta. <sup>23</sup> Nuquin Papan chiaid tantiashun naisa isnanten <sup>24</sup> bëisadash bëpiscudacimboec bëpiscudendac. <sup>25</sup> Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Icbon chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac. <sup>26</sup> Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquidbidi bëdamboec tabadaid ismesa nec. <sup>27</sup> Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Èmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

## 2

*Nëid bëdambo iquec. Nëidien icsambo iquec, quesa icta quiaid*

<sup>1</sup> Utsibo, Nuquin Icho Esuquidistu Bëdaidquio nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta. <sup>2</sup> Mibi iccuededacno Esus tantiaquid mimbi isacmaid choec. Abentsëc bëdaidquio dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadensi mimbi tantiatpatsia? <sup>3</sup> Bëdaidquio dasiuidquid isun naden mimbi tantiatsiac:

Bëdamboquid nec. Aton na dadpen icquid nec, quiacimboen, Tsusion dayunquo tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiacimboen uano tsad mimbi caoapec. <sup>4</sup> ¿Nëid icsambocquid nec. Nëidien bëdamboquid nec, quiacimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bëdamboen tantiaquin naisa mibi neyoc.

<sup>5</sup> Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iguendac. <sup>6</sup> Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquo tsadumbocpadquidën utsin-utsinquien chono uashun mibi daëdpectsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? <sup>7</sup> ¿Adoanquidën baded-badedquien Esus queconquequin mamënshunenquioda ictiosh?

<sup>8</sup> Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bëdambo icpec. <sup>9</sup> Nëid bëdambo iquec. Nëidien icsambo iquec, quiacimboen naquid icnuc Nuquin Papan chiaid niacquid mibi iquec. <sup>10</sup> Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. <sup>11</sup> “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

<sup>12</sup> Mibi tantiaquin mibi icsaid pauquec Esuquidistuded icsambocquidbimboec yec unëspanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta. <sup>13</sup> Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsambocquid nec quiacimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënquid icquin icsambocquid nec quiacimboen icsamboen nashuntiapimbocquid mibi nec.

*Esus tantiaquid nebi quequin ambi tantiacpadomboen nabanquin isme quiaid*

<sup>14</sup> Utsibo, Nuquin Papan bacuë nebi, queshun ¿Icbon chiaid nainquiocquinda utsi bëdambo mimbi icmepadi? Padenquio. <sup>15</sup> Esus tantiaquid abi dasiuidtebëd pete nibëdquid, Bec cho, quesho <sup>16</sup> menenquiocquin, Nidecnid. Dashcutë bedash dasiuidta. Adembidi pete bedshun codocashun peta, ¿mimbi cacta bëdambo icpadic? Padenquio. <sup>17</sup> Adembidi, Nuquin Papan bacuë nebi, queshun Icbon chiacpadomboen naisa Icbon bëdambo icmiaidpenquio nec. Nuquin Papan bacuë nebi, queshun naisa Nuquin Papa yacno puduedtiapimbo icoaic.

<sup>18</sup> Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daédshun tantiacpadomboen mimbi tantieque? Chui. Tiantianu, quequin mimbi chuitsiac.

Adoaquí, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusèn chiacpadomboen naquin mibi ismimbi, caimbi. <sup>19</sup> Nuquin Papa Abentsècquiobi iquec, quequin mimbi tantiec. Aden tantiaid bédambo iquec. Adembidi, Nuquin Papa Abentsècquiobi iquec, quequin mayan icsatedishun tantiaoaic. Aden tantiaquin niacquido yec uèdèquec.

<sup>20</sup> Icsamboen mimbi tantieque. Tantia. Chuinu. Nuquin Papa Abentsècquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. <sup>21</sup> Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan èbi tantiaquidquioda neque? Tiantianu, qeshun, Min mado abentsèc mibi cudasaidquio èbi tantiaquin cuesuneshun tauita, cac Abadauanèn Nuquin Papan chiaid niacmane qeshun tauinuequin aton mado abentsèc setsempampic. Chèshtempti sanandosho isun, Padi. Chèn. Èmbi chiacpaden nanuesho mibi bédambo iquec, quequin mibi bédamboen isembi, ¿quequin chienquioda Nuquin Papan icpampic? <sup>22</sup> Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic. <sup>23</sup> “Mimbi tishmiadèn tishmiad dadpenquioshè iquendac,” quequin chiondashumbic Nuquin Papan yuecshun adembidi: “Min mado abentsèc cuesuneshun tauita,” quequin chuioaquí, Nuquin Papa abimbo chuiquidquio nec, qeshun ambi chiaid niacchitomane quequin, Abadauanèn aton mado abentsèc setsempampic. Adosho isashien Nuquin Papa, “Èbi tantiaquin naquidquio Abadauan nec. Adquid con matsesquio aidi nec. Aden aidi tantiaquin èmbi yuecquiocshon nanuequin tantiaid Abadauan chiembi,” quepampic Nuquin Papa.

<sup>24</sup> Nuquin Papan bacuè nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuè nebi, qeshun ambi chiaid naisa niacquid nec. <sup>25</sup> Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmèdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbèdta aidènquiocquid Icbobidi nec, quequin Daban tantiapampic. Aden tantiaquin Daban matses cuesunenuquido isadaidbo abia puduedquin isquid chosho, Nadatiambocquidèn matses nec, qeshun abi yacnoidtsèqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbèd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedèn chuibocpadquiobi Dababèd icquido cuesunianenquio yec isadaidbobèd icquidobimboec isec tabadpampic. <sup>26</sup> Nuquin Papa tantiaquid Daba yanshun bédamboen nasho isun mènchicaid Nuquin Papan con matses caidbèd tabadpampic.

Padnuen, Esus tantiaquid nebi, qeshun Icbon chiacpadomboen naisa cuëshédacimboec tabadec.

### 3

#### *Anan icsamboen chiec onquiaid icsa ënta quiaid*

<sup>1</sup> Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. <sup>2</sup> Chuibanquidtedishun chua-chuatsëquien chuibanantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquo adquid nendac.

<sup>3</sup> Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec. <sup>4</sup> Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec. <sup>5</sup> Cabayo canobidi nua icnuc abi bidiacmete aniaactsëc iquec. Adecbidi icbo nua icnuc aton ana aniaactsëc iquec. Aniaactsëcquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nëdënquiaid dëtsisidash badedquo nidacimboec onquiaid icsa badedquo nidoaic. <sup>6</sup> Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

<sup>7</sup> Nidaidën capuquid podochoquidbidi matsesën yuampicpaden abi yuaid iquec. Yua queneshash cuenenquiocquid. <sup>8</sup> Ad yenquo ana iquec. Quenenenquo yec ana onquebudec. Onquiaid icsa adecbidi ënëdtiapimbo iquec. Ana onquiaid icsa tantiabanec adecbidi icsabudquieic tabadendac.

<sup>9</sup> Nuquin Icho bëdambo iquec, qeshumbic ana icbon, Nuquin Icbon uaid matses icsambo iquec, quequin chuibanoaic. <sup>10</sup> Ana shëcuën utsi bëdamboen chuishumbic utsi icsamboen chuioaic. Aden nuqui chienquo ictiad. <sup>11</sup> ¿Acte batapenquiocquid choaidënuësh batambocquidta chopadic? Padenquo. <sup>12</sup> Adecbidi ¿cuëte bacuë batambocquidën ëshë bëchi chopecta dëyuctic? Padenquo. Adecbidi, ¿Isitodo dataniadaidën bacuë batambo yecta dëyucpadic? Padenquo. Aidi adesa yacpadquieic Esus tantiaquidën ana shëcuën utsi bëdamboen chuishun utsi icsamboen chiesa ictiad.

#### *¿Tsutsi Nuquin Papan chiaid tantiabenquidquo icpec? quiaid*

<sup>13</sup> ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bëdamboec tabadquin ismequid utsi-utsien ma icmëbampanuna. <sup>14</sup> Utsin tantiamenushe qeshun ëmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. <sup>15</sup> Adembidi, utsin dëniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. <sup>16</sup> Aden aidën icsamboen tantiacpadomboen abëd icquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuïdi bunquid yampec. <sup>17</sup> Nuquin Papan tantiacpadomboen pausunaid ad yenquo iquec. Ambi tantiacpadomboen pausunaid yec utsibëd

bëdamboec tabadquid iquendac. Adembidi utsi tantiaquin nashunquidquio icoaindac. Adembidi ëbëdtan nabanec cho cac nabanendac. Adembidi, Icsambocquid nec, quenquiocquin bëdamboen nabanquin ismendac. Adembidi, Esus tantiaquid nebi, abi quiacpadomboen bëdamboen naic. Adecbidi utsibo chiec muaisa nendac. <sup>18</sup> Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

## 4

*Ëbi nua pausun, quequin chiash Nuquin Papan dayunquio tsadta quiaid*

<sup>1</sup> ¿Atotsi quiaish Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabud-equi mibi chushcanancuededec. <sup>2</sup> Nëid bunebi, queboedëmbi bedti-apimbo yanquin mimbi cuesunec. Adecbidi, Utsi dëniacnu, quiaish chushcananec. Mimbi nauididi naquin Nuquin Papan tantiacpaden naisa mibi nec. <sup>3</sup> Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

<sup>4</sup> Mimbi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënnquid nec. <sup>5</sup> Adenquiocquin Esus tantiasho isun aton Mayan Nuquin Papan Esus tantiaquidtedi meniac bëdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tanti. Chuinu. Con bacué nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? <sup>6</sup> Aidëmbi abi chieshenquio yacpaden tantiamebanac icsamane quiaish chieshenquio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambi naid nasho isun pausuntiapimbo Nuquin Papa iquec. Icsaobi. Ëmbi bëdamboen tantiatiapimbo iquebique. Ëbi tantieme, Papa, qesho Nuquin Papan nua pausunac aton icbo chieshënnenquiocquid iquendac adquid.”

<sup>7</sup> Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquio tsadacimboecquin ambi chiaid tantiata. Nuquin Papa chieshënnquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac. <sup>8</sup> Aton dayunquio tsadquidbimboecquidbëd tabadquidquio Nuquin Papa nec. Icsash uano tsadquid icboedi bëchishash acten dapanudacimboen mimbi tantiaid icsa ënta. Adash, Tantiad bëda pausumenu, quiaish Nuquin Papan dayunquio tsadacimboecquin chieshenquiocquin ambi chiaiduidi tantiatadeneta. <sup>9</sup> Aden tantiec tsadboedi, Ëmbibi tantiembi, quec Nuquin Papa chieshënnquidën dayunquio uano tsadashic, Con Icho tantiec unësquio iquebi, quiaish shubiec mamënenquio yec tsadta. Mibibi uano tsadquid yash unësabimboec icboedi choec isadcuencacimboec Nuquin Papan dayunquio tsadacimboec yec chieshenquio yec bëdamboec tsadoata. <sup>10</sup> Uano icboedi choash, Ëmbi icsaobi. Nëbi icsate bunenquio iquebi. Mimbi chiacpadiadquio iquebi, Papa, quequin chui. Aden mimbi

chuisho tantiash, Puduedash nēmbo ëbëd tsadac bimboec mibi yanoaic, quependac Nuquin Papa.

<sup>11</sup> Utsibo, Esus tantiaquid tedi min utsibimboecquid nec. Mibëd icquid icsamboec chuinanenquo yacpadquiec Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacbimboecquid nec. <sup>12</sup> Nuquin Papa Chuiquid Dapa Abentsëcquiobi iquec. Ambi chiacpaden naquidquo nec. Nuquin Papa abitedi Isquidquo Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquo abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquin uguë nësecaindac. Nuquin Papan ambi chiacpadomboen naquidbëdtabi ambi chiacpadomboen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

*Ma badiadshun nanun chiaid tantiesa neyoc, quequin chiaid*

<sup>13</sup> Tantiaquidquo nebi, quiash, Piucquid bednuec seta abentsëc matamec chonoadec nidebi, quequid chuinu. Tantia. <sup>14</sup> Ma adquid badiadshun nanun chiaid tantiesa mibi neyoc. ¿Tedtsi seta matamec mibi tabadpe? Badiadbudnuc cuen-cuempambo yash badedquo nidac bimboec matses nidaidën tabadash adecbidi mibi nibëdanendac. <sup>15</sup> Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. <sup>16</sup> Aden chienquiocquimbi mibi utsi dëniaquec onquiaid mimbi chiec. Aden chiec icsaic. <sup>17</sup> Nuquin Papan chiaid tantiembi, qeshun adomboen natiadquidi naisa iquec icsaic.

## 5

*Na dadpen bedbanquin dayun uaquido chiaid*

<sup>1</sup> Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiaidquo buantiapimbo mibi iquendac. Aden mimbi bedbanquin daëd uaiduidtsëqui icsho isun Nuquin Papan mibi cuidendac. Adquid nebi, quequin tantiash shubita. <sup>2</sup> Unësosh, quequin chiac mimbi dadpen dayun uaid nibënquin isac ëden chodquiac. Adembidi mimbi bëdaidquo dectanaid capishton ënden piac. <sup>3</sup> Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unësacsho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënquo shubu nëdënquish nibëdacpadquiec mimbi bedbanaid nibëdquiendac. Adenuidi tantiaquin, Esus ëbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. <sup>4</sup> Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquo yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun tantiec. <sup>5</sup> Aido bunec sidquenubi chonoadenquiocquin nua pec mibi tsadec. Adec tsadquin min nami

bunaiduidi tantiaquin mimbi bedbanoaic. Nua pec cubudac bimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adec tabadec unēsash abi yacno mibentsēqui chosho Esuquidistu tantiamiamboecquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. <sup>6</sup> Mimbi chi-aid mimbi chono uaidon niaquenguioquon nabanacshobi, Icsamboen mimbi naoc, quequin daēdpactsēc mimbi menebampoc. Aden nabanec mimbi cuesuniac bimboec bunquieic chonoadequi unēsposh.

*Ma Nuquin Icbo chono quiash chieshesa icta quiaid*

<sup>7</sup> Nēbi utsibon chono uaido chuinu. Tantiata. Nuquin Icbo choec quequin tantiec chieshenquo yec tabadta. Nitsinash ma caninu quianec pec nidash cainec icbo tabadec. <sup>8</sup> Adembidi, Nuquin Icbo ēbi bednuec choec, quec bēdamboec tabadquin caimbudta. <sup>9</sup> Adec tabadquin Esus choate cainec Esuquidistu tantiaquid utsibobēd chieshēnanenda. Adec utsibobēd bēdamboec tabadsho isun abitedi tantiaquidēnquo Chuiquid Dapan mibi menequin bēdamboen cuidendac. Adesain menenquioquon cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquo chiendac, quec chieshenquo yec bēdamboec tabadta.

<sup>10</sup> Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquo chuibanu. Tantia. <sup>11</sup> Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsi-utsiectsēcquieccquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iquec, quec chieshenquiocpampic Obo. Adquid icsho isun daēd uaquin Nuquin Papan meneoapampic. Matses tantiaquin naquidquo Nuquin Papa nec, quequin <sup>12</sup> abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

*Nēidic bēdampec quequin abimbo tantianuc quiaid*

<sup>13</sup> ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec cuēdēntiad. <sup>14-15</sup> ¿Aton dada icsabudquidta icpec? Adquidēn ambia Esus tantiaquido chuiquin, Nuquin Papa ēbi chiec cho, catiad. Adsho tantias choshon icsabudquid tantiaquin anoshonuidi Nuquin Papa chuidoneta. Aden chuidoneshun cuēte bacuē ēnē chinshun dashunquinquin, Mimbi utsibo bēdamenēdacpadomboen mimbi tantiacpaden nēidtsen bēdame, Icbo, quequin chuita. Aden Nuquin Papa chuinin mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bēdamepanuna. <sup>16</sup> Abi icsaid uesquin Nuquin Papa chiash bēdamboec tabadendac. Adquidēn chiac dada icsambocquid Nuquin Papan bēdamendac.

<sup>17</sup> Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic.



Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. <sup>18</sup> Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

<sup>19</sup> Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacimboec icoaindac. <sup>20</sup> Aden mimbi chiac chieshenquo yec tabadsho isun Nuquin Papan uguë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aiteded dada uaombi.

## PETEDON DADA UAID 1

### *Petedon tauamboen chiaid*

<sup>1</sup> Petedo nebi. Abëd icquid icsho Esuquidistun: —Ëbi chuibeneta —caidquo nebi. Esus tantiaquidtedishun mimbi iste dada uanu. Isadaidbo icsho nuquin nidaidënsnun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidedi nidaid yacno tabadquidon iste nëid dada uaic nebi. <sup>2</sup> Ëndenquo Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquo icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquo iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquo icquin aido bëdamboen ista, Papa. Adembidi dacuëdenquo icnuc bëdambo icmeta, Papa —quequin Nuquin Papa mibi chianembi.

### *Esus tantiaquid Nuquin Papa yacno tabadte chiaid*

<sup>3</sup> —Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquo icquin utsiacbimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. <sup>4</sup> Ambi chiampicpadomboen bëdamboshë yacno Esusbëdquo ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquo nuqui tabadmendac —quequin nuqui tantiec. <sup>5</sup> Aden Esus tantiaquid icsho isash: —Con Mado Esus tantienquo yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

<sup>6</sup> Ëmbi aden chuisho tantiasho mibi cuishonquendac. Esus tantiesabon chieshënac shubiantiadtsëcquo yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquo iquendac. <sup>7</sup> Nuqui cudasquid yec ¿atotsi quiash Nuquin Papa: —Padi. Chën. Esus tantiaquido natiamenda —queboedi adenquo ictedictedpec? Matsu nacnenquidën: —Ma tsasinu —quequin ambi nacne- naid tauiec. Adembidi Esus tantiaquid chieshtoenquo icquid icmete Nuquin Papa comapenec bunec. Matsu nacnenquidën: —¿Bëdambo icquidida neque? Isnu —quetanquin matsu tauiec. Adembidi: —¿Esus tantiaquidquibida neque? Isnu —quequin: —Natiamenda —cainquo iquec Nuquin Papan. Aden natiamiaqui chieshtoenquo icquid icsho Esuquidistun padpidec choshon: —Mibi bëdambo iquec. Ëbëdi tabadec cho —quequin utsibo tantiamequin chuishun abi yacno buanendac.

<sup>8</sup> Aden mimbi isacmaidi Esus mimbi tantiaquiec. —Nëbi isadenquoio icquidi Nuquin Papan Madombo Esus ëbi bednuec choendac —quec mibi cuishonquianec. <sup>9</sup>—Abi tantiasho icsano nidmenquoio icquin Esusën abi yacno ëbi yuedendac —quec Esus tantiec mibi cuishonquianec.

*Esus chote tsusedpabon chiampid*

<sup>10</sup> Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquoio icte dada uapampic. Esusën nate abitedi tantienquoio icquin daëdpactsëc tantiaquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. <sup>11</sup> Aidobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënquin cuesten dectanac matses cuidmenquoio icnuec abided cuidadec unësendac. Adec unësacsho uincuemiapadpidec abitedishun Icho icoaindac —quequin Esus chote chuipampic. —¿Tsutsi chopec? ¿Teductsi yash chopec? —quequin abitedi tantiatiadquoio icquimbi daëdpactsëc isadaidbo tsusedpabon tantiapampic. <sup>12</sup> Naden Nuquin Papan tantiamepampic. —Mibi nibëdanan ëmbi chui-boed ëmbi matsesmiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiadquoio icquimbi abitedi tantienquoio iquec.

*Bëdamboec tabadte tantiamiaid*

<sup>13</sup> Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquoio yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquoio icquin. <sup>14</sup> Ambi: —Con mado nec. Con champi nec —caido icquin Nuquin Papan chiapadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda. <sup>15</sup> Mibi Esus tantiamequid icsaisambo Nuquin Papa neque. Ambi chiaid niaquenquoio yec bëdamboec tabadnuna. <sup>16</sup> Nuquin Papan ambi chiaid naden dada uamepampic. “Nuquin Papa icsaisambo nec,’ quiash icsaisa ictiadquoio yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

<sup>17</sup> Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Èbëdi tabadmenu —quequin matses abitedi chiendac. —Abëdi tabadmenquoio icnushe —quiash Nuquin Papabëd icte bunec bëdamboec tabadnuna. <sup>18</sup> Nuquin tsusedpabon chiaiduidi naquin Nuquin Papa tantienquoio nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanas nuqui bedshunuen ¿piucquidida Nuquin Papan menapanëdash? Padenquoio. Adquid icsabudtequid menenquoio icquin <sup>19</sup> aton Mado Esus icsaisambo icsho matsesmepanëdash. Aden matsesmiacsho chieshëmënuquidën cuesten dectanac Esus aton intac chididiquec abided cuidadec unëspandash. Nëbi aton Mado Esus tantiaquido bëdamboen isquin Nuquin Papan Satanas bedshunec. Aden Nuquin Papan bedshunaid yec bëdamboec tabadnuna. <sup>20</sup> Ëndenquimboshë

abitedi uabi Nuquin Papa nadpampic. —Ĕmbi tantiacpadĕn yuecash matsesash matses cuidmenquo icnuec mibided cuidadec unĕsta, Mado —quepampic. Aden ambi chiampicpadomboen badedquo namenquo icboedĕmbi nĕbi nameshun Esus tantiasho mibi bĕdamboen isec. <sup>21</sup> Abi tantiasho Esusĕmbi Nuquin Papatsen nuqui tantiamec. Adoac nuqui naden tantiec. —Esus unĕsacsho uincuemeshun abĕdi tabadmequin abitedishun Icbombo Nuquin Papan icmeoapanĕdash. Ambi chiacpadomboen naquidquo Nuquin Papa nec. Ĕbi unĕsacsho uincuemeshun abi yacno ĕbi tabadmendac —quequin Nuquin Papatsen nuqui tantiec.

*Esus tantiaquido tantiananquiotē chiaid*

<sup>22</sup> Nuquin Papan chiacpadomboen naic bĕdambo yanshun mibĕdtan Esus tantiaquido utsibo mimbi tantiec. Adecbidi muenquo yec tantiananquionona. <sup>23</sup> Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibĕdantiapimbo icquid icnuc ambi chiaid bĕnudtiapimbo iquec. Aidĕn chiaid tantiashun mimbi Esus tantiabempanĕdac. <sup>24</sup> Ambi chiaid bĕnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unĕsquid matses nec.

Cuĕte bacuĕec bĕdamboshĕ isadboedi badedquo chodquequid nec. Adecbidi matses: ‘Con nabĕdi bĕdamboshĕ iquebi,’ queboedi badedquo unĕsquid nec.

<sup>25</sup> Nuquin Papain nibĕdantiapimbo icquid nec. Adnuc ambi chiaid bĕnudtiapimbo iquec,”  
quequin abimbo chuiampic. Aidĕn chiaidquo mibi chiac caondash.

## 2

*Nuquin Papan chiaid iste bunquionona, quiaid*

<sup>1</sup> Aden Nuquin Papan chiaid tantiash chieshĕmĕnec tabadenda. Utsi mauuainda. —Esus tantiaquid nebi —quiashi icsamboec tabadenda. Utsin na isash: —Adquid con na nibĕdec —quec chieshĕmĕnec tabadenda. Utsibo chieshĕnec icsamboec onquenda. <sup>2</sup> Adenquo yec Nuquin Papan chiaid iste bunquionona. Tishac chucactsĕc bacuĕmpi shuma chishte bunquiacbimboec Nuquin Papan chiaid iste bunquionona. —Bĕdiactsĕc tantiaboedi aid isban-isbanquin Nuquin Papan chiacpadomboen natiadquo yantsiabi —qeshun Nuquin Papan chiaid isbanuna. <sup>3</sup> —Esus tantiec bĕdambo iquebi —qeshun Nuquin Papan chiaid isbanuna.

*Buintadbimboecquid Esus nec, quiaid*

<sup>4</sup> Nuqui tantiaid nadquo iquec. Shubu uanun buintadquo nactsinuen istuidshun: —Nĕid bĕdambo iqueque. Nĕidquo naimbi —quiachimboen Nuquin Papan: —Ĕmbi tantiaidquo yec mibi bĕdambo iqueque. Ĕmbi chiacpadomboen mibi namenu —capanĕdash Esus. Adoaidi matses dadpeshunquo Esus chieshĕnondash. Padnuen nuqui: —Nuquin Papa yacno puduedmianquid bĕdambo iquec —quequin nuqui Esus tantiabempondac. <sup>5</sup> Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiamē, Papa —quequin Nuquin Papa chianequid nuqui yanec. —Nuquin Papa bĕdamboshĕ iqueque. Ambi chiacpadomboenuidi

natiadquoio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. <sup>6</sup> Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquoio shubu uanun nitsinembi,’  
quiachimboen

Edusaden yacno ēbi bēdamboen ismequidquoio isadaidbobēd tabadmen-  
dambi.

Aid caic: ‘Nēid tantiasho Nuquin Papan abi yacno nuqui tabadmendac,’  
quequin abi tantiaquido unēsacsho ēbi yacno tabadmendambi.”

quequin Nuquin Papan ambi chiaid dada uamepampic. <sup>7</sup> Aid tantiec:  
—Bēdamboshē iquec —quependac Esus tantiaquido. Utsibombien Esus  
chieshēnec. Ēndenquimbo Esus choabi icnuc aidēn nate chuiquin Nuquin  
Papan dada uamepampic naden.

“Buintad bēdambo icquid istuidashi: ‘Nēidquoio shubu uanun nitsinembi,’  
quetiadquidi isuidacimboen Nuquin Papan namiaid chieshēnac.

Aden buintad isuidaidsin bedshun shubu uanun nitsinacimboen  
Nuquin Papan tantiamiacpadomboen utsibon ambi namiaid tant-  
tiosh,”

quequin Nuquin Papan dada uamepampic. <sup>8</sup> Adshumbic Esus  
chieshētetsen dada uamepampic naden chuiquin.

“Nuquin Papan abipadquidquoio Edusaden yacno isadaidbobēd tabad-  
miacsho ambocquidon chieshēnendac.

Aid chieshēnquid nadquoio iquendac. ‘Cuēte mabud iquec,’ quequin  
tantienquoio yec nidec tocoshquetanec uebudacimboec

ēbi bēdamboen ismequid tantienquoio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin  
Papan chiaid tantiatipimbo icquin Esustsen tantiatipimbo iquec. —  
Adquid icsano nidmendambi —quequin Nuquin Papan tantiacpadec  
Esus tantiesabo yec unēsash icsano nidendac.

### *Nuquin Papan matses nuqui nec, quequin chiaid*

<sup>9</sup> Esus tantiesabo dadpen icnubi Nuquin Papan Esus tantiamiaido  
nuqui nec. Icsambo iccondaids nuqui Esus tantiamepondash pa-  
poshquiachimboecnuc. Adoac: —Nuquin Papa bēdamboshē iquec. Ambi  
chiacpadomboenuidi natiadquoio iquebi —quec bēdamboec tabadquid  
nuqui yanec. Adembidi: —Con matses Esus tantiameta, Papa —quequin  
Nuquin Papa chianequid nuqui nendac. Adecbidi: —Nuquin Papa  
bēdambo iquec —quequin utsibo chuibanquid nuqui nendac. <sup>10</sup> Ēnden  
abi tantiesabo icsho Nuquin Papan mibi bēdamboen istiapimbo icquin: —  
Con matses mibi nec —mibi catiapimbo icpanēdash. Nēbi Esus tantiasho  
Nuquin Papan mibi bēdamboen isquin: —Con matses mibi nec —mibi  
caindac.

### *Bēdamboec tabadte chiaid*

<sup>11</sup> Ēmbi tantiaido mibi neque. Tantia. Mibi chuinu. —Nuquin  
Papa yacno tabadendabi —quiash Esus tantiesa icsate bunacpadec  
icsainda. —Esus tantienquoio yamane —quiash bēdamboec tabadta.  
<sup>12</sup> Esus tantiesabobēdi bēdamboec tabadnuna. —Ma aidontsen Esus  
tantianu —quiash adnuna. Adec mibi bēdamboec tabadsho isun  
mibi chieshēnquin icsamboen chuishumboedombi Esus tantiabenshun

Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

<sup>13</sup> Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. <sup>14</sup> Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. <sup>15</sup> Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ēntsiash.

<sup>16</sup> Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. <sup>17</sup> Matses abitedi bēdamboen isununa. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

#### *Yuabo chiaid*

<sup>18</sup> Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. <sup>19</sup> Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istsiashe. Min icbon chiacpadomboen nata. <sup>20</sup> ¿Icsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

#### *Chieshtoenquio yec Esus unēsaid*

<sup>21</sup> —Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —qeshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuec abided cuidadec mēyadec unēspondash. <sup>22</sup> Nuquin Papan dada uamepampicpadquio “muesambo yec icsaisambo icpondash.” <sup>23</sup> Adquid icsho abi chieshēnquidon mamēnshunaqui Esusēn chushcainquio icpondash. Aidon matonbudnetanquin buanshun cuesten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. <sup>24</sup> Adash: —Ēbi tantiaquid ma icsaid ucudacimboc bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdanshun Nuquin Papan aton Mado tantiaquido bēdamboen isec. <sup>25</sup> Yuan icbo cuenēnacimboc Nuquin Icho nuqui tantienquio icpondac. Adoboedi nēbi: —Con Icbon ēbi

bëdamboen dayun uaquin ëbi bëdamboen namendac —queshun nuqui Esus tantieque. Bëdamboen nanuna.

### 3

#### *Bënëbëdta chido chiaid*

<sup>1-2</sup> Tantia, chidobo. Bënëchoquid icsho mibi chuinu. Esus tantiaquid icquin min bënë chiapadomboen nata. —Esus tantiec ëbi bëdamboec tabadsho isun Nuquin Papan chiaid tantienquo icboedëmbi con bënë Esus tantiabentsiash. “Mimbitsen Esus tantiabenta,” quequin ëmbi chiambobi Esus tantiabentsiash —queshun min bënë chiapadomboen nata. <sup>3</sup> Bëdamboec tabadquid ictiadquo icquin casëdu payuteuidi tantienda. Adembidi dashcute bëdambo icquid dasiuidteuidi tantienda. —“Bëdambo isadec. Mibi bëdambo iquec,” mabi canu —quiash nacnemëdteuidi tantienda. <sup>4</sup> —Bëdambo mibi iquec —camenuc bëdamboec tabadta. Nëshëmënenquo icquin bëdamboen nabanta. Chieshenquo icquin min bënë chiapadomboen naquid icta. Mibi adquo icsho isash: —Mibi bëdambo iquec —quendac Nuquin Papa. <sup>5</sup> Èndenquimbo isadaidbo tsusedpan chido Nuquin Papa tantiaquid yec adquo icpampic. Aton bënë chiapadomboen naic bëdambo icpampic. <sup>6</sup> —Con bënë con icobimboec iquec —quequin aton bënë Abadauan caidën chiapadomboen Sada caidën napampic. Esus tantiaquid icsho mamëshunaqui min bënë dacuëdënenquo icquin aidën chiapadomboen naic bëdamboec tabadec Sadapadquo mibi ictsiac. Adquid bëdambo iquec. <sup>7</sup> Tantia. Bënësen chuinu. Abia uimabudquid icsho min chido bëdamboen ista. Mibëdta Esus tantiaquid yec Nuquin Papa yacno mibëdi tabadtequid neque. Min chido bëdamboen ista. —Èbi bëdamboen ista, Papa —quequin mimbi chiaid Nuquin Papan tantienquo icnushe. Min chido bëdamboen ista.

#### *Bëdamboec tabad, quequin chiaid*

<sup>8</sup> Nëbi Esus tantiaquido abitedi chuinu. Tantia. —Nuquin Papan chiapadomboen nanuna —quiash bëdamboec isnanuna. Cuishonquequidbëd cuishonquec shubiquidbëd shubinuna. Adec tantiananquionona. —Èmbi naiduidi naimbi —quenquo icquin utsibon chiaidtsen nanuna. <sup>9</sup> Mibi chieshënaqui cuidnanenda. Mibi chieshënquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Èbi chieshënquid bëdamboen isquin bëdamboen tabadme, Papa —quequin Nuquin Papa chianeta. —Èmbi bëdamboen isaidon ma aton mates utsibo bëdamboen isnu —queshun Nuquin Papan nuqui Esus tantiaquido icmiaye. Bëdamboec tabadnuna. <sup>10</sup> Adec bëdamboec tabadte chuiquin Nuquin Papan dada uamepampic naden.

“Bëdamboec tabadte bunquidën nadoendac.

Adonante bunenquo icquidëmbi utsibo muauainquo iquendac.

Chieshënquin utsibo icsamboen chienquo iquendac.

<sup>11</sup> Icsamboec tabadboedi bëdamboec tabadendac. Utsibo chieshënansho isash:

‘Padi. Chieshënanenda,’ quendac.

<sup>12</sup> Adec bëdamboec tabadsho Nuquin Papan bëdamboen isendac.

Aden bëdamboen isaidon: ‘Èmbi chuisho tantia. Èbi bëdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bëdamboen istiapimbo iquendac.”

quequin Nuquin Papan dada uamepampic.

*Cuesaqi dacuëdenda, quequin chiaid*

<sup>13</sup> ¿Bëdamboec tabadshoda bëdambo icquidën badedquoio mibi cuespatiasih? Padenquoio ictsiash. <sup>14</sup> Bëdamboec tabadsho isun icsambo icquidën cuesacsho mibi Nuquin Papan bëdamboen istsiashe. Mibi chieshënquido dacuëdënenda. <sup>15</sup> Dacuëdënenquoio icquin: —Con Icho Esuquidistu nec —quequin ambi chiacpadomboen nanuna. Aden mimbi Esus tantianuc ut-sibo: —¿Atotsieshun Esus tantie? —quesho: —“Abided cuidadec unësaid Esus tantiasho Nuquin Papan ëbi bëdamboen isquin unësacsho abi yacno ëbi tabadmendac,” queshun Esus tantiembi —quequin Esus tantiesabo chuibanuna. <sup>16</sup> Aden nëishëmënenquoio icquin Esusën naid chuibanuna. Aden bëdamboen chuinuec Esus tantiaquiec bëdamboec tabadnuna. —Ëbi bëdamboec tabadsho isash ëbi chieshënquin muauaquid: “Bëdambo icquidi muauachitombi. Icsachitobi,” ma quenu —quiasih bëdamboec tabadnuna. <sup>17</sup> —Ëbi tantiaquid utsibon chieshënendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshënendac. Bëdamboec tabadquid icsho utsibon chieshënaqui nuqui chieshtoenquoio icsho isash: —Mibi bëdambo iquiec —quetsiasih Nuquin Papa nuqui caic. Icsambo icsho quënën nauedaidi nëishenquoio icsho: —Mibi bëdambo iquiec —cainquoio ictsiash Nuquin Papan.

*Esus unësaid tantia, quiaid*

<sup>18</sup> Chieshënaqui Esus bimboec chieshtoenquoio yec bëdamboec tabadnuna. Aid icsaisambo yequi nuqui icsaid bedshunec abided cuidadec unëspondash. Aden Nuquin Papa abi tantiaquido bëdamboen ismenuec abentsecquiobi unëspondash padpidec unësenquoio icnuec. Aton dada unësambi aton tantiate unësabi icpanëdash. <sup>19</sup> Adec aton dada unësambi aton tantiate icnuc ëndenquimboshë Noe caidën matses abi tantiesabo icsho Nuquin Papan cuidquin unës uampido uidën uashun quënën sauedampicno Esus nidpanëdash. Ambo nidshun Nuquin Papan cuidpampido Esusën ambi naboed chuibampanëdash. <sup>20</sup> Naden Nuquin Papan aido cuidquin unës uapampic. Ëndenquimboshë aton matsesbëd tabadec Noe bëdambo icnubi aton matses icsamboshë icpampic. Adnubien Nuquin Papan: —Matses icsaquido abitedi uesquin unës uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquoio cano dapa nacnemëdenquoio yacpadembi Nuquin Papan badedi cuidenquoio icpampic: —Ma abi icsaid ënshun ëbi tantianu —queshun. Adnubien cano dapa nacnentanec Noe chedo 8tedpactsëc cano dapa antabëdtopampic. Adnubien aido antabëdtoaid cano dapa acten bedtoac nuadtopampic. Utsiboen acte mabudadmiadidën mentoadbudnepampic. Noe abi tantiaquidquo icsho Nuquin Papan cuidenquoio icpampic.

<sup>21</sup> Adembidi Esus tantiasho nuqui cuidenquoio iquiec. —“Esus tantiaquid nebi,” quequin utsibo ismequin acten mentomembi —queshun nuqui acten mentomec. ¿Bëchish ucquinda nuqui adodi? Padenquoio. Nuquin Papa naden chuiquin: —Esus tantiaquin icsaid ucac bimboen mimbi chiacpadomboen natiadquoio iquebi, Papa —quequin nuqui adoec. Aden abi tantiasho Nuquin Papan uincuenemëdaidën Esuquidistun nuqui cuidmenquoio iquiec. <sup>22</sup> Aidi uincuenash Nuquin Papa yacno nidash aibdëdi tsadoaic abitedishun Icbombo yanoac. Abitedimbo



chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bédabo bédamboen namequimbic Satanas aton yuabo mayan icsabobédta Esusén cuidendac.

## 4

### *Bédamboec tabadnuna, quiaid*

<sup>1</sup> Nuquin Papan tantiacpadomboen nasho utsibon chieshénquin mëyanaqui Esus chieshtoenquo icpondash. Adembidi chieshëmênquidën chieshënaqui adechidi chieshtoenda. Abided ciudadec unësaid Esus tantiaquin nuqui icsaid nuqui ënendac. <sup>2</sup> Aden nuqui tantiacpadomboen nainquo icquin Nuquin Papan chiacpadomboen natiadquo nuqui iquendac. <sup>3</sup> Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: — Nëid papa canu —quequin matsesbimboecnuc nacnenquinc mimbi capondac. Adec icsateuidi bunec mëmuntiapimbo mibi icpondac. Adquid iccondaidi nëbi bédamboec tabadta. <sup>4</sup> Adec bédamboec tabadsho isun mibéd icsaondaidën: —¿Atotsieshun nuqui naondacpadomboen nainquo ique? Mimbi Nuquin Papa caid nibëdec —quequin mibi icsamboen chuiquin mibi mamënsnunendac. <sup>5</sup> Aden mibi mamënsnunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bédamboec tabado? —cac ënden unësaidobédtan unësabi icquidotedishun ambi naidtedi uesquin chiendac. <sup>6</sup> Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadece unësquid yec unësashic Nuquin Papabéd tabadendac padpidec unësenquo yec.

### *Utsibo nashununa, quiaid*

<sup>7</sup> Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bédamboec tabadnuna. — Ma ëmbi abi chianesho Nuquin Papan bédamboen tantianu —quiash adta. <sup>8</sup> —Tantiananquido chieshënanec cuidnante bunenquo iquec —quiash ënëdenquo yec tantiananquionona. <sup>9</sup> Nuquibédtan Esus tantiaquido isedec chosho bédamboen isnuna. Shubu utsinquido ënapenuësh chosho adembidi chieshënenquo icquin min shubun yued. <sup>10</sup> Nuquin Papan tantiamiacpadomboen nuquibédtan Esus tantiaquido nashuntiad. Esus tantiaquidquo icmenuen chieshenquo icquin nanuna. <sup>11</sup> ¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquo chuibanquiota. ¿Ada Nuquin Papan mibédtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bédamboen namequid Nuquin Papa bédamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bédamboshë iquec —canuna ënenquo icquin.

### *Chieshënaqui chieshtoenquo icte chiaid*

<sup>12</sup> Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquo chieshëmpayoc. <sup>13</sup> —Chieshénquin Esuquidistu

comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. <sup>14</sup>—Esuquidistu tantiaquid nec —queshun chieshëmënquidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. <sup>15</sup>Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënquin icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. <sup>16</sup>Esus tantiaquid icsho utsibon chieshënac dacuëdenda. Adec dacuëdenquo icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquo icquin Esus tantiana. <sup>17</sup>—Nuquin Papan cuidte ushë nëbi icnuc ambi con matses caido Esus tantiaquido chieshëmënquidon natiamequid —quiapaden nëbi tauaquin mibi natiamec. Adsho isun: —Chieshëmënquidën chieshënac ëmbi tantiacpadomboen abi icsaid ëntsiash —queshun Nuquin Papan: —Natiamenda —cainquo iquec. Aden abi tantiaquido icsaid ëmete bunquin nashun çbëdiactsëcta abi tantiesabo cuidpec? <sup>18</sup>Naden chuiquin Nuquin Papan dada uamepampic. “Aden chieshëndeniact natiambo yan-yanequi unësash Nuquin Papabëd abi tantiaquido tabadendac. Nuqui adnuc çbëdiactsëcta ambi chiaid niac-niacquido Nuquin Papan cuidpec? Padenquo. Comapenen cuidendac,” quequin dada uamepampic. <sup>19</sup>Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiapadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

## 5

### *Esus tantiaquido chuibanquid Petedon chiaid*

<sup>1</sup>Tantia. Esus tantiaquido chuibanquido icsho mibi chuinu. Mibi-padquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduanegue. Tantia. <sup>2</sup>Icho yua cud-asacimboec mibëd icquido Esus tantiaquido cudasta. —Esus tantienquo yanushe —queshun: —Nuquin Papan chiaid niaquenquo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quenquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Piucquid dadpen bednun nanu —quenquo icquin Nuquin Papan chiapadomboen natiadquo yec Esus tantiaquido chuibanquid icta. <sup>3</sup>—Nëidtedi Esus tantiaquido bëdamboen name —caidtedi bëdamboen isequi chushcanenda. Adenquo yec: —Ëbi yacpadec ma tabadnu —quec bëdamboec tabad. <sup>4</sup>Aden Esus tantiaquido chuibanquidën bëdamboen namesho isun Nuquin Ichon nidaidën padpidec choshon utsibo ismequin: —Nëid bëdambo icquid nec —queshun chuibanquid ambi namiaidobëdta abi yacno buanendac.

### *Esus tantiaquidon nate utsi chiaid*

<sup>5</sup> Tantia, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidtedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic. <sup>6</sup> Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan. <sup>7</sup> Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

<sup>8</sup> Nuqui icsate bunacpadece icsainquo icquin Esusuidi tantianuna. Esus tantiaquido icsho Satanasën nuqui chieshënquieci. Esus bedshunuen nuqui icsametiadquo icquin bëdin nëish nibënacimboen ambi icsametequid Satanasën ënenquo icquin nibëmbeneque. <sup>9</sup> Ista. Icsamenda. Chieshtomenda. —Satanasën icsamechitoshe —queshun Nuquin Papan chiaid niac-niaquenquo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsieci yacno tabadquido utsibon chieshënac caosh —queshun chieshtoenquo icquin Esus tantianuna. <sup>10</sup> Aden utsibon chieshënaido yec yuec-yuecpectsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanas nuqui icsa uamenquo iquendac. Adem-bidi Nuquin Papan nuqui bëdamboen isquid icquin dayacquo yacbimboecnuc chieshtoenquo icquid nuqui icmendac. <sup>11</sup> Ëmbi aden chuisho tantiasun: —Mibi bëdamboshë iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquo icquin.

*Petedon ënquimbi chiaid.*

<sup>12</sup> Esus tantiaquidquo Sidas caid nëidtedtsëqui ëmbi dada uaboed mibi yacno buamembi. —Esusquo isondambi. Aid tantiasun Nuquin Papan matses bëdamboen isbenendac —quequin abimbo mibi chiombique. Chieshtoenquo icquin Esus tantianuna. <sup>13</sup> Nuquin Papan tantiamiac nuquibëdtan Esus tantiaquido ëmbi Babidonia caid yacnocquidon: —Aido unësquo iquec —mibi caosh. Babidonia caidbidi Doma caic. Con madobimboecquid Madcosën —Aido unësquo iquec —mibi caosh. <sup>14</sup> —Ëbëdtan Esus tantiaquido nec —quiash: —Mibi unësquo iquec —cananuna. —Ma Nuquin Papan mibi Esus tantiaquidotedi bëdambo icmepanu —quequin Nuquin Papa chianembi. Padi. Aidtedi chuiquin dada uaombi.

## PETEDON DADA UAID 2

### *Tauamboen chiaid*

<sup>1</sup> Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec. <sup>2</sup> Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

### *Nuquin Papan bëdambo icmete chiaid*

<sup>3</sup> Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. <sup>4</sup> Abipadquidquio Esusën chiondacpadomboen abi tantiaquidobëdta Nuquin Papan aton Nuquin tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

<sup>5</sup> Aden Nuquin Papan Esus tantiamiaido yec dayacquio yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. <sup>6</sup> Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshëñquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. <sup>7</sup> Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. <sup>8</sup> Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquotsiac. <sup>9</sup> Ëmbi chuibocpadomboen naisa pamumëdacbimboec iquec. Adquidon: —Aton Mado Esus tantiasho icsaid ucudacbimboec-nuc Nuquin Papan nuqui bëdamboen isec —queboedombi bëpiscudquin tantienquio yanec.

<sup>10</sup> Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiash chieshtoenquio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantiendac. Aden tantiec Esus tantienquio icquid nuqui yanenquio ictsiac. <sup>11</sup> Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc. <sup>12</sup> Ëmbi aden chuiboedtedi mimbi tantiondac. Aden tantiabosh Esus tantiec mibi bëdamboec tabadcuendonac. Aden mimbi tantiondaidi mibi chuided-chuidedendambi. <sup>13</sup> —Nëbi unësendabi —queboedi ëbi unësabi yacpadembi mibi chuided-chuidedendambi.

14 —Adênquio mibi unësendac —quequin Nuquin Icho Esuquidistun chi-acpadên nëbi unësebi. 15 —Ëbi unësan ëmbi chiondaid ma bëpiscudenquio icnu —queshun mibi chuiquin dada uanu.

### *Nuquin Papan Esus chiaid*

16 ¿Muaquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nid-nush: “Padpidec nidaidën choaindabi,” quepondash Esus —¿quectabi muadionda? Padenquio. Ëmbimbo isondayquio mambi mibi chiondac. —Nëid con Madombo nec —quequin Nuquin Papan ismiac Esus isondambi. 17-18 Nadquio iccondash. Macuësh dapan dectatoash Esus bëchamauanquiec iccondash. Adnubien Nuquin Papan: —Con Madombo nec. Ëmbi tantiaidquio yec bëdamboshë iquec. Nëid isec bëdambo iquebi —quequin abucshun dacuëdampamboecnuc chuipondash.

19 ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënëdadbimboen utsibon tantienquio icnubi paposhquiacbimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuc padpidec Esus choabi yacpadembi Nuquin Papan chiaid bëdamboen tantianuna. 20 —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio. 21 Ambembi chiaid dada uainquio icquin Nuquin Papan chiaidquio dada uapampic. Nuquin Papan Mayanën tantiamiac abimbo chuipampic.

## 2

### *Muaquido iquendac, quequin chiaid*

1 Nuquin Papan chiaidquio isadaidbo tsusedpabon chuinubien ut-sibo: —Nuquin Papan nadoendac —quec muapampic. Nëbi adquid-bidi iquendac. Mibi yacno puduedash ambembi chiaid chiec muasho tantiaishun: —Mibi muequi nec —badedquio cainquio mimbi iquendac. —Abided cuidadec unësaid Esus tantiaquid nebi —queboedi: —Esusën chiacpadomboen natiapimbo iquebi. Adshobi Nuquin Papan ëbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. 2 Aden muaquidën chuisho tantiaishun Esus tantiauidtsëchoedombi dadpenshun aidën chiaid tantiendac. Adashic Nuquin Papan chiaid niac-niaquec muaquido tabadacbimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. 3 Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiaishun aido cuidendac. —Adquid icsano nidmequin cuidendambi —quequin ambi ëndenquimboshë tantiapampic-padomboen comapenen Nuquin Papan cuidendac.

4 Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin

cuidpampic. —Chian anēdēnquiacno nēsecanumbi nabono —queshun aden tauamboen Satanas chedo cuidpampic. <sup>5</sup> Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmeyuin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo 8tedpactsēc Nuquin Papan cuidenquio icpampic. <sup>6</sup> Adshumbic yuecquio ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucuēsh taboad-ampamboec paēdquidēn pichiquepampic matses nibēdquio yec. —Aden icsambo icquido cuidquid nebi —quequin Nuquin Papan adopampic. <sup>7-8</sup> Sodoma caid yacnocquid abentsēqui Dod caid pichiquenquio icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmo icquido icsamboecuidi tabadec —quec shubiec tsadsho cuemetsaidi pichiquiambo ictsampic. <sup>9</sup> Aden abi tantiaquido daēd Noebēdta Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnaidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

<sup>10</sup> Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdacimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —queshun ambi naiduidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. <sup>11</sup> Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsēqui tantiaquid Nuquin Papa nec —queshun padoenquio iquec. <sup>12</sup> Padnuen ēmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

<sup>13</sup> Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquieci inchēshēn icsash badiadēntsen icsaic: —Bēdambo iquebi —quec adquido cuis-honquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo. <sup>14</sup> Muaquido utsin chido mēismec tabadec. Nuquin Papan chiaid niac-niaquec icsaic ēnēdenquio iquec. Adquid icquin Esus tantiatsēcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. <sup>15</sup> Nuquin Papan chiaid niac-niaquec icsateuidi bunquieci. Ēdenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic.

<sup>16</sup> Adnubien abi catsadaid cabayobitsecquid asno caid matsesbimboec onquiampampic. Ambi chiaidquo chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquo muaquido iquec. Piuquid comapenec bunec Nuquin Papan chiaid niactiadquo iquec.

<sup>17</sup> —Mibi bēdambo icmete chuinu —quequin muaquidon chuisho tantiash: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chēshēn bētīnacsho isash: —Tanunquien badiadec —queuidac bimboec: —Ambi chiacpadquo bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindami —quendac Nuquin Papa. <sup>18</sup> Adec muaquido abembi onqueuidequi onquec. Utsin chiaid tantienquo icquin ambi tantiaiduidi chiec naden. —Mibi bunacpadec mibitsen icsata —cac Esus tantiatsēcquin Nuquin Papan chiaid nauidsēcquimbi abi icsaid ēnuidboedi padpidemboec icsaquiec. <sup>19</sup> Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ēntiapimbo yec icsamboshē iquec. Adec icsamianquidēn chiacpadomboen naic matses icsaquid nendac. Adecbidi ambi naiduidi naic icsaquid matses nendac. <sup>20</sup> Nuqui cuidmenquo icquid Esuquidistu tantiatsēcquin abi icsaid ēnuidboedi padpiden Nuquin Papan chiaid niacniaquec icsamboshē muaquido yanec. <sup>21</sup> Ēnden Esus chiondac: —Ai, aid tantiembi —quetsēccondaidi aden Esus tantienquo yanec icsamboshē yansho isun: —“Esus tantiembi,” quenquo icpatecnēdan —caimbi. <sup>22</sup> Adquid chuipanēdash naden. —Ambi ucbudaid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechitequien iquec.

### 3

#### —Esus chote chiaid

<sup>1</sup> Tanta. Ēmibi tantiaido mibi neque. —Pabiate cuembo icquin Nuquin Papan chiaid tantiaquiec bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu. <sup>2</sup> Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquo icquidēn Nuquin Icbo Esusēn chuibanondash. Aidēn chiondaid abēd ictened utsin mibi chuinēdash. Aden chiaid tantiata. Aidbidi chuinu. <sup>3</sup> Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac. <sup>4</sup> —“Utsi uanuec padpidec nidaidēn choaindabi,” ¿quenēdaidta chopec? Ma choenquo icpayoc. “Nēbi Esus choec,” quedenedi con mēdimbo abitedi unēsbudniac. Esus choambobi —quependac Esus tantiesabo. Nadembidi chiendac. —Taēc nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ēbi nibēdnuc adiquendac. Utsi uanuec Esus choenquo iquec —quependac Esus tantiesabo. <sup>5</sup> ¿Abimboda capec? Aden chuiquin Nuquin Papan chiaid tantienquo iquec. Ēndenquimboshē ambi uaidtedi nibēdnuc: —Ad icta —quequin Nuquin Papan chiac abu yec acte yec nidaid yec quiampampic. Ac-teuidpambo icboedi nidaid nēnantan yampampic. Aden Nuquin Papan abitedi uapampic. <sup>6</sup> Aden abitedi uambic yuecquido ictaniash matses

icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unës uapampic. <sup>7</sup> Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbêdta nêdêncaindac. Adembidi matses Esus tantiesabo cuidendac.

<sup>8</sup> Êmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadêmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsëcbimboecquid nec. Adecbidi seta abentsëqui icquidquio iquequi dadpen seta icquidbimboecquid nec —quequin Nuquin Papan tantiec. <sup>9</sup> —Ëndenquio: “Padpidec choendabi,” quenêdaidi Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Ütsibontsen Esus tantiashun êmbi chiaid niacniacboedi ênushe. Isbono. Ênacsho icsamboshê yacno nidmenquio ictsiambi —queshun Nuquin Papan Esus chomiabi iquec.

<sup>10</sup> Adnubien matses: —Nêbi choec —quenquio icnuc Esus badedquio choendac. —¿Nêid ushêmbi ampequidên con na ampec —quequinda tantiapec? Padenquio. Adembidi: —Nêbi choec —quequin tantienquio icnubi Esus choendac. Choshon acquimboen toncac abitedi nibêdanendac. Uispa yec inchêshên ushê yec badiadên ushê yec queboedi nibêdquiecnuc nêdêncaindac. Nidaid abichobimbo nêdênquenuc aidên icquidtedi nêdênquendac nibêdquio yec. <sup>11</sup> —Nuquin Icbon nac adquidtedi nêdênquendac —quiash Esus tantiec bêdamboequien tabadiad. <sup>12-13</sup> Esus chobon Nuquin Papan cuidquin ambi uaidtedi nêdêncaindac. Abu yec uispa yec inchêshên ushê yec badiadên ushê yec queboedi nêdêncaindac nibêdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidên bêdambo icquiduidquio nuqui tabadmendac. Êmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusên naid chuibanec bêdamboec tabadnuna.

<sup>14</sup> Êmbi tantiaido mibi neque. Tantia. —Choshon abi yacno Esusên nuqui tabadmendac —quec chieshtoenquio yec bêdamboec tabadnuna. Choshon Esusên: —Mibi icsambo iquec —cainquio icnuc Nuquin Papan chiaid niaquenquio yec bêdamboec tabadnuna. <sup>15</sup> Adec tabadquimbi êmbi chuiboed tantiashun naden tantia. —“Ütsitsen ma Esus tantiaquid yanu. Aden Esus tantiasho aid cuidenquio ictsiambi,” queshun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidên Pabadon dada uapaccondash. Nuquin Papan tantiamiac bêdamboen chiaccondash. <sup>16</sup> Êmbi chuiboedbidi chuiquin dada uadenepaccondash. —Pabadon dada uaid abentse-abentsec badedquio tantiadenquio iquec —queshun utsibon aidên chiacpadomboen chienquien icchitosh. Nuquin Papan chiaid niacniactiadquio icquidon Pabadon chiaidquio tantienquio icquin icsamboen chiosh cashnad-cashnadacbitsëcquiecnuc. Nuquin Papan chiaidquio nuquin tsusedpabon dada uapampidtsen isbanshun adembidi tantienquio icquin icsamboen chiec. Adquido Nuquin Papan cuidendac.

<sup>17</sup> Êmbi tantiaido mibi neque. Tantia. Chuinu. —Abimbo tantienquio icquin Nuquin Papan chiaid niacniacquidon muauaic —êbi quesho tantiashun: —Esus tantienquio yamane. Muasho tantiatiapimbo iquebi



—quequin ënenquoio icquin Esus tantianuna. <sup>18</sup>—Abi tantiaquid cuidmenquoio icnuec abided ciudadec Esus unëspondash. Aid tantiasho Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiaquionona. Adshumbic: —Nuquin Icbo Esuquidistu bëdamboshë iquec —canuna ënenquoio icquin. Padi. Aidedi chuiquin dada uaombi.

## UANÈN DADA UAIDÈMPI 1

### *Nuquin Papabéd ènèdenquo yec tabadte chianiaidquo*

<sup>1</sup> Abia Yampidènquo matsesun Esuquidistun chuibansho èbéd icquidobèdtan tantiapadenembi. Aidi èbéd icquidobèdtan ispadenembi. Aidi èbéd icquidobèdtan mishpadenembi. Aidi Nuquin Papabéd ènèdenquo yec tabadte chianiaidquo nec. Aidquo chuiquin dada uaid nèid nendac. Aidquo tantiaquido icquin bédamboen ista. <sup>2</sup> Aid, abuc Nuquin Papabéd ènèdenquo yec tabadboedi nidaidènuèsh matses icnuec chopanèdash. Choshon abipadquo yec Nuquin Papabéd ènèdenquo yec tabadte ismequin chianiaidquo èbéd icquidobèdtan isteneshun chuibanec nebi. <sup>3</sup> Aidi èbéd icquidobèdtan ispadened adembidi èbéd icquidobèdtan tantiapadened chuibanec nebi ma mibitedishun tantiash shubu abentsèquèn tabadac bimboec ma tabadpanu queshun. Nuquin Papa tantiaquid icquin aton Madombo Esuquidistu tantiec Nuquin Icbobéd shubu abentsèquèn tabadac padec nuqui bédamboec tabadendac. <sup>4</sup> Esuquidistu tantiaquidtedi shubu abentsèquèn tabadac bimboecquido nec, quequin chuiquin dada uaimbi ma aid tantiash, Cuishon. Bédambo iquebi, quiacpadec ma mibitedi tabadpanueshun.

### *Nuquin Papa Bédambocquid Abentsècquiobi nec quiaid*

<sup>5</sup> Esuquidistun Nuquin Papa chuibansho nuqui tantiondac padomboen chuioaimbique. Tantiata. Nuquin Papa Bédambocquid Abentsècquiobi nec. Icsapenquiocquid aidi nec. <sup>6</sup> Adquid icnuc, Nuquin Papan shubun icquid nebi, queboedi ambi chiaid niacquin abipenquo chuiquid nuqui nendac. <sup>7</sup> Nuquin Papan chiapadomboen nabanquidquo iquec abi tantiaquid utsibobéd shubu abentsèquèn tabadac bimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unèspondash. Aid unèsnèdaidènquo nuqui icsaidtedi paucbantequid nendac.

<sup>8</sup> Icsaisa nebi, quequi mua uadquin abipenquo chuiquid nendac. <sup>9</sup> Icsaobique. Èbi pauc, Papa, qesho tantiashun, Con mado unèso isun abi tantiaquid icsaid bèpiscudnu, quequin ambi chiapadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid èmbi paucaid padpiden tantiamenu, quenquicquin icsaisa nuqui icmendac. <sup>10</sup> “Matses icsaisa nibèdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacbimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesa nec.

## 2

<sup>1</sup> Ma icsainquo icnu queshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Èbi tantiaquid paucoata, quequin Nuquin Papan chiaid niaquesa icquin aton Madonquo Esuquidistun nuqui icsasho aden chiendac. <sup>2</sup> Aidi matstedidi icsaid bedshunash abided cuidadec unèspondash.

<sup>3</sup> Ambi chiacpadomboen nabanquin Esuquidistu tantiaquid nebi, queshun nuqui tantiendac. <sup>4</sup> Esuquidistu tantiaquid nebi, queshun Icbon chiacpadomboen nainquocquin abipenquio chiendac adquidën. <sup>5</sup> Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. <sup>6</sup> Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

<sup>7</sup> Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. <sup>8</sup> Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmëñquid icboedi aidën pausunac tantianquidquio yanec.

<sup>9</sup> Esuquidistu tantiaquid nebi, queshun abi tantiaquid utsi chieshënec Nuquin Papan tantiacpadomboen pausunacmaid adquid nec. <sup>10</sup> Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. <sup>11</sup> Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuachimboecquid adquid nec. Mayan icsan yua icquin ambi niatadquio yaid tantiesa nec.

<sup>12-14</sup> Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

*Icsate bunesa icta, quequin chiaid*

<sup>15</sup> Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. <sup>16</sup> Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. <sup>17</sup> Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadtiaipimbo iquec. Nuquin Papan chiacpadomboen naquidien ënëdenquio yec Icbobëd tabadendac.

*Esuquidistu chieshënquid dadpen choendac, quequin chiaid*

<sup>18</sup> Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. <sup>19</sup> Esuquidistu chieshënquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

<sup>20</sup> Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. <sup>21</sup> Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. <sup>22</sup> ¿Tsutsi muaquid nepec? ¿quepecta mibi ique? Nuquin Papan Madombo nidaidëshun chidon tishac matsesash aton Papan chuimaidquio nec, quesa muaquid nendac. Adquid Esuquidistu chieshënquid nendac. Abentsëcquidquibi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. <sup>23</sup> Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

<sup>24</sup> Tauamboen chiampid tantiadonec tantesa uainquiocquid yanta. Mimi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadacbimboecquido mibi iquendac. <sup>25</sup> Ëbëd shubu abentsëquën nidaidën tabadacbimboecquido ëbëd abuc ënëdenquio yec tabadte iquendac, quequin Esuquidistun chiaid nendac.

<sup>26</sup> Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. <sup>27</sup> Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiash bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

*Nuquin Papan chiaid tantiaquid ambi bacuë icmiaid*

<sup>28</sup> Adembidi con nabo quequin mibi chuioaimbique. Adembi tantia. Esuquidistun chiaid tantiadonequiec tabadteneta. Adec tabadquin Esuquidistu choasho isash cuenenquio yec, Ëbi, ambi paucaid, bednuec choec, quependac mibi. Abëdi nidebi, quequin caidonec tabadta. <sup>29</sup> Nuquin Papa bëdambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

**3**

<sup>1</sup> Matses tantiaquin naquidquio Nuquin Papa nec. Ma ëmbi unësquiocquin comapenen tantiaido ëbëdi tabadpanueshun con

bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. <sup>2</sup> Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiembi, nuqui quendac. <sup>3</sup> Aid choabicnuc, Abipadquid iquendabi, quequin caindonequido nëbi Esuquidistu icsainquo yec tabadacpadquiec tabadte bunquid nuqui nendac.

<sup>4</sup> Nuquin Papan naded bédamboec tabadta, quequin chiaid niacquid abibi icsaquid nendac. <sup>5</sup> Adnubien, Esuquidistu abuc tabadboedi nidaidënshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. <sup>6</sup> Icbopadquidquo icnu quiash Esuquidistubëd tabadac bimboecquid icsadenesa nec. Icsadenequid, Nuquin Papan Esuquidistu tantiamioši, quetiapimbo iquec. Esuquidistu tantiesa adquido iquec.

<sup>7</sup> Con nabo, tantesa uamane qeshun muaquin chuibanaid tantiesa icta. Esuquidistu bédamboec tabadacpadquiec tabadquid icsaisa nec. <sup>8</sup> Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiacquidquo iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. <sup>9</sup> Nuquin Papan con bacuë caido icsadenesa nec. Ambi con bacuë caido Nuquin Papapadquidquo yec icsadenetiapimbocquid nendac. <sup>10</sup> Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiacquidquo nendac.

### *Esuquidistu tantiaquido tantiananaid*

<sup>11</sup> Esuquidistu tantiaquid utsibo tantiaquiota, quequin chiaid nuqui abia tantiondaid nendac. <sup>12</sup> Aton utsimbo chieshënquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaiđen aton utsi Abedën abi tantiaquin nadenesho Nuquin Papan aid bédamboen isnubi Cainën ambibi tantiacpaden nadenesho Nuquin Papan bédamboen istiapimbo icpampic. Aden isac Cainën aton utsimbo Abed chieshënquin cuesunepampic. <sup>13</sup> Cainën aton utsimbo chieshënapadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. <sup>14</sup> Esuquidistu tantiaquid tantienquiochoedi Esuquidistu tantiaquid yanash abi tantiaquid utsibo tantiaquidquo nuqui nendac. Aden abi tantiaquid utsibo tantiaquid icquin, Nuquin Papabëd tabadquid bimboecquid nebi, quequin nuqui tantiendac. Aton utsibo tantiesa cuëshëdac bimboecquid nec. <sup>15</sup> Aton utsibo chieshënquid, Con

utsi cuesunenu, quiac bimboecquid nec. Adquid Nuquin Papabêd tabadtemaid nendac, quequin nuqui tantiendac.

<sup>16</sup> Matses tantiaquin nashunquidquo Esuquidistu icpondash. Nuqui tantiec, ma ëbêd ênêdenquo yec tabadpanu quiash unësmene, quenquo yec nuqui icsaquido icsho cuidnshu quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmene quenquo yec nuqui tabadendac. <sup>17</sup> ¿Aton nachoquid icnuc Esuquidistu tantiaquid utsin na nibêdquiocsho isec, Con utsi menenquo iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. <sup>18</sup> Êmbi con nabo caid, Utsi tantiec bêdamboec tabadquidquo nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. <sup>19</sup> Aden mimbi chiacpadomboen nabansho isun Nuquin Papan tantiamiac dacuêdenquo yec Nuquin Papa chuinu quiash abi yacno puduedquidbimboecquin nuqui chuided-chuidedec. <sup>20</sup> Utsien Nuquin Papan chiacpadomboen abentse-abentsen naquid, Nuquin Papa dacuêdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid êmbi paucaid, êmbi con bacuê caid mibi nec. Mimbi chuisho tantianuna. Muesa nebique. Dacuêdenquiocquin ëbi chuita, quependac Nuquin Papa adquid caic.

<sup>21</sup> Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidênquo Nuquin Papa bëisquidëmbimboen, Êbi menepec, quequin dacuêdenquiocquin chianendac. <sup>22</sup> Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bêdamboen isquin menendac. <sup>23</sup> Naden tantiata, quequin Nuquin Papan chiaid nad iquec: Abêd Abia Yampidquo, Esuquidistu, nidaidênshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobêd tantiananendac. <sup>24</sup> Aden ambi chiacpadomboen naquidbêd Nuquin Papa iquec. Adquidquidquo Nuquin Papabêd ictequid nec. Abibimboecquid Nuquin Papan aton Mayan meniac ëbêd tabadquin tantiamiac, Nuquin Papabêd icquid nebi, quequin nuqui tantiendac.

## 4

*¿Nuquin Papan chiaidquibida chuibanoshe? Isnu, queshun Nuquin Papan chiaidquo isteneta quiaid*

<sup>1</sup> Utsibo, Nuquin Papa chieshênquidên chuimiaindo dadpen iqueque. Aidên chuimiaindên chuisho tantiashun, ¿Nuquin Papan chiaidquibida chuibanoshe? Isnu queshun Nuquin Papan chuiquin dada uamiaindquo isteneta. ¿Adquibida iqueque? Isnu, queshun isteneta. <sup>2</sup> Nuquin Papan pausunaidên naden chiendac: Nidaidênshun chidon tishac matsesaid Nuquin Papan chomiaid aton Madombo nec, quequin chuibanendac. <sup>3</sup> Nuquin Papa chieshênquidên chuimiaindên naden chiendac: Nuquin Papan chomiaicmaid Esus niondash. Aid aton madopenquo nec, quequin chiendac. Aden chuiquid Esuquidistu chieshênquid nec. “Êmbi chomiaid

chieshënquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

<sup>4</sup> Con nabo quequin Nuquin Papan aton Mayan meniac aidënquio tantiamiac Esuquidistu chieshënquidon chuisho, Tantianu, qesa mibi nendac. Nuquin Papan meniaidën tantiamiac Nuquin Papan chiaid chiac dëniacpadquiec mibi chieshënquid cuenendac. <sup>5</sup> Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. <sup>6</sup> Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabenuid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tantianu, qesa iquendac. Adsho isun, Abipenquio chuiquidën yua nec, quequin nuqui tantiendac.

*Nuquin Papan ismiac adecbidi tantiananquidquio ma nuquitedi icoapanuna quiaid*

<sup>7</sup> Utsibo, Nuquin Papa tantiaquido adembi mibi chiembique. Adembi tantiaata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. <sup>8</sup> Utsi tantiaquidquio Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. <sup>9</sup> Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac. <sup>10</sup> Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nïdaidën chomiaid nuqui icsaquido icsho cuidmenquiocnoec abided cuidadec unëspondash. <sup>11</sup> Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquiotiad. <sup>12</sup> Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquidendac.

<sup>13</sup> Aton Mayan meniac ambi tantiamiaidquio yec Nuquin Papa ëbëd iquec, nuqui quendac. <sup>14</sup> Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

<sup>15</sup> Esuquidistu Nuquin Papan Madombo nec, quequin tantiaquidquio Nuquin Papan pausunquin aton Mayan meniaid nec. <sup>16</sup> Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquio nendac. Adecbidi Icho abëd icquidquio nendac. <sup>17</sup> Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquio yec Nuquin Papa tantiaquid aton Madopadquiocquid Nuquin Papa yacno puduedendac. <sup>18</sup> Nuquin Papan tantiaid dacuëdenquio iquendac. Ambi tantiamiaid dacuëdesa nec. Abi tantiesa, Èbi icsaquid icsho cuidtsiash, quec dacuëdendac. Aidi utsi tantiesa yec dacuëdec.

19 Nuquin Papa Ambia Tantiaguid icquin ismiac tantiananquidombo nuqui nendac. 20 Èmbi isacmaidquio Nuquin Papa icsho, Aid tantiaguid nebi, quequin Esuquidistu tantiaguid utsi ambi isteniaid chieshènquid iquec muaquid nendac. Ambi isteniaid chieshènquid iquec ambi isacmaidquio Nuquin Papa chieshènquid nendac. 21 Nuquin Papan chiaid nad iqueque. Tantiata. Nuquin Papa tantiaguid nebi, quequin Nuquin Papa tantiaguid utsibo tantiatiad.

## 5

### *Nuquin Papan Madombo abimbo tantiaguid*

1 Nuquin Papan Madombo aton Papabèd abuc icboedi nidaidèn cho-miac matsesaid Esuquidistu nec, quequin tantiaguid Nuquin Papan con bacuè caid nendac. Ambi con bacuè caidènquio Nuquin Papa tantien-dac. Adembidi Nuquin Papan con bacuè caid utsibo nuqui tantien-dac. 2 Ambi con bacuè caidèn Nuquin Papa tantiaguid ambi chiac-padomboen naquidquio icquin ambi con bacuè caido nuqui tantiendac. 3 Aden tantiaguid Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. 4 Aden Nuquin Papan con bacuè caid icquin ambi chiacpadomboen nabanec tabadquin dèniacacimboen icsamenuequid nuqui cuemendac. Adembidi Abia Yampid nidaidènshun chidon tishac matsesash tabadec aton Papabèd cuèshèdesa Esuquidistu nec, quequin tantiaguid nuqui icnuc icsamenuequid cuenendac. 5 Esuquidistu Nuquin Papan Madombo Yampid nec, quequin tantiaguidènquio ismiac icsamenuequid cuenendac. Ai, icsamenuequidèn yuadesa Esuquidistu tantiaguidquio nendac.

6 Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidènshun chidon tishac matsesash capusho acten mentoacsho: “Èmbi bédamboen tantiaidquio mibi nec. Mibi isash bédambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unèsec aton Papa chiec: “Èbi yuedta, Papa,” quiash Esuquidistu unèsacsho nacsac aton intac chididique-pondash. Adashic, Nuquin Papa abimbo chuiquidpadquidquio icquin aton Mayanèn tantiamiac, Esuquidistu Nuquin Papan Madombo nec, quequin tantiaguid chiendac nuqui. 7 Nuquin Papa yec aton Mado yec aton Mayan yec quequin abucshun aidtedishun abentsèc yacbimboec-quin Esuquidistu Nuquin Papan nidmiac chosho nidaidènshun tishac matsesaid nec, quequin chuided-chuidedec. 8 Adecbidi nidaidènuèsh Esuquidistu matsesacsho isun, Nuquin Papan Madombo nec, quequin ismenuec aton Mayan abucuèsh budash aidbèd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unèso isun, Con madombo nec, quequin inchèshacimboecnuc icmequin Nuquin Papan nadatiambocquin ismebampondash. 9 Aden ismiac isondaidèn naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unèso isombi, quequin isondaidèn chiec. Aden chuinubi Nuquin Papanquio, Con madombo nec, quequin ambia Esuquidistu chuiquidquio icsho tantiadonetequidquio



nuqui nendac. <sup>10</sup> Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiñoapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiachimboen chuiquid nendac. <sup>11</sup> Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided ciudadec aton Mado unëspanëdash, quequin tantiaquid Nuquin Papa yacno tabadtequid nuqui nendac. <sup>12</sup> Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadtiapimbo iquendac.

*Ma tantiaquidquo mibi icpanuequin chiaid*

<sup>13</sup> Nuquin Papan Madombo Esuquidistu nec, quequin tantiaquid, Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. <sup>14</sup> Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. <sup>15</sup> Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

<sup>16</sup> Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaqui nona, quiacpadec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec. <sup>17</sup> Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquo yec Nuquin Papabëd tabadendac.

<sup>18</sup> Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënnquidën adquido yuadtiapimbo iquendac. <sup>19</sup> Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënnquidën yua nec, quequin nuqui tantiec. <sup>20</sup> Nuquin Papan Madombo abuc abëd icboedëmbi nidaidënnshun Nuquin Papa chuibanquin tantiamiac. Aidën aton Mayan abi tantiaquid neniac, Nuquin Papa Abentsëcquiobi iquec, quequin nuqui tantiendac. Aidbëdquicquid nuqui nendac. Aton Madombo aton Papabimboecquid nec. Aid tantiec aidbëd ënëdenquo yec nuqui tabadendac, quequin nuqui tantiendac.

<sup>21</sup> Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaguiota, cac tantienda. Esuquidistu nebi, quesho adembidi tantienda.

Nëbi padi. Aidedted chiombi.

## UANËN DADA UAIDËMPI 2

*Nuquin Papan chiaid abimbo iquec, quequid tantiaid*

<sup>1</sup> Ëmbia Esuquidistu tantiondaidquoio Uan nebi. Nëid chido Esuquidistu tantiaquid nendac, quequin Nuquin Papan tantiacpadquiec icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiash mibitedi tantiec tsadebi. ¿Ëbentsëquidabi mibitedi tantiec tsadpe? Padenquoio. Aden chuisho tantiash utsibotsen adecbidi mibi tantiec tabadoaic. <sup>2</sup> Nuquin Papan chiaid abimbo iquec, quequin ënenquiocquin nuqui tantiendac.

<sup>3</sup> Uquë nësiatiadquido nuqui icsho isash abëdi ënëdenquoio yec nuqui tabadmenuec nuqui icsaid bedshunash abided cuidadec Esuquidistu unëspondash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papabëdta aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquido nuqui nendac.

<sup>4</sup> Mimbi chiac utsi-utsiec Nuquin Papan chiacpadomboen nabanec tabadsho isash bëdambo iquebi. <sup>5</sup> Naden nata, quequin chiaid utsipenquoio nëid dada uaid nendac. Esuquidistu tantiaquidtedi nuquibi tantiananuna. <sup>6</sup> Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquiec ma tabadpanuna.

*Muaquin chuiquid*

<sup>7</sup> Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec. <sup>8</sup> Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. <sup>9</sup> Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëccquid nendac. Adquid Nuquin Papabëd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadac bimboec tabadendac. <sup>10</sup> Esuquidistu Nuquin Papan Madombo nec, quequin chiesha chosho isun yuedenda. Adembidi, Bëdambo icta, quequin adquid chienda. <sup>11</sup> Adquid yuedquid ambi yuedaidbëdta muaquin chuiquin ismequid nendac.

*Ënquin chiaid*

<sup>12</sup> Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

<sup>13</sup> Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

## UANËN DADA UAIÐËMPI 3

### *Cayon naid chuiquin utsibon chiaid*

<sup>1</sup> Ęmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

<sup>2</sup> Mimbi Nuquin Papan chiaid tantiacpadquiec min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna. <sup>3</sup> Mibëd icquidon nëmbo choshon naden chioishi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. <sup>4</sup> Mimbi chuibanac Esuquidistu tantiaquin muainquiocquin utsibon chuioaic, quequin chuisho tantiash bëdambo iquebi, quec tsadebi. Ęmbi con mado caidën bëdamboen naid chuisho tantiash bëdambo iquebi.

<sup>5</sup> Mimbi yuedaidon naden chioishi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioishi. <sup>6</sup> Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buaneshun. Aido Nuquin Papan con bacuë caido ambi chuimaidquio nec. <sup>7</sup> Aido isadaidpembo chuinuec nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Ębipadquid nec, quiash mibi yacno puduedendac. <sup>8</sup> Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

### *Diotedepesën icsamboen naid*

<sup>9</sup> Mibëd iccuededquido aden chuiquin dada uaondambi. Aden ëmbi dada uaid bedash: “Ęmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. <sup>10</sup> Mibi yacno choshon Diotedepesën muaquin chiaid mibëd iccuededquido chieñdambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

### *Demetedio caid bëdambocquid nec, quequin chiaid*

<sup>11</sup> Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. <sup>12</sup> Utsien Demetedio caid bëdambocquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdtan chuioaimbi. Uanën chiaid abimbo iquec, quequin mibitedishun tantiendac.

### *Ęnquin chiaid*

<sup>13</sup> Dadpen dada uatiadquiocquimbi daëdpactsëc dada uaombi.  
<sup>14</sup> Daëdec ushtanquin mimbi isplashuni. Mibi yacno nidash mibëdi onquendabi.

<sup>15</sup> Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.  
Padi. Aiteded dada uaombi.

## UDASËN DADA UAID

### *Tauamboen chiaid*

<sup>1</sup> Santiacon utsi Udas nebi. Esuquidistun yuambo nebi. Esus tanti-aquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquo yanushe —quiash Esus mibi cudasec. <sup>2</sup> —Aido bëdamboen isquin bëdambo icme, Papa —quequin Nuquin Papa chianembi mibi tantiaquin.

### *Muaquido iquendac, quequin chiaid*

<sup>3</sup> Ëmbi tantiaido mibi neque. Tantia. Nuqui cuidmenquo icnuec Esus abided cuidadec unësaid tantiateuidi mibi chuitiadquo iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquo mimbi chiec. Aid tantiatipimbo iquebi —cata. Nuquin Papan tantiacpadoamboen Esusën abëd icquido chuibanëdaid nuqui tantiaid neque. Utsi tantienda. <sup>4</sup> Esus tantiaquido mimbi danubi mibi icsamenuc mibi yacno muaquido puduedac caosh. Ambi ëndenquo tantiacpadoamboen Nuquin Papan icsano nidmetequido aido neque. Muasho tantienda. —Nuquin Papan bëdamboen isaïdo icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bëdamboen isec —quec comapenec muaique. Muasho tantienda. Esuquidistu Nuquin Ico abentsëcshun chiaïd niac-niaquec icsaïque.

<sup>5</sup> Adquid Nuquin Papan comapenen cuidendac. Tantia. Nuquin Papan cuidampid mimbi tantianëdaïd mibi chuinu. Equipito yacnoshon unësmenuen ancanquidën icsamboen chonoa uasho isun ashunquo Nuquin Papan con matses isadaïdbo tsusedpabo puduamepampic. Adoac yuectanquin puduamiaiombi ambi chiaïd niac-niacsho isun Nuquin Papan uesquin unës uapampic. <sup>6</sup> Adembidi utsibotsen cuidpampic. Abëd icpampido ambi abi yacnoshon uaido mayan chedo abëdtan namequido icboedobi Nuquin Papan chiaïd niac-niac-te bun-cuenash Nuquin Papabëd ic-te bunenquo yampampic. Adec Satanas chedo abëd ic-te bunenquo icsho isun puduentiapimbo yacno icsamboshë yacno Nuquin Papan nidmepampic. —¿Ada mibi bëdambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. <sup>7</sup> Adembidi shubu dadpen yacnocquido cuidpampic. Shubu dadpen icquid Sodoma caïd yacnoshon dadan aton chidopenquo chudnubi adembidi chidon aton bënëpenquo chudmepampic. Dada aton dada utsibëdi chichudnanquidquo icpampic. Shubu dadpen icquid Comoda caïd yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nëdëncapampic nibëdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anëdënquiacno nësecaindac —quequin nuqui tantiec.

### *Muaquido icsaïd*

<sup>8</sup> Cuidte tantienquoio yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. <sup>9</sup> Mayan bédabo chuiquid dapa Miqued caidën adotiapimbo icpampic. Aidi Moises unësacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miquedën. Adenquoio icquin: —Nuquin Papambien mibi cuidec —capampic Miqued caidën mayan bédabo namequid dapa icquin. <sup>10</sup> Muaquidombien ambi tantienquoio yaid icsamboen chuishunec. ¿Ada bëdi cuidnushe quepadic? Adembidi abi cuidte tantienquoio icquin ambi tantiaiduidi naic tabadsho Nuquin Papan cuidendac.

<sup>11</sup> Cain caidbimboecquid muaquido nec. Nuquin Papan chiaid niac-niacquinc abi bunaid naiqui icsaic. Badan caidën piucquid bednuen Nuquin Papan chiaid niactiadquido yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. <sup>12</sup> Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibëdtambi muaquidon piac caosh. —Esus tantiaquidquoio nebi —quiash puduedash dacuëdenquoio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquoio. Ambi naiduidi naquin ambembi chiaid chiac matses nadquoio iquec. Uispa dadpen icboedi badiadnuc abu chëshën bëtinaacsho isash: —Tanunquien badiadec —queuidac bimboec matses iquec. Pete ambi nitsinaid unësacsho istuidash: —Pete nitsinuidombi —quiabimboec muaquidon chuisho tantiaquido: —Bëdamboen chiaid tantianu —queuidendac. <sup>13</sup> Acte tēcguasquequidën cuëmano nushan uaqin icsa uac bimboen icsaquin muaquidon mibitsen icsamec. Abi capuaid tantienquoio yequi: —Ëbi capuaid tantiaquidquoio nebique. Isec cho —queboedi bënudtaniabimboen: —Nuquin Papan chiaid tantiamequidquoio nebi —queboedëmbi tantiamenquoio iquec. Adec muasho cuidquin Nuquin Papan puudentiapimbo yacno icsamboshë yacno nidmendac.

<sup>14</sup> Adquido con tsusedpa Enoc caidën chuipampic. Abia matses uaid Adanën madon baban tishmiadën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshë Nuquin Icbobëd choendac. <sup>15</sup> ‘¿Ada mibi bëdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. <sup>16</sup> Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiëc. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquido mibi nec —quec muaic.

*Esus tantiaquionona, quiaid*

<sup>17</sup> Ĕmbi tantiaido mibi neque. Tantia. Esusbĕd iccondaidon chiaid mibi chuinu. <sup>18</sup> Nadpondash. “Esus padpidec choabi icnu Nuquin Papan chiacpadec bĕdamboec tabadsho Esus tantiesabon mamĕnshunendac. Nuquin Papan chiaid niac-niaquec abi bunacpadec icsaquiendac,” quepondash. <sup>19</sup> Adquio muaquido iquec. Aton padi yec icsaiqui chieshĕmĕnquin mibi cuĕsh-cuĕshĕdmec. Nuquin Papan aton Mayan aidobĕd tabadmenquio iquec.

<sup>20</sup> Adquid icsacpadec icsainquio icquin Esus tantiatsĕcboedĕmbi Nuquin Papan chiaid isban-isbanquin ĕnenquio icquin Esusbĕdta Nuquin Papa tantianuna. Nuquin Papan Mayanĕn tantiamiacpadomboen Nuquin Papa chianenuna. <sup>21</sup> —Abi tantiasho bĕdamboen isquin abi yacno Esusĕn nuqui tabadmendac —queshun Esus chosho isnuen cainquin aidbĕdta Nuquin Papa tantianuna. —Nuquin Papan ĕbi tantiec —quequin ambi chiacpadomboen utsibo tantianuna. <sup>22</sup> Adshumbic Nuquin Papan chiaid tantiatsĕcquido bĕdamboen isnuna. Adquidon muaquidon chuisho tantiash: —ĵAbimbobida capeba? —quesho tantiashun nĕishenquio icquin Nuquin Papan chiaidquio tantiamenuna. <sup>23</sup> Bacuĕmpi cuĕten pichiquetsensho: —Baded bed. Taidnushe —quiachimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bĕdamboen isnuna. Esus tantiamenuen aido bĕdamboen isec: —Ĕbitsen icsamane —quiash aido icsacpadec icsainda. <sup>24</sup> Nuquin Papa bĕdamboshĕ iquec. Aid tantiasho nuqui icsamenguio iquendac. Adshumbic: —Icsambo mibi iquec —utsibo quetiapimbo icnuc bĕdambo icmeshun bĕdamboshĕ yacno abĕdi nuqui tabadmendac. Adoac nuqui cuishonquendac. <sup>25</sup> Aden tantiaquin naddonona. —Abipadquid utsi nibĕdnuc abentsĕcquiobi Nuquin Papa iquec. Nuquin Icho Esuseded cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bĕdamboshĕ iquec —canuna ĕnenquio icquin. Esus tantiaquido icquin adonona. Padi. Aidtedi chuiquin dada uaombi.

## ESUSËN UAN ISMIAID

### *Nëidba chuiquin Uanën dada uaid*

<sup>1</sup> Nuquin Papan tantiamiac Esuquidistun ismeboedquo chuibanquin dada uaic nebi. Esusbëd ictenedquo aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. <sup>2</sup> Adoac Nuquin Papan chiaidbëdta Esuquidistun ismeboedquo chuibanquin dada uaic nebi. Abimbo caimbique. Tantia. <sup>3</sup> Nëid dada uaid tantiaash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquo icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

### *Esus tantiaquidon iste dada uaid*

<sup>4</sup> Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bësec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup> Aton Mado Esuquidistu Nuquin Papan bëdamboen iste tantiaquidquo nec. Abia aton dada nëstiapimbo icquid icmequin uincuemiaidquo nec. Adquid yec abitedishun Icbombo nec. Ambiuuidsëqui chuiquid dapa abitedimbo namendac. Aidquo nuqui tantiaquidquo yec nuqui icsaid bedshunuec abided cuidadec unëspondash. <sup>6</sup> Abi tantiaasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquo nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquo icquin. <sup>7</sup> Aidquo tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquo isendac. Con matses ambi unës uaondaidquo chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

<sup>8</sup> Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquo nebi. Nidaid uabi yec ictenedi nebi. Nëbi adquid yec nibëdantiapimbo icquidquo nebi. Adquid yec abitedishun Icbombo nebi —queposh Nuquin Papa. Aidquo tantianuna.

### *Dacuëdampamboecnuc Esusën ismiaid*

<sup>9</sup> Esusbëd ictened Uan nebi. Mibëdtan Esus tantiaquid yec min utsi-bimboecquid nebi. Mibi yacpadembidi Esus tantiaasho Esus tantiesabon chieshëmpdashi. Adoac Esusën namiacpadec chieshtoenquo iquebi.



Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedac bimboen cuemenquo icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. <sup>10</sup> Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncac bimboec comapenec onquesho tantiapombi. Ushenquo icquimbi ushquin isac bimboen tantiombi. <sup>11</sup> Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aideddishun iste dada uashun buame —quequin comapenec onquequin chuiposhi.

<sup>12</sup> Comapenec onquesho tantiatanec bidadquin isquien tabote manitsinaid 7tedi icposh. Shocosh piu nacnenaidquo neposh. <sup>13</sup> Aid nënantanquo Esusquo icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiacosh. Abi shictonquete bëshpiu-bëshpiuctsëcquid nuacquid dapambo icposh. <sup>14</sup> —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh. <sup>15</sup> —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaidbimboec nacnacquo aton taë icposh. —Nuquin Papapadquidquo nec —camenuc acte chododoquiabimboec comapenec onqueposh. <sup>16</sup> Abiucshun uispa 7tedi sanamposh. Chështe cuënumbo icquid ana shëcuënuësh cueshqueshposh. —Matses icsaid cuidquidquo nec —camenuc adposh. Aton bëtantete ushëbimboec bëchamauanquiecposh. —Bëdambo icquidquo nec —camenuc ad icposh.

<sup>17</sup> Dacuëdampamboecsho istanequini Esusën dayumbi uebudpaccoc unësanibimboec padishec. Adshobini Esusën camishquin bëdameposh. —Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Ichombo nebi. <sup>18</sup> Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

<sup>19</sup> Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. <sup>20</sup> Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuedquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuedquidobëd iquebi,” quequin tantiaquin tabote manitsinaid 7tedi tabëcacno aid nënantanquo ëbibi iquebi —quequin aden ismeposhi Esusën.

## 2

*Epeso yacnocquido Esusën chiaid*

<sup>1</sup> Aden Esusën uispa 7tedi sananquin ismioshi. Tabote 7tedbidi man-itsinaid tabëcacno aid nënantanquo abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. <sup>2</sup> Mimbi naidtedi tantiaquid nebi. Dayacquo icquin ëmbi chiacpadomboen mimbi dadpen nabanoc. Utsibo chieshtonobi chieshtoengquo icquin mimbi ëbi tantioc. Ëbi tantiaquido icsamenuen chiec: ‘Esusën namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc. <sup>3</sup> Adembidi utsibon chieshënaqui chieshtoengquo icquin Nuquin Papan chiaidbëdta ëmbi naid mimbi chuibanoc.

<sup>4</sup> Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquio icquin mimbi utsibotsen tantiaquiopadenec. Adodenedëmbi pacuënëdacimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec. <sup>5</sup> Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ queshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoengquo icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedengquo ictsandac. <sup>6</sup> Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. <sup>7</sup> Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoengquo icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabcimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusën chuiposhi.

*Esmidina yacnocquido Esusën chiaid*

<sup>8</sup> Adshumbic Esusën padpiden chuioposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëngquidon unës uacsho chococaqui uincuempaccondash. Adonda yec unësaid uincuemeguidquio nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu. <sup>9</sup> Ëbi tantiaquido icsho utsibon chieshënac mimbi dayun uaid nibëdquidendac. Nëbi mitsana nibëdquid yequi con

Pa yacnuësh dadpen dayun uaquidbimboec mibi bédamboshë iquendac. Chieshëmênquidon mibi icsamboen chuishumboedtsen tantiemi. Mibi yacnoshon Satanasèn namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquio yec Satanasèn yuaboen nec. <sup>10</sup> Aido tantiaish: ‘Ashibi mëyampatsiash,’ quec dacuédenda. Satanasèn: ‘¿Ada Esus tantiaquido chieshtoenquio ictsiashe? Tanu,’ quequin namiacpadomboen chieshëmênquidon mibi utsi-utsien quênên nauedbanendac. Adoac daédpactsêc ushec mibi mëyadendac. Puduenabi yec chieshtoenda. Chieshëmênquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. <sup>11</sup> Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquio icquin ëbi tantiasho isun icsaido cuidquiagno nësecainquio iquendambi,” quequin ëmbi chuiboed dada uata —quequin chuiposhi Esusèn.

### *Pedcamo yacnocquido Esusèn chiaid*

<sup>12</sup> Adoshombic ana shëcuënuësh chështe cuënumboshë icquid cueshqueboedën Esusèn naden chuioaposhi. —Pedcamo yacnocquidon ëbi tantiaquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu. <sup>13</sup> Mibi yacno Satanasèn yuabo dadpen icnuc ëbi tantiec mibi chieshtoenquio iquec. Ënden Satanasèn namiac mibi yacnoshon chieshëmênquidon con yua Antipas caid cuesunepondash. Aidën chieshtoenquio icquin ëmbi naid chuibansho cuesuniacsho isumbic adembidi chieshtoenquio icquin mimbi ëbi tantiaquiopondac. Aden mimbi bédamboen naid tantiemi.

<sup>14</sup> Adondaaid tantiaquin mibi icsaidtsen chuinu. Mibi cuédëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niacniacmec icsamianquido mibëd iquec. Aido cuemepatecnëdan mimbi. <sup>15</sup> Adec nicadaitabo caido ëbi tantiate shubun puduedash mibëdi cuédëncuededec icsamiente bumpec. <sup>16</sup> Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuédëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique. <sup>17</sup> Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquio icquin ëbi tantiasho bédambo icmendambi. Nuquin Papan isadaidbo mana caid pemedenequin dayun uacpadomboen mibi bédamboen tabadmendambi. Adshumbic: ‘Ëmbi tantiaidquio yec ëbi yacno puduedtequid nec,’ queshun cuënote ushu menendambi. Abi cuëmëdquid icnubi utsi uain cuënquin

aid cuënoten dada uatanquin menendambi. ‘Ëmbi meneboedënuidsëqui ma isnu,’ quequin adoendambi,” quequin ëmbi Pedcamo yacnocquido chuiboad dada uata —quequin chuiposhi Esusën.

*Tiatida yacnocquido Esusën chiaid*

<sup>18</sup> Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquio yequi aton taë shocosh piubimboec nac-nacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec —camenuc adquio isadquidën naden chuiposhi. — Tiatida yacnocquidon ëbi tantiaquidon iste ëmbi naden chuiboad dada uata. <sup>19</sup> “Tantia, Tiatida yacnocquido. Mibitedi chuinu. Mimbi naid abitedi tantiëmbi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquio icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquio icquin ëbi tantiapec. Tauamboen ëbi tantiaquin daëdpactsëc naondaïdi nëbi ëbi tantiaquioshon ëmbi chiacpadomboen mimbi dadpen naic.

<sup>20</sup> Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaïdbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaïd chuiquid nebique. Tantia. Chuinu,’ quequin abi bunaiduidquio chuibanosh. Adoac ëbi bëdiactsëc tanti-aidtsëcboedi aidën chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nëish pichicaïd pec tabadcuededquimbi aton chidopenquio chudbededposh. <sup>21</sup> Adsho isun aid chido: ‘Ma abi icsaid ënu,’ qeshun badedquio cuidenquio iccombi. Adoboqui abi icsaid ënte bunenquio iccosh. <sup>22</sup> Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adëmbidi mëyadquionoc cuidendambi. Aidon ambi naid ënshoëmbi cuidenquio ictsiaç. <sup>23</sup> Aid chido cuidquioquimbi aton bacuëbobimboecquido aidën chiacpadomboen naquin ëntiapimbo icquido adëmbidi cuidquiendambi. Ëmbi adosho isun ëbi tantiaquidtedishun: ‘Matsesën otacquo tantiaïd tantiaquidquio Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiatsiash.

<sup>24</sup> Tantia. Ambocquido ëbi tantiaquidombotsen chuinu. Aden Satanasën chuimiaidën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquëmbi. <sup>25</sup> Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiata. Ëbi choabi yacpadëmbi adota. <sup>26</sup> Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. <sup>27</sup> Aden Nuquin Papan aïdo ëbëdta chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi

chieshënquido: ‘Esus dëniacquin ëmbiquen matses namenu,’ qesho tantiashun matsu nacnenquidën ambi nacnenaid icsambo icsho isun posposachimboen cuidquiendambi. <sup>28</sup> Badiadte aonoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi. <sup>29</sup> Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata — quequin chuiposhi Esusën.

### 3

#### *Sadis yacnocquido Esusën chiaid*

<sup>1</sup> Adoshombic Nuquin Papan Mayan abi tantiaquidobëd tabadmequidquio icquin Esusën padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësachimboen mimbi ëbi bëdamboen tantienquio iquec. <sup>2</sup> Isucunachimboen ëbi padpiden tantiaquiota. Nuquin Papan chiacpadomboen mimbi nauidsëccoque. Mimbi ëbi tantienquio iqueque. ‘Nuquin Papan chiacpadquiec bëdamboec tabadnuna. Esus tantiaquionona,’ cananta. <sup>3</sup> Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquio yachimboen ëbi tantienquio icshoembi mibi cuidendac. ‘Ampequid choec,’ quequin tantienquio yachimboen ëmbi cuidte tantienquio icsho mibi cuidtsiambique. Ëbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daëdpactsëc ambi naid icsa ucudachimboec icsainquio yec bëdamboec tabadec. Adec bëchish ucudachimboec abi icsaid ënash bëdamboec tabadsho isun ëbëdi tabadmequin icsaisa icmendambi. <sup>5</sup> Ëbi tantiaquido utsibotsen chuinu. Ëmbi chuibocpadquidën chieshtoenquio icquin ëbi tantiasho adembidi bëdamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquio yachimboen bëshunenquio icquin ëbëdi tabadtequido abitedi tantiembi. <sup>6</sup> Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

#### *Pidadepia yacnocquido Esusën chiaid*

<sup>7</sup> Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid

Esus nec. Aidèn naden chuiposhi. —Pidadepia yacnocquidon èbi tantiaquidon iste èmbi naden chuiboed dada uata. <sup>8</sup> “Tantia, Pidadepia yacnocquido. Mibitedi chuinu. Mimi naid tantiambi. Mibi yacno èbi tantiaquido daèdpectsèc iquec. Adquid yec: ‘¿Ada nuquitedictsèqui chieshtoenquo icpatsiaba?’ queded-quededtsècquien mimi èbi tantiaquioc. Chieshènaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun èmbi namiac èmbi naid mimi chuiban-chuibanendac utsibon èmetiapimbo icquin. <sup>9</sup> Aden isadaidbon mibi èmetiadquo iquec. Aido: ‘Con matses isadaidboudtsèqui Nuquin Papan bédamboen isendac,’ quec muaboedo Satanasèn yuabo niosh. Èmbimbo namiac mibi yacno cho-chosho mimi chuibanendac. Adoac: ‘Ai, abimboen mimi caoc. Nuquin Papan Madon Esusèn tantiaidombo mibi nec,’ aidon mibi caindac. <sup>10</sup> Èmbi chiapadec chieshtoenquo icquin èbi tantiasho isash mibi cudasendabi. ‘¿Ada Esus tantienquo yantsiashe? Tanu,’ queshun nidaid utsi-utsiec yacno tabadquido abitedi Satanasèn natiambo icmendac. Adosho mibi chieshtoenquo icquid icmendambi.

<sup>11</sup> Tantia. Nèbi choendabi. Utsibon chieshènaqui mibi icbocpadquiec chieshtoenquo yec bédamboec tabadta. ‘Èbi adenquo icsho isun Esusèn abi yacno puduedmenquo ictsiashi,’ quiash bédamboec tabadta. <sup>12</sup> Aden chieshtoenquo icquin èbi tantiaquido utsibo abitedi Nuquin Papa yacno yuedendambi. Buintad nitsinaid chiquidiapimbo yac bimboecnuc con shubun icquido mibi icmendambi auèshquo cuentiapimbo icnuc. ¿Mitsipaden icbon: ‘Con na nec,’ quequin abi cuèmèdquid dada uaquin ismepec? Adembidi abitedi ismequin: ‘Con Pabèdtan con matses nec,’ mibi caindami. ‘Nuquin Papa yacno èbi tabadaid Edusaden chuca caid abucuèsh budtequid yacno tabadtequidombo nec,’ mibi caindami. Nuquin Papan abitedishun Icbombo icmiac èbèdtambi chuiquid mibi icmendambi. <sup>13</sup> Èmbi Pidadepia yacnocquido chuibocpadamboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiaata. Chieshtoenquo icquin èbi tantiasho adembidi bédambo icmendambi,” quequin èmbi chuiboed dada uata —quequin Esusèn chuiposhi.

### *Daudiseya yacnocquido Esusèn chiaid*

<sup>14</sup> Adoshombic abitedishun naid tantiaquin abimbo chuiquidènquo Esusèn padpiden chuioaposhi. Nidaidbèdta abitedi uaquidènquo abitedishun Icbon chuiposhi naden. —Daudiseya yacnocquidon èbi tantiaquidon iste naden èmbi chuiboed dada uata. “Tantia, Daudiseya yacnocquido. Mibitedi chuinu. <sup>15</sup> Mimi naid tantiambi. Chieshtoenquo icquin èbi tantiaquid ictiadquidi adquidpenquo mibi nec. ¿Èbi bédamboen tantiaquidon adopendactic? Padenquo. ‘Esus tantiaquid nebi,’ quiondaidèmbi mimi naiduidi naquin mimi èbi bèdiactsèc tantiatsèccoc. Adsho tantiasahun: ‘Dayacquio yac bimboen èbi tantiaquiopashun,’ caimbi mibi. <sup>16</sup> Mibi adec chieshtonoc èbitsen chieshtotiadquo iquebi. ‘Cacumiabimboen Nuquin Papa yacno èbèdi mibi tabadmenquo iquendambi,’ mibi catiadquo icchitebi. <sup>17</sup> ‘Nuquin Papan chiaid niac-niaquec icsapobi,’ quetiadquidi: ‘Èmbembi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabèd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun

mibi shubiatiadquo iquebi. Bëchish ucabi yacbimboen mibi icsaid ënabi icsho mibi bëdamboen istiapimbo iquebi. Pacuënëdacbimboen ëbi tantienquo mimbi iquec. <sup>18</sup> Adboedëmbi Nuquin Pababëd tabadte bunquin ëbi tantiaquiota. Ëbi tantiaquin bëchish ucacimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid icmetsiambique. Pacuënëdaid paposhquiacbimboecnuc ëmbi naid mibi bëdamboen tantiametsiambique. Ëbi tantiata.

<sup>19</sup> Ëmbi tantiaido bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiacimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta. <sup>20</sup> Mibi tantiaquiembi. ‘Ëbi tantiata,’ ëmbi cac mibi: ‘Ai,’ qesho tantiash mibëd iquendabi. Pec tabadec bëisnanguiacbimboec mibëd iquendabi. <sup>21</sup> Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibëdi tabadquid nebi. Adquid yec aibëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi. <sup>22</sup> Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuibod dada uata —quequin chuiposhi Esusèn.

## 4

### *Nuquin Papa Uanën isaid*

<sup>1</sup> Asia yacnocquido Esusèn ëmbudquin chuibon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec onqueoaposh. —Nëmbö cho. “Nadquid iquendac. Nadotsiandac,” quequin mibi dadpen ismenu —caposhi.

<sup>2</sup> Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. <sup>3</sup> —Chuiquid dapa abentsëcquiobi nec. Bëdamboshë iquec —camenuec matses bunaidquo casëdubimboec nac-nacquo yec pumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. —Bëdamboshë icquidquo nec —camenuec adquo icposh. <sup>4</sup> Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquo dasiuidcuededposh. Chuiquid dapan mauetembo shocosh nacnenaidquo maucuededposh. <sup>5</sup> Adnubien Nuquin Papa yacnuësh abubimboec bed-bedquetanenubien abu tesquianiacimboec cuëdtoposh. —Abitedishun Icbombo nec —camenuec adec cuëdtoposh. Nuquin Papan bëntsiaucquo tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuen aden ismeposhi. <sup>6</sup> Bëntsiaucbidi actepenquo chian dapa acte-actectscquo isadposh.

Nuquin Papa tsadaid anoen daëdtsëcquio abi dacuenadec aben icquid-bimboecquid 4tedi icposh. Dadano chedobi ëshë ictsäcquiec icposh. Utsi tanenquio. Abimbouidquio istequidquio icposh. Cachoc icnubi tacbiduc adquiobidi icposh. <sup>7</sup> Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. <sup>8</sup> Icho-icboec aton podo uicchunën podobimboec 6tedi icposh. Podonotsen adquiobidi ëshëuidquio isadposh. Podo ananquio adquiobidi icposh. Aidonquiobi ënenquio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquio nec

—quec badiadquidën badiadquidënquiec cuëdënashic inchëshëntsen cuëdëndeneposh.

<sup>9</sup> Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsiash, Papa —Nuquin Papa cadonenubi <sup>10</sup> tsusiobo 24ted icquido ambo tabadquido danëshën tinquebudcuededposh. Adtanquimbi mauete chichbedetanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbi aidontsen Nuquin Papa chuiposh nadec cuëdënquin.

<sup>11</sup> —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiapadomboen mibiuidtsëcquiobi abitedi uapampic.

Adoac mimbi tantiapadequi mimbi uaido nibëdanabi yec abi iquec.

—quec tsusiobo cuëdëncuededposh.

## 5

### *Nuquin Papan chiacpadomboen namequid Esus isadaid*

<sup>1</sup> Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën is-nushe —qeshun 7ted icnuc bitaccatempin bitaccabanaid neposh.

<sup>2</sup> Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitac-caid chichbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. <sup>3</sup> Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aïdtedi dada uaid bedshun bitaccad chichbanquin istequid nibëdposh. <sup>4</sup> Adsho isashini unësquio icnuc shubipoc: —Aid dada uaid bedshun chichbanquin chuibanquid nibëdec —quiash. <sup>5</sup> Adshobini anocquid tsusion: —Otac. Shubienda. Ënëd. Is. Dada uaid bedshun chichbanquin chuibanquid



abi iqueque. Nuquin Papan matsesmequin chomiondaidquo neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacdiapimbo icquid nec. Aidëmbi chieshtoenquo icquin Nuquin Papan chiacpadomboenuidi naquidquo icquin aid dada uaid bedshun namendac —caposhi.

<sup>6</sup> Adoac isquien isadaidbon Nuquin Papa cuidmenquo icnuc abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunec abided cuidadec unësaid Esusquo nec —camenuc adec isadposh. Utsibo dacuenadec tabadnuc nënantanquo Nuquin Papabëdquo icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobouidquo dacuenadec tabadposh. Padnuc obecabimboecquid yec aton pais 7tedi icnuc aton ëshëmbö aiteddquibidi icposh. —Abitedishun Icbombo yec utsin dëniacdiapimbo icquid Esusquo nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdiapimbo icquid Esus nec —camenuc ëshë 7tedi ismeposhi ushquin isacbimboecnuc. <sup>7</sup> Adshumbic obecabimboec isadboedën Esusën Nuquin Papan abiucshunquo sananaid dada uaid bedposh. <sup>8</sup> Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. —Bëdamboshë icquidquo mibi nec —quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —

Ëmbi ten-tencamequin Nuquin Papa cuishoncamiacbimboec Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushdquid Nuquin Papa yacno nidacbimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec. Nuquin Papan chiacpadec matses cuidmenquo icnuc mibided cuidadec unësondaidquo mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquo mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquo.

Nëidic matses utsibo.

Nëidic nidaid utsi-utsiec yacno tabadquido.

Aitedi mibi tantiaquido yansho Nuquin Papan bëdamboen isendac.

<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

<sup>11</sup> Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquo icnuc anoentsëqui

dadanobi ëshëcquidoidquio dacuenadec tabadposh. Abi uquëctsäc dacuenadec tsusioboidquio tabadposh. Aid uquëctsäc dacuenadequic mayan bédaboidquio tabadposh. <sup>12</sup> Adec tabadec mayan bédabo abitedimbo cuëdëncuededposh naden chiec.

—Isadaidbon obeca bacuëded cuidachimboec matses icsaid bedshunuec abided cuidadec Esus unëspondash.

Esusquio bédamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bédamboshë iquec. Mibi tantiaquiemi,” abitedishun capashun

—quec cuëdëncuededposh mayan bédabo Esus tantiec.

<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bédamboshë iquec.

Obeca bacuëbimboecquid abided cuidadec unësaid Esustsen bédamboshë iquec,” canuna, ënenquio icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

<sup>14</sup> Adsho tantiaish dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

## 6

### *Bitaccaid chicaid chiaid*

<sup>1</sup> Adnubien Esusën Nuquin Papan: —Nadoendambi —quequin chicaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacimboec comapenec cuëdquin: —Cho —caposh. <sup>2</sup> Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshëncquido uesquin cuesun secaquidquio mibi nec —quetanquin chuiquid dapan mauetempo mauemeposh. Adoac adecbidi abi chieshëncquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac <sup>4</sup> cabayo piumbo icquid catsadec dada choposh. —Matses cuesun secananenquio icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa matses siante dapa meneposh. Adomboen Nuquin Papan matses cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen:

—Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuiposh. —Piuquid dadpenquo meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquo icquin nata —quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

<sup>7</sup> Adnubien Esusèn dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac <sup>8</sup> cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsno tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secanec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusèn dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbëdta Esusèn naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ?tedetsicshun mimbi cuidpe? —caquin chuidoneposh. <sup>11</sup> Adoaiquen: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembï —qeshun abitiombi dasiuidbudte ushumbo icquid dasiumbamposh.

<sup>12</sup> Adshumbic Esusèn dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacbimboec inchëshquo icposh. Inchëshën ushëbic intacbimboec piumboshë isadposh. <sup>13</sup> Uispabic natiambo cunquenec cuëte bacuë tididiquiacbimboec nidaidën tididieposh. <sup>14</sup> Abubic dashcute bidiquiacbimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquo. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sid-

quetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidtsash: —Macuësh dapa cuitiadbudnec sebudnequin mabêspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided ciudadec unësaid Esusëntsen cuidnushe. <sup>17</sup> Aidon ambi tantiacpadênquiobini nêbimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

## 7

### *Isadaidbo Nuquin Papa tantiaquidombo bësiaid*

<sup>1</sup> Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bédabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquo icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobêdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. <sup>5</sup> Nêidic Acobo caidën mado Uda caidën matses tsyuecquido 12,000tedi. Nêidic Acobon madobidi Duben caidën matses tsyuecquido 12,000tedbidi. Nêidic Acobon madobidi Cad caidën matses tsyuecquido 12,000tedbidi. <sup>6</sup> Nêidic Acobon madobidi Ased caidën matses tsyuecquido aidtedquiobidi. Nêidic Acobon madobidi Netadi caidën matses tsyuecquido aidtedquiobidi. Nêidic Acobon madobidi Manases caidën matses tsyuecquido aidtedquiobidi. <sup>7</sup> Nêidic Acobon madobidi Simeyon caidën matses tsyuecquido aidtedquiobidi. Nêidic Acobon madobidi Debi caidën matses tsyuecquido aidtedquiobidi. Nêidic Acobon madobidi Isacad caidën matses tsyuecquido aidtedquiobidi. <sup>8</sup> Nêidic Acobon madobidi Sabadon caidën matses tsyuecquido aidtedquiobidi. Nêidic Acobon madobidi Ose caidën matses tsyuecquido aidtedquiobidi. Nêidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabêdta Esus tantiaquido dadpenquioshë ismeposhi. —Adquido iquendac —quequin adoposhi.

### *Esus tantiaquido Nuquin Papa yacno tabadaid*

<sup>9</sup> Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac

isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. <sup>10</sup> Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esuseded cuidpanëdash.

Adoac nuqui icsaid bedshunec abided cuidadec unëspondash Esus.

Aid tantiasho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

<sup>11</sup> Adsho tantiash ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquio tabadposh. Abi uquëtsëc dacuenadec tsusiobo 24tedi icquiduidquio tabadnuc abi uquëtsëc dacuenadequic mayan bëdabouidquio tabadposh. <sup>12</sup> Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquio icnuc ambi tantiacmaid utsi nibëdec.

Aiduidtsëqui bëdamboen tantiaquidquio nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

<sup>13</sup> Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido çtsutsi nepec? çMitsiuëshquio aido chosh? —cac: <sup>14</sup>—Tsauidi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “çAda chieshtoenquio ictsiashe? Tanu,” qeshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmëncuidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. <sup>15</sup> Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bëdamboen dayun uaic. <sup>16-17</sup> Isadaidbo matsesën nëish yua obeca dadpen dayun uacpaden abided cuidadec unësaidën Esusën

abi tantiaquido bédamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquieci iquendac. Unësquio icmiantë nibëdquieci iquendac. Bacuë shubisho anin bëucquin bédambo icmiacimboen abi yacnoshon Nuquin Papan Esus tantiaquido bédambouidquio icmendac —quequin chuibamposhi tsusion.

## 8

### *Dada uaid bitaccaid nainquin chicaid*

<sup>1</sup> Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpactsëc otacquo tantieci tabadposh. <sup>2</sup> Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. <sup>3</sup> Adnubien mayan bëda utsi ambobidi choposh. Choash bédambo nuadquid tauinuequin shocosh nacnenaid tauite dapa dayun nidtuidposh. Shocoshëmpin bédamboshë nuadnuc tauitempi utsi sanamposh. Adsho isun bédambo nuadquid nua meneposh. Adoac: —Nëid tauiac pushudquid Nuquin Papa yacno nidacimboec Esus tantiaquidon chianiaid iquec —quequin bédambo nuadquid sanshun tauite nacnenaid dapan tauiposh bédambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshëncuideo cuidendac —quequin aden ismeposhi. <sup>5</sup> Adshumbic aid mayan bédan tauite dapan samëdquid cuëte dëtsisadaid isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquianiachimboec cuëdtoposh. Adnubien nidaid abichobi saca-sacaquemboec uëdëqueposh. —“Nuquin Papan ëbi chieshëncuideo cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

### *Shoncate shoncaquin ismiaid*

<sup>6</sup> Matses tabadacno cuëte dëtsisadaid isquidquio icquid masiabudnubien shoncate bedboedon mayan bédabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid yec intac yec quenuc chomeposh ue dapa choacimboecnuc. Aden chomiaidën nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh. <sup>8</sup> Adnubien mayan bëda utsin shoncaposh 5tedishun shoncabi icnuc. Shoncanubien macuësh dapatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. <sup>9</sup> Adec intac yanaidën acten icquid dadpenquioshë

unësbudneposh. Adecbidi cano dapa antabëdquidotedi abi canochobi mentoadbudneposh.

<sup>10</sup> Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotëbimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. <sup>11</sup> Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

<sup>12</sup> Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiantsëccosh.

<sup>13</sup> —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësqioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

## 9

### *Mayan bëda utsin shoncanuc isaid*

<sup>1</sup> Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempì meneposh. Podobitsì icsabo uidën uacno nidaid shëcuë uquëducquio icquid bëtashte chichte neposh. <sup>2</sup> Aid chictempin chicaquien uquëducuësh tied nëdënquedoacbipamboec pushudtoposh. Abuc inchëshquio pushudquid icnuc ushë isadenquio icposh. <sup>3</sup> Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. <sup>4</sup> Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidoidquio sebudneta —quequin chuiposh. <sup>5</sup> Adshumbic: —Unësnuç seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. <sup>6</sup> Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

<sup>7</sup> Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetëbimboecquid mauëcuededposh. Matsesën bëtantetembobi bëisadposh. <sup>8</sup> Chidon tëbucshumbimboec isadposh. Bëdin shëtabimboec aton shëta icposh. <sup>9</sup> Bëntsiauc shicdiadquid cudaste shocosh nacenaidbimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. <sup>10</sup> Aid tsectsebiecquid chishpichquid yec chichumbimboec sianquidquio neposh. Inchëshën ushë 5tedi nidmequin adquidën dadpëshun natiamboshë

icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

<sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

### *Chiqui dapan chuiboed utsi*

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiac tsadunaid yacnuëshquio onquedoshon tantiombi. <sup>14</sup> Adec onquequidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. <sup>15</sup> Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. <sup>16</sup> Adoaquien ambi namiaido cabayo catsadquido sondado chedo matses utsibo cuesun secanuec chochoposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

<sup>17</sup> Ëmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. <sup>18</sup> Adshumbien ana shëcuënuësh choaidën matses dadpenquioshë cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

<sup>20</sup> Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ëntiadquidi abi icsaquiposh. Nuquin Papa tantienquio icquin podobitsi icsabo tantiaquin ëntiapimbo icposh. Adembidi ambibi nacnenaid ambi papa caid ënenquio icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacnenaiduidi tantiaposh. <sup>21</sup> Cuesanquidon abi cuesun secaposh. Nënëchoquidombic abi unës uabudneposh. Cuëte podò dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnuschë. Ëbi icsaid ënu —quetiadquidobi adenquio icposh.



## 10

### *Mayan bēdan dada uaidēmpi pemiaid*

<sup>1</sup> Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquo Nuquin Papa yacnuēshquo budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacpamboec mapino icposh. Ushēbimboec bētantete bēchamauanquiecposh. Buintad nitsinaid nēdēnquiacpamboec isquid-isquidpambo nidte icposh. <sup>2</sup> Dada uaidēmpi bēcadotsaid sanamposh. Budash nidtuidposh. Tsiembudcuenshun taē abiucshun chian dapa mad caid nētincaquimbi taē opiocshon mananuc tincaposh. Ēnapenquioshē icquid niosh. <sup>3</sup> Adashien bēdi noshquiacbimboec nuamboshē cuēdtoposh. Adec cuēdquin chiac abu 7tedec cuēdtonquin ēcbedtonesho Nuquin Papan chiaid chuiquin. <sup>4</sup> Aden abu cuēdquin ēcbedtonesho tantiashun: —Abu cuēdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuēdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

<sup>5</sup> Adnubien mayan bēda tsiembudcuenshun chian dapa nētincaquin utsiucshun mananuc tincaboedēn ambibi podo abiucquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiucquo cadoposh. <sup>6</sup> Adotanquin chuiposhi. —Tantia. Mibi chuinu. ¿Tutsi nidaid uabi yec ēndenquimboshē icpampic? Aidi Nuquin Papa nēbi adquid yec nibēdantiapimbo iquendac. Adquid icquin abitedi uapampic. Abu uashun aidēn icquidtedi uapampic. Nidaid uashun aidēn icquidtedi uapampic. Acte uashun aidēn icquidtedi uapampic. Aden abitedi uaquidēn chiaidquo chuinu. Nēbi Nuquin Papan ambi tantiacpadomboen īcsambo icquido cuidquimbi abi tantiaquido abēdi tabadmendac. <sup>7</sup> Ēbi padquid mayan bēda utsin shoncate sanamboedēn: “Nēbi nainquin shoncanu,” cacpadēnquo Nuquin Papan ambi chiampicpadomboen adoendac —queposh mayan bēda chuiquid dapa dacuēdampambo icquid Nuquin Papan matses cuidquin naimpanuda.

<sup>8</sup> Adnubini abucuēsh cuēdquidēn chuiposh. —Aid mayan bēdan sanamboedada uaid bed —cac: <sup>9</sup> —Dada uaid beccho —capombi. Adoquien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacbimboen Nuquin Papan chiaid cuis-honquequin isban-isbanash mucambo yanacimboc Nuquin Papan cuidte tantiash shubitiadquo mibi yanendac —quequin tantiamenuen aden chuiposhi.

<sup>10</sup> Adoac aid bedshun chiash adquo yanobi. <sup>11</sup> Adquo yansho isun mayan bēdabo chuiquid dapan chuioaposhi. —Nuquin Papan ambi chiaid tantiamiac matsesēn nabante dadpen mimbi chuibanendac. Nidaid utsi-utsiec yacno tabadquidon nabantebēdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bēdabo chuiquid dapan.

## 11

### *Nuquin Papan namiaidon daēdshun naid*

<sup>1</sup> —Nuquin Papan tantiacpadomboen mimbi chuibanendac —quequin chuishumbic mayan bēda chuiquid dapan piabimboecquid

tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bēdambo nuadnuc tauinuequin nacnenaïd dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. <sup>2</sup> Shubu nuntanguio tambanshun umanucquid daquēnē uaid tambanenda. “Ambo Nuquin Papa tantiesabo isadaïdpembo pudued-puduedendac. Aidon Edusaden yacnoshon seta abentsē chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquēnē uaidēn pudued-puduedendac,” qreshun aid shubu daquēnē uaid tambanenda. Aden Edusaden icsa uaqin seta 3tedi matamendac —quequin chuioposhi. —“Muainquio icquin Esusbēdta ēbi tantiaquidombo nec,” quequin Nuquin Papan tantiec —camenuen aden tambanaïdo tantiameposhi. <sup>3</sup> Adnubini Nuquin Papan chuiposh. —Aden Edusaden icsa uanubi matses daēdquiobi ēmbi chuiboedquio chuimendambi. “Nuquin Papan namiaïd nec,” quequin matses tantiamenuen comapenen tantiaquido icmendambi. Adoac seta abentsē chotsecnuc matamequin ēmbi chiacpadomboen chuibanendac. Adquid yec: “Matses abitedi icsamboshē icsho isash shubitiadquio iquebi,” quequin icsambo icquid abi icsaid ēmenuec dashcute icsactsēcquidquio dasiuidendac —quequin Nuquin Papan chuiposhi.

<sup>4</sup> Adshobini mayan bēdan chuioposh. —Aïdo Nuquin Papan oncamiaïd daēd isadaïdbo matses tsusedpan chuipampid nendac. “Nuquin Papan bēntsiauc cuēte odibos caïd nitsinaïd daēd bēdambo icquid iquendac. Ambobidi tabote daēd bēdambo icquid iquendac,” quequin chuipampid nendac. “Nuquin Papan Mayanēn tantiamiaïdquio icquin ambi chiaïdquio chuibanendac,” camenuen aden chuipampic. <sup>5</sup> Aden abi chuïbansho abi chieshēnquidēn: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shēcuēnuēsh choboedēn nibēdquiecnuc pichicacbimboen abi cuesunenuquidotedi unēs uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanēn namiaïdquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuēdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaïdtedi aid daēdshun nainquin naindac. Aden nainshobien matses chuïquid icsamboshē icquidēn bēdi dapabimboecquidēn abidaēdi cuesun secaindac. Satanasēn namiacpadomboen adoendac. <sup>8</sup> Edusaden yacnoshon cuesun secashun chococainquio iquendac. “Ma cuesun secaid ischitono,” qreshun chococainquio icquin podqued ansanendac. Nuquin Icho Esus cuesten dectanacnoshonquio matsesēn adoendac. Equipito yacno icpampido yec Sodoma yacno icpampido yec quequidbimboec icsamboshē icquin aden Nuquin Papan chiaïd chuïbanquido cuesun secaindac. <sup>9-10</sup> Aden cuesun secabosh: “Nuqui mēyanquid nēïd daēd neque. Chococatiapimbo iquebi,” qreshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quïash

cuishonquec abèd icquidobèd menenancuededendac. Matses abitedimbo caimbi. Nèidic matsesquio. Nèidic mayu. Nèidic nidaid utsi-utsiec yacno tabadquido. Aidedi menenancuededendac. Abentsè chotsec ushquin aden ambi cuesun secaboed isbededec tabadendac —quequin chuiposhi mayan bèdan.

<sup>11</sup> Adashic abi onquec: —Abentsè chotsec ushquin isbededec tabadbombien Nuquin Papan cuesun secaboed daèd uincuemendac. Uincuemiasho isash cuishonqueboedobi natia dacuèdec tabadendac. <sup>12</sup> Adnubi Nuquin Papan abucshun cuènquin: “Nèmbo cho,” cac abu ushu datanec cuesun secaboed daèd abuctoendac. Abi chieshènquidon isnubi adendac. <sup>13</sup> Aid daèd abuctonoc nidaid saca-sacaquemboec natiambo uèdèquianendac. Nidaid uèdèquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unès uabudnendac. Adnubien unèsabi icquido dacuèdcuededendac. Dacuèdequi: “Nuquin Papa dacuèdampamboecquidèmbien nash. Aidquien tantiatid,” quecuededendac —quequin chuiposhi mayan bèdan. <sup>14</sup> Aden chiqui dapan chuibocpadomboen mayan bèdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

*Nainquin shoncaquin Uan ismiaid*

<sup>15</sup> Nuquin Papan uincuemetequido daèd chuibombien mayan bèdan shoncate sanamboedèn nainquin shoncaposh. Shoncanubien Nuquin Papa yacnuèsh nua cuèdèncuededposh naden chiec. —Nuquin Papabèdi aton Mado Esuquidistu abided cuidadec unèsaid bèdamboshè iquec.

Abi chieshènquidon naid èmeshun aid abentsècshumbi matses abitedimbo namendac ènenquio icquin.

Abitedishun Icho nec

—quec cuèdèncuededposh. <sup>16</sup> Adashic Nuquin Papa yacnombo icho-ichoec tsadten tabadboedobi tsusiobo 24tedi icquido: —Mibi bèdamboshè iquec —quequin ismec danèshèn tinquebudcuededposh. <sup>17</sup> Adtanequi nadec cuèdèncuededposh.

—Nidaid uabi yec èndenquimboshè mibi icpampic, Papa.

Nèbi adquid yec nibèdantiapimbo icquid mibi nec.

Abitedishun Icbombo mibi icnuc:

“Èmbiquen dèniacquin namenu,” Satanasèn catiapimbo mibi iquec.

Nadatiambo icquid icquin mimbentsèqui matses abitedimbo mimbi namendac.

<sup>18</sup> Nidaid utsi-utsiec yacno tabadquidon abi chuiquidobèdta mibi chieshèndenec.

Mimbi uaidtedi icsa uadenec.

Adsho mimbi tantiacpadènquio nèbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobèdta mibi tantiaquido abitedimbo mibi yacno mibèdi mimbi tabadmendac.

Chuiquid dapambobèdta chuiquidpenquio mibi tantiaquidotedi bèdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacimboen.

<sup>19</sup> Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. —Ëndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ëbi ismenubien bed-bedquetanec abu teshquianiachimboec nua cuëdtoneposh. Nidaid saca-sacaquemboec uëdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

## 12

### *Chidobëdta nisibimboecquid dapa ismiaid*

<sup>1</sup> Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacximboec bëchamauanquiecsho ispombi. Inchëshën ushë tincash tsadposh. Uispa 12tedi nacnenaid mauete maueposh. <sup>2</sup> Bacuë nua usunec tishtiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. <sup>3</sup> Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete maueducuededposh. Satanas niosh. <sup>4</sup> Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. — Aden Nuquin Papabëd icquin Satanasën abipadquido utsibo mayan bëdabo ichoedo utsi-utsien yuapampic. Aden yuash aton yuabobëdi nidaidën choshon matsetsen icsamete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. <sup>5</sup> Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo huamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. — Aden Satanasën Esus nibëdametiapimbo iquec —quequin ismeposhi. <sup>6</sup> Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

<sup>7</sup> Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo ichoedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqued caid. Aidtedi ispombi. Adnubien Satanas nadposh. —Aton yuabo mayan bëdabo cuemiash Nuquin Papa dëniaquec ëbimbo abitedishun icho yantsiabi —quiash nicantiadquio icposh. Satanas chedo nidaidën nidmiabi icnuc neposh. <sup>8</sup> Adshumbic: —Niunchitono —quequin bedbidanbedbidanaquien Nuquin Papan yuabo Miqued chedo uidënuquo icquido yec niadenquio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon

nicaposh. <sup>9</sup> Nicaquien matses tabadacno nidaidën choec Satanasho chedo bud-budposh. Eba caid icsamepampid Satanasho niosh. Nëbi matses dadpenquioshë icsamequin yuate bunquieci.

<sup>10</sup> Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdamo icquidoda nedic? Ëmbi natiamiac aido chieshtotsiash,” quequin Nuquin Papa chuidenequid Satanasho nec.

Satanasho chedo cuemias Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. <sup>11</sup> Adashic padpidec auëshbidi:

—Nëbi ëmbi isac Satanasho Esus tantiaquido chieshtometiapimbo icposh.

Satanasho: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided cuidadec unësaid Esus tantiec chieshtoenquio icposh.

Adsho abi chieshënquidon matsesën: “Padi. Esus tantienda. Cueschitomanë,” caqui

chieshtoenquio icquin adenuidi Esus tantiasho cuesun secameposh Satanasho aton yua icmiambobi.

<sup>12</sup> Satanasho cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquieci Satanasho chieshëmënquieci tabadec.

Mibi icsamete bunquieci. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

<sup>13</sup> Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —queshun chieshënquin nisibimboecquid Satanasho aid chido nadancaposh. <sup>14</sup> Adnubien

Nuquin Papan chiqui dapan podobiequid meniac bedanec aid podombi cuenec matses nibëdacnombo Nuquin Papan tantiacnombo chido cuemposh.

Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. <sup>15</sup> Adnubien nisibimboecquidën: —Aid chido unës uachitono —quequin ambibi ana shëcuëshun chomequin acte

dapa chido dayun uacno nua chomeposh. Aden Satanasho Nuquin Papa tantiaquido isadaidbo matses nibëdametiadquio iquec. Adembidi

Esus tantiaquido nibëdametiadquio iquec. <sup>16</sup> Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido

yacno chiuidenquo icnuc. <sup>17-18</sup> Adsho isun nisibimboecquidén Satanasén nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquido icposh. Nuquin Papan chiacpadomboen chieshtoenquo icquin bédamboen naquido Esus tantiaquido caimbi.

## 13

### *Bëdibimboecquid dapa ismiaid*

<sup>1</sup> Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icbombo icnu —quequin aton mapitedi bédada uadaid neposh. Pais 10tedi icposh. Aid paistedi chuiquid dapan mauete paisén dectambampaccosh. <sup>2</sup> Aton dada bëdin dadabimboec isadposh. Aton taë uinsadpambo icquid utsi oso caidén taëbimboec isadposh. Ana shëcuë bëdi utsi tëbuchoquidén ana shëcuëbimboec icposh. Adsho isun Satanasén ambi caimboed chuiquid dapan icmeposh. Ambi tantiaidquido tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasén matses icsamboshë icquid chuiquid dapa icmequin ismeposhi. <sup>3</sup> Adshumbic padpiden ismeposhi. Adoac aid bëdi dapabimboecquid acte uquëducuësh choboedén mapi abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —qeshun matses abitedishun acte uquëducuësh choboedén chuiquid icsamboshë icquidén chiacpadomboenuidi nabededposh. <sup>4</sup> Adshumbic: —Èbi chuiquid dapa namequid mibi nec —quequin Satanas papa caquin matsesén tantiabededposh. —Aden Satanasén namiac ëbi chuiquid dapapadquid utsi nibëdec. Comapenen tantiaquidquido icnuc utsibon nuqui cuesun secatiapimbo iquec —qeshun abi chuiquid dapa acte uquëducuësh choboedtsen tantiaquioposh. <sup>5</sup> Aden matsesén tantiaid icquin Satanasén tantiamiacpadomboen Nuquin Papa chieshënquiec: —Nuquin Papa caid nibëdquiec. Èmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. <sup>6</sup> Aidén Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. <sup>7</sup> Adshumbic Satanasén tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. <sup>8</sup> Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Èndenquimboshë matses uabi Nuquin Papan tantiampicpadec abided cuidadec unësaid Esusquido tantiesabo nec. —Adquido yec Nuquin Papan: “Èbëdi tabadmendambi,” quequin chiacmaidombo nec —quequin aden ismeposhi.

9 Pabiate cuembo icquin bēdamboen tantia. Esus tantiaquido icsho mibi chuinu. 10 Nuquin Papan: —Ēbi tantiaquid chieshēnquin quēnēn nauedquido cuidendambi—caindac. Esus tantiesabon Esus tantiaquido chēshten seshun secaindac. Adsho Nuquin Papan seshun secanquido cuidquiendac. Ēbi adsho tantiash mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

*Nidaid shēcūēnuēsh choboedtsen ismiaid*

11 Adshumbic padpiden ismeposhi. Adoac aben icquidbimboecquid utsitsen nidaid shēcūēnuēsh puduensho ispombi. Obecan paisbimboec aton pais daēd icposh. Satanasēn ancانquidquio icmiacpadec dacuēdampamboec onqueposh. Bēdambo icquid damianquien muaquin chuibanquidquio niosh. 12 Adsho isun Satanasēn abia chuiquid dapa icmeboedēn nidaid shēcūēnuēsh puduamboed chuiquid dapatsen icmiac abēdtambi matses abitedimbo ancaquin nameposh. Aden namequin abi chuiquid dapa acte uquēducuēsh choboedēn chiacpadomboen matses abitedi nameposh naden chuiquin. —Seshuniaid uincuemiondaidēn nuqui chuiquid dapan chiaiduidtsēqui natiad—caphosh. 13 Aden acte uquēducuēsh choboedēn abi chuiquid dapan chiaid namenuen comapenen tantiaquid icquin nidaid shēcūēnuēsh choboedēn dadpen ismeposh. Matses dadpenshun isnubi abucshun abembi taboadaid budmequin ismeposh. 14 Aden Satanasēn namiacpadomboen comapenen tantiaquin ismiac matses dadpenshun: —Abimbo caic—quequin abi chuiquid dapa icsamboshē icquidēn chiaid nabededposh Nuquin Papambo tantienquio icquin. Abi chuiquid tantiamequid nidaid shēcūēnuēsh choboedēn: —Nuqui chuiquid dapa uincuemiaidquio icsho tantiaquin abibimboecnuc nuamboshē icnuc nacnenta—cac matsesēn nacnemposh. 15 Nacnenacsho isun Satanasēn namiacpadomboen nidaid shēcūēnuēsh choboedēn abi chuiquid dapabimboecnuc nacnemboedi tibocameshun oncameposh. Adoāquien nacnemboedquiobi chuiquid dapa icsabimboec onquequin: —Ēbi tantiesabo neque. Cuesun secatan—cac yuabon abi chuiquid dapa tantiesabo cuesun secatamposh. 16 Adnubien nidaid shēcūēnuēsh choboedēn: —Nuqui chuiquid dapan yuabo nuqui nec—quequin ancabudquin matses dadpenquio dada uaqin bēsiadmeposh nēidtedi. Nēidic chuiquid dapabo. Nēidic chuiquidpenquio. Nēidic dadpen dayun uaquido. Nēidic aton na nibēdquido. Nēidic matses yuabotedi. Nēidic yuapenquio. Aidedi matses dadpenquioshē dada uaqin bēsiadmeposh. Utsi-utsien bētanteteno bēsiadmeposh. Utsi-utsien mēdante abiucquio mēsiadmeposh. —Acte uquēducuēsh choboedēn ēbi chuiquid dapan yuabo nec—queshun nameposh. 17 Adshumbic nidaid shēcūēnuēsh choboedēn chuiposh. —Adec ěmbi chiacpadec siadambo icquido piucquidbēdta mitsana utsi menenda. ěmbi siadmiaiduidtsēqui mene—queposh. Utsi-utsiec abi chuiquid icsamboshē icquid cuēmēdquid dada uaqin bēsiadmiaid neposh. Utsi-utsiec aid cuēmēdaidbimboecquid naden 666 dada uaqin bēsiadmiaid neposh. 18 ¿Ada ěmbi chuiboed tantio? Bēdamboen tantiaquidēn: —Abi cuēmēdquidquio chienquio icquin naden 666 chuiquin dada uapac—catsiash. —Adec matses icsamboshē icquidquio chuiquid dapa yansho isun bēdambo icquid danenda—quequin ushqin isacbimboecnuc aden ismeposhi.

## 14

### *Nuquin Papan cudasënaido ismiaid*

<sup>1</sup> Adoshombic padpiden ismiac abided cuidadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësëmiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbiposh. Abu tesquianiacbipamboequien nechitosh. Ten-tencate dapa dadpen icbo-icboen sananquin ten-tencacbipamboec comapenec cuëdëncuededposh. <sup>3</sup> Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. <sup>4</sup> Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. <sup>5</sup> Chieshtoenquio icquin Esus tantiec muesabo icpanëdash. —Adquido iquendac —quequin ushquin isac bimboecnuc aden ismeposhi.

### *Mayan bëda utsi 3tedshun chiaid*

<sup>6</sup> Aido ismëboshombic utsitsen ismiac Nuquin Papan abi yacnoshon uaid mayan bëda uicchun cuenac bimboec abuc cuensho ispombi. Bënuutiapimbo icquid Nuquin Papan chiaidquio matses chuinuec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. <sup>7</sup> Abuc cuenquimbi chuibem-posh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiata. Nëbi ambi chiaid niac-niacquido cuidquieque. Aidquio tantiata —quequin chuibem-posh abuc cuenquimbi.

<sup>8</sup> Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcac bimboen matses utsibo abitedi Nuquin Papa tantiamenquio icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquindac —quequin chuibem-posh mayan bëda utsin abuc cuenquimbidi.

<sup>9</sup> Adnubien mayan bëda utsitsen abuc cuenoaposh. Aidëntsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aid bimboecnuc nacnënaid tantiaquioposh. Aden abi chuiquid icsamboshë



icquid tantiec: “Aton yua nebigue. Ismenu,” quia sh ambi tantiaidèn chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. <sup>10</sup> Aidedi chuiquid icsamboshë icquidèn yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquio mayan bëdabobëdtan isnubi adoendac. <sup>11</sup> Ènenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ènenquio icquin —quequin chuibemposh mayan bëdan. Aden ismeposhi.

<sup>12</sup> Èmbi chuiboed tantiashun mimbi nabocpadomboembi chieshtoenquio icquin Esus tantiaquin ambi chiacpadomboenuidi nabanta. Ut-sibon chieshënquin: —Padi. Esus tantienda. Cueschitomane —caqui adenuidi ènenquio icquin Nuquin Papabëdta Esus tantiaquiota.

<sup>13</sup> Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmënquidon: “Esus tantiec,” queshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

*Intac nua icnuc Nuquin Papan cuidtequid chiaid*

<sup>14</sup> Adoshombic padpiden ismiac abu ushunquio Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaïd maueshun chështebimboecquid sanamposh. <sup>15</sup> Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidèn icquid sinaid butebanquin sando. Nuquin Papan tantiacpadèn nëbimbobi nata <sup>16</sup> —caquien chështebimboecquidèn sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusèn buanendac —camenuen aden ismeposhi.

<sup>17</sup> Adnubien mayan bëda utsi Nuquin Papa yacnuëshquibidi choposh chështebimboecquid sanampamboec. <sup>18</sup> Adec chështebimboecquid sanampamboec choshobien mayan bëda utsin matses tabadacno cuëte dëtsisadaïd isquidquio icquid nidaid masiabudboedèn tauite dapa dayunuëshquio choshon comapenec cuëdquin chuiposh. —Shancuinbimboecquid uba caïd nidaidèn caniquid chështebimboecquidèn mëtebanquin sandoshon buanshun uba tish-tishten sando <sup>19-20</sup> —caquien uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ènë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesèn intac nuamboshë chididiquec nua mauanendac. Acte nua chëuëdacobamboec cabayon mapi yaction intac chëuëdsho isombi. Ènapenquio quidometedos

300ted cactiombi cuèsquec nuamboshë matsesèn intac chëuëdsho isombi ushquin isac bimboen. —Aden Nuquin Papan abi chieshënquido cuidendac —quequin ismeposhi.

## 15

### *Nuquin Papan cuidtequid 7tedbidi nabanaid*

<sup>1</sup> Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec acte-actetsëcquio isadposh. —Nuquin Papa icsaquido cuidquidquido nec —camenuc tied nëdënquiac bimboec aid bëntse isadposh. Aid cuëmambi Esus tantiaquido tabadposh. Satanasèn namiaidën acte uquëducuësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquid bimboecnuc nacnenaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaid bimboecquid 666 dada uaqin siadmetiapimbo icquido niosh. Adecec abi tantiaquido icsho Nuquin Papan meniaid ten-tencate cuëdëmec cuëdëncuededposh. <sup>3</sup> Nuquin Papan namiaid Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bëdamboen ismenuc abided cuidadec unësaidquido Esus aton Papabëdta tantiec cuëdëncuededposh naden chieci.

—Nadatiambo icquin nabanquidquido mibi nec, Papa.

Abitedimbo uaquidquido yec abitedishun Icbombo mibi nec, Papa.

Matsesèn naid abitedi tantiaquidquido abimbo chuiquidquido mibi nec, Papa.

Mimbi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

<sup>4</sup> Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

<sup>5</sup> Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. <sup>6</sup> Auëshquio Nuquin Papan chiacpadec ëmbi isboedo mayan bëdabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuc dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh

piu nacnenaïd icho-icboen menebamposh. Unëstiapimbo icquidën Nuquin Papan nëshënquioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaïd nuntanuësh pushud-pushudpambo icposh. Adec dacuëdampamboecsho isash Nuquin Papa chuïnuec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadtiapimbo icquin —camenuen aden ismeposhi.

## 16

### *Maspanëmpin cushtoaid*

<sup>1</sup> Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

<sup>2</sup> Adoaquien abentsëcshun ambi bedboed maspanëmpin cushtoaid nidaidënsnun chiuïmposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaïdquio icsamboshë icquid tantiaquin abibimboecnuc nacnenaïd tantiaquido yec aton icho cuëmëdquid dada uaqun siadmiaïdo icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caïd nëchiuïmposh. Adoaquien aid chian mad caïd intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuïmbeneposh. Nëchiuïmbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caïmbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuïdi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ëmbi chiaïd chuïbanquidobëdta ëbi tantiaquido nua intac icnuc chieshëmënsquidon cuesun secabudnepondash,” qeshun cuesun secanquido cuidquin mimbi aton acte intacuashunacsho isun:

“Mibi bëdamboshë iquec,” caïmbi, Papa

—queposh mayan bëda acte dayun uaquid.

<sup>7</sup> Aden acte dayun uaquidën chuïsho tantiaquin Nuquin Papa tantiaquin nësh pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naïdtedi mimbi tantiec, Papa. Icsambo icquidon naïd abimbo chuïquin mimbi aïdo cuidec. Adsho isun: “Mibi bëdamboshë iquec,” Papa, caïmbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuïmposh. Adoaquien Nuquin Papan namiacpadeç matses baded-badedquieç ushën pichiebudneposh. <sup>9</sup> Adec pichiebudneshumbien Nuquin Papa chushcabededposh. —Icsauidequi

icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquo Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuim-benequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquo icposh. Adsho isash matses abitedi natiambo dacuëdcuededposh. <sup>11</sup> Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquo yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

<sup>13</sup> Adec aid matses cho-choabi icnuc ushë choacmishun chochometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidedi chosho isombi. <sup>14</sup> Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

<sup>15</sup> Adnubien Esusquo cuëdposh. —Tantia. Chuinu. Mimbi: “Nëbimbobi aid choec,” cacmaidquiени choendac. Ushenquo yacimboen ëbi ënenquo icquin tantiec: “Nëbien Esus chochitec. Choson nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacimboec icta ëbi cainec —queposh Esus.

<sup>16</sup> Adnubimbi coqeshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanëmpi bedboed utsintsen ambembi chiinquin Nuquin Papan cuidte ënquimbi ismeposh. Ambembi chiunubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. <sup>18</sup> Adnubien abu bedbedquetanepamboec abu tesquianenuec natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. <sup>19</sup> Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia

caid yacnocquido uesquin cuidquioposh. Adec nidaid uèdèquenubi nidaid utsi-utsieo yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uèdèquenubi chian dapa mad caid yacno acte nēnantan nidaid icquid abited-imbo nibèdambudneposh. Adecbidi macuësh abitedi nibèdambudneposh. <sup>21</sup> Abucuëshquoio ue dapa choacimboc ue tsasi nuacquid dapa quidos 50 icnuc yuè tanaid dadpenquoio paèdbudnequimbi matses tish-tishbudneposh. Aden ue tsasi dapan mëyansho isun padenquoio ictiadquidēmbi matsesèn Nuquin Papa chushcabededposh. —Nuqui ic-said ènshun Esus tantianuna —quetiadquidēmbi chushcabededposh. —Adquido iquendac —quequin ushquin isacimbocnuc aden ismeposhi.

## 17

### *Chido chishpidabimboecquid ismiaid*

<sup>1</sup> Adshumbic maspanēmpin icquid chiuimboedèn abentsēcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquoio icsamete bunquido nec,” quequin chido chishpidabimboecquid acte dapa bèntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. <sup>2</sup> Aido icsamboshè iquec. Matses utsi-utsien abi chuiquid dapabobèdta uisma uanten danoshcacimboc Nuquin Papambo tantiamenquoio icquin ambi chiaid niac-niacmequioposh. Aido cuidsho isec cho —queposh.

<sup>3</sup> Adshumbic ushquin isacimbocnuc ismeposhi. Nuquin Papan Mayanèn tantiamiac masiuidquoio yacno shubu nibèdacnombo chido aben icquid dapa catsadsho ispombi. Aben icquid piumboshè icposh. Aidèn dadan: —Nuquin Papa caid nibèdquoio iquec —quequin uesquin dada uapaidquoio icposh. Aton mapi sietetedi icnuc aton pais 10tedi icposh. —Mimbi isboed acte uguèducuësh choboed chuiquid icsamboshè icquidquoio nec —quequin aden aben icquid ismeposhi. <sup>4</sup> Aid catsadquid chido dashcute piumbo icquidbèd umumbo icquid dasiuidposh. Shocosh piu nacnenaaid chedo cuēnotempi nac-nacquoio icquid chedo payuec aibidi mësiuidposh. Dèshote bèdambo icquid sanamposh. Aden sanansho dèshote anisquin isaquien icsambo icquiduidquoio icposh. —Chido chishpidabimboec Babidonia caid yacnocquido icsamboshè iquec. Uisma uanten danoshcacimboc: “Nuquin Papa caid nibèdquiec,” quequin tantiamequin matses utsibo dadpenquoio icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuëmèdquid bètanteteno bèdada uadac. —Babidonia yacnocquido bèdambo icquido damianquidi icsamboen tabadmequido nec —quequin dada uaid icposh. <sup>6</sup> Aid chido paëmbo icquid acacimboc Esus tantiaquidon intac acash tantiadenquoio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuèdampamboecsho isash: —¿Mitsipadquiopequini ique? —quebudquiobi.

<sup>7</sup> Adbudquioshobini aid mayan bèdan: —“Tantiadenquoio iquec,” ¿quecta ique? Tantia. Chido chishpidabèdta abi catsadaid aben icquid chuinu. <sup>8</sup> Mimbi isboed aben icquid icsamboshè icquid ictenedi nèbi nibèdec. Yuecshun Satanasèn abi tabadacnoshon padpiden chomen-dac. Adoacsho yuecshun Nuquin Papan chian anèdènquiacno nèsecaindac.

Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaidi uincue-nashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquio adoendac —queposh mayan bëda.

<sup>9</sup> Adshumbic padpiden chuiposhi. —Tantia. Ëmbi chuiboed bëdamboen tantiamenuen chuinu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibëdnubi utsi abi iquec. Nëbi aidën aton matses namec. Ütsitsen choendac. Choshon aton matses nametantsequi badedquio nibëdanendac. <sup>11</sup> Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiachimboen aton matses icsamboenshë namen-dac. Adoacsho isun Nuquin Papan icsaido cuidquiacno nësecaindac —queposh mayan bëda.

<sup>12</sup> Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. <sup>13</sup> Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” qeshun aden icsamboshë icquid abi chuiquid dapa icmendac. <sup>14</sup> Aden Esus chieshënquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënquin cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetan-quin adoendac —queposh mayan bëda.

<sup>15</sup> Adashic padpidec: —“Nidaid utsi-utsiec yacno tabadquido dadpenuen Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. <sup>16</sup> Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden chieshënquin cuesun secatanquin shububëdtabi nëdëncaindac nibëdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. <sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

## 18

### *Nuquin Papan Babidonia caid yacnocquido cuidaid*

<sup>1</sup> Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi.

Nuquin Papan icmiacpadquid mayan bédabo chuiquid dapa yec bēchamauanquiecposh. <sup>2</sup>Choshombic nua cuēdquin chuiposh. —Babidonia caid yacnoquido Nuquin Papan uesquin cuidquiendac. Aden cuidac matses nibēdquiecnuc abi tabadtenecnombo podobitsiuidpambo tabadendac. Ambobidi edesteuidquo tabadendac. <sup>3</sup>Babidonia caid yacnoquidon matses utsibo abitedimbo abi chuiquid dapabobēdta Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac —quequin mayan bēdabon chuiposhi. <sup>4</sup>Adnubien Nuquin Papa abucuešh onqueposh. —Tantia, Esus tantiaquido. Mibitsen chuinu. Babidonia caid yacnoquidon nacpadomboen nainda. “Aidobēdi icsasho ēbitsen cuidquionoshe,” queshun aidon namiacpadomboen nainda. Auēshquo niqueta —quesho tantiombi. <sup>5</sup>Nuquin Papa yacnoshombidi utsin chuiposh. —Ēnēdenquo yec icsauidequi icsho isun ambi tantiacpadomboen Nuquin Papan cuidquiendac. <sup>6</sup>Babidonia caid yacnoquidon matses utsibo dadpenquo icsamequioposh. Aden icsamequido icsho Nuquin Papan nēbi nēshquioshon uesquin cuidquiopashun —queposh mayan bēda. <sup>7</sup>Adashic abi onquec: —Babidonia caid yacnoquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bēdambo iquebi,” quepec Nuquin Papan cuidte tantienquo yequi. Adsho tantiashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bēdamboec tabadec. Chido niante bēnē unēsaid mēyadac bimboec mēyadtiapimbo nuqui iquendac,” quechitequien iquec Babidonia caid yacnoquido Nuquin Papa tantiatiapimbo yec. <sup>8</sup>Adsho ambi: “Nēbi ēbi cuidec,” cacmaidēnquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unēs uabudniacsho isash natiambo sedenquecuededendac. Aton pete nibēdquiecnuc natia bunendac. Aton shububēdi dadpenquo nēdēnquendac —queposh mayan bēda.

<sup>9</sup>Adashic abi onquec: —Adec Babidonia yacnuēsh nēdēnquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup>“Tantia. Nuqui tantiaido sidquebudneque,” quec uinte paēdtampamboec dacuēdtanash uanoshon isec tabadendac. Adec tabadec: “Aido unēsquimboshē iquec. Aton matses aton yuabobēdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unēsquimboshē iquec. Badedquo uesquin cuidquiopac,” quec sedenquecuededendac Babidonia caid yacnoquido tantiec —queposh mayan bēda.

<sup>11</sup>Adashic abi onquec: —Babidonia caid yacnoquido aden cuidacsho isash utsibotsen: “Ēmbi meniaid bedshun piucquid dadpen menedenebi. Nēbi adquid nibēdquiec. ¿Tsuntsimbini ēmbi meniaid cuidquin piucquid menepatsiashba?” quec sedenquecuededendac. <sup>12</sup>Aidobidi: “Nadquid Babidonia caid yacnoquido menequin piucquid dadpen bedtenembi. Nēdic shocosh piu. Nēdic shocoshquo. Nēdic casēdubimboecquid cuēnote bēdambo icquid. Nēdic dashcute bēdambo icquid. Nēdic dashcute pi-

umbo icquid. Nêidic dashcute umumbo icquid. Nêidic sêntebimboecquid nacnenaïd. Nêidic aben icquid edepanten shêta nacnenaïd. Nêidic cuête utsi bêdaïdquio nacnenaïd. Nêidic shocosh utsi nacnenaïd. Nêidic cuênote nac-nacquio icquid nacnenaïd. Piuccquid dadpen menequin adquidtedi Babidonia caïd yacnocquidon bedpadenec. <sup>13</sup> Utsitsen dadpen bedpadenec. Nêidic batambo icquid sabimboecquid. Nêidic bêdambo nuadte. Nêidic bêdambo nuadec danoshquete. Nêidic acte paêmbo icquid. Nêidic bêchi. Nêidic pan nacnentequid. Nêidic nêish yua baca caïd. Nêidic nêish yua utsi obeca caïd. Nêidic nêish yua cabayo caïd. Nêidic matses antsadsho cabayon nimbanquin buante. Nêidic ambi chonoa uatequido matses ambi ampequin bedaido dadpen. Babidonia caïd yacnocquidon aidtedi dadpenquio bedtenesho aton piuccquid dadpen bedpadenembi,” quependac nidaïd utsi-utsiec yacno tabadquido —queposh mayan bêda.

<sup>14</sup> Adashic abi onquec: —Abi piuccquid menedenedën dayun uaid nibêdanesho isash: “Aïd matses bunaidquio ambi dayun uaid pete nibêdquiec. Ambi dayun uaid dashcute bêdambo icquidbêd aton na utsi dadpen abitedi nibêdquiec,” <sup>15</sup> quiash natiambo dacuêdec uanoshon isec tabadec sedenquecuededendac abi piuccquid menedenedo tantiec. <sup>16</sup> “Aïd matses tantiac unêsquimboshê iquec. Matses dadpen yuaquin matses dadpen namepadenec. Aton matses dashcute bêdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Ut-simbic casêdubimboecquid shocosh piu nacnenaïd payudenec. Utsibic casêdubimboecquid utsi payuec mêsuiidtenec. Adec: ‘Con na dadpenquio icnuc bêdamboec tabadebi,’ quepadenec Babidonia caïd yacnocquido. <sup>17</sup> Adsho isun Nuquin Papan abi ushêmbe cuidquiac ambi dayun uaidbêd aid matses badedquio nibêdanac,” quec sedenquecuededendac abi piuccquid menedenedo tantiec. Adecbidi nidaïd utsin icquidotsen sedenquecuededendac. Nêidic cano dapa dancha icbo. Nêidic dancha icbobêd nidquido aton yuabo. Nêidic icbo piuccquid meniash dancha antabêdtoquido. Nêidic nuêcquid bedshun piuccquid bednuen menequido. Aidtedi uanoshon isec sedenquecuededendac. <sup>18</sup> Nêdênquec pushudtonesho uanoshon isash: “Adquido utsi nibêdec,” <sup>19</sup> quiash nati-aquiec sedenquecuededendac. Adec shubiec: “Ëbipadquid dancha icbon bêaidtedi bedshun piuccquid dadpen menedenedo tantiac unêsquimboshê iquec. Is. Cuidquiac badedquio nibêdanaque,” quec sedenquecuededendac —queposh mayan bêda.

<sup>20</sup> Adashic mayan bêdabidi: —Ëbien cuishonquendac. “Nuquin Papa yacno tabadquidotsen êbêdi cuishonque,” quequin chiendambi. Esus tantiaquido chuiquinc Esusbêd icquidombo chuiquinc Nuquin Papan chiaïd chuibanquido chuiquinc caquin: “Cuishonquec tabadnuna. Mibi chieshênquin natiamicpadomboen mibi chieshênquido Nuquin Papan uesquin cuidquioshe,” quequin chiendambi —queposh mayan bêda.

<sup>21</sup> Adnubien mayan bêda utsin uidênquio icquidênquio nidaïd moco nuacquid dapa yuêmboshê icquid cadotanquin acquimboen acte nênebidanquimbi chuiposh. —Ëmbi acquimboen nênebocpadomboen Nuquin Papan Babidonia caïd yacnocquido uesquin cuidquiendac nibêdquiecnc. <sup>22</sup> Adoac aïdo ictenecnombo nadimbo iquendac. Ten-tencate ten-tencainquio iquendac. Utsibobic cuêdênquio iquendac. Utsibombic shoncate shoncainquio iquendac. Cuête chêshun



nacnenenquo iquendac. Piacbo macuesenquo iquendac. Nadimboshë iquendac. <sup>23</sup> Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaequin icsamepadenec,” quendac. <sup>24</sup> Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

## 19

### *Chieshënquido cuidacsho isash cuishonquiaid*

<sup>1</sup> Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

<sup>2</sup> Muesambo icquin ambi chiacpadomboen naquidquo nec.

Abi tantiesabo ënëdenquo yec icsauidequi icsho cuidquidquo nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

—quec cuëdëncuededposh.

<sup>3</sup> Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdënaquin Babidonia caid yacnocquido uesquin cuidquioshe

—quec cuëdëncuededposh Esus tantiaquido dadpenquioshë.

<sup>4</sup> Adsho tantiash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icho nec —quequin ismenuec danëshën tinquebudcuededposh. Adec tinquebudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi. <sup>5</sup> Adashic auëshquiobidi abentsëc cuëdposh.

—Nuquin Papa matses uaquidquo yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

—queposh.

### *Esusën abi tantiaquido beduante chiaid*

<sup>6</sup> Adsho tantiash abu tesquianiacbimboec acte nua chododoquiacbimboec Nuquin Papa yacnocquido dadpenquo cuëdëncuededposh.

—Abi chieshënquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bédamboshë iquec.

<sup>7</sup>Nuquin Papa tantiec cuishonquenuna. Nuquin Papa bédamboshë iquec. Dadan aton chido buntacquo beduanacimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacenëmëdquiacimboec:

“Nëbien con Icho chochitec,”

quiash Esus tantiaquido bédamboec tabadec.

<sup>8</sup>Abi tantiasho Nuquin Papan bédamboen isaïdo yec abi icsaïd ënash:

“Nëen con Icho chochitec,” quiash bédamboec tabadec.

Aden abi tantiasho Esusën dashcute chuca ushumbo icquid dasiuinacimboen abitedi icsaisa icmendac —quec comapenec cuëdëncuededposh.

<sup>9</sup>Adnubi mayan bédan chuioposhi. —Ëmbi chuibocpadomboen dada uata. “Isadaïdbo aton chido bedquin aton matses cho-chomiash pemec bédamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaïdquio chiec nebi —queposh mayan bëda.

<sup>10</sup>Adsho tantiashini Nuquin Icho danec ismenuec danëshën tinquebuduidpoc. Adshobini: —Ëbi aden ismenda. Nuquin Papauïdtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaïd dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

*Cabayo ushu catsadquid bédamboshë icquid*

<sup>11</sup>Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaïdo cuidquidquio icquin icsaïdo cuesun secanuec niosh. <sup>12</sup>—Matsesën ompodëmëdtiapimbo icquidquio nec —camenuec cuëte isquidquio icquidimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bédada uadaïd tantiadenquio icposh. Utsibon tantiatiapimbo icnuc ambentsëqui tantiate niosh. —Nuquin Papabëdtan Esusën naidtedimbo matsesën tantiatiapimbo iquec —camenuen adec bédada uadaïd ismeposhi. <sup>13</sup>Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaïd niosh. Aton dashcute bëntse icquid cuidaidën intaquën punacimboec piumboshë isadposh. —Abi tantiesabo cuidquidquio nec —camenuen aden ismeposhi. <sup>14</sup>Esus bëyuc nidnuc abi tsibanec abi tantiaquidobëd mayan bédabo cabayo ushucquidquidquio catsadcuëdedec cho-choposh. Icsaisa icmiaïdo yec dashcute ushumbo icquid bëchish nibëdquidquio dasiuidcuëdedposh. <sup>15</sup>Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaïdo abitedi cuidquidquio Esus nec —camenuen aden ismeposhi. Adquid icquin nidaïd utsi-utsiec yacno

tabadquido icsauidequi icscho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ènè icnuc tish-tishacimboen nua intac icnuc cuesun secaindac. <sup>16</sup> Aton dashcute bèntse icquidèn abi cuëmédquid utsi dada uaccosh. —Abipadquid utsi nibèdnuc abitedimbo chuiquid dapambo yec abitedishun Ícbombo nec —quequin dada uaccosh. Aton bëusudquid yacnombo adembidi dada uaccosh.

<sup>17</sup> Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuédquin chuiposh. —Nuquin Papan cuidquin cuesun secaidon nami chec cho-cho. <sup>18</sup> Èmbi chiacpadec cho-choshon matsesèn nami mimbi nua tèpuisquin chendac nëidtedi. Nèidic matses utsi-utsien chuiquid dapabo. Nèidic sondado chuiquid dapabo. Nèidic dada cuesabo. Nèidic cabayo chedo abi catsadquidobèdtabi. Nèidic matses utsibo abitedimbo. Nèidic matses yuabo. Nèidic matses yuapenquio. Nèidic bacuëbo. Nèidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

<sup>19</sup> Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobèdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobèdta cuesun secanu —caqui <sup>20</sup> cuesun secadenquio icposh. Adshobien Esusèn acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasèn oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidèn chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Èbi chuiquidèn yuabo nec —quequin matses dadpen bësiadmequid niosh. Adec icsamianquidquio icscho bedposh. Abi chuiquid dapabèdta bedshun unës uabi chian dapa ènèdenquio yec anèdënquequid icsamboshë nuadquidquio nèsecaposh. <sup>21</sup> Adshumbic Esusèn ana shëcuënuësh chështe cuënumbo icquid cueshquequidèn: —Èbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tèpuisquin matsesèn nami chebededposh. —Aden Esusèn abi chieshënquido nibèdamendac —camenuen aden ismeposhi.

## 20

### *Satanas uidèn uaid*

<sup>1</sup> Adshumbic padpiden ismeoposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasèn yuabo shëcuën tabadacno bètashaid chictèbèdta shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaidèn ambi sanamboedèn uidèn uaposh. <sup>3</sup> Uidèn uatanquimbic aton yuabo uidèn uacno shëcuë aneposh. Adotanquimbic shëcuë bètashquioposh puduentiapimbo icnuc. Seta dadpenquio 1000tedi

matameshun bêtashte chicshun Satanas cuemenuen adoposh. — Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquin uidën uaquioposh. Aden ismeposhi.

<sup>4</sup> Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemi-aido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacnenaaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapimbo icquido niosh. Utsibic mësiadiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemi-aido tabadposh. <sup>5</sup> Unësaidotedi uincuemi-aido icpash. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemi-aido bëdambo yec cuishonquepash: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

*Satanasquio chian anëdënquequid nëniaid*

<sup>7</sup> Adshumbic aidtedquio seta 1000tedi matameshun uidën uaid chicquin Satanas cuemendac. <sup>8</sup> Adoquien matses icsamenuc muaquin chiech nidaid utsi-utsiec yacno nidendac. Aden aidën muaquin nami-iquien matses dadpenquo Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

<sup>9</sup> Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic aido icsa uamequidtsen Satanasquio bedshun acte uquëducuësh chondayid chuiquid icsamboshë icquidbëdta nidaid shëcuënuësh chondayid ënden nësecaondacnombo chian anëdënquequid Satanastsen nënendac. Adoac aido ënëdenquo yec natiamboshë iquendac. Aden ismeposhi.

*Icsambo icquido cuidte chiaid*

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadpash. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadiapimbo yec. <sup>12</sup> Nuquin Papa yacno unësaido uincuemi-aido abitedimbo tabadpash. Adnubien bëshunenquo icquin dada uaten dada uabanachimboen Nuquin Papan abitedi tantiaquid icquin matsesën naidtedi abimbo

chuibamposh cuidnumbi. Abi tantiaquido abèdi tabadmequimbi abi tantiesabo comapenen cuidnun aden chuibamposh. <sup>13</sup> Unèsaido abitedi icposh. Utsi-utsiec unèsacsho chian dapa mad caid nēniaido uincuemiaido niosh. Utsi-utsiec nidaidēn chococaid uincuemiaido niosh. Adsho aidon naidtedi Nuquin Papan chuibamposh. <sup>14-15</sup> Adshumbic Esus tantiesabo icsho documento nibēdquidbimboecsho abi yacno tabadmenquio icquin chian dapa anēdēnquequid uesquin nēsecabamposh. Aden Esus tantiesabo nēsecan unēstequido utsibo nibēdposh. Esus tantiesabo aton dada unēsan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unēstiapimbo icquidoudiquio icposh. —Adquid iquendac —quequin aden ismeposhi.

## 21

### *Nuquin Papabēd tabadaidquio*

<sup>1</sup> —Esus tantiesabo chian anēdēnquequid nēsecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubēdi nidaid shēni nibēdnuc utsi chucambo icquiduidquio icposh. Ēnden iccondaid chian dapa mad caidtsen nibēdposh. <sup>2</sup> Adnubien Esusbēdi Nuquin Papa tabadaidquio abichobi Edusaden chuca caid abucuēsh budposh. Chido nēbi bedboedēn aton bēnē cuishoncamiachimboec cuishonciamianquid yec bēdamboshē icposh. <sup>3</sup> Adnubien Nuquin Papa tsadacnuēshquio comapenec cuēdposh naden chiec. —“Con matses nec,” quish nēbi Nuquin Papa matsesbēdi tabadendac cuēshēdenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caindac. <sup>4</sup> Ambo Nuquin Papan abitedi chuca uacnombo aidbēdi tabadec matses shubitiapimbo iquendac bēun ucacimboec. Nidaid shēnin tabadec abitedi unēstequiduidquio icboedi Nuquin Papa yacnuēshien matses unēstiapimbo iquendac. Adecbidi sedenquetiapimbo iquendac. Adecbidi paēmbō ictiapimbo iquendac —queposh Nuquin Papa yacnuēsh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bēdamboshē icnuc —queposh Nuquin Papa Esusbēdi. Adshumbic ēbi chuiposh. —Ēmbi aden chuiboed dada uata. Ēmbi muesambo icquin abimbo chiaid nec —queposh Nuquin Papa Esusbēdi.

<sup>6</sup> Adashic Nuquin Papa padpidec onquec: —Ēmbi chuiboctedimbo nainquin naindambi utsibon: “Padi,” catiapimbo icnuc. Ēndenquimboshē nidaid uabi ictenedi nebi. Nēbi adquid yec nibēdantiapimbo icquid nebi. Adquid yec abitedishun Icbombo icquin ēmbi tauaidtedi nainendambi. Adquid icquin acte bunacimboec ēbēd tabadte bunquidon con Mado Esus tantiasho ēbēdi tabadmendambi. <sup>7</sup> Satanasēn: “Chieshtomenu,” cauidaido Esusbēdta ēbi chieshtoenquio icquin tantiaquido ēbēdi tabadmendambi bēdamboshē yacnombo. Ēbi papa casho: “Ai, con mado mibi nec. Con champi mibi nec,” caindambi. <sup>8</sup> Adshumbic utsibo chian dapa anēdēnquequid icsamboshē nuadquid nēsecaindambi. Nēidtedi icsamboshē icquido adoendambi. Nēidic ēbi bēdiactsēc tantiauidtsēcboedobi chieshēmēnquidon: “Cuesnu,” cac chieshtoash tantiesa yanoaido. Nēidic Esus tantiesabo abitedi. Nēidic icsamianquido. Nēidic chieshēmēnec cuesunianquido. Nēidic dada aton dada utsibēdi chichudnanquido.

Nëidic aton chidopenquoio chudquido. Nëidic aton bënëpenquoio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

*Abi tantiaquido Esusbëd icte chiaid*

<sup>9</sup> Adshumbic mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuishoncamiachimboen abided cuidadec unësaid Esus cuishoncamequido tabadaid mibi ismenu. Cho —cposhi Esus tantiaquido ismenuen. <sup>10</sup> Adshumbic Nuquin Papan Mayanën tantiamiac ushquin isachimboen isombi. Mayan bëdan ëbi buanquin ispombi. Aden buanshun macuësh dapa mananënquoio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. <sup>11</sup> Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquiecposh. Casëdu bëdambo icquidbimboec isquid-isquidquio isadposh. <sup>12</sup> Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. <sup>13</sup> Aid daquënë uaid puduedte shëcuë ushë choauc 3tedi icposh. Ushë nibëdauc nocte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. <sup>14</sup> Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentseabentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

<sup>15</sup> Adshumbic ëbi chuiobedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. <sup>16</sup> Adoshombic cuëma abitedi tambanac cuëma tiombitiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquibidi icposh. <sup>17</sup> Nidaid cuënote nuamboshë icquid dapa tsindoquin daquënë uaid

bitsipambo icquidtsen tanac nuamboshë bitsi icposh. Matsesën nacnenaïd tambanten tanac metedos 65ted cactiombi icposh nuamboshë bitsipambo.

<sup>18</sup> Daquënë uaid abichobi isquid-isquidquo isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaïdquïo yec nac-nacquïo icposh. <sup>19</sup> Aid daquënë uaqin tauaqin sandoaid nidaïd cuënote dapa casëdubimboecquid bëdambo icquid matses comapenec bunaidquïo utsi-utsien dabitaccabanaïd nïosh. Abentsëc aspe caïd umu-umumboctsëcquid dabitaccabampaccosh. Utsibic sapido caïd umumbo icquid dabitaccabampaccosh. Utsibic acata caïd ushumbo icquid. Utsibic esmedada caïd umumbo icquid utsi. <sup>20</sup> Utsibic onise caïd piumbo icquid. Utsibic conadina caïd piu-piupactsëcquid. Utsibic quïdisodito caïd bëshpiu-bëshpiupactsëcquid. Utsibic bedido caïd umu-umupactsëcquid utsi. Utsibic topasio caïd piu-piupactsëcquid utsi. Utsibic quïdisopadasa caïd nushan-nushanacbitsecquid. Utsibic asinto caïd umumbo icquid utsi. Utsibic amatista caïd umumbo icquïdbidi. Aïdtedi dabitaccabanaccosh. —Nuqin Papa yacnombo bëdamboshë iquendac —camenuen aden ismeposhi. <sup>21</sup> Daquënë uaid puduedte shëcuë 12tedi icposh. Aid bëtashtetedi acte chiumbimboecquïdën casëdu ushu uaid nuacquïd dapambo abichobi-abichobien nacnenaïd nïosh. Ambo shubu dadpen icquïd nënantanquïo podqued icposh. Aid podqued shocosh bëshpiu-bëshpiuctsëcquid acte-actetsëcquïo icnuc mabiunaïd icposh. — Esusbëd Nuqin Papa tabadacnombo bëdambo icquïduïdquïo iquendac —camenuen aden ismeposhi.

<sup>22</sup> Ambobi abi bëisec tabadacnombo Nuqin Papa tabadte shubu uashunaïd nibëdposh. Ambo Nuqin Icho Esus abided cuidadec unësaïdbëd Nuqin Papa icsho bëisquïoquin tantiec anocquïdo tabadendac. <sup>23</sup> Ambobidi inchështanec badiadenquïo iquendac. Badiadën ushë isadenquïo iquendac. Inchëshën ushëtsen isadenquïo iquendac. Nuqï icsaïd bedshunuec abided cuidadec unësaïd Esusbëd Nuqin Papa bëchamauanquïecquïd icquïn ambo ushëmbouïdi icmendac. Inchëshaid tantïadenquïo iquendac. —Nuqin Papa icsaisambo icnuc abi yacno icsaïdo nibëdqïo iquendac —camenuen aden ismeposhi. <sup>24</sup> Icsaisambo icquïn Nuqin Papan tantïamiac matses utsi-utsiec abi chuiquïd dapabobëdi Esus tantïaquïdo yanendac. Adash Nuqin Papa yacnombo quenenec tabadcuenash: —Esusbëd Nuqin Papa abitedishun Icbombo nec. Abipadquïd utsi nibëdec —quendac. <sup>25</sup> Nuqin Papa matsesbëdi tabadacnombo inchëshenquïo icnuc: —Icsambo icquïdo puduednushë. Bëtashnu —quetiapimbo icsho isun daquënë uaid shëcuë bëtashenquïo iquendac. Shëcniacchobi iquendac. <sup>26</sup> Padnuen nidaïd utsi-utsiec yacno tabadquïdo chuiquïd dapabo Esus tantïaquïdo yanash Nuqin Papa yacnombo puduedash: —Daëdpactsëc tantïaqin matses daëdpactsëc namebampadenembi. Nuqin Papa aton Mado Esusbëdi comapenen tantïaquïdquïo yec abitedishun Icbombo nec. Abipadquïd utsi nibëdec —quendac abitedi. <sup>27</sup> Ambo icsambo icquïd puduedtiapimbo iquendac. Adecbidi omposhon abi bunaiduïdi naquïdobëd muaquïdo puduedtiapimbo iquendac. Nuqin Papan bëshunenquïo icquïn dada uacbimboen: —Icsambo ichoedi abided cuidadec unësaïd con Mado Esus tantïaquïdo aïdo nec. Con bacuëbo nec —capendac. Aden ambi con bacuëbo caïdo abi yacno puduedendac. —Nuqin Papa yacno adquïo

bédamboshëuidquo iquendac —quequin aden ismeposhi mayan bédan.

## 22

### *Nuquin Papa yacno acte ismiaid*

<sup>1</sup> Adshumbic aid mayan bédan padpiden ismeoaposhi. Adoac Nuquin Papa abided cuidadec unësaid aton Madobédquo tsadte dapan tabadacnuësh matses unëstiapimbo icmetequad acte bédambo icquid nushan nibédquidquo chëuëdsho ispombi. <sup>2</sup> Nuquin Papa yacnuëshquo choec chëuëdec ambo tabadquido Esus tantiaquido tabadaid shubu nënantanquo chëuëdposh. Aid cuëmambi matses unëstiapimbo icmetequad cuëtetsen icposh. Baded-badedquiec bacuëquidquo niosh. Inchëshën ushë choan-choanquiec badedquo bacuëquid niosh. Aid cuëte podonidaid utsi-utsiec yacno tabadquido bédambo icmetequad niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëda ismeposhi. <sup>3</sup> Aden abitedi bédambo icmiac cuidtequido nibédquo iquendac. Icsambo icquido nibédnuc Nuquin Papa aton Mado Esusbéd tabadacnoshon aid daëdi tantiaquiec Esus tantiaquido tabadendac. <sup>4</sup> Adec: —Con bacuëbo nec —quequin Nuquin Papan abi cuëmédquid dada uaquin bësiaidon Nuquin Papambo bëisquiec tabadendac. —Nidaidën tabadec bédamboec tabadquido Nuquin Papabéd tabadec abipadquo bédamboshë yanendac —camenuen aden ismeposhi. <sup>5</sup> Ambo bédambouidquo yec inchëshenquo iquendac. Nuquin Papa bëchamauanquiecquidëmbi ushëmbouidquo iquendac inchëshaid tantiatenquo yec. —Aden abi tantiaquido bédamboen isquin ënenquo icquin bédamboshë icmendac. Chuiquid dapabo icmiac Esusbëdtambi ënenquo icquin namendac —quequin ismeposhi.

<sup>6</sup> Adshumbic mayan bédan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

### *Esus chote chiaid*

<sup>7</sup> Adnubini Esusénquo naden chuiposh. —Chieshtoenquo icquin ëbi tantiatia. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bédambo icmendambi —caposhi Esusén.

<sup>8</sup> Uan nebi. Abimbo chuiquin nëid dada uaombi. Aden mayan bédan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuidpoc ëbi ismequad mayan bëda ismenuc. <sup>9</sup> Adshobini: —Padi. Aden ëbi ismenda. Mibipadquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquo dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bédan.



<sup>10</sup> Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquo icquin Esus tantiec ma tabadnu,” qeshun dada uata. <sup>11</sup> Nëbimbobi Esus chonoc Esus tantiesabo badedquo bëdamboec tabadcuentiapimbo iquendac. Abi icsaid badedquo ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

<sup>12</sup> Adnubini Esusën chuioposh. —Chieshtoenquo icquin ëbi tantiatia. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. <sup>13</sup> Nuquin Papapadquidquo nebi. Ëmbi tantiacmaid nibëdnuc abitedi comapenen tantiaquidquo nebi. Nidaid uabi yec ictenedi nëbi adquidquo yec nibëdantiapimbo icquid nebi. Adquid yec abitedishun Icbombo nebi.

<sup>14</sup> Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen. <sup>15</sup> Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquo chudquido. Nëidic aton bënëpenquo chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquo naic muauanquido. Aidtedi Nuquin Papa yacno puduedtiapimbo iquendac.

<sup>16</sup> Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuiampid nebi. Isadaidbon cainaidquo nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusën.

<sup>17</sup> Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquo tantiabenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquo tantianuna —cac bëdambo ictsiash. Adsho tantiash Esus tantiesabo acte bunacbimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

<sup>18</sup> Tantia. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. <sup>19</sup> Adembidi ëmbi dada uaboed utsi uainquo icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquo ictsiash. Adembidi bëdamboshë yacno abëdi mibi tabadmenquo ictsiash.

<sup>20</sup> —Ma aidtedi tantianu —quequin Esusën chiacpadomboen mayan bëdan aidtedi ismeposhi. Ëmbi chuibocpadomboen Esusën:

—Nëbimbobini choendac —caposhi. Adsho tantiashun: —Ai, nëbimbobi chota —capombi.

<sup>21</sup> Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bëdamboen isquin bëdambo icmepashun —caimbi. Padi. Aidedi chuiquin dada uaombi.